

॥ श्री ॥

श्री गोपीजनवल्लभो विजयते तराम
श्रीगुसांईजीके दिजसेवक
दोसौवावन वैष्णवकी बार्ता
पुष्टि दृढाव ग्रंथ और अनुक्रमणिकासहित

यह पुस्तक

पुष्टिमार्गीय श्रीवल्लभ-संप्रदायी वैष्णवके
मित्य नैमित्तिक पठनार्थ

दोसाव-रामदासजी गुरुश्री गोकुलदासजीने
(रणहरपुस्तकालय)

डाकोर

छपवायके मसिद्धकिया

संवत् १९६० के फाल्गुन सुदि गोपिंद द्वाहरी

न्योकावेर ३ पयवे

यह पुस्तक सन् १८६७ के दस वे आक्ट मुअन रजिस्टर करणके
कापने छपवायेका हक, मसिद्धकिया स्थापितके है

(रत्नहर पुस्तकालय) छात्रोंके लियेके हरे पुस्तकोंका तालिका ।

संप्रदायी वैष्णवोपयोगी पुस्तकें

नाम.	दि.	पृ.	का.	नाम.	दि.	पृ.	का.
भजन सन्तानकी संकीर्णकीलाभुषि	१-४			वीर्य उषण स्वेद उपपद्	... १-	०	
कूटरेदीक गणपति विष्णवोपयोगी	०-८			" " रक्त उपपद्	... ०-	१२	
रत्नपत्रिका. रामपट्ट. सिद्धोत्पट्ट.				सन्ध्यानामना फुल उषा मु०वी०	०-२४		
संभुक्तानकी. चोवीसभावनो वे संको				उत्तरेगद्गालनभुक्तानकीभाषाउ०	०-२		
पुस्तकोंका एक मुद्रण	... १-०			शिवद्विज भुक्त मुद्रणकी टीका	०-१		
रत्नपत्रिका. वडाअक्षरों	... ०-४			भुक्तानुपदीयनिजाउष्या. मु०वी०	०-०४		
रामपट्ट. वडाअक्षरों	... ०-४			शम्भुपावली लक्ष्मी कीपत्रिका	०-१		
सिद्धोत्पट्ट. वडाअक्षरों	... ०-४			शिवकीकानुपगतसिद्धिनामी भाषाउ०	०-०		
संभुक्तानकी. (सर्वोपयोगी)	... ०-४			विशामसागर बहुदाअक्षरकी छद्	१-८		
बोवाउपट्ट. वडाअक्षरों	... ०-४			श्रीनरनाथदीक्षामुगाधार्मकीटीका	२-०		
चोवीसभावनो. संक्रान्तिसुद्धसिद्धि	०-४			अनस्य दीक्षा (वैष्णवोपयोगी)	१-४		
रत्नरादि श्रीरामसुद्धसिद्धि	... ०-४			श्रीशिवरामदासदासभक्तानाममंग			
रत्नरादि श्रीरामनवल्लभ	... ०-४			शा०टी.गोमदी वैष्णवोपयोगी	१-४		
रत्नरादि मन्तरादि श्रीरामसुद्धसिद्धि	२ दोमोंका एक मुद्रण.	... ०-५		रामानंद स्वामीकी रामरक्षा और			
श्रीरामसुद्धसिद्धिनामकी.	... ०-११			रामजीवरती रामरक्षा	... ०-१		
श्रीशिवसुद्धसिद्धि नामकी.	... ०-१			रामनाथकी टीका रामरक्षण.	... ०-१		
संभुक्तो एक मुद्रो सुनुत्पट्ट.	०-११			सुद्धसिद्धिनामकी	... ०-१		
सुद्धसिद्धिनामकी एक मुद्रण	०-१			वीरक्षकी तसवीर	... ०-१		
सुद्धसिद्धिनामकी भाषा दीक्षा श्रीपार्लो	०-६			श्री रामखेरीकीराम सिद्धिनामकी	०-११		
पार्लोनामकी बडी छप.	... ०-१			इनुमान भाषीका और संकट योग	०-१		
वसंतभवन सुद्धसिद्धिनामकी	... ०-१			भजन रामायण. मु० छ०	... ०-११		
अष्टाक्षरकीराम भवानमदी	... ०-१			गारदीया वडा अक्षरों	... ०-१		
श्रीशिवसुद्धसिद्धिनामकी भाषा और श्रीराजी				भुक्तानुपदीयकी वडाअक्षर	... ०-१		
वैष्णवकी वडा वडी मोदाअक्षरनाम				वैष्णव का रामायण. भाषादीक्षा	२-०		
भाषाके पुढिनामकीवैष्णव संभुक्तो				रामनाथनाम कीटीका. संकट	... ०-६		
वैष्णवोपयोगी.	... ४-४						
सुद्धसिद्धिनाम कीटीका संकट.	... ०-४						
सुद्धसिद्धिनामकीटीका संकट	०-४						
सुद्धसिद्धिनामकीटीका	०-४						
सुद्धसिद्धिनामकीटीका	०-४						

पुस्तक मिश्रणका टिकाना-
वैष्णव रामदासकी मोदुत्पट्टाकी
(रत्नहरपुस्तकालय) छात्रोंके

दोसोबावनवैष्णवनकेवार्ताकी अनुक्रमणिका.

अ. अं.	नाम.	पृष्ठ.	अ. अं.	नाम	पृष्ठ.
१	गोविंदस्वामी सनातन्य ग्राह्य- णकी वार्ता	१	२०	गोविंददासधनानगरकाव्यकी- वार्ता	७७
	गोविंददासकीवेदनकान्ह बाईकी वार्ता	१४	२१	कटहरियाकीवार्ता	७८
२	छीतस्वामीचोवेलीकीवार्ता	१५	२२	रूपचंदनंदाशास्त्राचारकीवार्ता	७९
३	चतुर्भुजदासभुवनदासकेवैशाकी वार्ता	२०	२३	बहुनाथदासजोनपुरवारेकी- वार्ता	८१
४	नंददासजीकीवार्ता	२८	२४	राजाठाखाकीवार्ता	८२
५	श्यामजीभाईसाठोदरानगर- कीवार्ता	३५	२५	ज्ञानचंदकीवार्ता	८३
६	हृदयभट्टजीकीवार्ता	४१	२६	श्रीशंकाकोठारीजीवार्ता	८३
७	पायाहरिवंशजीसानीकीवार्ता	४६	२७	हरजीकोठारीकीवार्ता	८५
८	मुरारीदासकीवार्ता	५३	२८	गोपाळदासयज्ञशारुवानवारेकी वार्ता	८५
९	नारायणदासमौडदेशवाठेकीवार्ता	५४	२९	माणिकचंदबोसवाठवनियाकी- वार्ता	८७
१०	काव्यविहलदासविनिषर्दमुमरा- खोतिनकीवार्ता	५९	३०	देवब्राह्मणवंगाठाकेवासीकी- वार्ता	८८
११	शैवालरूपमुरारीसानीकीवार्ता	६१	३१	मणेशम्बासकीवार्ता	८९
१२	पितापुत्रकीवार्ता	६२	३२	मधुसूदनदासकीवार्ता	९०
१३	हृदयदासकाव्यकीवार्ता	६३	३३	अज्ञदास (गोपाळपुरमेरहेते) दिनकीवार्ता	९१
१४	गोपाळदाससेवठदासीकीवार्ता	६४	३४	नरुचैष्णवहठोसोदरिकाकेरस्ता- मेरहेतोतिनकीवार्ता	९२
१५	हरिदासवनिषामेरतावाठेकी- वार्ता	६४	३५	पायोमुजरीआन्पोमेरहतीतिन- कीवार्ता	९३
१६	हरिदासकीवेदितीकीवार्ता	६९	३६	एकजलवासीकी बहुकीवार्ता	९३
१७	असीखानपठायकीवार्ता	७३	३७	गोपीनाथदासग्वाठकीवार्ता	९४
१८	विहालचंदसळोदासानीकीवार्ता	७४	३८	दोभाईपडेठ गुनराठके निननेधर्म-	
१९	गोविंददाससनीकानपुठवारेतिनकी वार्ता	७६			

अ. शं.	नाम.	पृष्ठ.	अ. शं.	नाम.	पृष्ठ.
	छिपायेरुमजुसीरतिनकीवातां	९५		वातां	११७
३९	मोपाठदासभीतरकीवातां	९६	५६	एकपदेठश्रीशुभाईकीकुटाकादस्य	
४०	एकब्राह्मणमयाजीकेतीरपररहे			तोनकीवातां	११८
	तिनकीवातां	९७	५७	एकविरकवैष्णवमिननेतजानमें	
४१	(एकवैष्णवदिहीमेरहेते) विन-			डोसदुखायोनकीवातां	१२१
	कीश्रीरामचंद्रजीनेपरीक्षाकी		५८	एकविरककीबातांजाकेपाकमेंडो	
	तिनकीवातां	९९		करतकी तिनकीवातां ...	१२२
४२	एककुण्ठवीपदेठमिनकेसीवैश्रीना-		५९	एकब्राह्मणीहोरानकीभरतीपरस्तो	
	यवीनेगाडीपठाईतिनकीवातां	१००		तिनकीवातां	१२२
४३	एकसाहूकारकेवेडाकीबहुकीवातां	१०१	६०	एकविरककीबातांजानेश्रीशुभाई	
४४	साठोदरानाथरमुजरातकेबासीकी-			कीकुठपचेठथारेदिवावेति. वा	१२६
	वातां	१०३	६१	ब्राह्मणकीपुरुचदेवीकेठपासीकी	
४५	एकपेशवाकीवेटीकीवातां ...	१०४		वातां	१२८
४६	माचकी रणपूतकीवातां ...	१०५	६२	कृष्णदासवथाईश्वरदासदोऊभाई	
४७	अनचक्रुंवरबाईयेवाठमेरहेतीति-			कीवातां	१३०
	नकीवातां	१०६	६३	एकसाहूकारकेवेडाकीबहुमिनको	
४८	विरवठकीवेटीकीवातां ...	१०७		श्रीशुभाईकीन्यायकन्योति०	१३०
४९	एककृष्णरीकीवातां ...	१०९	६४	हरिदासखवाससुनोटीयाकी	
५०	मेठहतीतपतीतदपभाइनकी-			वातां	१३५
	वातां	११०	६५	मेमनिपिमिअकीवातां ...	१३८
५१	मंगाबाईसज्जानीमिननेश्रीपिठ-		६६	ब्राह्मणकीपुरुपतिनकीवातां	१४१
	ठमिरिधरपेशीछापकेकीतेनचम.		६७	श्यामदासविरककीवातां ...	१४४
	वेतिनकीवातां	११२	६८	एकवैष्णवकीवेटीकीवातां ...	१४५
५२	एकरानामिननेदुयाप्रवैयाकुंवेष्ण-		६९	आठवैष्णवहतेतिनकीवातां ...	१४६
	वकिथोत्रिकीवातां ...	११३	७०	तीनतुंभाथाठेवैष्णवकीवातां	१४९
५३	दुयाप्रवैयाकीवातां ...	११४	७१	एकब्राह्मणीने (देवताकोवैभानच	
५४	एककुनवीवैष्णववीनकीपोतीके			दायो) तिनकीवातां	१५३
	छोदानतेंकोठमयोति० था०	११६	७२	एकपेठकोठकोइतोयोदेइकीसे	
५५	एकभाईसजाणीमिननेश्रीठाकुर			मगवडीतामेवयो तिनकीवातां	१५६
	कीकुंमिठाईकोमेणोदियोतिनकी		७३	आसकरभाराजाकीवातां ...	१५७

अ. अं.	नाम.	पृष्ठ.	अ. अं.	नाम.	पृष्ठ.
७४	दोवभाईसाधोरा (गुजरातमेरहेते) जिनके वडने वैष्णव नकुंजी श्री छण्ण करी तिनकी वातां ...	१७५	९१	एकसंदनवाहणकी वातां	२०१
७५	रामदाससंभ्रातके वाचीकी वातां	१७८	९२	एकपटेज जिनने भेतको उखारकि यो तिनकी वातां ...	२०२
७६	तारापंदभाईकी वातां ...	१८०	९३	निर्धिकचन वैष्णव जिनके श्रीठा मुरजीने भावशरोगे तिनकी वातां ...	२०३
७७	एकवाहणपंडित जिनने गमोईसों महारीवांची तिनकी वातां	१८१	९४	नानपंदवनियाराजनगरमें रहते ति नकी वातां ...	२०५
७८	हरिदासतया मोहनदासकी वातां	१८२	९५	एकडोकरी जिनने वाठपेरकाठ पाछोके न्यो तिनकी वातां	२०५
७९	एकचोर वैष्णवकी वातां ...	१८३	९६	एकडोकरी (राजनगरमें रहते) जिनने चमचाके ठिकाणें दातणच न्यो तिनकी वातां ...	२०६
८०	एकदायाठदासवनीवालो भीकी वातां ...	१८५	९७	एकनगपदीय और एकताहरीकी वातां गुजरातके वासीकी	२०८
८१	श्रीपुरुष जिनने अन्व्याश्रयछोड दि यो तिनकी वातां ...	१८६	९८	एकपटेज जिनके जेठा कुंजानत्रयो तिनकी वातां ...	२०९
८२	देवाभाईपटेज गुजरातमें रहते ति नकी वातां ...	१८७	९९	मावेडाकी वातां ...	२११
८३	एकडोकरीधानीपुनीवाडीकी वातां ...	१८८	१००	देवजीभाईपोरवंदरमें रहते ति	२११
८४	वैष्णवसत्तनीयमधुरामें रहते जिनके घरमहादेवजीनें पणाको मसाद छियो तिनकी वातां ...	१८९	१०१	श्रीपुरुषराजनगरवासी जिन के माथेहस्याको दोपनिवृचत्रयो तिनकी वातां ...	२१२
८५	निर्धिकचन श्रीपुरुष जिनने दिठेद्र- व्यको त्याग कियो तिनकी वा०	१९०	१०२	दोवपटेज जिनकी वातां सुनवेकुंजी माथजीपथारते ति वातां	२१३
८६	पटेज वैष्णव जिनकुंजमुनाजीके स्व रूपको ज्ञान भयो तिनकी वा०	१९२	१०३	एकश्रोतापका दोनोनकी वा०	२१४
८७	एकअजवासियो श्रीठाकुरजीकुंज रैमानतो तिनकी वातां ...	१९३	१०४	एकमियाजीनकुंजदेवीने कवाड उत्तार दीये तिनकी वातां ...	२१५
८८	एकश्रीपुरुष जिनके पीर श्रीठाकु रजीने वडाये तिनकी वातां ...	१९६	१०५	एकवैश्याजीनहुंवाचवडासजी को जेह तो तिनकी वातां ...	२१७
८९	एकविरक्तयाशेठभादरमें रहते तिनकी वातां ...	१९८			
९०	घरमानंददाससोनी ति० वा० -	१९९			

अ. अं.	नाम.	पृष्ठ.	अ. अं.	नाम.	पृष्ठ.
१०६	एकपटेकवैष्णवकिननेद्रातवेष्ट केष्टेकरीतीनकीवार्ता ...	२१८	१२५	नारायणदाससनाटपशाहपकी वार्ता	२३५
१०७	वेगिदासजीरदानोदरदास तिनकीवार्ता	२१९	१२६	जयनादासदक्षिणमॅरहेतेतिनकी वार्ता	२४०
१०८	जनबासीजानेमोपीकुंवेष्णन किपोतिनकीवार्ता ...	२२०	१२७	एकवेगाडीकीवार्ता ...	२४१
१०९	जनिबाजोदेवीकीवर्षासनाछो डकेवैष्णवप्रदोतिनकीवार्ता	२२१	१२८	एकदाहण भायनगरमॅरहेतेति वार्ता	२४२
११०	श्रीनाथकीकेवीनकारकीवा.	२२२	१२९	माधुरीदासमाडीकीवार्ता	२४२
१११	मेनजीभाईहुवागाकीवार्ता	२२३	१३०	धर्मदासभडीमॅरहेतेतिनकी वार्ता	२४३
११२	मुंदाचनदासखसीददासकीवा.	२२४	१३१	एकवैष्णवकृतोनानेसोदेंकर्मकरके श्रीगुसाईजीकीपरीसाडीनीतिन कीवार्ता	२४४
११३	एकधोवीकीवार्ता	२२५	१३२	एकराजापूरवदेशमॅरहेतेतिनकी वार्ता	२४६
११४	एकराजापोधीठाकुरजी वेधतो तिनकीवार्ता	२२६	१३३	शेठकोवेडाभौरदासीति०वा०	२४७
११५	एकपटेकफेमेडाभौरपटवारीकी वेडीकीवार्ता	२२८	१३४	रूपापोरियाकीवार्ता ...	२४९
११६	दोमेतठकरेतिनकीवार्ता ...	२२९	१३५	एकबुहुडो (भंगी) शोवर्धनगा मॅरहेतो तिनकीवार्ता ...	२५०
११७	राजाजोतासिंहजीकीवार्ता	२३०	१३६	वैष्णवकुनवीजिननेनाचतपासमॅ सोपाठदेखोतिनकीवार्ता	२५२
११८	दोजविरकएककेसुंगतेदुखरेको कल्याणनपोतिनकीवार्ता	२३२	१३७	दारकादासनीकीवार्ता	२५३
११९	एकमाझणीअडेकमॅरहेतेतिनकी वार्ता	२३३	१३८	पटाणकेवेडाकीवार्ता	२५४
१२०	हुमांदासकीवार्ता	२३५	१३९	एकरजपूत और रजपूतकी वेडीकीवार्ता	२५४
१२१	चतुरविहारीकीवार्ता ...	२३६	१४०	विरकवैष्णवदारकातेंश्रीगुसाईं जीकेसंगलायेतिनकीवार्ता	२५६
१२२	सजाजीजिननेभाप्रहसुंनचवा- मुतसुनेतिनकीवार्ता ...	२३७	१४१	एकविरकवैष्णव (जिननेडोकरी कोवेडानिवायो) तिनकीवा०	२५६
१२३	भायोदासकपूरानीकीवार्ता	२३७			
१२४	भीष्मदाससजाजीकीवार्ता ...	२३८			

अ. अं.	नाम.	पृष्ठ.	अ. अं.	नाम.	पृष्ठ.
१४२	एकलक्ष्मी (जिनने श्रीठाकुरजीको और श्रीगुर्दाईजीको एकस्वरूप बाण्यो) तिनकी वार्ता ...	२५७		अकाठमृत्युनिवृत्तकन्धोति० वार्ता ...	२७६
१४३	आनन्ददाससाधोरात्राज्ञानकी वार्ता ...	२५७	१५८	गुलाबदाससुत्रीकी वार्ता ...	२७७
१४४	एकनाथ वैष्णवकी वार्ता ...	२५८	१५९	धोषीकटावतकी वार्ता ...	२७७
१४५	धीमशीडुबेसाधोरात्राज्ञानकी वार्ता ...	२५९	१६०	एकवनिवासठवर्षको होयके शरण आयो तिनकी वार्ता ...	२७८
१४६	एकवैष्णव जिनकुंरत्नदारावैष्णवके स्वरूपको ज्ञानशयोतिनकी वार्ता ...	२६०	१६१	राजाराजी जिनने वैष्णवराजकुंर वेदीदीनी तिनकी वार्ता ...	२८३
१४७	एकबृहटो जिनने पंडित नकुंरपाखे केन्दो तिनकी वार्ता ...	२६१	१६२	एकवैष्णव शकुनदेसके पठतो तिनकी वार्ता ...	२८४
१४८	एकवैष्णव जिनने श्रीनाथजीको और श्रीगुर्दाईजीको स्वरूपजाण्यो तिनकी वार्ता ...	२६३	१६३	एकबाई जिनको वेठाधोरी करतो तिनकी वार्ता ...	२८५
१४९	बाबकजी वेदीकी वार्ता ...	२६३	१६४	कुमनदासजीके वेठाकृष्णदास तिनकी वार्ता ...	२८७
१५०	दोषभाईपटेल (सोमाशुभामर चंदनठावे तिनकी वार्ता)	२६५	१६५	गोकुलभट्ट और गोपिंद्रहृष्टकृष्णभट्टजीके वेठाति० वार्ता	२८८
१५१	किशोरीबाईकी वार्ता ...	२६६	१६६	यादवेंद्रदास आनरेमें रहेते तिनकी वार्ता ...	२८८
१५२	दोषभाईपटेल जिनने देवीकृष्णामें डारी तिनकी वार्ता ...	२६८	१६७	सुरामठ और हरजीमठदोकभाई नकी वार्ता ...	२८९
१५३	एकवैष्णव जाके शरीरमें कोठअयो हतो तिनकी वार्ता ...	२६९	१६८	एकवडाईकी वार्ता ...	२९०
१५४	मेहाधामरकी वार्ता ...	२७०	१६९	एकराना (जिनने ब्राह्मणनकुंरदेदी सानेदियो) जाकी वार्ता ...	२९४
१५५	मोहनदास जिनकुंर श्रीगुर्दाईजीने मिरिराजजीको स्वरूपकसो तिनका वार्ता ...	२७३	१७०	समुद्रदास तिनकी वार्ता ...	२९५
१५६	सुरकुंरदासनाम्नकी वार्ता	२७४	१७१	मन्नालास और गोवर्धनदासदोकभाईनकी वार्ता ...	२९५
१५७	निरकवैष्णव जिनने चरणामृतकुं		१७२	भगवानदासभीतरियाकी वार्ता	२९७
			१७३	शेटजीरनिरककी वार्ता ...	२९७
			१७४	माजेटी जिनने श्रीठाकुरजीबाजरी अरोमते तिनकी वार्ता ...	२९८
			१७५	गोपाठदासवठनगरानगरति	

अ. सं.	वाच.	पृष्ठ.	अ. सं.	वाच.	पृष्ठ.
	नकीवाता ३००		१९६	मानकुंवरवार्द्धिनने श्रीवाकळ	
१७६	रणछोडदासवैष्णवकीवाता	३०१		प्यामीशुकीन्दनमोहनजीसन्धो	
१७७	द्वोडडमजिननेनारायणदासकी			तिनकीवाता ३२८	
	श्रीकुंकांसीदीनीति०वाता	३०२	१९७	माधवदासमठनगरमेंरहेतेविषकी	
१७८	राधाकोनेटावभीसकळपोति			वाता ३३०	
	नकीवाता ३०३		१९८	एककुम्बवीपटेकजिनचीशंखापटी	
१७९	पुरुषोत्तमदासकाशीमेंरहेतेति			कीमाटाजर्जवीकाररुनीतिनकी	
	नकीवाता ३०६			वाता ३३१	
१८०	केगीदासजिननेमृतकोडडारकि		१९९	ठाडवाईतथापारवाईकीवाता	३३३
	योतिनकीवाता ३०८		२००	दोयवैष्णवजिननेईटपरव्यक्षरकि	
१८१	ईसईसनीकीवाता	३०९		येतिनकीवाता ३३४	
१८२	पारपीकीवाता	३११	२०१	एकराजाजिनकेगाममेदोपंडितर	
१८३	एकवैष्णवजादेभीरमकुंतुच्छा			हेतेतिनकीवाता ३३६	
	धयोतिनकीवाता ३१२		२०२	यदुनगीपाळदासकायस्थहते	
१८४	एकवैष्णवसूरतमेंरहेतोति०वा.	३१३		तिनकीवाता ३३७	
१८५	एकराजाविरकवैष्णवकोतयात्र		२०३	क्षत्रीवैष्णवगुजरातेकेवासीति	
	हृत्पकोभमंपूछतोतिनकीवाता	३१४		नकीवाता ३३९	
१८६	भी वनदासब्राह्मणजिनकीचि		२०४	छप्पादासस्वामीगुरामेंरहेते	
	ताकेभूवाभुंभेवनकोउरारभयो	३१६		तिनकीवाता ३४०	
१८७	एकब्राह्मणकोपंडितकीवाता	३१८	२०५	वैष्णवईश्वरदासजीमोसवीपर	
१८८	विरकवैष्णवजिनकोअमश्रीनाथ			वैष्णवकीमसन्नातामानतेति.	३४१
	जीनसहीशकेतिनकीवाता	३१९	२०६	स्यासदासभांननाकुनवीकीवा.	३४२
१८९	भीमसेनराजाकीवाता	३१९	२०७	वेणोदासछोपाकीवाता	३४४
१९०	उत्तमदासकीवाता	३२१	२०८	साचोरान्राह्मणजीनकुंवाटीवहोत	
१९१	जनश्रमवानदासगौरवारजपूत			सुंदरव्यापतीतिनकीवाता	३४५
	कीवाता ३२२		२०९	ठरुनीदासजोशीकीवाता	३४६
१९२	एकराजा जिनकेगाममेंब्राह्मण		२१०	महीपरजीश्रीफुठवाईति.वा.	३४७
	कुंवीष्णवनेनेवीचतोफयाँ		२११	एकवैष्णवभूपरदासजीनकुंश्रीगु	
	तिनकीवाता ३२३			साईनीचभारकारदेखायो ति०	३४८
१९३	रेडाउर्द्धरब्राह्मणकीवाता	३२४	२१२	मयनवाईछंभातमेंरहतेति.वा.	३४९
१९४	पर्यभोगनीकीवाता	३२६	२१३	एकब्राह्मणजिननेमयनवाई	
१९५	सासुपहुतिनकीवाता	३२६		के पासपांयहाररुपैया धरे	
				तिनकीवाता ३५१	

क्र. खां.	नाम.	पृष्ठ.	क्र. खां.	नाम.	पृष्ठ.
२१४	भुरारीभाचार्यसंभातमेंरहेते तिनकीवार्ता ३५३			तिनकीवार्ता ३८७	
२१५	माटवनकेएकरजपूतकीवार्ता ३५५		२३४	कायस्थसुरतमेंरहेतोत्रि. वा. ३९२	
२१६	एकपैष्णपगुभरातमेंरहेतेजीनके दुखसुंश्रीठाकुरजीकापत्रठेति नकीवार्ता ३५७		२३५	जीवापरिखतथासहजपाठडो शीतथारठाडमाघपदासति. ३९३	
२१७	निर्मिकचनपैष्णपकीवार्ता (निन केमनोरथठाकुरजीनिपूरणकीवे) ३५८		२३६	थांपाभाईअधिकारीकीवार्ता ३९५	
२१८	रसखानपठानदिछीमेंरहेते तिनकीवार्ता ३५१		२३७	तानसेनकीवार्ता ३९७	
२१९	एकरजपूतजिनकोश्रीठाकुर जीनिभाचारविचारनदेरुवोति नकीवार्ता ३६३		२३८	एकब्राह्मणभौरवाकीछीकी वार्ता ३९९	
२२०	शैवकेवेडाकीवार्ता ... ३६५		२३९	ध्यानदासतपाजगनाथदासकी वार्ता ४००	
२२१	तीनपैष्णपकीवार्ता ... ३६६		२४०	गोपाठदासजिननेमोपीनाथदास ऊपरविश्वासराख्योति. वा. ४०१	
२२२	एकजगनाथसीरावठमेंरहेतेति नकीवार्ता ३६८		२४१	पृथ्वीसिंघजीकीकनिरकेराजाक न्यायासिंघकीवेडाफीवा. ४०३	
२२३	एकपैष्णपजकोरचंदगुजरातमेंरहे जिननेरहेनेहासकियवसनवान कोपेदजान्योतिनकीवार्ता ३६९		२४२	दुर्गावतीरापीकीवार्ता ... ४०५	
२२४	धामोदरदासजीरविनश्रीदोयखी नकीवार्ता ३७१		२४३	भगवानदास जोराभरायकेसुं गसुंपैष्णपअवे तिनकीवार्ता ४०६	
२२५	कबुतरकबूतरीकीवार्ता ... ३७२		२४४	एकचूडोहेतोजिननेंश्रीगोमुड नाथजीकोनाममगठकन्योति. ४११	
२२६	मिहठदासकीवार्ताजिनकोश्रीगु सईजीनेसुंदेहमिटापो ... ३७४		२४५	मजुकरशाहराजाकीवार्ता ४१२	
२२७	रजावतीरापीकीवार्ता ... ३७५		२४६	तुठधीदासजीसारस्वत ब्राह्मण तिनकीवार्ता ४१३	
२२८	दक्षिणकोराजातिनकीवार्ता. ३८१		२४७	सीदामरजिननेंवनियाकेदेवावच देकीखबरदीनीति. वार्ता ४१५	
२२९	सुराठदासजिननेंआसुरीद्रव्यको त्यागकियोतिनकीवार्ता ... ३८२		२४८	हृपीकेशसमीकीवार्ता ४१६	
२३०	गोकुडदासइतोमानेंगुमअठकरी तिनकीवार्ता ३८३		२४९	काम्बदासराजनगरमेंरहेतेजिनके वेडाकीबहुनेंश्रीठाकुरजीकुंजा म्योतिनकीवार्ता ... ४१९	
२३१	नरहीदासजिननेंसिंदरूपदिसापो तिनकीवार्ता ३८४		२५०	मथुरादासकीवार्ता ... ४२०	
३३२	रूपमंभरीकीवार्ता ... ३८५		२५१	भापवंदपूरीकीवार्ता ... ४२२	
२३३	कल्याणभट्टसंभाजीयामेंरहेते		२५२	जाडाकल्याणदासकीवार्ता ... ४२४	
			१	पुष्टीहडानकीवार्ता ४२९ से ४५० तक	
				इति अनुक्रमणिका समाप्त.	

पुष्टिसाग्रीय वैष्णवोंके उपयोगी पुस्तकोंका सूचिपत्र.

श्रीकृष्णाश्रय मूढश्लोक अने शुद्ध गुजरातीटीका	०-२	०-११
नोपोकोगीत मूढश्लोक अनेशुद्ध गुजरातीटीका	०-११	०-११
नारदभक्तिसूत्र मूढसंस्कृत अने शुद्ध गुजरातीटीका	०-११	०-११
षोडशर्षय मूढश्लोक अने शुद्ध गुजरातीटीका चादी जील्द	०-१२	०-१
षोडशर्षय मूढश्लोक अने शुद्ध गुजरातीटीका रेशमी जील्द	१-०	०-१
पुष्टिसाग्रीयस्तोत्ररत्नाकर स्तोत्र संख्या (८१) चादी जील्द	०-६	०-११
पुष्टिसाग्रीयस्तोत्ररत्नाकर स्तोत्र संख्या (८१) रेशमी जील्द	०-८	०-११
उत्सवनिर्णय मूढश्लोक अनेशुद्ध गुजराती टीका	०-८	०-१
यमयात्रा सचित्र व्रत चोरासीकोसकी परीक्रमा	०-४	०-१
पुष्टिसाग्रीय षोड संग्रह	०-४	०-१
गोपालचन्द्रनाम भाषाटीका	०-८	०-१
वज्रभास्करानभनेमूलपुरुष गुजराती	०-१	०-११
श्रीगोवर्धननाथजीनुमागट गुजराती	०-१	०-११
हरायजीकृत शिक्षापत्र षोड मूढश्लोक अने शुद्ध गुजराती टीका	२-०	०-४
गोकुलनाथजीकृत वचनमृत अजनाथा गुजराती अक्षर	०-६	०-१
चिन्दीत रहस्य मूढसहित गुजराती टीका	०-२	०-११
श्रीकृष्ण जन्मसंज्ञ पुर्वाष गुजराती भाषांतर	१-८	०-४
श्रीमद्भगवद्गीतादिपंचरत्न मूढश्लोक अने शुद्धगुजरातीटीका रेशमी	१-०	०-२
श्रीमद्भगवद्गीता मूढश्लोक अनेशुद्ध गुजराती टीका रेशमी गुटको	०-८	०-१
श्रीयमुनाजीके चाठीसपद गुजराती	०-१	०-११
सूरसागर सूरदासजी कृत श्रीमद्भागवतके वारहोस्केपके पद	७-०	०-१२
रागरत्नाकर सचित्र इक्ष्मं जो श्रीकृष्णभयमानने जोजो लीलाकीगी है		
सो सव सचुररागरामनीमेहे वचन सोनहरी जील्द	२-०	०-४
अजबिहार नारायणस्वामी कृत बडा अक्षर उचम सोनहरी जील्द	२-०	०-४
अजबिहार नंददासजी कृत बडाअक्षर सोनहरी जील्द	२-०	०-६
मेघसागर सचित्र बडा (दशमलीला) बडाअक्षर सोनहरी जील्द	१-४	०-४

इत्यादिक पुस्तकोंके शिवाय हमारे यहाँ वेद, वेदान्त, कर्मकांड, पुराण, धर्मशास्त्र, न्याय, छन्द, ज्योतिष, काव्य, अलंकार, चम्पू, नाटक, कोप, वैद्यक, योगमार्ग ग्रन्थ, पुष्टिसाग्रीय ग्रन्थ, रामानुज संप्रदाह ग्रंथ वैश्व संस्कृत हिंदुस्तानी, गुजराती, पुर्ब, उस्बनी, अमदावादके छपेहुये हमारेपास हरवक्त तयार रहते हैं और भंगयाने वाले महाशयपकों योग्य दामसे कमिशन काठके और भेटकी पुस्तक निना मूल्य लिये साचहि जाय भेजते हैं चादिये सो भंगयाना सुंत भेज द्ने. सर्व प्रकारके पुस्तक निठनेका ठिकाना.

वैष्णव रामदासजी श्रीगुरु गोकुलदासजी.

(रणहर पुस्तकशाळा) डाकोर.

॥ श्री ॥

श्रीवाचस्पत्यायनमः ॥

श्रीअस्मतगुरुचरणकमलेभ्यो नमोनमः ॥

श्रीगोपीजनवदभाय नमः ॥

श्रीगुसांईजीके निजसेवक दोसौबावनवैष्णव तिनकी वार्ता ॥

**श्रीगुसांईजीके सेवक गोविंदस्वामी सनाढ्य
ब्राह्मण महावनमें रहते तिलकी वार्ता ॥**

प्रथम गोविंददास आंतरी गाममें रहते ॥ तहां गोविंद-
स्वामी कहावते ॥ और आप सेवक करते ॥ गोविं-
ददास परम भगवद्भक्त नित्य याही रीतीसो रहते ॥
जो श्रीभगवत् चरणारविंदकी प्राप्ति कैसें होय ॥ याही
वातकी तलासी करत रहते हते ॥ एकसमय गोविंददास
आंतरी गांमते ब्रजफों आये ॥ और महावनमें आयके
रहे ॥ काहेतें जो यह ब्रजधामहै ॥ इहां भगवत् चरणार-
विंदकी प्राप्ति होयगी ॥ और गोविंदास कवि हते ॥ सो
आप पद कर्ते ॥ सो जो कोऊ इनके पद सीखकें श्रीगुसां-
ईजीके आगे आयकें गावें ॥ तिनके ऊपर श्रीगुसांईजी
प्रसन्न होते ॥ सो गावनहारें गोविंदस्वामीके आगे आयकें
कहते ॥ जो तुमारें पद सुनके श्रीगुसांईजी बहुत प्रसन्न
होंतहैं ॥ ये वार्ता सुनि गोविंदस्वामीनें ऐसो विचार
कियो ॥ जो श्रीगुसांईजीकूं मिलें तो ठीक ॥ तब एकसमय
श्रीगुसांईजीको सेवक महावन गयो हतो ॥ सो भगव-

दिच्छाते श्रीगुसाईंजीके सेवकको और गोविंदस्वामीको मिलाप भयो ॥ वा वैष्णवकी गोविंदस्वामीकी आपसमें बात चीत भई ॥ जब गोविंदस्वामीने कहीं के श्रीठाकुरजीको अलुभव कैसे होय ॥ जो मोकुं बहुत दिनसों या बातकी आतुरता है ॥ तातें कही ॥ तब वा वैष्णवनें गोविंदस्वामीकी आतुरता देखिके कह्यो ॥ जो आजकाल श्रीठाकुरजीकुं श्रीविठ्ठलनाथ श्रीगुसाईंजीनें बसकर राखेंहें ॥ तातें श्रीठाकुरजी और ठौर कहुं जाय सकत नहीं ॥ श्रीठाकुरजीतो श्रीगुसाईंजीके हाथहैं ॥ सो यह सुनके गोविंदस्वामीकुं अति आतुरता भई ॥ तब गोविंदस्वामीनें उन वैष्णवसों कही ॥ जो मोकुं श्रीगोकुलमें श्रीगुसाईंजीके पास लेचलो ॥ तब उहासे उठे सो श्रीगोकुलमें आये तब श्रीगुसाईंजी ठकुरानीघाट ऊपर संध्या-तर्पण करत हते ॥ वा वैष्णवनें गोविंदस्वामीकुं श्रीगुसाईंजीको दर्शन करायो ॥ गोविंदस्वामी दर्शन करिके मनमें समझें ये कर्ममार्गीय दीखतहैं ॥ सो कहा कारण होयगो ॥ तब गोविंदस्वामीकुं देखके श्रीगुसाईंजी बोले जो आवो गोविंदस्वामी बहुत दिनसूं देखे ॥ तब गोविंदस्वामीनें कही माहाप्रभु अबही आयोहूं ॥ तब गोविंदस्वामीनें अपने मनमें विचार कियो की ॥ आपने मोकुं कोई दिन देख्यो नहीं हैं सो कैसे जान गये ॥ यामें कछु कारण दीसतहै ॥ जब श्रीगुसाईंजी मंदिरमें पधारे ॥ तब गोविंदस्वामीनें वीनति करी हे महाप्रभु मोकुं कृपा-करिके शरण लेओ ॥ तब श्रीगुसाईंजीनें कही न्हाय

आवो ॥ तब वे न्हाय आयें ॥ तब श्रीनवनीतप्रिया-
 जीके संनिधिमें नाम निवेदन करायो ॥ तब गोविंदस्वा-
 मीकुं साक्षात् पूर्णपुरुषोत्तम कोटिकंदर्पलावण्यके दर्शन
 भये ॥ और सब लीलानको अलुभव भयो ॥ श्रीगुसाईंजी
 श्रीनवनीतप्रियाजीकी सेवा करके बाहिर पधारे ॥ तब
 गोविंदस्वामीनें बीनती करी ॥ जो आपतौ कपटरूप
 दिखावत हो ॥ साक्षात् पूर्णपुरुषोत्तमरूप होयके वेदोक्त कर्म
 करत हो ॥ सो हम जैसेनकूं मोह होयहै ॥ जब श्रीगुसाईंजीनें
 आज्ञा करी ॥ जो भक्तिमार्गहै सो फूलको वृक्ष है ॥ और क-
 र्ममार्गहै सो कांटनकी बारहै ॥ तासूं कर्ममार्गकी बारविना
 भक्तिमार्ग जो फूलको वृक्ष वाकी रक्षा नहोय ॥ ये मुन-
 के गोविंदस्वामी बहुत प्रसन्न भये ॥ गोविंददास ऐसैं कृ-
 पापात्र भगवदीय भये ॥ प्रसंग ॥ १ ॥ सो गोविंददास महाव-
 नके टेकरापर रहते हते ॥ और नये कीर्तन करके गावते
 हते ॥ और उहां श्रीठाकुरजी मुनवेकुं पधारते हते ॥ जब
 उहां मदनगोपालदास कायथ कीर्तन लिखवेकुं आवते
 हते ॥ सो एकदिन श्रीठाकुरजीकुं गोविंदस्वामीनें कही
 ॥ इहांताई आप नित्य श्रम करोहो ॥ सो आपको गान
 मुनवेकी बहुत इच्छा दीखैहै ॥ आपकुं गानको अभ्यास
 है ॥ यातें आपकुं कछु गायो चाहिये ॥ तब आपनें कछु
 गान कियो ॥ तब गान मुनके श्रीस्वामिनीजी पधारी ॥
 जब तालस्वर बरोवर बजावे लगे तब गोविंदस्वामी धन्य
 धन्य कहन लगे ॥ और आपनें भाग्यकी सराहना करन
 लगे ॥ जब मदनगोपालदास कायथ बोले ॥ जो इहां कोई

आदमी तो दिसे नहीं है ॥ तुम कौनसूँ बात करतहो ॥ तब गोविंदस्वामी कछु बोले नहीं ॥ बात गुप्त राखी ॥ पाछे एक-दिन श्रीगुंसाईजीने पूछी जो श्रीठाकुरजी कैसे गावेंहैं ॥ तब गोविंदस्वामीने कही श्रीठाकुरजी बहोत आछे गावेंहैं ॥ परंतु तालस्वर श्रीस्वामिनीजी बहोत आछो देत हैं ॥ ये गुनके श्रीगुंसाईजी गुसकायके चुपहोय रहे ॥ प्रसंग ॥ २ ॥ सो गोविंदस्वामी जब श्रीगोकुलमें रहते हुते ॥ सो उहां आंतरिगाममें पहिले गोविंदस्वामीके सेवक हते सो श्रीगोकुल आये ॥ सो पृछत पृछत विनके पास गये ॥ जायके पूछी जो गोविंदस्वामी कहां हैं ॥ तब विनने कही गोविंदस्वामी अरगये ॥ तब तिनमेंसूँ एक पहेचानतो हतो ॥ जब वाने कही आप क्यों हमारी हाँसी करोहो ॥ जब गोविंदस्वामीने कही हमने स्वामीपनो छोडदियो ॥ जासुं तुम ऐसे समझो जो अरगये हैं ॥ जब विनने बीनती करी जो अब हम सेवक कौनके होंय ॥ जब गोविंदस्वामीने विनकुं लेजायके श्रीगुंसाईजीके सेवक कराये ॥ सो गोविंदस्वामीके संग सो विनकुं अगवत्प्राप्ती भई ॥ जिनके संगते सहज अगवत्प्राप्ती होवै विनकी कृपाते कहा नहोवै सब होवै ॥ विनकी बात कहा कहिये ॥ प्रसंग ॥ ३ ॥ सो वे गोविंदस्वामी श्रीगोकुलमें रहते ॥ परंतु श्रीयमुनाजीमें पाँव नहि देते ॥ श्रीयमुनाजिकुं साक्षात् श्रीस्वामिनीजी अष्टसिद्धीके दाता जानते ॥ जैसे स्वरूप श्रीमहाप्रभुजीने यमुनाष्टकमें वर्णन कियोहै ॥ वैसे श्रीगुंसाईजीकी कृपासे गोविंदस्वामी जानते हते जासुं श्रीयमुनाजीमें

पांव नहीं धरते हुते ॥ और श्रीयमुनाजीके दर्शन करते और दंडवत करते ॥ और पान करते सौ एकदिन श्री-वालकृष्णजी और श्रीगोकुलनाथजी गोविंदस्वामीकुं पकड़के श्रीयमुनाजीमें नहायवे लगे ॥ जब गोविंदस्वामी-नें वीनती करी जो ये मलयूत्रको भन्यो देह श्रीयमुनाजी लायक नहीं है ॥ श्रीयमुनाजी साक्षात् स्वामिनी हैं ॥ जासूं ये अधम देहस्पर्शकरवे योग्य नहीं है ॥ और श्रीयमुनाजीकुं तो उत्तम सामग्री समर्पी चर्हीये ॥ ये मुनके श्रीवालकृष्णजी और श्रीगोकुलनाथजी चुप कररहे ॥ सौ वे गोविंदस्वामी ऐसो स्वरूप श्रीयमुनाजीको जान-तहते ॥ प्रसंग ॥ १५ ॥ श्लोक ॥ गागोपकैरलुवननयतोरुदार-वेणुस्वनैःकल्पदैस्तनुभृत्सुसख्यः ॥ अस्पृदनंगतिमतां पुलकस्तरूपांनिर्योगपाशकृतलक्षणयोर्विचित्रं ॥ या श्लो-कको व्याख्यान श्रीगुसाईजी गोविंदस्वामीके आगे कहवे लगे ॥ जब कहते कइते अर्धरात्र वीती तब श्रीगुसाईजी पोढै ॥ गोविंदस्वामी घरकूं चले ॥ तब श्रीवालकृष्णजी तथा श्रीगोकुलनाथजी तथा श्रीरघुनाथजी तीनो भाई वैष्णव-नके मंडलमें विराजत हते ॥ जब गोविंदस्वामीनें जायके दंडवत करी ॥ तब श्रीगोकुलनाथजीनें पूछे जो श्री गुसाई जीके इहां कहा प्रसंग चलती हतो ॥ जब गोविंदस्वामीनें ये श्लोककी सुबोधिनीजीको प्रसंग कइयो ॥ फिर कइयो आपकी व्याख्यान आप करें यामें कहा केहेनो ॥ जाके स्वरूपको वेद हूं नहीं जानसकें वाको व्याख्यान वे आप-ही करें तब होय ॥ जब ऐसे कइयो तब श्रीगोकुलनाथजीनें

दोनो भाइनों कही जो गोविंदस्वामीने श्रीगुसाईजीको
 स्वल्प कैंसोजान्योहै ॥ और इनके ऊपर आपने कैंसी छपा
 करी है सो इनके भाग्यको कहावर्णन करिये ये कहिके श्री-
 गोकुलनाथजी छुपहोयरहै ॥ प्रसंग ॥ ५ ॥ सो गोविंदस्वामी
 श्रीनाथजीके संग खेलते हते सो एक दिन अपछरा कुंडसो
 गोवर्धनपर्वतऊपर होयके श्रीगोवर्धननाथजीके संग गो-
 विंददास आवते हते ॥ सो उहासि राजयोगकी आरती
 भई ऐसी अवाज सुनी ॥ जब गोविंदस्वामीने कहि श्री
 नाथजी तो अवी आवतहै ॥ राजयोग कौनने अरोये
 है ॥ गोविंदस्वामीने जायके श्रीगुसाईजीसो वीनती करी
 ॥ जब श्रीगुसाईजीने दूसरो राजयोग सिद्ध करायके ध-
 रायो ॥ और गोपालदासभीतरियाने श्रीगुसाईजीसो
 वीनती करी ॥ जो एकदिन पृच्छरीकी औरतें गोविंददास
 श्रीनाथजीके संग आवते मेने देखे हते ॥ जब श्रीगुसाई-
 जीने कही ॥ जो कुंमनदास तथा गोविंदस्वामी तथा
 गोपिनाथदासगवाल ये तीनों श्रीनाथजीके एकांतके स-
 खाहै ॥ सो इनकुं अधिकार श्रीमहा प्रसूजीने दियोहै ॥
 ये बात सुनके गोपालदासजी बहृत प्रसन्न भये ॥ और
 अपने मनमें कहेवे लगे ॥ जो हम भितरियाभये तो
 कहा भयो ॥ सो वे गोविंदस्वामी ऐसे भगवदीय कृ-
 पापात्र हते ॥ प्रसंग ॥ ६ ॥ सो एकदिन गोविंद
 स्वामी उत्थापनकेसमें श्रीनाथजीके दर्शनकुं गये ॥
 जब देखें तो श्रीनाथजीके पागके पंच खुल रहे हते ॥
 तब गोविंदस्वामीने कही के पागके पंच क्यो खोलडारहै

॥ जब श्रीनाथजीनें कही तूं पागके पेंच संवारिदे ॥ तव गोविंदस्वामीनें भीतर जाइके पागके पेंच संवारदिये ॥ तव भीतरियानें श्रीगुसांईजीसोकही ॥ जो गोविंददासनें अपरस छिवाय दीन्होहो ॥ पाछें श्रीगुसांईजीनें आज्ञा करि जो गोविंददाससें श्रीनाथजी नहीं छुआयजाय ॥ येतो श्रीनाथजीके संग सदैव खेलें हैं ॥ सो गोविंदस्वामी ऐसे कृपापात्र हते ॥ प्रसंग ॥ ७ ॥ एकदिन श्रीगुसांईजी श्रीनाथजीको शृंगार करत हते ॥ तव गोविंदस्वामी जगमोहनमें कीर्तन करत हते ॥ तव श्रीनाथजीनें गोविंददासकुं आठ कांकरी मारी ॥ जब गोविंदस्वामीनें एक कांकरी मारी ॥ तव श्रीनाथजी चमक उठे ॥ जब श्रीगुसांईजीनें कही गोविंददास यह कहा कियो ॥ तव गोविंदस्वामीनें कही ॥ हे महाराज आपकोतो पूत औरको सूलीकर ॥ जो आठ वखत मोकुं कांकरी मारी जब आप कछु नहीं बोले ॥ ये मुनके श्रीगुसांईजी चुपकरि रहे ॥ सो गोविंददासजीकुं ऐसो सखा भाव सिद्धभयो हतो ॥ प्रसंग ॥ ८ ॥ एकदिन गोविंददासकी बेटी देसमेंसो आई ॥ परंतु गोविंदस्वामी कोईदिन वा बेटीसुं बोले नहीं ॥ जब कान्हवाईनें कही जो बेटीसुं एकदिन तो बोले ॥ तव विननें कही जो मनतो एकहे ॥ इतको लगाऊं के उतको लगाऊं फेर कछुदिन रहिके बेटी देसकुं जावे लगी ॥ जब बंडू बेटिननें साढीचोली पठाई ॥ तव गोविंदस्वामीके मनमें दया आई ॥ जो गुरुके घरको अनप्रसादी लेवेगी तो याको विगार होयगो ॥ वे गोविंदस्वामी कोईदिन बेटीसें

बोलते नहते ॥ तो परंतु दयाकेलियें बोलें जो तूं
 ये लेवेगी तो तेरो बुरो होयगो ॥ जब बेटीनें
 कही मोड़ुं लसज नहीं हती ॥ तो मोड़ुं दुम-
 नें बडी कृपा करिके रस्ता बतायो ॥ तब वे सब कपडा
 पाछें पठाय दिये ॥ बेटी अपनें घरकों गई ॥ सो वे गोविं-
 दस्वामी गुरुकी अंशसो ऐसें दरपत हते ॥ प्रसंग ॥ ९ ॥
 और फागनके दिन हते ॥ सो सैनसोग सरायकें श्रीगु-
 साईंजी बीडी अरु गावत हते ॥ तब गोविंदस्वामी धमार
 गावत हते ॥ सो धमार श्रीगोवरधनरायलाला ये धमार
 पूरी करेबिना गोविंदस्वामी चुप कर रहै ॥ जब श्रीगुसां-
 ईजीनें आज्ञा करी ॥ गोविंददास धमार पूरी करौ ॥ तब
 गोविंदस्वामीनें कही महाराज धमारतौं भाज गईहै ॥
 वेतो घरमें जाय छुसे ॥ खेलतो बंद भयो अब कहा गावूं ॥
 ये छुनके श्रीगुसाईंजी चुप कर रहे ॥ पाछे बैठकमें पघारे ॥
 जब एक तुक आपनें बनायके गोविंद स्वामीके नामकी
 वा धमारमें धरी ॥ वादिनसुं गोविंदस्वामीकी धमार
 लोकमें साढेबारह कहीजायहै ॥ सो गोविंदस्वामी ऐसें
 कृपापात्र हते ॥ जो लीलके दर्शन करिकें गान करते
 हते ॥ प्रसंग ॥ १० ॥ सो वे गोविंदस्वामी महावनके टेकरा-
 पर नित्य गान करते हते ॥ श्रीनाथजी नित्य सुनि-
 वेहुं पधारते हते ॥ और श्रीनाथजीसंग गानहूँ करते
 हते ॥ और वे गोविंदस्वामी भगवल्लीलामें अष्ट सखा-
 नमें हते ॥ सो कोई समें श्रीनाथजी चूकते सो गोविंद-
 स्वामी भूल काढते ॥ और गोविंदस्वामी चूकते जब

दोसौवावन वष्णवकी वार्ता.

लाये ॥ पाग पाली दीनी ॥ वे गोविंददासकुं पाग बांध-
उत्सकी ऐसी चतुराई हती ॥ प्रसंग ॥ १२ ॥ सो गोविंद-
दास नित्य जसोदाघाटपर जाय बैठते ॥ सो उहां
एकदिन एक वैरागी गायवे लायो ॥ सो राग तालस्वर
हीन हतो ॥ जब गोविंदस्वामीनें कही जो तुं मत गावै ॥
या गायिवेसों कहा होतहै ॥ तब वा वैरागीनें कही मैंतो
मेरे रामकों रिझावतहो ॥ जब गोविंदस्वामीनें कही राम
तौ चतुरशिरोमणीहै ॥ सो कैसें रीझेंगे ॥ जो तेरो साचो भा-
व होय तौ मनमें नाम लिये सो रीझेंगे ॥ सो वे गोविंदस्वामी
ऐसे निःशंक हते ॥ प्रसंग ॥ १३ ॥ सो एकदिन श्रीना-
थजी सामढाके ऊपर कूदिके निगमने हते ॥ और
छुरला वजावत हत और गोविंददास दूरसाटफरक ऊ-
पर बैठे देखते हते और वाही समय श्रीगुसाईंजी न्हायके
उत्थापन करवेके लिये श्रीगिरिराज ऊपर पधार ॥ सो
श्रीनाथजीनें सामढाके पैसुं देखे और उतावलसों कूदे
और वागाको दांवन फट गयो और लीर झाडपै रहि गई ॥
तब श्रीगुसाईंजीनें केंवार खोलिके उत्थापन करे देखेंतो
वागाको दांवन फटयोहै ॥ जब मनुष्यनसों पूछी जो इहां
कोई आयी तौ नहीं हतो ॥ तब सबनें नाहीं कही ॥ जब
आप विचार करवे लगे ॥ तब गोविंददासनें कही जो आप
या वातको विचार कहाकरेंहै ॥ लरिकाको सुभाव जानें
नहींहैं जो बहुत चंचल है स्यामढाकेपैसुं कूदिके वागाको
दांवन फाडयोहै ॥ सो आप चलोतो दिखाऊं ऐंसे लीर
विंददासपै ॥ जब श्रीगुसाईंजी पधारके वा लीर उतारि

श्रीनाथजी मूल कहते ॥ श्रीनाथजी तथा गोविंदस्वामी
 श्रीकृष्ण गान सुनिवैके लिये श्रीगोकुलनाथजी नित्य पध
 रते और एक मनुष्य बैठाय रखते ॥ जो श्रीगुरुसाईजी
 भोजन करवेकुं पधारें तब मोकुं हुलायलीजो ॥ एकदिन
 वा मनुष्यके मनमें ऐसी आई ॥ जो श्रीगोकुलनाथजी
 नित्य श्रीगुरुसाईजीसों छाने पधारतैहै ॥ एकदिन जो ये
 नबोलाओं तो गुरुसाईजी सब जान जाएंगे ॥ जब श्रीगो-
 कुलनाथजीतौ नित्य जाते बंदहोय जाएंगे ॥ ये सब-
 झके वे मनुष्य एकदिन हुलायवे न गयो ॥ जब श्रीगुरुसा-
 ईजी भोजनको पधारवे लगे ॥ तब सब लालजी आए ॥
 श्रीगोकुलनाथजी न पधारें तब श्रीगुरुसाईजीमें बसरे

मनुष्यकुं आज्ञा करी जो गोविंदस्वामीके पास बह-
 यजी बैठैहैं विनकी हुलाय लव ॥ जब दूसरो मनुष्य
 हुलाय लायो तब वे मनुष्य जो जानके बोलावे नही गयो
 हतो सो पश्चात्ताप करवे लयो ॥ जो श्रीगुरुसाईजी तो सब
 जानतैहै मैनें काहेको श्रीगोकुलनाथजीसों छुटिलता
 करि ऐसो पश्चात्ताप ययो ॥ सो वे गोविंदस्वामी ऐसे
 छपापात्र हते ॥ जो तिनके संग श्रीनाथजी क्षणक्षण
 आयके बिराजते हते ॥ प्रसंग ॥ ११ ॥ वे गोविंदस्वामी
 पाग आछी बांधते हते ॥ सो टुक टुक पाग होती तब
 कोईकुं खबर न हती ॥ जब एकदिन एक ब्रजवासीनें
 गोविंदस्वामीकी पाग आछी जानके उतारलीनी ॥ तब
 गोविंदस्वामीनें कही सारे ये टुक संभारके धरराखियो
 काल तेरे घरकुं आयके लेजाउंगो ॥ वे ब्रजवासीनें

लाये ॥ तब श्रीगुरुसाईजी श्रीनाथजीसों पूछी ॥ जो आपने उतावल काहेकों करी ॥ तब श्रीनाथजीनें कही जो उत्थापनको समय भयोहतो ॥ और आप न्हायके पधारे हते जासुं उतावल भई ॥ वादिनतें ऐसो वंदोवस्त करथौं ॥ जो तीन वेर घंटानाद तथा तीन वेर शंखनाद करिके और बीस पल रहिके मंदिरके किंवार खोलके उत्थापन करनें ॥ सो वे गोविंददास ऐंसे कृपापात्र भगवदीय हते ॥ प्रसंग ॥ १४ ॥ एकदिन आगरेमें अकबर पातशाहनें सुन्यो जो गोविंदस्वामी वहुत आछे गावतहें और निरपेक्षहें और निःशंकहें ॥ जव इनके सुखको राग कैसे सुन्यो जाय ॥ ये विचार करिके पातसाही वेप पलटके श्रीगोकुलमें इकेले आए ॥ जव गोविंददास जसोदाघाटपर भैरव राग अलापत हते तव वा पातशाहनें वाहवा वाहवा करी ॥ जव गोविंददासनें कही ये राग छीगयो ॥ जव वाने कही जो मै पातशाहहुं जव विननें कही जो तुम पातशाहहो तो पातशाही करौ ॥ परंतु ये रागतो तुमारे सुनवेसुं छिवाय गयो जव पातशाहनें विचार कन्यो एक देसको में राजा हुं/श्रीर इनकोंतो त्रिलोकीको वैभव फीको लगेहि ॥ जासुं ये काहेकुं आपने हुकुममें रहंगे ॥ ये विचारिके पातशाह चले गये ॥ और गोविंदस्वामीनें वादिनसुं भैरव राग गायो नहीं ॥ वे गोविंदस्वामी ऐंसे टेकी भगवदीय हते ॥ प्रसंग ॥ १५ ॥ और वे गोविंदस्वामीके संग श्रीनाथजी नित्य वनमें खेलते ॥ और कोईदिन गोविंददासको घोडा करते और कोईदिन हाथी करते ॥ ऐंसे

नित्य क्रीडा करते ॥ सो एकदिन श्रीनाथजीनें गोविंदस्वामीकुं घोडो कन्यो हतो और ऊपर आप असवार भये हते ॥ सो गोविंदस्वामीनें घोडाकीसीन्याई लहलहांका करी ॥ ये बातें एक वैष्णवनें देखी ॥ सोश्रीगुसाईजीसों जायके कही ॥ जब श्रीगुसाईजीनें आन्ना करी जब गोविंदस्वामी हाथी घोडा होतेहै ॥ सो हाथी घोडाको स्वांग पूरो नकरें तो कैसें होवै ॥ और इन बातनमें तुम मत पढो ॥ ये बात सुनके वे वैष्णव चुप करिगयो ॥ सो वे गोविंदस्वामी ऐसे कृपापात्र हते ॥ प्रसंग ॥ १६ ॥ एकदिन गोविंददास श्रीगुसाईजीके संग मथुराजीमें केशवरायजीके दर्शनकुं गये ॥ तब उष्णकाल हतो ॥ और सब जरीको वागा जरीकी ओढनी देखके गोविंददासनें केशवरायजीसों पूछो जो नकितोहो ॥ सो सुनके केशवरायजी खुसकाये ॥ जब श्रीगुसाईजीनें कही ॥ जो गोविंददास ऐसे नबोलिये ॥ तब गोविंददासनें कही महाराज मादी मनुष्यको पोसाक पहन्योहै जब कैसेनपूछो जाय ॥ ये सुनिके श्रीगुसाईजी चुपकररहै ॥ प्रसंग ॥ १७ ॥ और एकदिन श्रीनाथजीके राजभोग आवते हते ॥ तब भी तरियासों गोविंदस्वामीनें कही जो राजभोग धरे पहिले मोकुं प्रसाद लेवाव ॥ जब भीतरियाननें थार पटिकदियो और श्रीगुसाईजीकुं पुकार करि ॥ जब श्रीगुसाईजीनें गोविंददाससों पूछी यह कहा जब गोविंदस्वामीनें कही जो आप संगमें मोकुं खेलवेकुं लेजाएहै ॥ और जो पाछे प्रसादले वेकुं रहिजाऊं तो वनमें पाछे मोकुं श्रीनाथजी मिले नहीहै

जब कैलें करुं ये छुनके श्रीगुसांईजीनें ऐसी बंदोवस्त करी जो राजभोग आवेके समय गोविंददासकुं प्रसाद लेवानो ऐसी बंधारीसों आज्ञा करि। सो वे गोविंदस्वामी ऐसे छुपापान हते जिनबिना श्रीनाथजी रहि नहीं सक्ते ॥ प्रसंग ॥ १८ ॥ एक दिन श्रीनाथजी गोविंदस्वामी संग खेलते हते ॥ तब श्रीनाथजीके उपर दाव आयो ॥ तब उत्थापनको समय भयो ॥ तब श्रीनाथजी भागके मंदिरमें छुसगये ॥ तब मंदिरमें भीतर जायके श्रीनाथजीकुं गीली मारि तब सेवक टहेलवाननें गोविंददासकुं धक्का मारके बाहेर काढदिये और उत्थापन भोग धर्यो तब गोविंदस्वामी जायके रस्तामें बैठे और कहे जो अबि गायनके संग श्रीनाथजी ये रस्तापर आवेंगे और याको मार देउंगो पीछे श्रीगुसांईजी न्हायके मंदिरमें पधारि देखें तो श्रीनाथजी अनमनें होय रहेहैं और उत्थापनके सामग्री अरोगें नाहीहैं तब श्रीगुसांईजीनें श्रीनाथजीसों पूछे जो कैसेही तब श्रीनाथजीनें कहि जो जहांसुधि गोविंददासकुं नहिंमनावोगे तहांसुधि मोकुं कछु भावेगो नहीं काहेतें मोकुं रस्ता चलेविना और वाके संग खेले विना सरेगो नहिं ॥ अबि रस्तामें जाउंतो आन गिनती नकि मारदेवेगो याचिताकेलियें मोकुं कछु भावे नहिं है गोविंददास आवेगो जब कछु भावेगो ये बात छुनके और श्रीनाथजीकी भक्तवत्सलता देखके श्रीगुसांईजीको हृदय भर आयो तब गोविंददासकुं बुलायके और मनायके श्रीनाथजीसुं वीनति करि जो ये हाजिरहैं अब आ-

यग्येहै तब श्रीनाथजीअरोगे सो वे गोविंददास ऐसे
कृपापात्र हते ॥ प्रसंग ॥ १९ ॥ वार्तासंपूर्ण ॥ ॐ

गोविंददासकी भैल कान्हवाई हति तिनकी ०

सो कान्हवाई श्रीनवनीतप्रियाजीकुं साथे पधरायके सेवा
करत हती ॥ और श्रीठाकुरजी विनकुं अतुभव जताव-
तहते ॥ हंसते और बोलते जो चाहिये सो यांगलेते ॥
और वे कान्हवाई जादिन श्रीगुसाईजीके घर सेवासें
जाती जब रसोई न करती हती ॥ तब पातर लायके
योग घरती हती ॥ और वे कान्हवाई कछुक सायग्री
घरसेंकर राखती हती ॥ जब श्रीठाकुरजी लखनकी-
न्याई मांगते तब वे देति ॥ प्रसंग ॥ १ ॥ एकदिन कान्ह
वाई श्रीठाकुरजीकुं देवका बेटीजीके पास पधरायके
सहावनगई रातकुं आयसकी नहीं ॥ तब देवका बेटी-
जीनें अपने श्रीठाकुरजी पोढाये तब कान्हवाईके ठाकु-
रजीकुं पोढावते झूलगई हती ॥ जब कान्हवाईकुं श्रीठा-
कुरजीनें सहावनसें जतायो जो देवका बेटीजी मोकुं
पोढावते झूल गई है ॥ सिंघासन पेँ एकेलो बैठो डरपत
हूँ ॥ जब कान्हवाई रातकों उहांसे चली सो श्रीगोकुल
आयके देवका बेटीजीकुं जगायके अपने श्रीठाकुरजीकुं
पधरायके घर लेजायके पोढाए ॥ प्रसंग ॥ २ ॥ एकदिन
कान्हवाईसों श्रीगोकुलचंद्रमाजीनें कही कि मेरी शय्यामें
कछु चुमतहै ॥ तब कान्हवाईनें जायके नारायणदास
ब्रह्मचारीसों कही ॥ जो श्रीठाकुरजीकुं तो शय्या चुमेंहै ॥

जब नारायणदासनें शय्याकी गादी खुलाई तब रुईमें सो वनौस निकसे ॥ जादिनतें नारायणदास ब्रह्मचारी शय्याकी गादी अथवा रजाई नई भरावते जब अपने हाथनसूं रुईके पेल देखके धरते ॥ सो वे कान्हवाई ऐसे कृपापात्र भगवदीय हती ॥ प्रसंग ॥ ३ ॥ एकदिन कान्हवाई श्रीगुसांईजीके घर श्रीनवनीतप्रियाजीके पालनेके दरशन करवेकुं गई ॥ जब जायके देखें तो श्रीनवनीतप्रियाजीतो अकेले झुल्लिहै ॥ तब श्रीनवनीतप्रियाजीनें कही जो कान्हवाई तूं भौकुं झुलाय ॥ तब कान्हवाई झुलावे बैठी ॥ जब श्रीगिरिधरजी पधारे तब कान्हवाईनें खीजकर कही ॥ जो तुमने श्रीठाकुरजीकुं इकेले क्यों छोडे तब श्रीगिरिधरजीनें कही जो अब कोई दिन नहीं छोड़ंगो ॥ सो वे कान्हवाई ऐसी कृपापात्र हती ॥ प्रसंग ॥ ४ ॥ एकदिन श्रीगोकुलनाथजीनें श्रीगिरिधरजीकुं यज्ञ करवेकुं पूछो ॥ जो हमारी यज्ञ करवेकी इच्छा है तब कान्हवाई बोली जो यज्ञरूप श्रीगोवर्धनधरजी तुमारे माथे विराजेहै ॥ इनके सेवेसों सब यज्ञहोय जाएंगे ॥ ये सुनके श्रीगोकुलनाथजीनें यज्ञ करवेको विचार बंद राख्यो सो वा कान्हवाईकी सब बालक ऐसी कान राखते हते ॥ प्रसंग ॥ ५ ॥ वार्ता संपूर्ण वैष्णव ॥ १ ॥

॥ श्रीगुसांईजीके सेवक छीतस्वामी चौबे ति ०

सो वे छीतस्वामी मथुरामें रहतेहते ॥ और मथुराजीमें पांच चौबे बडा गुंडा हते ॥ और ठग्याई करते और छीत-

चौबे दिन पांचनमें मुख्य हतो ॥ सो विननें विचार कन्यो जो कोई गोकुलमें जायहै सो श्रीविठ्ठलनाथजीके बस होय जायहै ॥ जासुं ऐसो दीसेहै जोश्रीविठ्ठलनाथजी जाहू टोना बहोत जानेहैं ॥ परंतु हमारे ऊपर टोना चले तब साँची मानें ये विचार पांचौ चौबिननें कन्यो तब एक खोटो नारियल और खोटो रुपैया लैके पांचौ चौबे श्रीगोकुल आये तब चार चौबेतौ बाहेर बैठरहै ॥ और मुख्य जो छीत चौबे हतो विनकुं मीतर पठायो ॥ सोबे छीत चौबानें खोटो नारियल तथा खोटो रुपैयाजायके भेट धन्यो तब श्रीगुसाईजीनें खवाससुं आज्ञा करी ॥ जो या रुपैयाके पैसा लेआव ॥ जब रुपैयाके पैसा आए और नारियल फोड्यो तब छुफेद गरी निकसी ॥ तब छीतस्वामी देखिके मनमें विचारी ॥ जो येतो साक्षात् ईश्वर हैं ॥ जब छीतस्वामीनें कही जो महाराज मोकुं शरण लेओ ॥ जब श्रीगुसाईजीनें छीतस्वामीकुं नाम सुनायो ॥ पाछे श्रीनवनीतप्रियाजीके दर्शन करवेकुं गये ॥ भीतर देखें तो श्रीगुसाईजी बिराजेहैं ॥ और बाहेर आयके देखे तो बिराजे हैं जब छीतस्वामीनें विचारी जो श्रीगुसाईजीकी ईश्वरता जीवसों जानी नहीं जायहै ॥ जब वे चार चौबे बाहर बैठे हते विननें छीतस्वामीकुं बुलाये ॥ तब श्रीगुसाईजीनें आज्ञा करी जो तुमारे संगी बाहेर तुमकुं बुलावत हे सो तुम जाओ ॥ तब छीतस्वामीनें बाहर आयके चारौचौबानसे कही मोकुं टोना लगगयोहे तुम भाग जावो नहिंतो तुमकोलगजायगो ये सुनके चारौ चौबे

भाग गये छीतस्वामीनें एक पद करिके गायो ॥ राग नट ॥ भई अब गिरिधरसों पहेंचान ॥ कपटरूपधरिछल्लवे-
 आयो पुरुषोत्तमनहिजान ॥ १ ॥ छोटीबडोकल्लनहिजान्यो-
 छायरह्योअज्ञान ॥ छीतस्वामिदेखतअपनायोश्रीविठ्ठल-
 कृपानिधान ॥ २ ॥ ये पद सुनके श्रीगुसाईंजी प्रसन्न भए ॥
 और छीतस्वामी रातहुं उहां सोय रहे फेर दूसरे दिन
 छीतस्वामीहुं श्रीगुसाईंजीनें निवेदन करवाये ॥ तब छीत-
 स्वामीहुं साक्षात् कोटिकंदर्प लावण्य पूर्णपुरुषोत्तमके
 दर्शन भये ॥ और भगवल्लीलाको अनुभव भयो और
 श्रीगुसाईंजी तथा श्रीठाकुरजीके स्वरूपमें अमेदनिश्चय
 भयो दोनो स्वरूप एकहै ऐसे जानन लगे तब छीत-
 स्वामी गोपालपुर श्रीनाथजीके दर्शनहुं गये ॥ उहां
 श्रीनाथजीके पास श्रीगुसाईंजीहुं देखे ॥ जब बाहेर
 निकसके पूछी जो श्रीगुसाईंजी कब पधान्ये है ॥ तब
 उहांके लोगननें कही जो श्रीगुसाईंजी तो गोकुल-
 विराजैहै ॥ जब छीतस्वामी उहांति श्रीगोकुलमें आयके
 श्रीगुसाईंजीके दर्शन किये ॥ जब छीतस्वामीनें ये नि-
 श्चय कियो जो श्रीनाथजी तथा श्रीगुसाईंजी एकही स्व-
 रूप है ॥ जबसुं छीतस्वामीजीनें “गिरिधरन श्रीविठ्ठल”
 ऐसी छापके बहुत पद गाए ॥ सो वे छीतस्वामी ऐसे कृ-
 पापात्र भगवदीय हते ॥ प्रसंग ॥ १ ॥ सो वे छीतस्वामी
 वीरबलके पुरोहित हते ॥ सो वे वीरबलके पास वसौंधी
 लेवेहुं गए तब सवारके समें छीतस्वामीनें यह पद गाये ॥
 “ जेवसुदेव किये पूरण तप सोई फल फलित श्रीवल्लभ-

देह" ॥ ये पद छुनके वीरवल बोले जो मैंतो वैष्णव हूं परंतु ये बात देशाधिपति छुनेगे तो तुम कहा जवाब देओगे वे तो स्लेच्छ है ॥ तब छीतस्वामी बोले जो देशाधिपति पूछेंगे तो मैं नीके जवाब देउंगो और मेरे मनसूं तो तूही स्लेच्छ है ॥ आज पीछे तेरो मुख न देखुंगो ऐसे कहेके छीतस्वामी चले गए ॥ जब ये बात देशाधिपतीनें सुनी तब वीरवलसूं पूछो जो तुमारे पुरोहित क्यों रिसाय गए ॥ तब वीरवलनें सब बात देशाधिपतिआगे कही ॥ ब्राह्मण-छोग हृथा रिस बहुत करे है तब देशाधिपतीनें कही जो तुम और हम नावपें बैठे हते जब दीक्षितजीनें मोडुं आ-शिर्वाद दियो हतो तब मैंनें मणी भेट करी हती वे मणी कैसी हती जो पांच तोला सोना नित्य देती हती ॥ सो वे मणी दीक्षितजीनें श्रीयमुनाजीसें पटक दीनी ॥ जब मेरे मनमें बडो गुस्सा लय्यो तब मैंनें मणी पाछी सांगी ॥ तब दीक्षितजीनें श्रीयमुनाजीसें सुख सौच भरिके मणी काटी तब हमसुं कही तुमारी होयसो पहिचान लेओ ॥ जब हमसुं ये निश्चय भयो ये साक्षात् ईश्वरहै ईश्वरविना ऐसो कारज नहीं होयगो ये बात विचारकरतें तुमारे पुरोहितकी सब बात साचीहै सो तुमनें क्यों विचार न कयो ये बात छुनके वीरवल बहोत खिसानो भयो ॥ और कछु सोल्यो नहीं और ये बात श्रीगुसांईजीनें सुनी तब लाहोरके वैष्णव आये हते विनसों आज्ञा करी जो छीतस्वामीकी खबर राखते रहियो जब छीतस्वामी बोले जो मैंनें वैष्णवधर्म विक्रय करवेकुं लियो नहीं है मेरेतो विश्रांत-

घाट है सो आपकी कृपासों सब चलेगो ॥ ये बात सुनके श्रीगुसांईजी बहोत प्रसन्न भये ॥ प्रसन्न ॥ २ ॥ और एक-दिन वीरबल देशाधिपतीसों रजालके श्रीगोकुलमें जन्माष्टमीके दर्शकुं आयो ॥ पाछे वेषपलटायके देशाधिपती हूं छानेछाने आयो ॥ तब जन्माष्टमीके पालनाके दर्शन करे ॥ मनुष्यनकी शीडमें ॥ तब देशाधिपतीकुं श्रीगुसांईजीविना और कोईने पहिचान्यो नहैं ॥ तब छीतस्वामी कीर्तन करते हते ॥ और श्रीगुसांईजी श्रीनवनीतप्रियाजीकुं पालना झुलावते हते ॥ तब छीतस्वामीने ये पद गायो ॥ प्रियनवनीतपालने झूलेश्रीविठ्ठलनाथ झुलावेहो ॥ कवहुं-कआपसंगमिलझूले कवहुकउतरझुलावेहो ॥ १ ॥ कवहुं-कसुरंगखिलोनालैलै नानाभांतिखिलावेहो ॥ चकई फिर कनीलेविंगीटुझुणझुणहातवजावेहो ॥ २ ॥ भोजनकरत थालएकझारीदोउंमिलखायखवावेहो ॥ गुप्तमहारसप्रकटजनावेप्रीतिनईउफजावेहो ॥ ३ ॥ धन्यन्यभाग्यदासनिजजनकेजिनयहदर्शनपाएहो ॥ छीतस्वामीगिरिधरनश्रीविठ्ठलनिगमएककरगाएहो ॥ ४ ॥ ऐसे दर्शन छीतस्वामीकुं भए ॥ और देशाधिपतीकुं हूं ऐसे दर्शन भए ॥ और मनुष्यनकुं साधारण दर्शन भए ॥ तब देशाधिपती चले तब श्रीगुसांईजीने गुप्तरीतिसुं देशाधिपतीकुं महाप्रसाद दिवाये ॥ तब देशाधिपती आगरे आये ॥ फेर दूसरे दिन वीरबलहूं आए ॥ तब देशाधिपतीने वीरबलसुं पूछी जो कहा दर्शन किये ॥ तब वीरबलने कही श्रीनवनीतप्रियाजी पालना झुलते हते और श्रीगुसांईजी झुलावते हते ॥

तब देशाधिपतीनें कही ये बात झूठी है ॥ श्रीगुसाईंजी पालना झलते हते और श्रीनवनीतप्रियाजी झुलावते हते ॥ मोडुं ऐसे दर्शन भएहे ॥ और छीतस्वामी तुमारे पुरोहित ऐसे कीर्तनगावते हते ॥ और में तेरे पास ठाडो हतो ॥ तब वीरवलनें कही मोडुं ऐसे दर्शन क्यूं नहीं भये ॥ तब देशाधिपतीनें कही तुमकुं गुरुके स्वरूपको ज्ञान नहींहि ॥ और तुमारे पुरोहित छीतस्वामी जिनकुं इन बातको अनुभव है ऐसिनसों तुमारी प्रीती नहींहि ॥ जब तुमकुं ऐसे दर्शन काहेकुं होवें ॥ सो वे छीतस्वामी ऐसे कृपापात्र हते ॥ ॥ वार्ता संपूर्ण ॥ ॥ वैष्णव ॥ २ ॥ ॥ ॥

॥ श्रीगुसाईंजीकेसेवकचतुर्भुजदास कुंमनदासके बेटा तिनकी वार्ता—सो वे कुंमनदासजी श्रीनाथजीके संग खेलते हते ॥ सो एकदिन कुंमनदासकुं श्रीगोवर्धननाथजीनें चारभुजा धरिके दर्शन दिये ॥ वाहीदिन बेटाको जन्म भयो जासूं वा बेटाको नाम चतुर्भुजदास धर्यो ॥ ये बात कुंमनदासजीकी वार्तामें लिखीहि सो वे चतुर्भुजदासजी ११ दिनके भये ताही समय कुंमनदासजीनें श्रीगुसाईंजीके पास लेजायके नाम सुनवाये और चतुर्भुजदास जब ४१ दिनके भये तब कुंमनदासजीनें श्रीगुसाईंजीके पास लेजाय निवेदन करवाये ॥ वादिनतें चतुर्भुजदासमें श्रीनाथजीनें इतनी सामर्थ्य धरी जब इच्छा आवे तब सुग्धवालक होय जाय और इच्छा आवेतो बोलवे चालवे सब अलौकिक बातें करवें लग-

जाय जब कुंमनदासजी एकांतमें बैठे तब चतुर्भुजदास कुंमनदाससाँ भगवद्वार्ता करें और पृच्छें और पद गावें और जब लौकिक मनुष्य आयजाय तब चतुर्भुजदास सुग्धवालक बनजाय ॥ ऐसी सामर्थ्य श्रीनाथजीनें चतुर्भुजदासमें धरदीनी ॥ सो जब श्रीनाथजी इच्छा करते तब चतुर्भुजदासकुं साथ खेलवेकुं लेजाते ॥ और जैसी लीलाके दर्शनकरते तैसे पद गावते ॥ सो वे चतुर्भुजदास ऐसे भगवत्कृपापात्र हते ॥ प्रसंग ॥ १ ॥ सो एकदिन श्रीनाथजी एक ब्रजवासीके घर माखनचोरीकरवेकुं पधारे और चतुर्भुजदासजीकुं संगले पधारे ॥ और उहां एकब्रजवासीकी बेटीके चतुर्भुजदास नजर आये और श्रीनाथजीतौ नजर नाहीं पहे ॥ और चतुर्भुजदास पकडाय गये सो विननें मार खाई ॥ पाछे चतुर्भुजदास श्रीनाथजीके पास गए ॥ जब चतुर्भुजदासजीनें कही जो महाराज मोकुंतो आछी मारखवाई ॥ श्रीनाथजीनें कही जो तेरेमें सामर्थ्य ओछी नहीं हती जब तू क्यों न भाग आयो ॥ सो वे चतुर्भुजदास श्रीनाथजीके अंतरंग लीलाअध्यपाती हते ॥ ताते इनकी वार्ता कहा कहिये ॥ प्रसंग ॥ २ ॥ और जादिन चतुर्भुजदासजीकुं प्रथम लीलाको अनुभव भयो वादिनतें सर्व व्यापी वैकंठ संवंधीलीला सर्वत्र दर्शवे लगी ॥ सो ये सामर्थ्य इनके भीतर श्रीगोवर्धननाथजीनें कृपाकरिके धरी जब कुंमनदासजीकुं पोढवेके दर्शन होते हते ॥ तब कुंमनदासजी कीर्तन गायवे लगे ॥ सो पदा ॥ “वे देखो-वरतश्चरीखनदीपकहरिपोढेउंचीचित्रसारी” ॥ सो इतनी-

तुक जब कुंमनदासजीनें गाई तब चतुर्भुजदासजी।गाचउठे
सुंदरबदननिहारनकारनबहुतयतनराखेकरप्यारी ॥ ये सु-
निकें कुंमनदासजीनें निश्चय कय्यो जो इनकुं श्रीगुसां-
ईजीकी कृपासों संपूर्ण अलुअव भयो ॥ सो बडी कृपा-
मानके बहोत प्रसन्न भयो ॥ जादिनतें चतुर्भुजदास कहंजाते
अथवा नहीं जाते अथवा अवार सवार आवते सो कुंमन-
दासजी कछु कहते नहीं ॥ ऐसी जानते जो श्रीनाथजीके
संग खेलत होएंगे ॥ सो चतुर्भुजदास ऐसे भगवत्कृपापात्र-
भगवदीय हुते ॥ प्रसंग ॥ ३ ॥ और एकदिन श्रीगोवर्धनना-
थजीके शृंगारके दर्शन चतुर्भुज दासजीनें कीने और श्री-
गुसांईजी आरसी दिखावते हते ॥ तासमें चतुर्भुजदासजीनें
ये पद गायो ॥ 'सुभगशृंगारनिरखभोहनकोलदरपणकरपि-
यहिदिखावें' आपुननेकनिहारियेवलिजाऊंआजकीछवि-
कछुकहत न आवें ॥ १ ॥ ता पीछे गोविंदकुंडुडउपर श्रीगु-
सांईजी पधारि तब एकवैष्णवनें पूछ्यो जो महाराज चतु-
र्भुजदासजीनें आजकी छवि कछु बरनि न जावै ॥
एसे गायो और आपतो नित्य शृंगार करे है और
आरसी दिखावैहै ॥ सो आजके पदको अभिप्राय कछु
समझमें नहीं आयो ॥ जब श्रीगुसांईजीनें कही सो चतु-
र्भुजदाससों पूछ्यो ॥ तब वा वैष्णवनें चतुर्भुजदाससों
पूछी ॥ जब चतुर्भुजदासजीनें औरभी पद गायो ॥
"सो पद ॥ माईरीआजऔरकालऔरछिनछिनप्रति और
और" ॥ ये पद सुनिके वा वैष्णवनें श्रीगुसांईजीसों पूछ्यो
जो भगवल्लीला तो नित्यहै और सर्वत्र है ॥ जब चतुर्भु-

जदासजीनें और और क्यों कही ॥ तब श्रीगुसांईजीनें आज्ञाकरी ॥ भगवल्लीलामें विलक्षणपणो येईहै जो नित्य है और क्षणक्षणमें नूतन लागत है और लीलास्थ जीवनकूं और लीलाके दर्शनकरवेवारेनकूं क्षणक्षण नूतन लागतहै और नूतन रुचि उपजेहै ॥ सो गोपालदासजीनें गायोहै ॥ चौथे आख्यानमें पांचवी तुक ॥ एकरसनाकि-मकहंघुणप्रकटविविधविहार ॥ नित्यलीलानित्यनूतनश्रु-तिनपामेपार ॥ ऐसी भगवल्लीला है ॥ ये सुनके वो वैष्णव वहोत प्रसन्न भयो ॥ और वे चतुर्भुजदास ऐसे कृपापात्र हुते जो जिनको नित्यलीलाको अनुभव सर्वत्र होयगयो ॥ प्रसंग ॥ ४ ॥ एकदिन श्रीगुसांईजी श्रीगोकुल विरा-जते और श्रीगिरिधरजीसों लेके सब बालक श्रीजीद्वार विराजते हते ॥ तब उहां रासधारि आये तब श्रीगोकुल-नाथजीनें श्रीगिरिधरजीसों पूछकें परासोलीमें रास क-रायो ॥ और रासमें खूब गान भयो ॥ जब चतुर्भुजदा-सजीसुं श्रीगोकुलनाथजीनें आज्ञा करी जो तुम कछु गावो ॥ तब चतुर्भुजदासजीनें कही जो भरे सुनवेवारे श्रीनाथजी नहीं पधारे हैं जासुं मैं कैसे गाऊं ॥ जब श्री-गोकुलनाथजीनें कही जो श्रीनाथजी अबी पधारेंगे ॥ ये बात श्रीगोकुलनाथजीकी सत्य करवेकेलियें श्रीना-थजी जागके और श्रीगिरिधरजीकुं जगायके श्रीना-थजी परासोली पधारे और श्रीगिरिधरजी पधारे और चतुर्भुजदासकूं और श्रीगोकुलनाथजीकूं दर्शन भये ॥ और कोईकुं दर्शनभये नहीं ॥ तब श्रीनाथजीके दर्शन-

करके चतुर्भुजदासजी गावे लगे ॥ जब अधिक सुख भयो
 रातहुं बढ गई और चतुर्भुजदासजीनें गायो सो पद ॥
 अद्भुतनटमेखधरेयशुनातटस्याससुंदरगुणनिधानगिरि-
 वरधरनरासरंगराचें ॥ पद दूसरो ॥ प्यारीश्रीदासुजमेले-
 नृत्यतप्रियासुजान ॥ ऐसे ऐसे चतुर्भुजदासजीनें बहुत
 पदगाये जब रासभयो तब परम आनंदभयो ॥ फेर श्री-
 गिरिधरजीनें श्रीनाथजीकुं रातकेजगेजानके सवारे ज-
 गाए नहीं इतनेमें श्रीसुसाईजी गोकुलमें पधारे और
 पूछी जो कहासमयहै ॥ जब श्रीगिरिधरजीनें कही जो
 श्रीनाथजी जागेनहींहै ॥ रातकुं रासमें जगे हते ॥ जब
 श्रीसुसाईजीनें कही जो श्रीनाथजीतो सदैव रास करेंहे
 और सदैव जगेहै जासुं शंखनाद करावो ॥ जब शंखनादकर-
 रायके श्रीनाथजीकुं जगाए ॥ फेर श्रीगोकुलनाथजीकुं
 श्रीसुसाईजीनें आज्ञा करी ॥ जो ऐसो आग्रह करिके श्री-
 नाथजीकुं पधरावने नहीं ॥ एतो सदैव अपनी इच्छाते
 रास करतहै जासुं वीनतीकरिके पधरावने नहीं ॥ वे चतु-
 र्भुजदासजी ऐसे कृपापात्र हते के श्रीनाथजीके विना दूस-
 रे ठिकानें मान नहीं करत हते ॥ प्रसंग ॥ ५ ॥ एकदिन
 श्रीसुसाईजीनें चतुर्भुजदाससां आज्ञा करी जो अपछरा-
 कुंडलपर जायके रामदासभीतरीयाकुं बुलायलावो और
 तुम फूल लेआवो तब चतुर्भुजदास जायके रामदासजीकुं
 बुलायके आप फूल वीनके आवते हते ॥ जब श्रीगोवर्ध-
 नपर्वतकी कंदरासुं बाहेर श्रीनाथजी श्रीस्वामिनीजी स-
 हित पधारे और श्रीस्वामिनीजीनें मनमें ये विचार कयो

जे यह लीला कोई जानेवहीं इतनेमें चतुर्भुजदासजीने दर्शन करिके ये पद गायो ॥ " गोवर्धनगिरिसधनकंदरारैनिवासकियोपियप्यारी ॥ और दूसरो पद गायो ॥ " रजनीराजकियोनिहुंजनगरकीरानी" ये पद सुनके श्रीस्वामिनीजी प्रसन्न भई ॥ फेर चतुर्भुजदासजी फूललेके श्रीगुसाईंजीके पास गए ॥ सो वे चतुर्भुजदासजी ऐसे छुपापात्र हते जो श्रीनाथजीके तथा श्रीस्वामिनीजीके मनकीजानवेवारे भये ॥ प्रसंग ॥ ६ ॥ सो चतुर्भुजदासजीकी वह एकदिन श्रीनाथजीके चरणारविंदमें पहुँचगई जब चतुर्भुजदासजीहुं सूतक आयो सूतकमें चतुर्भुजदासजी वनमें बैठके नित्य कीर्तन करते ॥ तब श्रीगोवर्धननाथजी बिनके चारौ और दूर दूर खेलै करते ॥ जब श्रीगोवर्धननाथजीने आज्ञा करी जो चतुर्भुजदास तुम दूसरो विवाह करौ ॥ जब चतुर्भुजदासने कही जो जातमें कन्या नहीं मिलेहै जब श्रीनाथजीने कही जो तुम धरेजा करौ ॥ जब चतुर्भुजदासजीने धरेजा कन्यो ॥ तब श्रीगोवर्धननाथजी नित्य चतुर्भुजदाससौं हांसी मस्करी करते ॥ सो चतुर्भुजदासजी ऐसे अंतरंग भगवदीय हते ॥ ॥ प्रसंग ॥ ७ ॥ एक समय श्रीगुसाईंजी परदेस पधारे हते तब श्रीगिरिधरजीकी ऐसी इच्छा भई जो श्रीनाथजीहुं मथुरामें अपने घर पधरावें तौ ठीक ॥ जब श्रीनाथजीकी आज्ञा लैके फागनवदीषष्टीकेदिनसैनपीछे श्रीनाथजीहुं मथुरा पधराए ॥ और फागनवद ७ केदिन बढी उत्सव मान्यो और जो कछु घरमें हतो सो सर्वस्व अर्पण कन्यो

और बेटीजीनें एक वीटी घर राखीहती ॥ बेटीजी बालक हते जासूं ससन्नते नहीं हते ॥ सो विटीहूं श्रीनाथजीनें मांगलीनी ॥ कारण जो श्रीगिरिधरजीनें सर्वस्व अर्पण करवेकी प्रतिज्ञा करीहती सो प्रतिज्ञा सत्यकरिवेकेलियें श्रीनाथजीनें वीटी मांगलीनी और नित्य चतुर्भुजदास गिरिराजजी ऊपर बैठके विरहके पद और हिल्लके पद गायोकरते ॥ और श्रीनाथजी नित्य विनकुं संध्यासमें गायनकेसंग पधारते दर्शन देते ॥ सो वैशाख शुद्धि त्रयोदशीके दिन चतुर्भुजदासजीनें ये पद संध्यासमें गायो। श्रीगोवर्धनवासीसांवरैलालतुलबिनरह्योनजायही। या पदकी छेलीतुक श्रीनाथजीनें पधारतेही सुनि तब कलुषान्याकुल भये और मनमें ये विचार कन्यो जो सर्वथा काल इहां पधारंगो जासूं भक्तकी दुःख दुःख देखके श्रीनाथजीसे रह्योनगयो ॥ जब रात्र एकप्रहररही तब श्रीनाथजीनें वैशाखशुद्धि चौदसकेदिन श्रीगिरिधरजीकुं आज्ञा करी जो आज गोवर्धनपर्वतऊपर राजभोग अरोगुंगो जब श्रीगिरिधरजीनें मंगलाकरायके श्रीनाथजीकुं पधराए ॥ और पहेले मनुष्य पठायकें मंदिर खासा करा यो और श्रीनाथजीकुं पधारते अवार होयगई ॥ जासूं राजभोग तथा शयनभोग एकसमयमें अरोगे। वा दिनसुं आजदिनपर्यंत वृसिधचतुर्दशीकेदिन श्रीनाथजी द्वायसमें राजभोग अरोगेंहें ॥ एकतो नित्यकेसमें और एक शयनभोगके संग ॥ वे चतुर्भुजदास श्रीनाथजीके ऐसे कृपापात्र हते जो तिनविना श्रीनाथजीसों रह्यो

न गयो ॥ प्रसंग ॥ ८ ॥ एकसमय चतुर्भुज दास श्रीगुसांईजीकेसंग श्रीगोकुल गए और श्रीनवनीत-प्रियाजीके दर्शन करे और बाललीलाके तथा [पाल-नेके कीर्तन करे ॥ और दर्शन करके फेर गोपालपुर आए जब कुंमनदासनें पूछ्यो जो कहांगयोहतो ॥ तब विननें कही श्रीगोकुलगयो हतो ॥ जब कुंमनदासजीनें कही प्रमाणमें क्योंजाय पढयो हतो ॥ तब चतुर्भुजदासनें श्रीगुसांईजीसों पूछी जो प्रमाणप्रकर्णकीलीला और प्रमे-यप्रकर्णकी लीलामें कितनी भेद है ॥ जब श्रीगुसांईजीनें कही जो भगवल्लीला सब एक समानहै ॥ कुंमनदासजी-कुं किशोरलीलामें बहोत आसक्ती है जाई ऐसे बोले भ-गवल्लीलामें भेद समझनो नहीं और श्रीठाकुरजी विरुद्ध-धर्म आश्रयहैं ॥ एककालावच्छिन्न श्रीप्रभु सर्वत्र सबलीला करतेहैं ॥ ये सुनके चतुर्भुजदासजी बहोत प्रसन्न भए ॥ वे चतुर्भुजदास श्रीगुसांईजीके ऐसे कृपापात्र हते ॥ जिनसूं श्रीगुसांईजी कछु गुप्त नहीं राखते हते ॥ प्रसंग ॥ ९ ॥ और चतुर्भुजदासजीके पाछें चतुर्भुजदासजीके बेटा राघोदास हते ॥ सो विनकूं भगवल्लीलाको अनुभव भयो जब राघो-दासजीनें धमार गाई ॥ सो धमार ॥ 'एचलजांएंजहांहरि-क्रीडतगोपिनसंगा' ॥ ये धमारकी जब दस तुक भई तब राघोदासकी देह छूटी ॥ सो भगवल्लीलामें प्रवेश भयो ॥ तब राघोदासजीकी बेटीनें डेढतुक धरके धमार पूरी करी ॥ वे चतुर्भुजदास तथा विनके बेटा विनकी बेटी ये सब ऐसे कृपापात्र हते ॥ ताते इनकीवार्ता कहांताईलिखिये ॥ ॥ प्रसंग ॥ १० ॥ वार्ता संपूर्ण वैष्णव ॥ ३ ॥ ❀ ॥ ॥

बल्लीलासै मन सग्न होयगयो ॥ अनेकलीलानको अलु-
भव होवै लग्यो ॥ भरे घरके चोरकी सीलाई लोहित
भये ॥ ऐसैं करते सवारो होयगयो ॥ कछु छुदिरही-
नहीं ॥ तब श्रीगुसाईंजी पधारके नंददासजीके कानमें
कही के नंददासजी उठो दर्शनकरो ॥ जब नंददासजी
उठके ठाढे भये तब नंददासजीने उठके श्रीगुसाईंजीके
दर्शन करके ये पद गायो ॥ 'प्रात समय श्रीवल्लभसुत-
कोउठतहिरसनालीजियेनाम' ॥ इत्यादिक पद गायके ॥
श्रीनवनीतप्रियाजीके दर्शन करे ॥ दर्शन करत मात्रही
भगवल्लीलाकी स्फूर्ती भई जब पालनेको पद गायो ॥
'बालगोपालललनकोमोदभरीयशुभतिहुल्लावत ॥ इत्या-
दि भगवल्लीलासंबंधी बहुत पद नये करके गाये ॥ सो नं-
ददासजीके ऊपर श्रीगुसाईंजीने ऐसी कृपा करी तब सब-
ठिकानेनसों बिनको मनस्वीचके श्रीप्रभुनमें लगाय
दीनो ॥ सो वे क्षत्रीकी बहू जिनसों नंददासजीको मन
लाग्यो हतो सो वे क्षत्रीकी बहू नंददासजीकुं रस्तामें
पांच सात वार नित्य दीखती हती ॥ परंतु नंददासजी
वाकी आडी देखतेही न हते ॥ ऐसैं श्रीगुसाईंजीकी कृपाते
ऐसो मनको निरोध होयगयो हतो ॥ जासुं इनके भाग्यकी
बडाई कहा कहिये ॥ प्रसंग ॥ १ ॥ तापाछे श्रीगुसाईंजी
श्रीजी द्वार पधारे ॥ सो नंददासजीकुं आज्ञा करके संग
लेगये ॥ तब नंददासजीने जायकर श्रीगोवर्धननाथ-
जीके दर्शन करे ॥ सो साक्षात् कोटिकंदर्पलावण्यपूर्णपु-
रुषोत्तमके दर्शन भये ॥ सो दर्शन करके नंददासजी

बहुत प्रसन्न भये ॥ और नंददासजीकूं किशोरलीलाकी स्फूर्ती भई ॥ तब उत्थापनको समय हतो ॥ सो श्रीगुरुसाईजीकी आज्ञा पायकें यह पद गायो ॥ 'सोहतसुरंगदुरंगीपागकुरंगललनाकेसेलोनलोने' ॥ यह पद गायकें अपने मनमें नंददासजीनें बड़े भाग्य माने ॥ फिर संध्याआरतीसमय दर्शन करे ॥ तब ये पद गाये ॥ 'वनतेसखनसंगगायनकेपाछेपाछे आवतमोहनलालकन्हई' ॥ १ ॥ वनतेआवतगावतगौरी ॥ २ ॥ देखसखीहरकोवदनसरोज ॥ ३ ॥ घरनंदमहरकेमिसहीमिसआवतगोकुलकीनारी ॥ ४ ॥ याभांतसूं नंददासजीनें इत्यादिअनेक पद गाये ॥ सो नंददासजी कोईदिन श्रीगिरिराजजी रहते कोई दिन श्रीगोकुल आवते ॥ जिनकूं संसार ऐसो फीको लागतो ॥ जैसे मनुष्यकूं उलटी देखके बुरो लगे ॥ जासूं वे औरठिकाने जाते नहीं हुते ॥ और श्रीमहाप्रभुजी और श्रीगुसाईजी और श्रीगिरिराजजी और श्रीयमुनाजी और श्रीब्रजभूमी इनको स्वरूप विचार्यो करते ॥ प्रभुनके दूसरे अवतारन पर्यंत कोई ठिकाने बिनको मन नहीं लागतो हुतो ॥ जासूं बिननें श्रीस्वामिनीजीके स्वरूपवर्णमें कब्योही ॥ 'बलीयेकुंवरकान सखीसेषकीजे' ॥ या पदमें कब्योही ॥ शिवमोहेजिनवेमोहनीजेकोई ॥ प्यारीकेपायनआजआनपरेसोई ॥ ऐसी दृष्टी जिनकी उंत्ती हती ॥ प्रसंगा॥२॥ सो वे नंददासजी ब्रजछोडके ॐ जो नहीं हुते ॥ सो नंददासजीके बड़े भाई नामसूं नकाशीमें रहते हुते ॥ सो बिननें म्भजो ॥ तब नंददास-

साईजीके सेवक भयेहैं ॥ जब तुलसीदासजीके मनमें ये
 साईके नंददासजीनें पतिव्रताधर्म छोड़ दियोहैं थापनेतो
 श्रीरामचंद्रजी पती हुते ॥ सो तुलसीदासजीनें ये विचारके
 नंददासजीकुं पत्र लिख्यो ॥ जो तुम पतिव्रताधर्म छोड़के
 क्यों तुमनें कृष्ण उपासना करी ॥ ये पत्र जब नंददास-
 जीकुं पहुंचो तब नंददासजीनें वाचके ये उत्तर लिख्यो ॥
 जो श्रीरामचंद्रजीतो एकपत्नी व्रतहैं सो दूसरी पत्नीनकुं
 कैसे संभारसकेंगे एकपत्नीहुं बरोबर संभार न सके ॥
 सो रावण हरलेगयो और श्रीकृष्णतो अनंत अबलानके
 स्वामीहैं और जिनकी पत्नी भये पीछे कोई प्रकारको
 भय रहे नहीं है ॥ एककालवच्छिन्न अनंतपत्नीनकुं सुख-
 देतहैं ॥ जासुं मैंने श्रीकृष्णपती कीनेहैं ॥ सो जानोगे ॥
 ये पत्र जब नंददासजीको लिख्यो तब तुलसीदासकुं लि-
 ख्यो तब तुलसीदासजीनें वाचके विचार कियो के नंद-
 दासजीको मन वहां लगगयोहैं ॥ सो वे अब आवेंगे
 नहीं ॥ सो इनकी टेक हमसुं अझिकीहै ॥ हमतो अगुध्या
 छोड़के काशीमें रहेंहैं ॥ और नंददासजीतो ब्रजछोड़के
 कहीं जाय नहीं हैं ॥ इनकी टेक हमारी टेकसुं बडीहै ॥
 सो वे नंददासजी ऐसे कृपापात्र भगवदीयहुते ॥ प्रसंग ॥
 ॥ ३ ॥ सो एकदिन नंददासजीके मनमें ऐसी आई ॥ जो
 जैसे तुलसीदासजीनें रामायण भाषा करीहै ॥ सो हमहुं
 जैसे स्वतभाषाकरें ये बात ब्राह्मण लोगननें सुनी
 जिके दर्शन मिलके श्रीगुसाईजीके पास गये ॥ सो
 रूपोत्तमके दर्शन मिलके श्रीगुसाईजीके पास गये ॥ सो
 " जो श्रीमद्भागवतभाषा होयगो

तो हमारी आजीविका जाती रहेगी ॥ तब श्रीगुसाईं-
 जीनें नंददासजीसुं आज्ञा करी ॥ जो तुम श्रीमद्भागवत
 भाषा मतकरो और ब्राह्मणनके क्लेशमें मत परो ॥ ब्रह्म-
 ह्येश आछो नहीं है और कीर्तन करके ब्रजलीला गाओ ॥
 जब नंददासजीनें श्रीगुसाईंजीकी आज्ञा मानी ॥ श्रीम-
 द्भागवतभाषा न क्यो ॥ ऐसो श्रीगुसाईंजीकी आज्ञाको
 विश्वास हतो ॥ ऐसे परमकृपापात्र भगवदीय हुते ॥
 प्रसंग ॥ ४ ॥ सो नंददासजीके बडे भाई तुलसीदासजी
 हते ॥ सो काशीजीते नंददासजीकुं मिलवेकेलिये ब्रजमें
 आये ॥ सो मथुरामें आयके श्रीयमुनाजीके दर्शन करे
 पाछे नंददासजीकी खबर काढके श्रीगिरिराजजी गये
 उहां तुलसीदासजी नंददासजीकुं मिले ॥ जब तुलसी-
 दासजीनें नंददासजीसुं कही के तुम हमारे संग चलो ॥
 गाम रुचे तो अयोध्यामें रहो ॥ पुरी रुचे तो काशीमें
 रहो ॥ पर्वत रुचे तो पित्रकूटमें रहो ॥ वन रुचे तो दंड-
 कारण्यमें रहो ॥ ऐसे बडेबडे धाम श्रीरामचंद्रजीनें पवित्र
 करेहै ॥ तब नंददासजीनें उत्तर देवेकुं ये पद गावौ सो
 पद ॥ जोगिरिरुचेतोवसोश्रीगोवर्धनगामरुचेतोवसोनंद-
 गाम ॥ नगररुचेतोवसोश्रीमधुपुरीसोभासागरअतिअभि-
 राम ॥ १ ॥ सरितारुचेतोवसोश्रीयमुनातटसकलमनोरथ-
 पूरणकाम ॥ नंददासकाननरुचेतोवसोभूमिदंडावन-
 धाम ॥ २ ॥ यह पद सुनके तुलसीदासजी बोले जो
 ऐसो कोनसो पाप है ॥ जो श्रीरामचंद्रजीके नामसूं न
 जाय ॥ जासूं तुम श्रीरामचंद्रजीकुं भजो ॥ तब नंददास-

जीनें एक कीर्तनमें उत्तर दियो ॥ सो पद ॥ कृष्णनाथज-
 वतेंमेंश्रवणसुन्योरीआलीसूलीरीसवनहोंतोवावरीमईरी॥
 भरभरआवैनयनचितहुंनपरेचैनसुखहुंनआवैनतनकी-
 दशाकलुऔररहीरी ॥ १ ॥ जेतेकनेमधर्मब्रतकीनेरीसैव-
 हुविधर्मगोअंगमईमेंतोश्रवणमईरी ॥ नंददासप्रभुजाके-
 श्रवणसुनेयहगतिमाधुरीसूरतकेधोंकैसीदईरी ॥ २ ॥ ये
 पद सुनके तुलसीदास छुप रहे ॥ जब नंददासजी श्रीना-
 थजीके दर्शन करवैकू गये ॥ तब तुलसीदासहुं उनके
 पीछे पीछे गये ॥ जब श्रीगोवर्धननाथजीके दर्शन करे
 तब तुलसीदासजीनें साथो नमायोनहीं॥ तब नंददासजी
 जान गये ॥ जो ये श्रीरामचंद्रजीविना और दूसरेहुं नहीं
 नमैहे ॥ जब नंददासजीनें मनमें विचारकीनो यहां और
 श्रीगोकुलमें इनकुं श्रीरामचंद्रजीके दर्शन कराऊं ॥ तब
 ये श्रीकृष्णको प्रयाव जानेंगे ॥ जब नंददासजीनें श्री-
 गोवर्धननाथजीसों बीनतीकरी ॥ सो बोहा ॥ आजकी-
 सोभाकहाकहुंमलेविराजेनाथ ॥ तुलसीमस्तकतवनमे-
 घलुषबाणलेओहाथ ॥ ये बात सुनके श्रीनाथजीकों श्री-
 गुसाईंजीकी कानतें विचार भयो ॥ जो श्रीगुसाईंजीके
 सेवक कहें सो हमकुं मान्यो चाहिये ॥ जब श्रीगोवर्ध-
 ननाथजीनें श्रीरामचंद्रजीको रूप धरके तुलसीदासजीकुं
 दर्शनदिये ॥ तब तुलसीदासजीनें श्रीगोवर्धननाथजीकुं
 साष्टांग दंडवत करी ॥ जब तुलसीदासजी दर्शन करके
 बाहिर आये ॥ तब नंददासजी श्रीगोकुल चले जब तुल-
 सीदासजीहुं संग संग आये तब आयके नंददासजीनें
 श्रीगुसाईंजीके दर्शन करे ॥ साष्टांगदंडवत करी और

तुलसीदासजीनें दंडवत करी नहीं ॥ और नंददासजीकुं तुलसीदासजीनें कहीं के जैसे दर्शन तुमनें वहां कराये वैसेही यहां कराओ ॥ जब नंददासजीनें श्रीगुसांईजीसों वीनती करी ये मेरे भाई तुलसीदासहै ॥ श्रीरामचंद्रजी-विना औरकुं नहीं नमेंहै तब श्रीगुसांईजीनें कहींके तुलसीदासजी बैठो ॥ जब श्रीगुसांईजीके पांचमेंपुत्र श्रीरघुनाथजी वहां ठाढे हुते ॥ और विन दिननमें श्रीरघुनाथजीको विवाह भयो हतो ॥ जब श्रीगुसांईजीनें कही रघुनाथजी तुझारे सेवक आयेहै ॥ इनकुं दर्शन देवो तब श्रीरघुनाथलालजीनें तथा श्रीजानकीवहूजीनें श्रीरामचंद्रजीको तथा श्रीजानकीजीको स्वरूप धरके दर्शन दिये ॥ साक्षात् दर्शन भये ॥ तब तुलसीदासजीनें साष्टांगदंडवत करी ॥ याहीतें श्रीद्वारकेशजीनें मूलपुरुषमें ॥ गाचोहे ॥ “हेतुनिजअभिधानप्रकटेतातआज्ञामानके” ॥ और तुलसीदासजी दर्शन करके बहुत प्रसन्न भये ॥ और पद गायो ॥ “वरणींआवधिगोकुलगाम” ॥ ये पद गायके तुलसीदासजी बिदा होयके अपने देशकुं गये ॥ सो वे नंददासजी श्रीगुसांईजीके ऐसे कृपापात्र भगवदीय हते ॥ जिनके कहेंतें श्रीगोवर्धननाथजीकुं तथा श्रीरघुनाथजीकुं श्रीरामचंद्रजीको स्वरूप धरके दर्शन देणे-पढे ॥ जासुं इनकी वार्ता कहांताई लिखिये ॥ वार्ता संपूर्ण ॥ ॥ वैष्णव ॥ ४ ॥

श्रीगुसांईजीके सेवकनागजीभाईसाठोदराना-गर तिनकी वार्ता ॥ नागजीभाई श्रीमहाप्रभुजीके पास

सेवक होवेको गए ॥ जब श्रीमहाप्रभुजी विचारे जो नाग-
 जीद्वारा सृष्टी बहोत अंगीकार होयगी ॥ और नागजी-
 भाईके संगते देवीजीव प्रभुनके सन्मुख होएंगे ॥ और पु-
 ष्टिमार्गके सिद्धांतके पात्र नागजीभाईहै ॥ और इनकोबंध
 बद्धतवर्षपर्यंत चलेगो ॥ जासूं ये लालजीकी शरण जां-
 एंतो बहुत आछो ॥ जासूं श्रीमहाप्रभुजीनें आज्ञा करी
 जो तुम लरकाके सेवक होवो ॥ तब नागजीभाई श्रीगु-
 साईजीके सेवक भए सो वे नागजी ऐलेंकृपापात्र भगव-
 दीय हते ॥ प्रसंग ॥ १ ॥ और वे नागजी गोधरामासेके
 देसाई हते ॥ और कछुकारणछु सरकारमें आजीविका
 बंदभई हती सो वे नागजीभाई बडे संकोचमें आयगये
 इतनेमें नागजीभाईकी बेटीको विवाह आयो ॥ सो वे
 वात खंभातके वैष्णवननें छुनी ॥ सहजपालडौशी तथा
 माधवदासदलाल तथा जीवापारिख नागजी भाईके
 जेही हते ॥ सो विननें नागजीकीबेटीके विवाहकी खबर
 छुनी ॥ जब विननें दसहजार रुपैया गोधरामें नागजीकुं
 पठाये ॥ सो वे रुपैया नागजीभाईकुं पढ़ंचे ॥ तब नागजी-
 भाईनें विचार कय्यो जो ये द्रव्यतो वैष्णवनकोहै ॥ और
 वैष्णवननेंतो मोकुं वैष्णवसंबंधसो पठायोहै ॥ जासूं ये द्रव्य
 लौकिकमें नहीं खरचाय तो आछो ॥ आपदा कालतो
 चार दिनमें मिटजायगो ॥ जब वे द्रव्यकी सोनामोहर
 लेके एकलाकडीमें भरके अडेलको चले ॥ जब रस्तामें
 एक वैष्णवढोकरी रहती हती वा ढोकरीकुं श्रीठाकुरजीनें
 स्वप्नमें आज्ञा करि ॥ जो काल नागजी कासिदको वेप-

धरि आवेंगे तिनकुं तुम प्रसाद लेवाइयो ॥ जब दूसरे-
 दिन परदेसिनके उतारामें वा डोकरीनें नागजीभाईकुं
 हंडपाए ॥ तब वा डोकरीनें कही जो मैं तुमारी ज्ञातीकी
 हूं और श्रीगुसाईंजीकी सेवक हूं जासूं मेरेघर प्रसाद
 लेवेकुं चलो तब नागजीभाईनें नाहीं कही ॥ तब नाग-
 जीभाई उहांसे चले ॥ जब दो मजिल गये तब श्रीठाकु-
 रजीने स्वप्नमें आज्ञा करी जो तुमनें वा डोकरीके घर
 प्रसाद क्योंनलियो ॥ वा डोकरीकुं मैनें आज्ञा करी हती
 तब नागजी फिरके वा डोकरीके घर प्रसादलेवेकेलिएं पा-
 छे आयके उहां तीनदिन रहे ॥ और वा डोकरीकुं कही
 जो तुमकुंश्रीठाकुरजीनें आज्ञा करी हती सो मोकुं
 क्यों न कही ॥ तब वा डोकरीनें कही जो तुमतो श्रीठा-
 कुरजीके अंगही मैं इन बातनमें कहासमझूं हूं तब ना-
 गजी ये सुनके और डोकरीकी नभ्रता देखके बहुत प्रसन्न
 भये ॥ फिर उहांतें नागजी अडेलगाममें आये ॥ और श्री-
 गुसाईंजीके दर्शन करे ॥ और वे लाठी भंडारीकुं दीनी और
 कही जो ये लाठी वैष्णवननें दीनीहै सो श्रीगुसाईंजीकुं
 दीजिये ॥ ये कहेके नागजीभाई ब्रजमें गये और पाछें
 भंडारीनें लाठी श्रीगुसाईंजीके आगे खोली तब द्रव्य नि-
 कस्यो ॥ और नागजीभाईतो तीनमहिना श्रीनाथजी-
 द्वारमें रहे ॥ और पाछें ते गोधरामें सब पंचननें हाकमसो
 कहेके नागजीभाईकी आजीविका खुली कराई ॥ और
 चढयो द्रव्य लेके नागजीभाईकी बेटीको विवाहकरदियो
 जब नागजीभाई गोधरामें आए तब दसहजाररुपैया

खंभातमें पठाय दिये ॥ तब खंभातके वैष्णवननें विचार कन्यो जो ये द्रव्यतो नागजीभाईकुं हमनें बैरैहीं दियो-हतो सो अब कैसें लियोजाय ॥ जब वे द्रव्य खंभातके वैष्णवननें श्रीगुसाईंजीके पास भेजदिये ॥ सो वे नागजीभाई ऐसे भगवदीय और अनुभवी हते ॥ श्रीगुसाईंजीके स्वरूपमें ऐसे आसक्त हते जो वर्षमें गोधरासूं दो-वार जरूर दर्शनकुं आवते ॥ प्रसंग ॥ २ ॥ एकदिन वे नागजीभाईकुं गोधराके हाकमनें राजनगर पठायो ॥ पातहाहके पास जागीर बढाईवेके लिये और दौयहजार रूपैया खरचवेकुं दिये ॥ तब वे नागजीभाई राजनगर आये सो उहां एक चीर दक्षणको अति सूक्ष्म देख्यो ॥ सो हजाररूपैयामें लेके श्रीगोकुल गए ॥ और जायके श्रीगुसाईंजीकुं चीर भेट कन्यो ॥ और फेर राजनगर आए देशाधिपतीकुं मिलकरके पांचगुणी जागीरको पढावढ-वायलिये ॥ फेर गोधरा जायके हाकमकुं खबर दीनी ॥ हाकम ये बात सुनके बहुत प्रसन्न भयो और एक महा-लके पांच महाल भए ॥ तादिनतें आजसूधी गोधरापंच-महाल कह्योजायहै ॥ सो नागजीभाईको स्नेह प्रभुनमें निष्काम हतो ॥ और लौलिककुं तुच्छमानते हते ॥ और बिनके लौकिककार्य प्रभु आपसोंआप सिद्ध करते ॥ ॥ प्रसंग ॥ ३ ॥ और एकसमय श्रीगुसाईंजी द्वारिका प-धारे हते ॥ नागजीभाई राजनगरसों आव लेके द्वारिका पहुंचे ॥ और श्रीगुसाईंजीके दर्शन करिके आवनकी वी-नती करी ॥ जब श्रीगुसाईंजीनें कही श्रीरणछोडजीके मं-

दिरमें पड़ुंचायदेवो ॥ जब नागजीनें आंव पड़ुंचायके दूसरे आंव मनुष्यकुं पठाय राजनगरसों फेर मंगवाये ॥ तब श्रीगुसाईंजीकुं वीनति करी जो ये आंव आपके डेरामें रणछोडजीकुं पधरायके अंगीकार करावें ॥ जब श्रीगुसाईंजीको डेरो राम लक्ष्मणजीके मंदिरकेपास हतो ॥ जब उहां श्रीगुसाईंजीनें श्रीरणछोडजीकुं पधरायके आंव भोगधरे और नागजीभाईकुं साक्षात् श्रीरणछोडजीके दर्शन भये ॥ जबतें श्रीगुसाईंजीकी बैठक वा ठिकाणे भई ॥ और उहां श्रीगुसाईंजीके मनमें ऐसी आई ॥ जो ऐसैं आंव श्रीनाथजीअरोगें तो ठीकहै ॥ जब नागजीभाईनें श्रीगुसाईंजीके मनकी जानी तब उहांसूं नागजीभाई चले सो राजनगरसूं आंव लेके श्रीनाथजी तथा श्रीनवनीतप्रियाजीके इहां आंव पड़ुंचायके फेर राजनगरसों दूसरे आंव लेके सो घाघाघुरघट गाममें श्रीगुसाईंजीकुं मिले ॥ और श्रीगुसाईंजीकुं उहांके सब समाचार कहे और पत्र आगे धरे ॥ जब श्रीगुसाईंजी मनमें विचारि जो नागजीविना मेरे मनकी कौन जाने ॥ तब नागजीभाई सों कही जो तुमारो कहा मनोरथहै ॥ जब नागजीभाईनें वीनती करी जो महाराज श्रीनाथजीकुं इहां पधरायके आंव भोगधरें जब मोकुं दर्शन होवें ॥ तब मेरो चित्त प्रसन्न होय तब श्रीगुसाईंजीनें वैसेही दर्शन नागजीभाईकुं कराये ॥ सो वे नागजीभाई ऐसैं कृपापात्र हते ॥ और श्रीगुसाईंजीनें विनमें ऐसी सामर्थ्य धरी हती ॥ जोचाहें जितनो बोज उठाय लेंते और चाहें जितनो रस्ता चलें

जाते ॥ दसदिनको रस्ता होय तहां एकदिनमें पहुँचजाते ॥ वे नागजीसाईं ऐसे कृपापात्र हते ॥ प्रसंग ॥ ४ ॥ एकसमें नागजीसाईं अडेलकू चले सो रस्तामें श्रीजीद्वार आये ॥ तब रामदासनें कही जो नागजीसाईं थोडेदिन इहां रहिके सेवा करौ ॥ तब नागजीसाईं उहां सेवामें न्हाए ॥ जब श्रीगुसाईंजीकुं एक श्लोक लिखपठाये ॥ सो श्लोक ॥ सरसिक्कुशेभ्यमप्यास्वादितुमागच्छतो लिनो-
 मार्गे ॥ यदिकनककमलपानेनासीत्तोषःकिसन्येन ॥ १ ॥ जब अडेलमें वे पत्र श्रीगुसाईंजीकुं पोहोच्यो तब श्रीगुसाईंजीनें दौय श्लोक लिखपठाये ॥ श्लोक ॥ नाश-
 कुशेभ्यमानसमर्थयसेयत्प्रियोमधुर्पः ॥ तस्मिस्तुष्टतोपो-
 दुस्थेदौस्थ्यंहिनिरुपसन्नेहात् ॥ १ ॥ यद्यत्त्रिपिनिरुप-
 धिभावश्चभावतःसमागच्छेत् ॥ निरवधितोपोस्त्यापिप्र-
 भवेदेवेति किंवाच्यं ॥ २ ॥ ये श्लोक वाचिकें नागजी ब-
 होत प्रसन्न भये ॥ और अडेलजाय फिर श्रीगुसाईंजीके दर्शन किये ॥ प्रसंग ॥ ५ ॥ और एकसमें नागजीनें गो-
 धरातें श्रीगुसाईंजीकुं पत्र लिखे ॥ वामें लिख्यो जो श्री-
 गुबोधिनीजी तथा निबंध तथा अणुभाष्य और श्रीमहा-
 प्रसूजीके करे भये ग्रंथनको आशय थोडेमें समझ पडे सो लिख पठावेंगे ॥ तब श्रीगुसाईंनें दौय श्लोक लिख पठाये ॥
 ॥श्लोक॥श्री बल्लभाचार्यपथिप्रगाढंप्रैमैवचास्त्यव्यभिचा-
 रहैतुः ॥ तत्रोपसुकानवधोक्तमक्तिस्तत्रोपयोगोऽखिलसा-
 धनानाम् ॥ १ ॥ यःकुर्यात्सुंदराक्षीणांभवनेलास्यनर्तने॥
 तासां भावनयानित्यंसहिसर्वफलातुभाक् ॥ २ ॥ तब ये

श्लोक ॥ वांचके नागजीभाईकुं सगरो सिद्धांत स्फुरित
भयो ॥ सो वे नागजीभाई ऐसे कृपापात्र भगवदीय हते ॥
वार्ता संपूर्ण ॥ वैष्णव ॥ ५ ॥ ॐ ॥ ॥ ॥

श्रीगुसाईजीके सेवक कृष्णभट्ट हते तिनकी ०

श्रीमहाप्रभुजीके सेवक पद्मारावल्साचोराब्राह्मण तिनके
बेटा कृष्णभट्टजी हते सो श्रीगुसाईजीके सेवक भए ॥
जब श्रीगुसाईजीनें श्रीमद्भागवत सुवाधिनीटीकासहित
कृष्णभट्टकुं पढाए ॥ तब पुष्टिमार्गीय सिद्धांत सब बिनके
हृदयमें आयो ॥ और जैसे पद्मारावलकुं श्रीमहाप्रभुजीकी
कृपातें पुष्टिमार्गीय सिद्धांत स्फुरितभयो हतो ॥ तैसे वि-
नके बेटा कृष्णभट्टजीकुं भयो और नित्य प्रति सुवाधि-
नीजी की कथा कहते ॥ सो एकदिन कृष्णभट्टजी ब्रजमें
गये ॥ बिनके संग एक कुनवी वैष्णव गयो ॥ और श्रीगु-
साईजीके तथा श्रीनाथजीके दर्शन करे ॥ जब कुनवी वैष्ण-
वनें श्रीगुसाईजीसों बिनती करी ॥ जो कृष्णभट्ट कथामें
ऐसे कहते हते ॥ जो श्रीगिरिराजजी धातुमय रत्नख-
चित हैं ॥ और गोविंदकुंड दूधसों भय्योहे ॥ सो ऐसे
दर्शन क्यों नहींहोवेहें ॥ ये बात सुनके श्रीगुसाईजीनें
विचार कय्यो जो मेरे सेवक कृष्णभट्टकी वाणी मिथ्या
नहोवे सत्यभईचहिये ॥ जासुं श्रीगुसाईजीनें वा कुनवीको
दिव्यनेत्र दिये ॥ और जैसे दर्शन कृष्णभट्टनें कहे हते
तैसेही श्रीगिरिराज तथा गोविंदकुंडके कराए ॥ सो वे
कृष्णभट्टजी ऐसे कृपापात्र हते ॥ प्रसंग ॥ १ ॥ एकसमय
कृष्णभट्टजी श्रीनाथजीके भीतरियामें न्हाए और सब

सेवा करन लागे और चरणस्पर्श न करे तब एकदिन श्रीनाथजीने आज्ञा करी जो कृष्णभट्ट चरणस्पर्शकरो ॥ तब कृष्णभट्टने वीनती करी जो लीलाके दर्शन होंवे तो चरणस्पर्शकरूं ॥ तब श्रीनाथजीने आज्ञा करी जो लीलाकेदर्शन देहांतरमें होंवेगे ॥ ये छुनके कृष्णभट्टजी उदास होय गए ॥ जब श्रीगुसाईंजीने पूछी ॥ जो कृष्णभट्ट उदास कैसें भएहो ॥ तब कृष्णभट्टने कही जो श्रीनाथजीने चरणस्पर्शकी आज्ञा करी है ॥ और लीलाके दर्शनकी नाही कहीहै ॥ जब श्रीगुसाईंजीने कही श्रीनाथजीतो बालकहैं तुम क्यों उदास भए ॥ इतनी कहेके श्रीगुसाईंजीने कृष्णभट्टकोहाथ पकडके चरणस्पर्श कराए ॥ और श्रीनाथजीकी लीलाके दर्शन कराए ॥ तब कृष्णभट्टजी बहुत प्रसन्न भए और ये निश्चय किये श्रीनाथजीतो श्रीगुसाईंजीके वशमेंहैं ॥ प्रसंग ॥ २ ॥ और एकदिन कृष्णभट्टजीने उज्जैनमें वसंतपंचमीको उत्सव कन्यो सो वा दिन वसंतपंचमी हती नहीं ॥ जब श्रीनाथजी खेलके गिरिराजऊपर पधारे तब गुलालभरे ॥ दर्शनरामदासभीतरीयाकूं भये जब रामदासने श्रीगुसाईंजीसों पूछी जो श्रीनाथजीकुं कौनने खिलाएहैं ॥ तब श्रीगुसाईंजीने कही जो कृष्णभट्टने वसंतपंचमीजानके खिलाएहैं ॥ तब रामदासने वीनती करी जो कृष्णभट्टजीतो मृल्लिगये ॥ परंतु श्रीनाथजी क्योंखेले ॥ तब श्रीगुसाईंजीने कही जो श्रीनाथजीतो भक्तनके वशहैं ॥ जो भक्त जैसे मनोरथ करे वाको वैसी अंगिकार करें हैं ॥ सो वे कृष्णभट्टजी ऐसे कृपापात्र हते ॥ प्रसंग ॥ ३ ॥ और

एकसमें कृष्णभट्टजी श्रीगोकुल आये हते ॥ जब एकांतमें चाचाहरिवंशजीसों भगवद्वार्ता करवे लगे ॥ तब उहां सांधेकी सुगंध आई ॥ जब कृष्णभट्टजीनें कहि ये सुगंध कहांसों आईहै ॥ तब चाचाजीनें कही जो वे छेलआए होंएंगें ॥ जिनकुं तुमविना रह्यो नहिजायहै ॥ सो वे कृष्णभट्टजी ऐसे कृपापात्र हते ॥ जिनके पीछे श्रीनाथजी फिरत डोलत हते ॥ प्रसंग ॥ ४ ॥ एकसमें श्रीगुसांईजी उज्जेन पधारे सो कृष्णभट्टजीके घर डेरा किये ॥ और उहांके ब्राह्मण सब मिलके श्रीगुसांईजीके पास आयके प्रश्न क्यो ॥ जो तुमारे सेवक कृष्णभट्टजी वेदोक्तकर्म नहीं करेंहैं और अष्टप्रहर सेवा करेंहै ॥ जब विनकुं श्रीगुसांईजीनें उत्तर दियो ॥ सो श्लोक ॥ मत्कर्मकुर्वतापुंसां कर्मलोपो भवेद्यदि ॥ तत्कर्मते प्रकुर्वति त्रिंशत्कोटयो महर्षयः ॥ १ ॥ “और कहे भोरभए जानिये” ॥ तब ये मुनके ब्राह्मण बोले जो भोरभए कैसो जान्यो जायगो ॥ तब श्रीगुसांईजीनें कहि जहां रात्र होवेहै तहांदिनके पदार्थ सुझै नहींहैं ॥ जब तुमारे अंतःकरणमें उजारो होयगो और मायारूपी रात्र मिटगी तब देखोगे ॥ सो गीतामें कइहोहे ॥ श्लोक ॥ यानिशा सर्वभूतानां तस्यां जागर्तिसंयमी ॥ यस्यां जाग्रति भूतानि सानि शापश्यतो मुनेः ॥ १ ॥ ऐसैं जब मुन्यो तब विन ब्राह्मणनको संदेह मिटगयो ॥ सो वे कृष्णभट्ट ऐसे कृपापात्रहते ॥ प्रसंग ॥ ५ ॥ सो वे कृष्णभट्टजी सदैव उज्जेनमें रहते हते ॥ और गुजरातके तथा दक्षिणके वैष्णव उज्जेन होयके श्रीगोकुल जाते हते

॥ और विनसुं मिलके सब वैष्णव प्रसन्न होत हते ॥ और कृष्णभट्टजी वैष्णवनपर कैसी प्रीती राखत हते जो वैष्णव विनके ईहां गांठडी धरते वा वैष्णवकी गांठडीमें छाने छाने दूधघरको प्रसाद बांध राखते ॥ तब ये मनमें समझते ॥ जो वैष्णवनको रस्तामें सुख लगेगी तब येलेवेंगे इनकुं श्रम नहीं होयगो ॥ ऐसी वात्सल्यता वैष्णवनके ऊपर राखते हते ॥ प्रसंग ॥ ६ ॥ एकसमें श्रीगुसाईंजीने श्रीगोकुलसुं कासिदपठायके कृष्णभट्टकुं बुलवायो जब कृष्णभट्टजी उज्जेनसों चले ॥ तब नित्य स्वप्नमें कृष्णभट्टके सेव्य श्रीठाकुरजी आयके कहते जोतुमविना सोकुं रह्यो नहींजायहै ॥ जब कृष्णभट्टजी रस्तामेंसो एकसदुप्यकुं पत्र देके नित्य आपनें घर पठावते और पत्रमें येही लिखते जो श्रीठाकुरजी प्रसन्नहोंवें सोई करियो ॥ परंतु श्रीगुसाईंजीके मिलेविना कृष्णभट्टजी पाछे न गए ॥ जब कृष्णभट्ट श्रीगोकुल पहुंचे तब श्रीगुसाईंजीके दर्शन करे ॥ जब श्रीगुसाईंजीनें कही जो तुमनें श्रीठाकुरजीकी आज्ञा क्यों नमानी ॥ तब कृष्णभट्टनें वीनती करी जो महाराज श्रीठाकुरजीतो आपके वश्य हैं ॥ और आपनें हमकुं श्रीठाकुरजी दिखाएहैं ॥ जासुं राजकी आज्ञा कैसे लोपकरीजाय ॥ ये बात सुनके श्रीगुसाईंजी चुपकरीरहै ॥ वा कृष्णभट्टकुं श्रीगुसाईंजीके आज्ञापर ऐसो विश्वास हतो ॥ प्रसंग ७ ॥ एकदिन उज्जेनके वैष्णव सब भेलेहोयके कृष्णभट्टसों पूछे ॥ जो श्रीठाकुरजी कैसे प्रनन्नहोंवेंहें ॥ तब कृष्णभट्टनें कही जो श्रीठाकुरजीतो स्वामिनीजीकी

कृपातें प्रसन्नहोवेंहैं ॥ याहीतें श्रीस्वामिनी स्तोत्रमें श्रीठा-
 कुरजीकी प्रसन्नताकेलियें श्रीगुसाईंजीनें द्वादशप्रकारकी
 प्रार्थना करीहै ॥ और द्वादशप्रकारके दास्यभाव वर्णन
 करेहै ॥ ये सुनके वैष्णव वहीत प्रसन्नभये गीतगोविदमें
 श्रीठाकुरजीनें कहीहै ॥ अघरसुधारसमुपनयभामिनी जी-
 वय सृतमिवदासं ॥ त्वयि विनिहितमनिशं विरहानलदग्ध-
 वपुषमविलासं ॥ और नंददासजीनें कहीहै ॥ श्रीवृषभा-
 नुसुता-पद-अंबुज जिनके सदासहाय ॥ यहरसमग्ररहतजे-
 निसदिन तिनपर नंददासबलिजाय ॥ प्रसंग ॥ ८ ॥ एकदि-
 न नागजीभाई गोधरातें उज्जैनमें आए तब कृष्णदृष्टुं मिले
 और महाप्रसाद लेके भगवद्दार्ता करवे लगे ॥ सो एकांतमें
 भगवद्दार्ता करत करत देहानुसंधान भूलगए ॥ सो सातदि-
 वस पीछेदेहकी सुध आई ऐसे करतकरत नागजीभाई बहुत
 दिनउहां रहे ॥ सो कोई समें तीन दिन कबहु सात दिन
 देहानुसंधान छूट जाय ॥ सो वे कृष्णभट्ट तथा नागजी-
 भाई ऐसे भगवद्रसमें मग्न हते ॥ प्रसंग ॥ ९ ॥ कृष्णभट्ट
 एकसमय श्रीगोकुल गये सो रस्तामें विनकी देहछूटी
 विनके बेटा गोकुलभट्ट उनकुं चिता भई ॥ जो श्रीगो-
 कुल न पहुंचे और घरमें भी न रहे फेर उनको अग्निसं-
 स्कार करिके उज्जैनमें पाछे आये ॥ और जादिन कृष्ण-
 भट्टकी देह छूटी वाहि समय श्रीगुसाईंजी श्रीनाथजी ॥
 शृंगारकरके चौकमें पधारे हते तब कृष्णभट्टजीकुं दे वे ॥
 जब कृष्णभट्टनें साष्टांगदंडवत करी तब श्रीगुसाईंजीनें
 पूछयो जो तुम कब आये ॥ जब कृष्णभट्टनें वीनति करी

जो राजकीकृपातें अबी आयोहुं ॥ जब श्रीगुसांईजी गो-
पीवल्लभ भोग धरिके वाहेर पधारे ॥ फेर पूलवे लगे जो
कृष्णभट्ट कहाहैं ॥ तब रामदासभीतरीयानें कही जो कृ-
ष्णभट्टतो मंदिरमें जाते देखे परंतु वाहेर निकसते काहू-
नें देखें नहीं ॥ जब श्रीगुसांईजीनें एक पत्र लिखायके
उज्जेनमें मनुष्य पठाये ॥ सो मनुष्यनें गोकुलभट्टकुं पत्र
दिये ॥ सो बांचके बहुत प्रसन्न भये ॥ जब गोकुलभट्टनें
श्रीगुसांईजीकुं वीनती पत्र लिखे जो अलुक समय अलुक
दिवस कृष्णभट्टकी देह छूटीहै ॥ ये पत्र श्रीगुसांईजी वां-
चके कहे जो कृष्णभट्टजी ऐसेही हते ॥ जिनके संग श्री-
नाथजी खेलतहते ॥ सो वे या रीतीसूं भगवल्लीलामें प्राप्त
होवें यामें कहा आश्चर्य है ॥ सो वे कृष्णभट्टजी ऐसे कृ-
पापात्र हते ॥ तातें इनकी वार्ता कहांताईं लिखीजाय ॥
॥ प्रसंग ॥ १० ॥ वार्तासंपूर्ण ॥ वैष्णव ॥ ६ ॥ ❀ ॥

श्रीगुसांईजीके सेवक चाचाहरिवंशजी ति०
सो चाचाहरिवंशजी क्षत्री हते विनकुं श्रीगुसांईजीनें
आज्ञा करी ॥ जो श्रीनाथजीको अभिप्राय पुष्टिमार्ग ब-
ढायवेको है ॥ जासूं तुम परदेसनमें जाय हमारी आ-
ज्ञासूं सबको नाम सुनावो और वैष्णव जो मेट काटे
सो लेआवो तब चाचाहरिवंशजी गुजरात आए ॥ सो
राजनगरकेपास असारवा गाम है ॥ तहां भाईला कोठा-
रीके घरमें रहै ॥ सो उहांते मेट उगायके स्वभातमें
माल लैकेलिये गए ॥ सो उहां गाममें पूंछी जो भले
आदमी कौनहैं ॥ तब माधवदास दलालनें कही जो स-

हजपालदोसी भले आदमी हैं ॥ जब माधवदासदलालके साथ सहजपालदोसीके ईहां जाय सब साल लियो सो उत्तम ते उत्तम वस्तु लीनी ॥ और जीवापरिखके उपरकी हुंडी लाएहते सो माधवदास दलालकुं दीनी और कही जो इनके मोलको दाम सब चुकायके वचेसो नारायणसरपें हमारो डेरा है ॥ तहांपहुंचाय दीजियो ॥ जब माधवदासजी वो द्रव्य लेके विनके डेरापर पहुंचावन गए ॥ तब माधवदासनें विनको आचारक्रिया देखके विस्मय भये ॥ तब माधवदासजीनें विचार कयो जो ये कोई महापुरुषहें ॥ तब माधवदासनें कही जो तुमारो धर्म हमरूँ सिखावो ॥ तब चाचाजीनें विनकुं नाम सुनाये ॥ जब माधवदास सब रीतभांति सीखिके सहजपालदोसी तथा जीवापरिखसूं कही जो येतो बडेमहतपुरुषहें ॥ ये बात सुनके वे दोनो जने चाचाजीके पास नाम पाए ॥ जब खंभातसूं वे तीनो जने चाचाजीके साथ श्रीगोकुल आए ॥ तब आयके श्रीगुसांईजीके पास निवेदन करवाए ॥ तब श्रीनाथजीके दर्शन करिके बहुत प्रसन्न भये ॥ सोवे चाचाजी ऐसे कृपापात्र हते ॥ प्रसंग ॥ १ ॥ फेर चाचाजी एकदिन गुजरातके परदेसकुं गए ॥ सो रस्ता थूलिगये ॥ सो भीलनके गाममें गए उहां कूवापर एक स्त्री जलभरत हती वा स्त्रीनें विनके आचारविचार देखिके अपनैं घरकुं लेगई ॥ और विनके पास नाम पायो और सबरीतभांतसूं भोग धरिवे लगी ॥ चाचाजीनें विनसूं पूछो जो तुमारो घरके पुरुष कहां गएहें ॥ तब विननें कही जो चो-

रीकरवेकुं गएहैं हमारो येही धंधो है ॥ तब चाचाजीनें कही जो ये धंधो आछो नहीं हैं ॥ जब वा स्त्रीनें वीनती करी जो आप इहां रहिके विनकुं वैष्णवकरिके फेर तुम जाओ तब चाचाजी उहां रहगए तब वा बाईको बेटा गामको सुखी हतो वानें चाचाजीके दर्शनकरतमात्रही वाको चित्त लौकिकमेंसुं निकसके प्रभुनके चरणारविंदमें लभ्यो ॥ सो सूरदासजीनें गायोहै ॥ सो पद ॥ “जादिन संत-पाडुने आवें । तीरथकोटीखानकरनफलदर्शनही तें पावें ” ॥ जासुं वा भीलको मन झट फिरगयो ॥ तब आखी-गाम वैष्णव भयो ॥ जब चाचाजी विनकुं सब सेवाकी रीति सिखायके उहासे विदा भए ॥ तब वे भील चोरी-को धंधो छोडिके खेती करवे लगै ॥ जब रस्तामें चाचा-जीकुं स्वप्नमें श्रीनाथजीनें आज्ञा करी ॥ वे भील आ-चार क्रिया आछी पालेहैं परंतु भोगचाखके धरेंहैं सो सोकुं नित्य भीलनकी जूठन लेनीपरे है जासुं विनको तुम शिक्षा आछीतरहसुं दीजियो ॥ जब चाचाजी फिरके वा गाममें आय दौमहीना रहके सेवाकीरीती और आ-चारधर्म सब पक्को करायो और सब रीति सिखायके श्री-गुसाईंजीकी सेट लेके गए ॥ सो वे चाचाजी ऐसे कृपा-पात्र हते ॥ प्रसंग ॥ २ ॥ एकसमें चाचाहरिवंशजी श्रीगो-कुलतें उज्जेनकुं चले सो रस्तामें क्षत्रीवैष्णवके घर आए ॥ वा क्षत्रीवैष्णवनें चाचाजीके मुखसे भगवद्वार्ता सुनके संसारमेंसुं आसक्ति काढडारी ॥ तब चाचाहरिवंशजीकुं वा वैष्णवनें कहि जो ये सर्वस्व श्रीगुसाईंजीके पास ले-

जायो चाचाजीनें कही जो में उज्जेनकुं जायके आउंगो ॥ जब पाछे आयके लेजाउंगो तव चाचाजी उज्जेनकुं आए कृष्णभट्टसूं बात करी तव कृष्णभट्टनें कही वे क्षत्रीतो अनाचारीहें तव चाचाजीनें कही ॥ जिनकी संसारमें आसक्ति नहींहि बिनको आचारविचारको कहा-कामहे ॥ फेर चाचाजी वा क्षत्रीवैष्णवके घर आए ॥ तव वा वैष्णवनें सब द्रव्य श्रीगुसाईजीकी भेट कन्यो ॥ जब चाचाजी तीनहजार रुपैयालिंगए ॥ और दोसोरुपैया वा वैष्णवकुं जोरसूं देगए व्यवहार चलाइवेकुं वे चाचाजी ऐसे कृपापात्र हते ॥ जिनके संगसूं हजारों वैष्णवनकी संसारासक्ति छूटगई हती ॥ प्रसंग ॥ ३ ॥ एकसमें श्रीगुसाईजी परदेश पधारे हते रस्तामें एकगाम आयो ॥ वा गाममें वैष्णव कोई न हतो ॥ तव श्रीगुसाईजीनें कही चाचाजी ये रस्ता नहिं निकसे होयगे ॥ सो चाचाजी ऐसे कृपापात्र हते ॥ जो रस्ता निकसते और जिनलोगनसूं प्रसंग पढतो बिनको मन श्रीप्रभुनमें लगाय देते ॥ प्रसंग ॥ ४ ॥ और एकसमें चाचाहरिवंशजी श्रीनाथजीके लियें श्रीगोकुलमेंसुं सामग्री लेवेंको गये ॥ सो सामग्री एक वैष्णवके माथे पधरायके श्रीगोकुलते चले ॥ जब यमुनाजीके घाटपर आए तव नाव नहीं हती सांझ होयगई हती ॥ जब चाचाजीनें विचार कन्यो जो सवारे छेघडी रात रहेंगी तव ये सामग्री चहियेगी और रातकुं सिद्ध भई चहिये ॥ और गोपालपुरतो दसकोस दूर हैसो कैसे पोहोंचेंगे ॥ ये विचारके वा वैष्णवसां कही जो में य-

मुनाजीके ऊपर चलेंद्वं जहां में पांव धरके उठाऊं जा ठि-
 काणे तुम पांव धरत आईयो ॥ तब चाचाहरिवंशजी
 श्रीयमुनाजीके ऊपर चलवे लगे और भगवन्नाम लेवे
 लगे ॥ जब वे वैष्णव पिछाडी भगवन्नाम लेत चल्यो ॥ तब
 वा वैष्णवनें मनमें विचार क्यो ॥ जो चाचाजी भगव-
 न्नाम लेतेहैं ॥ और में भगवन्नाम लेतद्वं इनके पग ऊपर पग
 काहेको धरूं ॥ जब दूसरे ठिकाने पग धरवे लग्यो ॥ तब य-
 मुनाजीमें द्रववे लग्यो ॥ तब चाचाजीनें आयके वाको
 हाथ पकरके पार लेगए ॥ जब चाचाजीने कही में जाठिका-
 णेसूं पांव उठाए तुमने वही ठिकाणे क्यो नही धरे ॥ वाने
 कही में भगवन्नाम लेतद्वं तुमद्वं भगवन्नाम लेतेहो ॥ जब
 चाचाजीनें कही मेरी मुनिहै तेरी अब मुनेगे ॥ सो वे
 चाचाजी ऐसे कृपापात्र हते विनकी प्रसूनें सुनी हती ॥
 प्रसंग ॥ ५ ॥ एकदिन श्रीगुसाईजी लघुशंका करके पधारे
 ॥ सो चाचाजीसो भगवद्दार्ता करने लगे सो ऐसे रसा-
 वेश भये जो आखीरात चलीगई ॥ हाथमेंसे नीचे झारी
 धरिवेकी शुध न रहि ॥ और चाचाजीकुं तो तीनदिन
 सुधि रसावेश रह्यो ॥ वे ऐसे भगवद्रसके पात्र हते ॥
 प्रसंग ॥ ६ ॥ एकदिन चाचाजी गिरिराज ऊपर गए ॥
 और शंखनादकी तैयारी हती ॥ चाचाहरिवंशजीकुं ऐ-
 सो अनुभव भयो की श्रीनाथजी निर्भर निद्रामें हैं ॥
 तब शंखनाद होवे न दियो ॥ सब भीतरिया ठाडे रहे
 ॥ दोघडीपीछे श्रीगुसाईजी पधारे ॥ जब शंखनाद कराए
 तोद्वं श्रीनाथजी जागे नहीं ॥ तब सुरदासजीनें कीर्तन

गायो ॥ सो पद ॥ “कौनपरीनंदलालेंवान ॥ प्रातसमय-
जागनकीविरियांसोवतहैपीतांवरतान” ॥ ये यद सुने
श्रीनाथजी जागे ॥ सो चाचाजीऐसे कृपापात्र हते ॥ जि-
नकी कान श्रीगुसाईजी राखते ॥ और जिनकुं श्रीठाकु-
रजीकी कृतीकी सब शुध रहेती ॥ प्रसंग ॥ ७ ॥ एकदिन
श्रीगुसाईजी शय्यामंदिरमें पधारते हते ॥ जब श्रीनाथजी
श्रीगुसाईजीकी आडि देखवे लगे ॥ तब चाचाजीने श्री-
गुसाईजीसों वीनती करी जो श्रीनाथजीतो आपकी ओर
चितवें हें ॥ और आप भीतर कैसे पधारतेहो ॥ तब श्री-
गुसाईजीने आज्ञा करी जो श्रीनाथजीतो बालकहें ॥ परंतु
सेवातो करी चाहिये ॥ जब श्रीगुसाईजी सेवा करवेको
पधारे ॥ सो वे चाचाजी ऐसे कृपापात्र हते ॥ जिनकुं
श्रीनाथजीकी घडीघडीकी खबर पडती हती ॥ प्रसंग ॥ ८ ॥
और एकदिन चाचाजीकुं ठोकर लगी हती ॥ जब दुः-
खीहोय बैठरहे हते ॥ तब रुक्मिणी बहूजीके आगे बात
निकसी हती ॥ श्रीगुसाईजीने कही जो सब वैष्णव हमारे
अंगहें ॥ तब रुक्मिणी बहूजीने कही चाचाजी कौनसो
अंगहें ॥ तब श्रीगुसाईजीने आज्ञा करी जो हमारे नेत्र हें ॥
जो देखो चाचाजी दुःखीहैं तो हमारे नेत्र दूखेंहें ॥ सो
वे ऐसे कृपापात्र हते ॥ प्रसंग ॥ ९ ॥ एकसमें चाचाहरिवं-
शजीकुं आज्ञा करी जो तुम परदेसकुं जाओ ॥ तब चा-
चाजीने कही हमकुंतो आपके दर्शन विना रह्यो नहिं जाय
जब श्रीगुसाईजीने आज्ञा करी जहां तुम जावोगे तहां
हम तुमकुं नित्य दर्शन देंवेंगे ॥ वाकी कारण ये हतो जो

श्रीगुसाईजीकुं आसुरव्यामोहलीला करनी हती तासुं चाचाजी तासमें ईहां होएंगे तो इनको देह न रहेगो ॥ जब श्रीगोकुलनाथजी तथा श्रीरघुनाथजी तथा यदुनाथजी तथा घनश्यामजी इनकुं स्वमार्गीय ग्रंथनकी परिपाटी कौन बतावेगो ॥ श्रीगिरिधरजीकुं तो सेवामेंसों अवकाश नहींहै ॥ ये विचार करके श्रीगुसाईजीनें चाचाहरिवंशजीकुं परदेस विदा कियो तब चाचाहरिवंशजी गुजरात गए ॥ ता पाछे श्रीगुसाईजीनें आसुरव्यामोहलीला दिखाई ॥ जब चाचाजीनें गुजरातमें ये बात सुनी तब तत्क्षण सृष्टित होय गये ॥ जब श्री नाथजीनें आयके चाचाजीसों कही ॥ जो हाल तुमारो पृथ्वी ऊपर रहेनो है मेरी ऐसी आज्ञाहै जब चाचाजीनें अपनो देह राख्यो ॥ तब चाचाजी ब्रजमें आयके सब बालकनके पासतें सुबोधिनीजी सुनवेके सिष करके पढावते ॥ कारण वे चाचाजी ज्ञातीके क्षत्री हते ॥ सो ब्राह्मणकुलकुं कैसे पढावे ॥ जासुं सुनवेके सिषतें सब बालकनकुं पढाए ॥ सो वे ऐसे कृपापात्र हते ॥ जिनकुं श्रीगुसाईजी मार्गकी परिपाटी बतावेकैलीये पृथ्वीपर छोडगये ॥ जैसे श्रीमहाप्रभुजी दामोदरदास हरसानीकुं परिपाटी बतावेकैलीये छोडगये हते याहीतें श्रीगुसाईजीनें शृंगाररसमंडनग्रंथमें कह्यो है ॥ श्लोक ॥ यस्मात्सहायभृतोदामोदरदासहरिवंशो ॥ विद्वलचितमिदंशृंगाररसमंडनपूर्णम् ॥ १ ॥ या श्लोकमेंतें एसो निश्चय होवैहै जो दामोदरदासजी तथा चाचाहरिवंशजीको अधिकार एक सरीखो है वे चाचाजी

पृथ्वीऊपर एकसो पचीस वर्षके आसरे रहे हते ॥ जिनकुं काल कल्ल बाधा करसक्यो नहीं ॥ प्रसंग ॥ १० ॥ वार्ता
संपूर्ण ॥ वैष्णव ॥ ७ ॥ ॐ ॥ ॥ ॥ ॥

श्रीगुसांईजीके सेवक मुरारीदास हते तिनकी ०
॥ सो मुरारीदास गौडदेशमें नारायणदासके पास नौकरी
करवेकुं गए ॥ जब नारायणदासनें मुरारीदासकुं काम ब-
तायो ॥ सो मुरारीदासको बहोत आच्छो काम देखकेदस
रुपैया महिना करे ॥ तब मुरारीदासनें कही जो मैं आठ
रुपैया महिना लेउंगो सवा पहेर दिन चढे आउंगो और
छे घडी दिनरहते जाउंगो ॥ तब नारायणदासनें ये बात
कवल राखी ॥ जब मुरारीदास चाकरी करनेलग्यो ॥ और
मुरारीदासके माथे श्रीबालकृष्णजी विराजते हते ॥ और
सातुभाव जनावत हते ॥ औरजो चाहे सो मांगते ॥ और
बालककी न्याईं सब मांगते ॥ सो एक दिन नारायणदासनें
ऐसो विचार क्यो जो अवारे आवेहें ॥ और वेग जाएहें ॥
सो कहा कारण होयगो ॥ तब नारायणदास विनके पाछे
छाने जायके विनके घरमें छिप रहे और विनकुं सब सेवा
करते देखी ॥ और श्रीठाकुरजी सों बातें करते देखे ॥ फिर
नारायणदासजी दूसरे दिन एकांतमें मुरारीदाससों कही
जो हम तुमारे घर काल सब रीती देखीहें ॥ जासूं तुम ह-
मकों सेवक करो ॥ जब विनकी बहुत नम्रता देखके मु-
रारीदासने कही जो हमतो श्रीगुसांईजीके सेवकहें ॥ तु-
महुं श्रीगुसांईजीके सेवक होवो ॥ तब नारायणदासनें
मुरारीदासके पास वीनती पत्र श्रीगुसांईजीको लिखायके

आदमी पठाय श्रीगुसाईंजीकुं पधराए जब नारायणदास
 तथा विनकीन्ही श्रीगुसाईंजीके सेवक भये ॥ और भगव-
 त्सेवा करवे लगे ॥ और जैसे मुरारीदाससों श्रीठाकुरजी
 बातें करते हते ॥ तैसे नारायणदाससूं करनलगे ॥ सो
 मुरारीदास ऐसे कृपापात्र हते ॥ जिनके संगतें नारायण-
 दासहुं वैष्णव भए सो संगकरियेंतो ऐसनको करिये ॥
 जिनके संगसों आपनमें भगवद्धर्म आवें ॥ वार्तासंपूर्ण ॥
 ॥ वैष्णव ॥ ८ ॥ ॥ ॥ ॥ ॥ ॥
 श्रीगुसाईंजीके सेवक गौडदेशके निवासीनारा-
 यणदास पादशाहके दिवाण हते हिनकी ० ॥

एकसमें श्रीगुसाईंजी श्रीजगन्नाथरायजीके दर्शनकुं प-
 धारे ॥ और वस्तु जो संगमें हती सो सब खटला भेटकर
 दिये ॥ येवात नारायणदासनें घर बैठे वाहीक्षण जानी ॥
 सो श्रीजगन्नाथरायजीनें जताई ॥ जब नारायणदासनें
 दूसरो खटला तथा अस्वारी वैसीही तैयार करके पठाई ॥
 ॥ और मनुष्यनसुं कही पुरुषोत्तमक्षेत्रके बाहर डेरा करो ॥
 जब श्रीगुसाईंजी पधारे तब खबर दीजियो ॥ तब म-
 नुष्य खटलालेके पुरुषोत्तमक्षेत्रसुं बाहिर जायके डेरा की-
 ये ॥ जब श्रीगुसाईंजी पधारे तब वा खटलामें सामान ध-
 रके और सब बालक तथा बहू बेटी सहित नारायणदासके
 घर पधारे ॥ जब नारायणदासनें श्रीगुसाईंजीकुं सर्व सम-
 पण मनसुं कन्यो मुखसुं बोलि नहीं ॥ मनमें ऐसे जानी जो
 बोलुंगोतो श्रीगुसाईंजी नहीं करेंगे ॥ तापाछे जब श्रीगु-
 साईंजी श्रीगोकुल पधारे तब नारायणदासनें मनुष्यके

संग सब द्रव्य पठाय दीये सो वे नारायणदास ऐसे कृपा-
 पात्र हते ॥ प्रसंग ॥ १ ॥ एकसमय नारायणदासने श्रीगु-
 साईजीकुं वीनती पत्र लिखके पठाए ॥ जव श्रीगुसाईजी
 गौडदेशमें पधारे ॥ जव गांम बाहिर नारायणदासजी श्री-
 गुसाईजीकुं पधरायवे आये तव नारायणदासजी श्रीगुसा-
 ईजीके चरणारविंदके दर्शन करतही मुच्छा खायगये ॥
 और भगवल्लीलाके दर्शन भये हते तासूं भगवल्लीलामें प्र-
 वेश करने लगे जव श्रीगुसाईजीने विचारे जो हालतो इ-
 नकुं इहां कारज वोहोत करनेहें और हाल लीलामें प्रवेश
 करिवेकुं ढीलहैं ॥ ये विचारिकें श्रीगुसाईजीने नारायणदा-
 सके कानमें कह्यो जो उठो अवी ढीलहैं तव नारायणदा-
 सजी मुनकें उठिवैठे ॥ और श्रीगुसाईजीकुं घरमें पधरा-
 यके ले गये ॥ जव श्रीगुसाईजी सेवालेके पाछे अडेल पधारे
 सो वे नारायणदासजीको ऐसो श्रीगुसाईजीकी आज्ञापर
 विश्वास हतो जो भगवल्लीलामें प्रवेश करनेमें ढील करी
 ॥ प्रसंग ॥ २ ॥ एकसमय नारायणदासने श्रीगुसाईजीकुं
 पत्र लिख्यो जो मोकुं सत्संग नहीहैं ॥ ये पत्र श्रीगुसाईजी
 बाचिकें चाचाहरिवंशजीकुं आज्ञा करी जो तुम नारायण-
 दासके पास जावो ॥ तव चाचाजीने वीनती करी जो आ-
 पके दर्शनविना कैसे रह्यो जायगो तव श्रीगुसाईजीने
 आज्ञा करी जो तुमकुं सर्व ठिकानें सदैव दर्शन देउंगो जब
 चाचाजी नारायणदासके पास आये ॥ जव नारायणदा-
 सजीकुं मारगकी रीति बताई और वैष्णवनके उतरिवेके-
 लीयें न्यारो घर करायो और श्रीठाकुरजीके सेवाके लीयें

न्यारे मंदिर कराये और नारायणदासजी तथा विनकी स्त्री चाचाजीके संगतें भगवत्सेवा करनेलोगो और चाचाजी तथा नारायणदासजी भगवद्द्वार्ता करवे बैठते ॥ तब दोय दिन तीन दिन सुधी देहातुसंधान श्रुतिजाते ॥ ऐसे करत करत बोहोत दिन बीते ॥ जब चाचाजीनें श्रीठाकुरजीसों वीनती करी ॥ जो नारायणदास लीलाके दर्शन करिकें सूचिछत होय जायहैं ॥ और हालकारजतो बोहोत करनेहैं ॥ जब श्रीठाकुरजी नारायणदासजीकों याही देहसों लीलाको अनुभव करावन लगे फेर जब लीलाके दर्शन करते तब सूच्छा नहीं आवती सो वे चाचाजीकी वीनतीहुं और श्रीगुसाईंजीकी कानतें श्रीठाकुरजीनें अती कृपा करी ता पीछें चाचाजी उहांहुं श्रीगोकुल आये ॥ प्रसंग ॥ ३ ॥ सो वे नारायणदासजीकी स्त्री भगवत्सेवा करती हती जब वैष्णव आवते तब सबकी टहल करती, कोई दिन चार ठगननें वैष्णवको वेश धरकें नारायणदासके घरमें आय रहे जब नारायणदास राजद्वार गये हते ॥ तब उन ठगननें वीरांकुं भगवद्द्वार्ता सुनाई तब वीरांकुं भगवद्रसको आवेश आयो सो सूच्छा आयगई जब उन ठगननें वीरांके गलामें फांसी डारके गहेना उतार लीनें सो लेगये रस्तामें नारायणदासजी मिले तब नारायणदासजीनें कही जो हयसों विदा भये विना तुम कैसें जाओहो ऐसे कहिके नारायणदास उनकोपाछे फिरायलेगये जब नारायणदास अपने घरमें गये सो स्त्रीको मृतक भई सुनी जब नारायणदासजी देखेतो वह स्त्री भगवद्रसके आवेषमें

हती जब नारायणदासनें बिनके गलामेंसूं फांसी काढ
 डारी और लोगनकूं कही जो यह मरी नहीं है झूठी बात-
 हैं नारायणदासनें मनमें जानी जो मरीकहंगो तो कोई
 वैष्णवनको संग नहीं करेगो तब नारायणदासनें स्त्रीकुं
 चरणामृत देके जीवति करी तब वे ठग नारायणदासके
 पावनपर और कहि हमकुं वैष्णव करो तब नारायणदा-
 सनें कहि तुम श्रीगुसाईंजीके पास श्रीगोकुलमें जायके
 वैष्णव होवो तब नारायणदासने महाप्रसादलेवायके श्री-
 गुसाईंजीके उपर पत्र लिखदियो सोवे नारायणदासजीनें
 वैष्णवनको दोष न देख्यो ॥ जगतमें वैष्णववेषकी निंदा
 नहोवे तैसे क्योसो वे नारायणदास ऐसे कृपापात्र हते
 ॥ प्रसंग ॥ ४ ॥ और एकसमय श्रीगुसाईंजी गौडदेशमें
 पधारे हते जब नारायणदासके घर विराजे हते ॥ सो
 नारायणदास श्रीगुसाईंजीकी सेवामें हते ॥ तब राजद्वार-
 रमें जायवे आयवेको बनतो नहीं हतो तब पात्साहनें
 ऐसो हुकुम दियो जो नारायणदास जहांसूधी तुझारे
 गुरु इहां रहें तहांसूधी तुम सेवा करो सो श्रीगुसाईंजीकी
 कृपातें वा म्लेच्छको मन ऐसो फिर गयो और एकदिन
 पातसाहनें कही जो नारायणदास हमहूं तुझारे गुरुके द-
 र्शन करेगे तुम हमारी आहीसां वीनती करो जब ना-
 रायणदासजी आपकूं वीनती करिकें और पात्साहकूं घर
 लगये और श्रीगुसाईंजीके दर्शन कराये और वर्षके वर्ष
 पात्साहनारायणदासके घर जाते ॥ और नजराना लेते
 हते सो वाहीदिन नारायणदासनें पात्साहकेआगें लाख-

रुपैयों धरे जब पातशाहनें कही मैं नजराना लेवै नहीं आयोहूं ॥ दर्शन करवेकुं आयोहूं ॥ और ये द्रव्य अब तुम श्रीगुसाईंजीकुं भेट करौ और कोई दिन तुमारे पास अब नजराना नहीं लेऊंगो ॥ और ये साक्षात् कन्हैयालालहैं इनकी प्रसादीवस्तु कछु हसकुं चाहिये ॥ जब श्रीगुसाईंजीनें प्रसादी उपरणा दियो तब वह उपरणा पात्साह सदैव साथे ऊपर बांधे रहते और जब श्रीगुसाईंजी पधारवेकी विचार करते तब नारायणदासजीकुं सूच्छी आयजाती जब श्रीगुसाईंजीनें चाचाहरिवंशजीकुं कही जो तुम इनकुं संयोग शृंगाररसको उपदेश करौ और संयोगकी वार्ता सुनाओ और हस इनकुं नित्य दर्शन देवेंगे और विप्रयोगकी वार्ता इनकुं मत सुनावो ॥ संयोगरसके अनुभवविना भगवत्सेवा नहीं होवैहैं ॥ जब चाचाजीके संगतें विनकुं संयोगरसको अनुभव भयो और भगवत्सेवा करनेलगे और राजकारमारकुंहैं भगवत्सेवा मानवे लगे ॥ सो जितनी कृती संसारव्यवहारकी हती सो वाकुं भगवत्सेवा मानकें करते सब ठिकाने उनकुं भगवदनुसंधान-स्फूर्त भयो तब नारायणदासजी ऐसे कृपापात्र हते ॥ प्रसंग ॥ ५ ॥ एकदिन नारायणदासके घर श्रीगोपीनाथजीके भेटीजी सत्यभामाजी श्रीजगन्नाथरायजीके दर्शन करके पाछें आवते पधारे हते ॥ सो नारायणदासको आग्रह देखके उहांकछुक दिनविराजे सो नारायणदासके घरके पास जेलखानो हतो ॥ जेलखानामें जो लोग पातशाहको कर नहीं भरसकते हते सो बंदीखानामें पड़े हते ॥ और

बहोत दुःखी हते ॥ और बडी पुकारें करते हते ॥ विनकी पुकार सुनके सत्यभामा बेटीजीनें ऐंसी विचार कच्यो ये लोग दुःखीहैं सो इनको दुःख भागेबिना मैं भोजन नकरुंगी ॥ तब बेटीजी भोजन करे बिना पधारवेकी तैयारी करी ॥ जब नारायणदासजीनें नाहीं कही ॥ जब सत्यभामाबेटीजीनें आखोदिन भोजन न कच्यो ॥ तब गाममें जितने वैष्णव हते तिनने प्रसाद लियो नहीं ॥ सब वैष्णव भूखे रहे ॥ यह बातकी खबर पातशाहकुं पडी जब पातशाहकुं पडी जब पातशाहनें नारायणदासजीसूं पूछ्यो तब नारायणदासजीनें सब समाचार कहे ॥ जब पातशाहनें कही जो बेटीजीको पचीसहज्जार रुपैया भेट धरके भोजन करवेकी विनती करौ ॥ तब बेटीजीनें ये बात सुनके कहि जो पातशाहकुं कही जो पचीसहज्जार रुपैया भौकुं नहीं चहीये ॥ इन कैदिनको माफ करके छोडो ॥ तब ये बात पातशाहके आगे नारायणदासनें कही जब पातशाहनें कही जो ऐंसे त्यागी बेटीजी महाराजकी आज्ञा मैं माथेपर नहीं चढावुंगो तो हमारो बुरो होयगो ॥ जासूं सब कैदिनकुं पातशाहनें छोडदिये तब बेटीजीनें भोजन करे सो नारायणदास ऐंसे वैष्णव हते ॥ जिनके संगसूं पातशाहकी बुद्धी ऐंसी निर्मल रहेती ॥ वार्ता संपूर्ण ॥ वैष्णव ॥ ९ ॥ * ॥ ॥

श्रीगुसाईंजके सेवक कायथ विठ्ठलदास ति०
 सो वा विठ्ठलदासनें गौडदेशमें जायके परगनौ इजारे लियो ॥ सो परगनेमें टोटो गयो तब गौडदेशके पातशा-

हके दिवान नारायणदासनें विठ्ठलदासकुं बंदीखाने दिये तब विठ्ठलदासकुं नित्य मार दिवावते ॥ सो विठ्ठलदास कैसे हते नित्य मार खाते परंतु वैष्णवता प्रकट न करी ॥ फेर विठ्ठलदासजी हिसाब चुकायके बंदीखानेतें छुटे ॥ तब श्रीगुसाईजी गौडदेशमें पचारे तब नारायणदास दर्शनकुं गए विठ्ठलदासकुं दर्शनकुं गए ॥ जब श्रीगुसाईजीनें पूछी जो विठ्ठलदास इतने दिन कहां हते ॥ तब विठ्ठलदासनें कही जो याहीदेशमें रहूं ॥ पाछे श्रीगुसाईजी भोजनकरके विठ्ठलदासकुं प्रसादलेवेकी आज्ञा करी ॥ जब विठ्ठलदासजीनें कपडा उतारे ॥ जब बिनके शरीरपर मार बहोत पडी हति ॥ जासुं बिनकी देह बहुत बिगडरही हती ॥ जब विठ्ठलदासकुं श्रीगुसाईजीनें पूछी जो तुमकुं कहा भयो हे ॥ जब विठ्ठलदासनें वीनती करी जो महाराज देहको दंड देहही सुजोहे ॥ तब नारायणदासनें वीनती करी ॥ महाराज इनकुं मैंने मार देवाईहे मैंने इनकुं वैष्णव जान्यो न हतो ॥ सो अपराध आप क्षमा करेंगे ॥ तब श्रीगुसाईजीनें कही जो वैष्णव नहीं जान्यो परंतु जीवतो हतो वैष्णवकुं जीवभात्र ऊपर दया राखी चाहिये ॥ और जिनके मनमें दया और विवेक और धैर्य और भगवदाश्रय नहींहे बिनके चित्तमें भगवदावेष नहीं होवेहे ॥ देखो विठ्ठलदास कैसे धीरजवान हैं ॥ जो इतनो कष्ट पायके दुःख सहन किये ॥ परंतु वैष्णवता गुप्त राखी ऐसेनके वश्य श्रीठाकुरजी रहतेहे ॥ ये कहिके श्रीगुसाईजी चुप कर रहै जब नारायणदास विठ्ठलदासके पास एकांतमें जायके अपरा

धक्षमा कराए ॥ और अब इहां रहोतो बहुत आछोहै तव
विठ्ठलदासनं कही जो तुम मेरी वैष्णवता जानगयेहो । अब
यादेसमें नहीं रहेंगो ॥ सो विठ्ठलदास ऐसे कृपापात्र भ-
गवदीयहते जिननें इतनो दुःखपायकें वैष्णवपनो गुप्त
राख्यो ॥ जासुं इनकी वार्ता कहांताई लिखिये ॥ वार्ता
संपूर्ण ॥ वैष्णव ॥ १० ॥ ❀ ॥ ॥ ॥ ॥

श्रीगुसाईजीके सेवकभैयारूपमुरारीक्षत्रीति ०
एकदिन श्रीगुसाईजी गोविंदकुंड उपर संध्या करते हते ॥
सो भैयारूपमुरारी उहां सिकार करते करते आए ॥ सो
विनके एक हाथमें वाज हतो ॥ सो विननें श्रीगुसाईजीकुं
दूरसो देखे सो साक्षात् पूर्णपुरुषोत्तमके दर्शन भए ॥ त-
व शिकार छोड दियो और श्रीगुसाईजीसों वीनती करी
जो मेरी तो ये दशा है ॥ जब श्रीगुसाईजीनें कही जबसुं
जागे तबही सवार ॥ ये सुनके भैयारूपमुरारी हाथ
जोडके ठाढे भए ॥ तब श्रीगुसाईजीनें कही स्नानकर
आवो तब न्हायके सन्मुख ठाढे भए ॥ तब श्रीगुसाईजीनें
विनकुं नाम सुनायो और श्रीनाथजीके संनिधान सम-
पेण करायो ॥ और भोजन करके महाप्रसादकी पातर
धराई ॥ तब रूपमुरारीनें महाप्रसाद लियो फेर एकदिन
रूपमुरारीनें श्रीगुसाईजीकुं पूछी जो मै आपके चरणस्पर्श
करूं परंतु मेरे करेकर्म मोकुं याद आवेंहैं जासुं मेरो मन
शकैहैं तब श्रीगुसाईजीनें कही अब तुम वैष्णव भए तुमारी
नयो जन्मभयो जासुं तुम नित्य अपरसमें न्हायके चरण-
स्पर्श भलेही करौ सो वे रूपमुरारी ऐसे कृपापात्र हते ॥

जिनको मन दर्शनमात्रहीतें प्रभुके चरणारविंदमें लख्यो
 ॥ वार्ता संपूर्ण वैष्णव ॥ ११ ॥ ❀ ॥ ॥ ॥
 ॥ श्रीगुसाईजीके सेवक कायथ पितापुत्र होते
 तिनकी वार्ता ॥ सो विननें एक परगना इजारे लियो हतो
 तब विनकुं वीसहजार रुपैया टूटे जब पातशाहनें विनको
 बंदीखानेमें राख्यो विननें पुरोहितकुं देसमें पठायो सो
 पुरोहित विनके घरके दागीना बेचके दो हजार रुपैया
 लिये और तीनहजार एक ब्राह्मणसों करज लेके पांच ह-
 जार रुपैया विनकुं लायदिये तब विननें विचार कय्यो
 जो इन रुपैयानसूं छूटेंगे तो नहीं जासूं ये दो हजारतो
 श्रीगुसाईजीकुं भेट पठाय देवें और ब्राह्मणको करज आ-
 पने उपर रहेंगे तो ब्राह्मण ऋण बाधा करेंगे जब वि-
 ननें तीन हजार रुपैया पाछें ब्राह्मणको पठाय दिये और
 दोहजार श्रीगुसाईजीकुं भेट पठाये ॥ सो पुरोहित लेके श्री-
 गुसाईजीके पास गयो ॥ जब श्रीगुसाईजीनें पूछी जो वे
 पितापुत्र कहाहैं तब विन पुरोहितनें कही वेतो बंदीखानेमें
 हैं ॥ जब श्रीगुसाईजीनें चाचाहरिवंशजीकुं वीरबलके पास
 पत्र देके दिल्ली पठाए ॥ तब चाचाहरिवंशजी आयके वीरब-
 लके इहां उतरे ॥ और पितापुत्रके पास मनुष्य पठायो ॥
 वा मनुष्यनें श्रीगुसाईजीको आशिर्वाद कह्यो और पत्र
 दियो वा पत्रके संग वीरबलको पत्र हतो सो वे वापवेताननें
 वीरबलको पत्र बाँचके छिपाय राख्यो ॥ वा पत्रको अभि-
 प्राय ये हतो ॥ श्रीगुसाईजी वीसहजार रुपैयाके जामिन
 पढ़ेंगे तो आपनौ धर्म न रहेंगे और बंदीखानेमें जो र-

हेंगे तो धर्म रहेगो ये विचारके वीरवलको पत्र छियाय
 राख्यो और वा मनुष्यसों कहि जो पत्र खोवाय गयोहै
 तब वा ब्रजवासीनें चाचाजीसों कहि जो वीरवलको पत्र
 खोवाय गयोहै तब चाचाजीनें मनमें विचार कियो जो
 पत्र खोयगयो तो कहाभयो श्रीगुसाईंजकि प्रतापतें सब
 कार्य सिद्ध होयंगे तबये विचारके चाचाजीनें वीरवलसों
 कहि जो श्रीगुसाईंजी वीसहजार रुपैयाके जामिन पडेंगे
 इन बापवेटानकुं छुडाय देवो ॥ तब वीरवलनें कांहें मैं श्री-
 गुसाईंजीको दास हूं मेरे पास द्रव्य है सो श्रीगुसाईंजीकोहै
 मैं जामिन पडुंगो तब वीरवलनें पातशाहकों कहके छुडाय
 दीये और परगनोमें पठाये फेर बापवेटानें कस्यके द्रव्य
 भर दीयो सो वे बापवेटा श्रीगुसाईंजीके ऐसे कृपापात्र
 हते ॥ जिननें बंदीखानो कबूल राख्यो और धर्म न
 छोड्यो ॥ वार्ता संपूर्ण ॥ वैष्णव ॥ १२ ॥ ❀ ॥ ॥
 ॥ श्रीगुसाईंजीके सेवक कृष्णदासहते ति० ॥
 सो वे कृष्णदास एक म्लेच्छके पास परगनेमें हते ॥ सो
 जो वैष्णव आवतो विनको रुपैया देके खत लिखाय लेते ॥
 और वेपार करावते तब रुपैया तीस हजार टूटे जब
 कृष्णदासकुं म्लेच्छनें बंदीखानेमें राखे ॥ तब कृष्णदा-
 सको पुरोहित सब खत म्लेच्छकुं देवे लग्यो जब कृष्णदा-
 सनें विचार कियो ये तो मेरो सब धर्म जायगो ॥ और सब
 वैष्णवनकुं कष्ट होयगो ॥ और एकलो मैंहीं कष्ट मुकुंगो तो
 चिंता नहीं ॥ ये विचारके कृष्णदासनें सब खत जराय
 दिये जब दूसरे दिन म्लेच्छनें कृष्णदासकुं बुलायके कही

जो तुमारे पास कछ्छ होयतो देओ ॥ विननें कही हमारे पास कछ्छ नहींहैं ॥ जब स्लेच्छनें कृष्णदासकूं सिरपाव देके और परगनमें पठायो ॥ और धीरेधीरे सब रुपैया भरदिये सो वे कृष्णदासजी ऐसे कृपापात्र हते ॥ जिननें बंदीखानो शुक्तयोपण वैष्णवनको कछ्छ न परवे दियो तासूं श्रीप्रभुननें स्लेच्छकी बुद्धी फेर डारी ॥ वार्तासंपूर्ण ॥
॥ वैष्णव ॥ १३ ॥ ॐ ॥ ॥ ॥ ॥ ॥

श्रीगुसाईंजीके सेवक गोपालदास सेगलक्षत्री तिनकी वार्ता:-सो वे गोपालदास श्रीनंदगाममें रहते सो श्रीनंदमें श्रीगुसाईंजी पधारे जब गोपालदासनें श्रीगुसाईंजीकूं अपने घरमें उतारे ॥ और सर्वस्व जो घरमें हतो सो सब अर्पण करदियो और फेर एक स्लेच्छकी चाकरी करवे लगे ॥ और वा स्लेच्छको द्रव्य गोपालदास वैष्णवन में खरच करते रहते ॥ जब वा स्लेच्छकूं लोगननें कही याकूं चाकरीसूं काढदेवो ॥ ये नित्य कथा कीर्तनमें द्रव्य खरच डारे हैं ॥ तब स्लेच्छनें कहीजो याके भाग्यसों मेरो द्रव्य दिन दिनबढतो जायहै और ये कछ्छ संसारव्यवहारमें खरचे नहीं है ॥ जासूं इनको कैसे काढयोजाय ॥ सो वे गोपालदास ऐसे कृपापात्र हते ॥ जिनके संगतें स्लेच्छकी बुद्धी निर्मल रहेतीहती ॥ वार्ता संपूर्ण ॥ वैष्णव १४
श्रीगुसाईंजीके सेवक हरिदास बनिया तिनकी ० सो वे हरिदास बनिया मेरता गाममें रहते ॥ वा गाममें एकही वैष्णव हते ॥ और वा गामको राजा जैमल हतो सो स्मार्त धर्ममें हतो ॥ और एकादशी पहेली करते हते ॥

और जैमलराजाकी वेनको घर हरिदासवनियाके सामें हतो ॥ सो जब श्रीगुसाईंजी हरिदासके घर पधारे हते तब जैमलकी वेनकुं वारीमेंसूं श्रीगुसाईंजीके साक्षात् पूर्ण पुरुषोत्तमके दर्शन भए ॥ जब जैमलकी वेननें पत्रद्वारा श्रीगुसाईंजीको वीनती लिखके पत्रद्वारा सेवक भई ॥ काहेतें वे पढदामेंसे बहार नहीं निकसते जासूं पत्रद्वारा सेवक भये ॥ फिर एकदिन जैमलजीनें ऐसो हुकुम कयो जो गाममें जो दूसरी एकादशी करेगो वाकुं दंड करुंगो ॥ जब जैमलकुं हलकारानें खबर करी जो हरिदासनें दूसरी एकादशी करीहै ॥ जब हरिदासजीकुं बुलायो ॥ और कही जो हरिया तेंने दूसरी एकादशी क्यों करी ॥ तब हरिदासनें कही अरे जैमल्ला हमारी खुसी ॥ जब जैमलकुं बडो क्रोध भयो ॥ और क्रोधावेशतें सुध मूल गयो और तरवार खेंचके हरिदासजीकुं मारवे दोयो और जैमलराजाकी कचेरीमें ऐसो हुकुम हतो जो भेरे हुकुम बिना जो कल्ल करेगो वाकुं शिक्षा करुंगो ऐसी वाकीरित हती ॥ जासूं हरिदासजीकुं कोई पकडवे न उठयो ॥ जब जैमलकुं तलवार खेंची देखके हरिदास वाहेर भागे ॥ जब वे जैमल पाछे दौडयो जब हरिदास जैमलकी वेनके घरमें घुस गए ॥ तब वेभी पाछे तलवार लेके गए तब जैमलकी वेननें जैमलकुं देखके कहेवे लगी जो तूं वैष्णवकुं मारेगो तो अपराध पढेगो और ये तो मेरो बडो भाई है और तूं छोटा भाई है जासूं याके पांवनपर ॥ नहीं तो तौकुं अपराध पढेगो ॥ और आपने बाप दादा सब

नरकमें जाएंगे ॥ फेर वैष्णव साहाय्यके श्लोकवावाई-
 नें जैमलकुं लुनाए ॥ भगवदचनस ॥ अतोमदकभक्तप्रीति-
 रभ्यधिका भवेत् ॥ तस्मान्मदकभक्तश्च पूजनीयो वि-
 शेषतः ॥ १ ॥ अध्वश्रांत मविज्ञात मतिथिष्ठुत्पिपा-
 सितम् ॥ योनपूजयतेभक्त्या तयादुर्ब्रह्मघातकम् ॥
 ॥ २ ॥ मर्ददनाच्छतगुणं मदकस्यतुर्वदनम् ॥ स-
 द्दोजनाच्छतगुणंमदकस्यतुभोजनम् ॥ ३ ॥ बृहन्नारदीये ॥
 योविष्णुभक्तान्निष्कामान्भोजयेच्छ्रद्धयान्वितः ॥ त्रि-
 सप्त कुलसुदृत्य सयातिहरिमंदिरम् ॥ ४ ॥ विष्णोःप्रसाद-
 माकांक्षन् वैष्णवान्परितोषयेत् ॥ अन्यथावासकासोस्ती-
 नैवकेनापितुष्यति ॥ ५ ॥ पूजनाद्विष्णुभक्तानांपुरुषार्थो-
 स्तिनेतरः ॥ तेषुचद्वेषतः किंचिन्नास्तिनाशनमात्मनः ॥
 ६ ॥ ब्रह्मालंकारसंपाद्यै र्याभागवतमर्चयेत् ॥ श्रूयतेत-
 स्यवंशोपिश्रीवृद्धिः पुत्रपौत्रकैः ॥ ७ ॥ अंगसंवाहनाच्चैश्च-
 तांबूलैर्व्यजनैस्तथा ॥ तोषयेद्भगवद्वक्तंतुष्यतेचजनार्दनः
 ॥ ८ ॥ श्रीमद्भागवते ॥ बाध्यमानोपिमदक्तो विषयैरजि-
 तैर्द्रियः ॥ प्रायः प्रगल्भयाभक्त्याविषयैर्नाभिभूयते ॥ ९
 ॥ श्रीमद्भगवद्गीतायाम् ॥ अपिचेत्सुदुराचारोभजते माम-
 नन्यभाक् ॥ साधुरेवसमंतव्यः सम्यगव्यवसितोहिस ॥ १०
 ॥ स्कंदपुराणे ॥ ब्राह्मणः क्षत्रियोवैश्यः शूद्रोवायदिवेतरः ॥
 विष्णुभक्तिससाद्युक्तो ज्ञेयः सर्वोत्तमोत्तमः ॥ ११ ॥ दुराचा-
 रोपिसर्वाशी कृतघ्नोनास्तिकः पुरा ॥ समाश्रयेदादिदेव-
 श्रद्धयाशरणं हियः ॥ १२ ॥ हारीतस्मृती ॥ भगवद्वक्तिदीपा-
 म्निदग्धदुर्जातिक इमलः ॥ श्वपचोऽपिबुधै श्लाघ्योनवे-

दाढशोपिनास्तिकः ॥१३॥ पाराशरस्मृतौ ॥तदीयाराधन-
 पुण्यं वक्ष्यामिमुनिसत्तमाः ॥ यदन्वेपणमात्रेणसर्वपापैः
 प्रसृच्यते ॥ नातःपरतरं पुण्यं त्रिपुलोकेषु विद्यते ॥ १४ ॥
 सर्वकामप्रदं पुंसामत्यंतातिशयं हरेः ॥ तस्मात्परतरं श्रेयो-
 नास्तिसत्यं ब्रवीम्यहम् ॥ १५ ॥ सकृत्संपूजनं तेषां मुक्ति-
 दंपापिनामपि ॥ सहस्रवार्षिकीपूजाविष्णोर्भगवतो हरेः ॥
 सकृद्भागवताचार्याः कलां नार्हतिपोडशीम् ॥ १६ ॥ सकृ-
 त्संपूजितेषुण्ये महाभागवते गृहे ॥ आकल्पकोटिपितरभरि-
 तुप्तानसंशयः ॥ १७ ॥ यथातुष्यति देवेशो महाभागवता-
 र्चनात् ॥ तथानतुष्यति हरिर्विधिवत्सार्चनादपि ॥ १८ ॥
 षष्टिवर्षसहस्राणि विष्णोराराधने फलम् ॥ सकृद्वैष्णवपूजा-
 यालभते नान्नसंशयः ॥ १९ ॥ वैष्णवो यद्गृहे भुंक्ते तस्य भुंक्ते हरिः
 स्वयम् ॥ हरिर्यस्य गृहे भुंक्ते तस्य भुंक्ते जगन्नयम् ॥ २० ॥
 अंशरीपाख्यानैर्दुर्वासा प्रतिभगवद्वाक्यम् ॥ अहं भक्तपराधी
 नो ह्यस्वतंत्र इव द्विज ॥ साधुभिर्ग्रस्तहृदयो भक्तैर्भक्तजनप्रि-
 यः ॥ १ ॥ नाहमात्मानमाशासे मद्भक्तैः साधुभिर्विना ॥
 श्रियं चात्यंति कीर्त्तयन्त्येषां गतिरहंपरा ॥ २ ॥ ये दारागा-
 रपुत्राप्तान्प्राणान्वित्तमिमंपरम् ॥ हित्वा मां शरणं याताः कथं
 तांस्त्यक्तुमुत्सहे ॥ ३ ॥ मयिनिर्वद्धहृदया साधवः समदर्श-
 नाः ॥ वशीकुर्वंति मां भक्त्या सत्स्त्रियः सत्पतियथा ॥ ४ ॥
 मत्सेवया प्रतीतं च सालोक्यादिचतुष्टयम् ॥ नेच्छंति सेवया
 पूर्णाः कुतोऽन्यत्कालविप्लवम् ॥ ५ ॥ साधवो हृदयं मद्दंसा-
 धूनां हृदयं त्वहम् ॥ मदन्यत्तेन जानंति नाहं तेभ्यो मनागपि
 ॥ ६ ॥ एवं धर्मैर्मनुष्याणामुद्धवाऽऽत्मनि वेदिनाम् ॥ मयि

संजायतेभक्तिःकोऽन्योऽर्थोऽस्यावशिष्यते ॥ ७ ॥ दशम-
स्कंधेउत्तरार्धेभगवद्वाक्यम् ॥ नह्यस्मयानितीर्थानिनदेवामृ-
च्छिलामयाः॥ते पुनंत्युरुकालेनदर्शनादेवसाधवः॥८॥ ना-
ग्निर्नसूर्योनचचंद्रतारकानसूर्जलंखंश्वसनोथवाइमनःउ-
पासिता भेदकृतीहरंत्यर्घविपश्चितौघ्नंतिद्युहृतसेवया ॥९॥
यस्याऽऽत्मबुद्धिः कुणपेन्निघातुकेस्वधीःकलत्रादिपुमौमई
ज्यवीः ॥ यत्तीर्थबुद्धिः ललिलेनकर्हिचिज्जनेष्वसिद्धेपुसए
वगोस्वरः॥१०॥ ये मुनकेजव जैमलजी शास्त्रके ज्ञाता हते
जव कहन लगे जो या शास्त्रको अभ्यास कहांसो कियोहै॥
तव वा बाईनें कही मेरे बडे भाई हरिदाससो लीखी-
हो ॥ तव जैमलनें कही ये तेरो बडो भाई कैसे ॥
जव वा बाईनें कही ये श्रीगुसाईजीके सेवक पहिले
भए और मैं पाछे सेवक भई ॥ जासूं ये मेरे बडे भाई
है ॥ औरमेरे प्राणसूं प्रियहै ॥ जव जैमलनें कही
जो ये तेरे घर नित्य आवेहै कहा ॥ तव वा बाईनें कही
जो ये नित्य भगवत्सेवा करवे आवेहै सो तूं चल दर्शन कर
तलवार नीचे धरदे ॥ श्रीठाकुरजीके सन्मुख तलवार नहीं
आवेहै ॥ तव वा बाईनें जैमलजीकुं ऐसे कहिके और हाथ
पकडके तलवार नीचे धरायके श्रीठाकुरजीके सन्मुख
लेगई ॥ और दर्शन करत मात्र क्रोध उतर गयो ॥ और
बुद्धि निर्मल होयगई जैसे सूर्य उदय भयेत कमल प्रफु-
ल्लित होयहै तैसे जैमलजीको हृदयकमल प्रफुल्लित होय-
गयो ॥ और कहेवे लम्यो जो हरिदासजीसूं मेरे अपराध
क्षमा करावो और मौकूं वैष्णव करो जव वा बाईनें जैमल-

जीको न्हायके हरिदासके पास अपराध क्षमा करायके जैमलजीकुं बैठायो ॥ और कही जो आज इहां महाप्रसाद लेओ ॥ तव जैमलजीने महाप्रसाद लियो ॥ इतनेमें श्रीगुसांईजी द्वारकासों मरते पधारे और हरिदासजीके घर खबर पठाई ॥ जब ये बात सुनके हरिदासजी जैमलजीकुं संग लेके श्रीगुसांईजीके दर्शन करिवेकुं गए ॥ और जैमलजी उहां वैष्णव भए ॥ और सब कुटुंब सहित गाम सहित जैमलजी वैष्णव भए ॥ तव सब लोकनकुं बडो आश्चर्य भयो जो जैमलतो हरिदासकुं मारवे गएहते सो वैष्णव होयके घर आए ॥ वे हरिदास ऐसे टेकके वैष्णव हते जैमलजीसों न हरे जैमलके सन्मुख उत्तर दिये ॥ प्रसंग ॥ १ ॥ वे हरिदासकी एक बेटी हती सो हरिदासने पुरोहितसों कही याकी सगाई करि आवो ॥ तव वह पुरोहित जैन धर्मीकुं धनाढ्य जानके धनके लोभसों सगाई करि आयो ॥ जब हरिदास सुनके कछु बोले नहीं ॥ और पुरोहितसों कही द्रव्य और बेटी लेजायके तुम विवाह करिदेवो तव वा पुरोहितने हरिदाससों द्रव्य लेके विवाह करदियो ॥ और बेटीकुं परभारे विदा करदियो सो वे हरिदास ऐसे टेकके भगवदीय हते ॥ जिनने लौकिकनिंदा सहन करि परंतु जैनधर्मीको मुख नदेख्यो ॥ वे ऐसे भगवदीय हते ॥ प्रसंग ॥ २ ॥ वार्ता संपूर्ण ॥ वैष्णव ॥ १५ ॥

॥ श्रीगुसांईजीके सेवक हरिदासकी बेटी ति०
जब वे पुरोहित हरिदासकी बेटीकुं परनायके सासरामें धरिगयो ॥ वाको नाम कृष्णाबाई हती सोवा कृष्णाबाईने

सासराके घरकी अनाचार देखके ये विचार कियो जो अन्नजल न लेनौ और देहत्याग करनौ ॥ जासूं वानें तीन-दिनसूधी अन्न जल लियो नहीं ॥ जब वाकी सासको स्वभाव दयायुक्त बहुत हतो जासूं वासुं दया आई ॥ जब वाकी सासुनें कही वह तूं क्यों खावें नहींहैं ॥ जब वा कृष्णानें कही मैं मेरे हाथसूं करकेलेऊं दूसरेके हाथको जल हूं न लेऊं ॥ जब वाकी सासुनें वासों कही तूं तेरे हाथसे जल भरलायके रसाई कर और वासन वहूनें कहे सो सब सासुनें मगाय दीने ॥ जब वा वहूनें रसाई करके भोग धरयो और भोग सरायके एक पातर अपनी करलीनी और सब महाप्रसाद बिनकुं हठायदीनौ ॥ सो महाप्रसाद लेतभात्रही बिनकी कुढी निर्मल भई ॥ जब वे घरमें वा कृष्णाकी सराहना करवे लगे ॥ और वे कृष्णा गाम बाहेर कुवा हतो जहां नित्य जल भरनेकुं जाती हती ॥ वा कुवापर एक वैष्णव बिनकुं मिल्यो ॥ जब वासु हरिदासजीकी पहचान काढी ॥ तब वैष्णव नित्य कुवापर वा बाईको भगवत्स्मरण करते ॥ वे कृष्णा बिनसों भगवत्स्मरण करेबिना प्रसाद न लेती और जादिन वे कुवापर न मिलते जब बिनके घर जायके भगवत्स्मरण कर आवती ॥ काहेतें जो श्रीमहाप्रभुजीनें आज्ञा करीहैं नवरत्नग्रंथमें ॥ "निवेदलंतु स्मर्तव्य सर्वथा तादृशीर्जनैः" ॥ यातें नित्य भगवत्स्मरण करेबिना प्रसाद लेती न हती ॥ एकदिन वे वैष्णव कोई गाम गये हते सो तीन दिनमें आए ॥ जब वा कृष्णानें तीन दिन सूधी प्रसाद न लियो

हती ॥जब वा कृष्णाकुं सासुनें कही तूं प्रसादकी पातर नित्य क्यो गायकुं देवेहे ॥ और लेत क्यो नहीं हैं ॥ तब वा कृष्णाने कही एक मेरो गुरुभाई नित्य कुवापर मोकुं मिलेहे ॥ और जब न मिले तब वाके घर जायके भगवत्स्मरण करआउंहे ॥ सो अब तीन दिन भये मिले नहिं जासूं महाप्रसाद न लियो ॥ सो वे सासू वाको साच देखके बहोत प्रसन्न भई ॥ और कहेवे लगी मैं तेरे संग चलूं सोकुं वा वैष्णवको घर दिखावेगी ॥ तब वा सासूको वा वैष्णवके घरलेगई ॥ जब वे वैष्णव तीन दिनमें फेर घर आयो इती जब वा कृष्णाने वा वैष्णवसों भगवत्स्मरण क्यो ॥ जब वाकी सासू वैष्णवकुं हाथ जोरिके कहेवे लगी ॥ जो ये तीन दिनसूं भुखीहैं ॥ और तुम कृपाकरिके हमारे घर नित्य आयके याकुं भगवत्स्मरण करजावो तो मैं तुमारो बडो उपकार मानुंगी ॥ और कछु तुमारे संगसों मेरो आछो होयगो ॥ जब वा वैष्णवनें नित्य आयवेकी हां कही ॥ जबतें नित्य वाके घर जायके भगवत्स्मरण करते ॥ जबतें वा कृष्णाकी सासू और सासुरा और धणी और सब घरके वा वैष्णवकुं पेहचानेव लगे और वा वैष्णवकुं कहेवलगे जो तुमारो धर्म हमकुं समझावो और हम सब तुमारे शिष्य होंगे जब वाने कही हमारे धर्ममें तो सब श्रीगुसाईजीके सेवक होवेहे ॥ जब वाकी सासुनें कही जो वे श्रीगुसाईजी कहांरहेहे इहां कैसे पधारें सो तुम उपाय करी द्रव्यतो हमारे इहां बहोत है ॥ तुम कहो सो मैं खरचुंगी ॥ जब वा वैष्णवनें पत्र लिखायके

कासिद पठायो ॥ तब श्रीगुसाईजी उहाँ पधारे और वे सब सेवक भए और बिनके संगसों सब गामके वनियां-हूँ वैष्णव भए ॥ सो वे हरिदासकी बेटी श्रीगुसाईजीकी ऐसी कृपापात्र हती जिनके संगसुं सब गाममें वैष्णव भये ॥ प्रसंग ॥ १ ॥ श्रीगुसाईजी उहति द्वारका पधारे और एकदिन वा कृष्णाकी सासुनें रसोई करी ॥ जब वा कृष्णाकुं बढो ताप भयो जो अब योसों भगवत्सेवा छूटी और रसोई करवेकेसमें श्रीठाकुरजी आयके मोहुं सिखावते और इच्छा आवती सो सायग्री करावते और सब बालभाव जनावते ॥ सो वे सुख योहुंतो न मिलेयो ये विचारके बहुत विप्रयोग करवे लगी ॥ बिनको ताप श्रीठाकुरजी सही न सके जब वाकी सासुहुं श्रीठाकुरजीनें स्वप्नमें जताएजो मोहुं कृष्णाके हाथकीरसोई बहुत आछी लगेहै ॥ जासुं तुम दूसरी सेवा करो ॥ फेर दूसरे दिन वाकृष्णाकुं सासुनें कही जो रसोई तुम करो मैं दूसरी सेवा करुंगी और श्रीगुसाईजीकुं हूँ श्रीठाकुरजीनें जताइ जो आप कृष्णाकुं भलाभण करो जो रसोईकी सेवा न छोडे ॥ तब श्रीगुसाईजी द्वारकासुं पाछेवा गाममें पधारे जब वे कृष्णा श्रीगुसाईजीके दर्शनकुं आवती जासुं रसोईकी बहुत अवार जानके वाकी सासु रसोई करती ॥ जब श्रीगुसाईजीनें वा कृष्णासों आज्ञा करी जो तेरे हाथकी रसोई श्रीठाकुरजीकुं भावेहै जासुं तुम श्रीठाकुरजीसों पढुंचके हमारे दर्शनकुं आईयो ॥ श्रीप्रभुनकुं श्रम होय ऐसो करणो नहीं ये दासको मुख्य धर्म

है ॥ जादिनते कृष्णावाई रसोईकी सेवा विशेष करके
आपही करती सो वे कृष्णावाई ऐसी कृपापात्र हती ॥
॥ वाता संपूर्ण वेष्णव ॥१६॥ ॥ ॥ ॥

॥श्रीगुसाईजीके सेवक अलीखानपठाण ति०

सो वे अलीखान पठाण पृथ्वीपतीके पाससों तबीसाकी ह-
कूमत लेके महावनमें आयरहे और श्रीगुसाईजीके पास
नित्य कथा सुनवेकुं आवते ॥ विननें कथामें ये सुन्यो ॥
श्लोक ॥ “वृक्षे वृक्षेणुधारीपत्रेपत्रेचतुर्भुजः ॥ यत्रवृंदावनं
तत्रलक्षालक्षकथाकुतः” ॥ १ ॥ ये श्लोक सुनके ऐसी ढोड़ी
फिराई जो ब्रजके वृक्षको पत्ता कोई तोरेगो वाकुं मैं शिक्षा
करुंगो ॥ वा देशमें एकतेलीतेल लादके जातो हतो वानें
एक वृक्षकी डार तोडी ॥ जब अलीखाननें वाको सगरो
तेल वा वृक्षमें ठलवाय दियो ॥ तवसुं ऐसो डर बैठगयो
जो कोई ब्रजके वृक्षको पत्ता न तोरे ॥ प्रसंग ॥ १ ॥ फेर
एक दिन एक चोरकुं अलीखानके पास पकड लाए ॥ वे
चोर सोगंध खायवे लगयो और कही जो मैं ताते तेलमें
हाथ डारुंगो जब तातो तेल ठंडो होयगो तब मेरी बात
आप साची मानोगे ॥ तब अलीखाननें तेल भगायके
कही ॥ जो परमेश्वर ताते तेलकुं ठंडो करसकेहैं वो ठंडेको
तातो कर सकेंगे ॥ जासुं तूं ठंडे तेलमें हाथ डार ॥ जब वा
चोरनें ठंडे तेलमें हाथ डारे तब वाके हाथ जर गए ॥ सो वे
अलीखानको परमेश्वर ऊपर ऐसो दृढविश्वास हतो ॥ प्रसंग
॥ २ ॥ वा अली खानके पास एकघोडा बहुत सुंदर हतो और
एक घडीमें छः कोस चलतो हतो ॥ वा घोडाकुं देखके

श्रीगुसाईजीने बहुत सराहना करी ॥ जब वा घोडा अलीखानने श्रीगुसाईजीके पास पठाय दियो ॥ तब श्रीगुसाईजीने राख्यो नहीं जब अलीखान मनमें समझे जो मैं इनको सेवक होऊँ तो राखेंगे तब अलीखान सेवक भए जब अलीखान सेवा करवे लगे तब अलीखानकी बेटीहुँ सेवा करवे लगी ॥ तब अलीखानकी बेटीकुँ श्रीठाकुरजीने अडुभव करायो ॥ और संगमिलके नृत्य करते जब अलीखानकुँ खबर पडी जो भीतर कहा नृत्यकी शब्द होयहै जब अलीखानने छिपके देख्यो तो श्रीठाकुरजी पधारेहैं और नृत्य करेहैं सो देखिके बेटीकी बहुत सराहना करन लागे ॥ प्रसंग ॥ ३ ॥ और नित्य श्रीगुसाईजी श्रीगोकुलमें कथा कहते और सब वैष्णव सुनते और अलीखानहुँ नित्य कथा सुनिवेकुँ आवते जब अलीखान आवते तब श्रीगुसाईजी कथा कहते वैष्णवनेके मनमें आई जो म्लेच्छ आवेहै जब कथा वाचेहैं ॥ तब श्रीगुसाईजी सब वैष्णवनेके मनकी जानके एकदिन वैष्णवनेसुँ पूछी जो काल कहा प्रसंग हतो जब कोई वैष्णवकहिसक्यो नहीं तब अलीखानने हाथ जाडके बिनती करी जो आपकी आज्ञा होय तो कालकी कहूँ अथवा आज्ञा होय तो जादिनसुँ कथा सुनूइ सब दिनकी कहूँ जादिनसुँ कथाकी आरंभ भयोहै ये सुनके श्रीगुसाईजी बहोत प्रसन्न भए ॥ सो वे अलीखान ऐसे कृपापात्र हते जो कछु भगवत् कथा सुनते सो एक अक्षर न भूलते ॥ वार्ता संपूर्ण ॥ वैष्णव ॥ १७ ॥ * ॥ ॥

श्रीगुसाईजीके सेवक निहालचंदझलोटाक्षत्री.

वे निहालचंद उज्जैनमें रहते हते ॥ पुष्टिमार्गीय ग्रंथ सुन-
वेमें बहोत आसक्ति उनकी हती ॥ और श्रीठाकुरजी
उनकुं अनुभव जतावत हते सो एक समें ये निहालचंद
श्रीगोकुल चले ॥ रस्तामें सोलह मनुष्य व्यापारि-
नको संग भयो सो रस्तामेंसों चोर वेपारिनकों तथा
निहालचंदकुं पकरिके लगए ॥ सो द्रव्य सब लेके कैद
करे ॥ और सबको मार डारने ऐसो विचार करयो ॥ परंतु
वे चोरनको जो मुख्य पटेल हतो वाकी मा वैष्णव हती ॥
चाचाहरिवंशजीने जिन भीलनको गाम वैष्णव करयो
हतो वा पटेलकी मा वा गामकी बेटी हती ॥ और वे नि-
हालचंदभाई रात्रिकों कीर्तन करते हते सो वा पटेलकी
माने सुन्ये ॥ सो वे उठके निहालचंदकीके पास गई
और विनकुं पूछयो जो तुमारी नाम क.हाहै विनने नाम
वताये सो वे निहालचंदको नाम वानें वैष्णवनसों सुन्यो
हतो ॥ सो वे नाम सुनतही पावन पडी ॥ और बेटाको
लायके पावन पराये अपराध क्षमा कराए ॥ और सब
गामकों वैष्णव कराए ॥ और सब गामसूं मिलके श्री-
गुसाईंजीकी भेट दिवाई और वा निहालचंदनें विनचोर
नको खेती करवेकी कही चोरी छुडाय दीनी ॥ फेर उ-
हांसों वे निहालचंद श्रीगोकुल आए और वे सोले वेपा-
रीहूं संग आए और सब वैष्णव भए ॥ और विनके संग
जो मालहतो सो सब भेट कर दीनो ॥ सो वे निहालचंद ऐसै
कृपापात्र हते ॥ जिनके संगसूं भीलको गाम तथा व्यापारी
सब वैष्णव भए ॥ वार्ता संपूर्ण ॥ वैष्णव ॥ १८ ॥ ❀ ॥

श्रीगुसाईजीके सेवक माधवदासक्षत्री तिन० सो वे माधवदास काबुलमें रहते हते ॥ सो एकसमें मैयारूपसुरारी देशाधीपतीके संग काबुल गए और उहां बजारमें माधवदासजीके साथेपर तिलक देखके पूछवे गए ॥ जो तुम कौन हो और ये तिलक क्यों करयो है ॥ जव माधवदासजीनें कहीहम श्रीगुसाईजीके सेवकहैं ॥ जव रूपसुरारीनें कही जो हमहूं श्रीगुसाईजीके सेवक हैं तव माधवदास बहुत प्रसन्न भए ॥ इतनेमें माधवदास उठके अंचल फिरायवे लगे ॥ जव रूपसुरारीनें पूछी यह कहाहै जब विननें कही श्रीनाथजी गाय चरायके ब्रजमें पधारें हैं जासूं अंचल वारत हूं ॥ तव रूपसुरारी ये सुनके दहोत विस्मय भए ऐसे आश्चर्य भयो जो श्रीनाथजी इनकी इहां दर्शन देतहैं ॥ तव मनमें इनकी वहीत सराहना किये और माधवदासनें जो श्रीनाथजीको शृंगारकह्यो सो मैयारूपसुरारीनें लिखलीनी ॥ फेर माधवदासके घर जायके श्रीठाकुरजीको दर्शन कियो सो साक्षात् श्रीगोवर्धननाथजीको दर्शन भयो ॥ तव मनमें कही मेरे बड़े भाग्यहै जो श्रीगुसाईजीनें ऐसे म्लेच्छदेशमेंहूं मोको वैष्णवनकोसंग दियो ॥ फेर कलकदिन रहिके चलवे लगे ॥ जव माधवदासनें कही जो तुम थोडे दिन और रहो सो पृथ्वीपति वीस अजिल जायगो तव मैं तुमकूं एकदिनमें पोहोचतो कर देऊंगो ॥ जव रूपसुरारि रहे ॥ वीसदिन पाछे माधवदासजी रूपसुरारीके संग घोडापर बैठके एकरातमें परवतमेंको दूसरो रस्ता अस्सीकोसको एकरा-

तमें पढ़ूँचे सो वे रस्तामें चौर बहुत हते परंतु माधवदासजीकूँ तथा भैयारूपसुरारीकूँ कोईने देखे नहीं और आखीरात रस्तामें भगवद्वार्ता करत आए जब माधवदासने कही मैं हरिद्वारमें श्रीगुसाईंजीको सेवक भयो हतो ॥ तब रूपसुरारीकूँ बढो आश्चर्य भयो जो श्रीनाथजी ब्रजलीलासहित इनको दर्शन देवेंहैं सो इनके उपर श्रीगुसाईंजीकी बहुत कृपाहै ॥ जब माधवदास रूपसुरारीसो विदाहोय अपने घर आए ॥ सो वे माधवदास ऐसे कृपापात्र हते ॥ जिनकुं काबूलमें श्रीनाथजी नित्य दर्शन देते ॥ सार ये कि प्रभूतो केवल भावके वशहैं और साधनके वश नहींहैं सो नंददासजीने कहीहै ॥ दोहा ॥ यद्यपिअगमतेअगमेंहैं, निगमकहतहैंजाहि ॥ तदपिरंगीलेप्रेमवशनिपटनिकटहरिआहि ॥ वार्ता संपूर्ण ॥ वैष्णव ॥ १९ ॥

श्रीगु० सेवक माधवदासभट्ट नागरा कायथ०

वे माधवदास श्रीगुसाईंजीके सेवक भए तादिनते विनको चित्तशांत भयो और भगवत्सेवा करेव लगे माधवदासके पिता संसारासक्त बहोत हते और विषयी हते और माधवदास उपर अप्रसन्न हते और विनके पास द्रम बहुत हतो माधवदासकुं एक पैसा देते न हते सो ऐसे जानते जो माधवदास भगवत् धर्ममें खर्च डरिगो और माधवदासकी निंदा बहुत करते हते जब वे लृद्ध बहुत भये तब माधवदासने विनसो कही अबतो तीर्थयात्रा करो तो बहुत आछोहै तब माधवदासके पिता तीर्थकरवेको चले ॥ जब मथुराके चौबे विनको मिले चौबेनने कही गुरुमुख होय जा

और तब विननें विचार करघो जो ये चोदे तो मेरे गुरु भए हैं सो बहुत दिन भए हैं परंतु मेरो मन संसारके विषयमेंसे निकरयो नहीं माधवदासके गुरुके शरण जाऊंगो जब मेरो मन निवृत्त होयगो ये विचार के श्रीगुरुकुल गए और वीनति करी जो मेरो अंगीकार करौ तब श्रीगुरुसाईजीनें नाम निवेदनं करायो ॥ जब माधवदासके पितानें श्रीगुरुसाईजीके संग जायके श्रीगुरुवर्धननाथजीके दर्शन किये और मनमें ऐसी आई जो श्रीगुरुसाईजीके चरणारविंद नहीं छोड़ूंगो जहांसुधी देह रहेंगी ॥ ये विचार करिके माधवदासकुं पास बुलाय लिये और मनमें कहेवेल्लो जो मेरे धन्य भाग्यहैं जो माधवदास जैसो पुत्र जन्म्यो तो सोकुं श्रीगुरुसाईजीके चरणारविंद मिले ॥ और सब तीरथइनके चरणारविंदमें हैं जासुं तीरथ करवे न जाऊंगो और सब द्रव्य माधवदासको सोपदिये ॥ सो माधवदास ऐसे भगवदीय भये जिनके संगतें उनके पिता जो विषयासक्त हते सो विषयमेंसुं मन काढके प्रभुमें लख्यो ॥ वार्ता संपूर्ण ॥ वैष्णव ॥ २० ॥ * ॥ ॥ ॥

॥ श्रीगुरुसाईजीके सेवक कटहरिया ति० ॥

एकसमें श्रीगुरुसाईजी गुजराततें ब्रजपधारते हते रस्तामें तीनसे असवार लेके कटहरिया लोगनको छुटते फिरते ते तब श्रीगुरुसाईजीकी असवारी जाती देखके आयकेह घेरो दियो और पंद्रे बीस गाडी हती सबका रोक लीनि तब श्रीगुरुसाईजीके मनुष्य एक एक गाडीपि एक एक ठाडे होय गये सो विन चोरनकुं ऐसे दीखे जैसे गाडीपि एक

हते तब जो सामग्रीकी श्रीगुसांईजीके मनमें आवती तब वे सामग्री रूपचंदनदा श्रीगुसांईजीके मनकी जानके झटलेके पठावते हते ॥ और रूपचंदनदाको मन श्रीगुसांईजीके स्वरूपमें तद्रूप होय गयो हतो ॥ ऐंसी ऐंसी इनकी वार्ता अनेकहैं सो वे भगवदीय कृपापात्र हते ॥ इनकीवार्ता कहा कहिये ॥ वार्ता संपूर्ण ॥ वैष्णव ॥ २२ ॥ ❀ ॥ ॥

॥ श्रीगुसांईजीके सेवक यदुनाथदास हते ति० सो जौनपुरमें रहते सो उहां एक हाथीको महावतकी स्त्रीसों विनको मन आसक्त हतो सो वाके देखेविना जल नहीं पीते ॥ सो एकदिन वो लुगाई सूती हती ॥ पहेर दिन रह्यो जहांसूची उठी नहीं ॥ यदुनाथदास तीन पहेर वाके दर-वजापें ठाढे रहे ॥ जब वे उठी तब वानें लौंढीसों कही जो देख तो बाहेर कोई पुरुषतो नहीं ठाढो है ॥ तब वा लौंढीनें कही जो एक बोहि देवको मारयो ठाढो है ॥ तब वे स्त्री बोली वोतो बावरो है ॥ जैसे मेरे हाड चामसूं मन लगायोहै वैसे श्यामसूं लगायो होतो तौस्यानों जानती ये बात सुनके यदुनाथदासके हृदयमें प्रकाश होयगयो जैसे सूरजउदय होवें तो अंधारो मिटके प्रकाश होजाय ॥ तब उहांसों चलदिये सो घरमें आयके ऐंसी संकल्प कियो जो अब जैसे बने तैसे श्यामकुं भजनो ॥ बाही घडी जौनपुर श्रीगुसांईजी पघारे हते ॥ और सब वैष्णव दर्शनकुं जाते हते सो भीड देखके यदुनाथदासहूं संग गए ॥ जायके श्रीगुसांईजीके दर्शन किये सो साक्षात् पूर्ण-पुरुषोत्तम कौटिकदर्पलावण्यस्वरूपके दर्शन भए ॥ जब

दंडवत करिके श्रीगुसाईंजीसों वीनती करी जो मोकूँ शरण
लेओ ॥ जब श्रीगुसाईंजीनें नाम निवेदन करायो ॥ मार्-
गकी परिणालिका समझायके श्रीठाकुरजी पधराय दीये
॥ फेर यदुनाथदास सेवा करवे लगे ॥ यदुनाथदासको
मन भगवत्सेवामें ऐसो आसक्त भयो जो वे स्त्री हाथी-
वालाकी रोज सामें आयके ठाडी रहे परंतु यदुनाथदास
वाकी आडी देखे नहीं और बोलेहं नहीं वे यदुनाथदास
ऐसे कृपापात्र हते ॥ जिनको चित्त विषयसों छूटके श्री-
प्रभुनमें लगगयो ॥ वार्ता संपूर्ण ॥ वैष्णव ॥ २३ ॥ ❀ ॥

॥ श्रीगुसाईंजीके सेवक राजालाखा ति० ॥
वह राजा ब्रजमें तीरथ करवेकों आयो और श्रीनाथजी-
के दर्शन करिके और श्रीगुसाईंजीके शरण गयो ॥ और
श्रीनाथजीके स्वरूपमें ऐसो आसक्त भयो जो श्रीनाथ-
जीबिना वाकूँ कछु भावे नहीं ॥ श्रीनाथजीको रटन वि-
नकुँ अष्टप्रहर रहेतो हतो ॥ एकदिन वाकी स्त्रीनें कही
जो उहां पडदाकी बंदोबस्ती होय तो मैं दर्शन करूं ॥
तब राजानें कही श्रीनाथजीके इहां पडदा कैसे ॥ जब
वा राणीनें श्रीगुसाईंजीसूं परवारी वीनती करवायके पड-
दाको बंदोबस्त करवायो ॥ और दर्शनकों आई जब एक
राजा भीतर हतो और कोई मनुष्य नहीं हतो सो श्री-
नाथजीनें कवांड खोलडारे ॥ सो अचानक रानीके उ-
पर भीड पडी ॥ सो राजानें कही मैंनें कह्यो हतो जो इहां
पडता नहीं चले और श्रीनाथजीनें कवांड खोले वा रा-
जाकी बात सत्य करवेके लिये खोले ॥ सो ऐसो श्रीनाथ-

जीमें आसक्त हते ॥ और श्रीगुसाईंजीकी कृपातें विनको भाव सदैव ऐसो रहतो ॥ वार्ता संपूर्ण ॥ वैष्णव ॥२४॥

॥ श्रीगुसाईंजीके सेवक ज्ञानचंदकी वार्ता ॥

सो वे ज्ञानचंदकी देह जब थाकी तब सब वैष्णवनसों कही जो तुम भगवन्नामलेओ तब वैष्णव भगवत्स्मरण करनलगे और भगवत्स्मरण करते करते ज्ञानचंदकी देह छूटी ॥ जब श्रीगोकुलमें नवीन देह धरिके श्रीगुसाईंजीकुं जायके दंडवत करी ॥ तब श्रीगुसाईंजीनें पूछी जो कब आए तब ज्ञानचंदनें कही अवी आयोहूं ॥ इतनेमें श्रीनवनीतप्रियाजीके दर्शन खुले ॥ तब ज्ञानचंद दर्शन करिके लीलामें प्रवेश कर गये ॥ फेर श्रीगुसाईंजी बाहेर पधारे जब वैष्णवननें पूछी जो ज्ञानचंद कहां गएहें ॥ तब श्रीगुसाईंजीनें आज्ञा करी ॥ ज्ञानचंद भक्तचंदके संग गयेहें। जब चाचाहरिवंशजी समझे जो ज्ञानचंदकी देह छूटी और भगवल्लीलामें गए ॥ चाचाजीनें सब वैष्णवनसों कही ॥ सो वे ज्ञानचंद ऐसै कृपापात्र हते ॥ जो सबनके देखते वैष्णवनकुं विश्वास उपजायवेके लिये भगवल्लीलामें प्रवेश कन्यो ॥ वार्ता संपूर्ण ॥ वैष्णव ॥ २५ ॥ ॥ ॥

॥ श्रीगुसाईंजीके सेवक भाईलाकोठारीकी ० ॥

जब श्रीगुसाईंजी द्वारका पधारते तब भाईलाकोठारीके घर उतरते ॥ जब भाईलाकोठारीको मन उद्विग्न होतो श्रीगुसाईंजीके दर्शन करवेके लिये तब भाईलाकोठारीके मनकी जानके और सब काम छोडके श्रीगुसाईंजी पधारते ॥ और वे भाईलाकोठारीके घरमें ऐसो चमत्कार ह-

तो जो कोई बिनके घरमें जावे वाकी बुद्धि श्रीगुसाईजीकी कृपातें निर्मल होय जाती वा देशमें एक ब्राह्मण श्रीगुसाईजीकी सेवक भई वानें अपनो सब द्रव्य भेट कर दीनो ॥ तब वाके परोसमें एक ब्राह्मण चुगल रहतो हतो सो वानें धौलकामें लाछवाई राणीसों कहि एक गोकुलको फकीर आयोहै ॥ और कोठारीके घरमें उत-योहै ॥ और सबको द्रव्य ठगलेवैहै तब लाछवाई राणीनें अपनो प्रधान बाजबहादुरकुं बुलायके परवानगी दीनी ॥ जो तुम राजनगर जावो ॥ और कोठारीके घर जाय सब खबर काढो ॥ तब बाजबहादुर राजनगरमें कोठारीके घर आयो ॥ वा समें दशपांचगिरासिया रजपूत बैठे हते ॥ सो श्रीगुसाईजीके दर्शनकुं आये हते ॥ तब बाजबहादुर बिनमें जायके बैठ गयो ॥ तब श्रीगुसाईजी पधारे सो बाजबहादुरनें उठके सबसों मिलके दंडवत करी ॥ और साक्षात् कन्हैयालालके दर्शन भये ॥ तब बाजबहादुरनें मनमें विचार कन्यो जो लोग भोकुं वृथा इनसुं लडावहे ॥ फिर कालके काल देखें तब बहुत डरप्यो ॥ तब श्रीगुसाईजीसों जायवेकी आज्ञा मागी ॥ तब श्रीगुसाईजीनें बीडा दीयो ॥ तब बाजबहादुरनें वीनती करि ऐसी वस्तु कृपा करके देवें जो सदैव माथेपें धरके फिरु ॥ तब श्रीगुसाईजीने एक सुपारी दीनी ॥ तब पागके खूटमें बांधके माथेपें पहरे रहतो ॥ जब बाजबहादुर मनमें समझो जो ये ईश्वर हैं ॥ तब श्रीगुसाईजीसुं वीनती करी जो महाराज मेह कब वरसेगो दुनियां बहुत धवराय रहीहै ॥ तब आपने कह्यो जो आज ब-

रसेगो ॥ जब मुनके वाजवहादुर अमने घर आयो सो
रस्तामें वर्षा ऐसी भई जो सब भीजगयो ॥ तव दृढ नि-
श्रय भयो जो ये ईश्वर हैं ॥ फेर वा ब्राह्मण चुगलीकरन-
वालेकुं मारडारनो ऐसो विचार क्यो तव वाको पक-
डाय मगायो ॥ ये बात मुनके श्रीगुसांईजीनें कहेवाय प-
ठायो याको मतमारो ॥ तव वा ब्राह्मणकुं कह्यो जो कोई
दिन कोईकी चुगली मति करियो ये लिखायके वाकुं श्री-
गुसांईजीके पास पठायो ॥ तव आयके दंडवत करिके
कही जो आपकी कृपातें वच्योहूं ॥ अब मोकुं सेवक करो
॥ तव वा ब्राह्मणकुं शरण लियो सो वे भाईलाकोठारी
ऐसे कृपापात्र हते ॥ जो बिनके घरमें जो आवे वाकी
बुद्धी निर्मल होयजाती ॥ वार्ता संपूर्ण ॥ वैष्णव ॥ २६ ॥ ❀ ॥

॥ श्रीगुसांईजीके सेवक हरजीकोठारीकी वार्ता ॥
सो वे तीन भाई हते जब श्रीगुसांईजी असारवामें पधारते
तव तीनों भाईनको मन प्रसन्न राखते ॥ सो एक भाईके
घर पोढते ॥ और एक भाईके घर रसोई करते और
एकभाईके घर बैठक राखते ॥ और बिन तीन भाईनमेंसुं
हरजीकोठारी पंडित हते ॥ सो वा हरजीकोठारीनें विठ-
लसहस्रनामग्रंथ प्रकट क्यो ॥ और श्रीगुसांईजीकुं
पूर्णपुरुषोत्तम जानते ॥ सो वे तीनोंभाई ऐसे कृपापात्र
हते ॥ जो अबसूधी बिनके घरकी बैठक असारवामें
प्रसिद्ध है ॥ वार्ता संपूर्ण वैष्णव ॥ २७ ॥ ❀ ॥

॥ श्रीगुसांईजीके सेवक गोपालदासकी वार्ता ॥
सो वा गोपालदास रुपालगाममें रहते वा गोपालदासकी

सगाई भाईलाकोठारीके घर भई हती, एकदिन विनको नोता भाईलाकोठारीके घर हतो ॥ तब गोपालदास पांच वरसके हते ॥ जब विनकुं देखके श्रीगुसाईजीनें पूछी ॥ ये कोनहै जब भाईलाकोठारीनें कही जो ये गोमतीको वर है तब श्रीगुसाईजीनें कही गोमतीको वर तो सागर चहिये जब कोठारीनें कही राजकी कृपातें येही सागर होयगो ॥ जब ये बात मुनिके श्रीगुसाईजीनें विचार करयो जो मेरो सेवक भाईलाकोठारी भयो याको वचनसत्य भयो चाहीये जब आपनें गोपालदासकुं चर्चित तांबूल दियो ॥ जब गोपालदासको हृदय निर्मल भयो ॥ जब गोपालदासकुं रासलीलाके दर्शन भए ॥ और रासलीलामें सदैव रात्र रहेहे जासूं सवा पहर दिन चढयो हतो तोहुं गोपालदासनें केदाराराममें वल्लभाख्यान गायो ॥ सो वे गोपालदास ऐसे कृपापात्र हते जिननें भारगको सब सिद्धांत नवाख्यानमें वर्णन करयो ॥ और चौथे आख्यानमें द्वादशस्कंधकी द्वादशलीला समावेश करिके एकेक तुकमें एकेक स्कंधकी लीला गायीहै ॥ सोवे ऐसे कृपापात्र हते ॥ प्रसंग ॥ १ ॥ और गोपालदासके हृदयमें आपने श्रीगुसाईजीनें हीं प्रवेश कीयो और आपनेंहिं वल्लभाख्यान गोपालदासके मुखद्वारा वरनन किये जैसे श्रीमद्भागवत श्रीठाकुरजीनें शुकदेवजीके हृदयमें प्रवेश करके शुकदेवजीके मुखद्वारा वरनन कीयो जासूं श्रीमद्भागवतमें कोई ठिकाणे श्रीराधाजी ऐसो नाम नहीं है ऐसे वल्लभाख्यानमंडुं । कोई ठिकाणे श्रीरुक्मिणीवहूजीका

तथा श्रीपद्मावतीवहूजीको नाम नहीं है सो वे गोपाल-
दास ऐसे कृपापात्र हते वार्ता संपूर्ण ॥ प्र० २ ॥ वैष्णव ॥ २८ ॥
श्रीगुसाईजीके सेवक मानिकचंद ओसवाल
बलियाकी वार्ता ॥ सो वे मानिकचंदको श्रीगुसाईजीकुं
पूर्णपुरुषोत्तमके दर्शन भए ॥ जब मानिकचंद तथा मा-
निकचंदकी स्त्री श्रीगुसाईजीके सेवक भए और मानि-
कचंदनें सर्वस्व अर्पण कर दियो जब मानिकचंदजी
सेवक भए जब ये पद गायो ॥ “चहुं युग वेद वचन प्रति-
पारयो” ॥ इत्यादिक बहुत पद गाये ॥ फेर मानिकचंदकुं
श्रीगुसाईजीनें आज्ञा करी ॥ जो तुम बेपार करौ और
घरमें रहके श्रीठाकुरजीकी सेवा करौ जब मानिकचं-
दजी फेर व्यवहार करन लागे ॥ फेर मानिकचंदजी जब
बुढ़ भए तब श्रीठाकुरजी पधरायके श्रीगुसाईजीके पास
आयके रहे ॥ सो वे मानिकचंदको ऐसो नेम हतो पात-
लपर महाप्रसाद लेवेकुं बैठते सो पातलपर महाप्रसाद न
छाडें ॥ एक दिन श्रीगोकुलनाथजीके मंदिरमें मानि-
कचंदजी प्रसाद लेवे बैठे हते सो विन साचोराननें ऐसी
जानी जो ये पातलपर कछु छोडे नहींहैं और पातल
धोयके पी जायहैं तब साचोराननें मस्करी करवेके लीयें
भातके नीचे गोबर धरदीयो ॥ तब मानिकचंद गोबर
सहित खाय गये ॥ वा बातकी खबर श्रीगोकुलनाथ-
जीकुं पडी तब श्रीगोकुलनाथजीनें हाथमें जललेकेसा-
चोरानको शाप दियो तुमारो साचोरा देहसुं कोईको
उद्धार नहीं होयगो ॥ और वाई दिनसुं सेवकी जल

पर्यंत साचोरा श्रीगोकुलनाथजीके घरमें नहिं छुवे ऐसो बंदोबस्त क्यो ॥ सो वे मानिकचंदजी ऐसे कृपापात्र हते जिनकी कान श्रीगोकुलनाथजी ऐसी राखते जिनकेलीये आज सूधी साचोरानको श्रीगोकुलनाथजीकी सेवामें नहीं आवेदेवेहे ॥ वार्ता संपूर्ण ॥ वैष्णव ॥ २९ ॥

॥ श्रीगुसाईंजीके सेवक देवब्राह्मण बंगालाके वासीकी वार्ता ॥ सो ब्राह्मण ब्रजजात्रा करवे आए सो श्रीगोवर्धननाथजीके दर्शन करिके बिनकी मन बहुत प्रसन्न भयो ॥ और साक्षात् पूर्णपुरुषोत्तमके दर्शन भये तब बिनने श्रीगुसाईंजीसों वीनती करी जो मोडुं शरण लेओ ॥ तब श्रीगुसाईंजीने कृपाकरिके समर्पण करायो जब वा ब्राह्मणनें इहां रहेके पुष्टिमार्गीय सब सेवाकी प्रणालिका सीखे ॥ फेर वे ब्राह्मण श्रीगुसाईंजीकी आज्ञा लेके बंगालमें गए उहां घरमें सेवा करवे लगे फिर एक दिन वा ब्राह्मणनें उददकी दारके बढा करे तब वा ब्राह्मणके मनमें ऐसी आई जो कछु मिष्टान्नइ चहिये जव द्रव्यको संकोच बहोत हतो जब थोडो गुड लाए और श्रीनाथजीकुं भोग समर्प्ये ॥ तब श्रीनाथजी साक्षात् आप अरोगवेकों पधारे और गिरिराजजी उपर राजभोग धर्यो सो नहीं अरोगे ॥ पाछें भीतरियाननें अनोसर करे जब श्रीगुसाईंजी श्रीगोकुलविराजते हते ॥ जब उहां श्रीनाथजीनें जताई जो आज हम मृखेंहे हम वा देवब्राह्मणके घरमें गुड और बढा अरोगवे गए हते जापीछे राजभोग धरिके और सरायके भीतरियाननें अनौ-

सर कर दिये ॥ जब श्रीगुसांईजी वाहीसमें श्रीगोकुलमें श्रीगिरिराजजी पधारे और सामग्री करायके राजभोग घराए ॥ और वा ब्राह्मणकुं पत्र लिखे जो तुमनें अमुक दिन गुड और बडा धन्येहें सो श्रीनाथजी भली भांतिसें आरोगेहें ॥ ये पत्र वांचके वो ब्राह्मण बहोत प्रसन्न भयो और दो थान बंगाली मलमलके लेके चल्यो ॥ सो आयके श्रीगुसांईजीकुं एक भेट कन्यो और वीनती करी जो ये थान अंगीकार करें जब ॥ श्रीगुसांईजीनें आज्ञा करी जो ये थान श्रीनाथजीके लायकहै ॥ जब वा ब्राह्मणनें वीनती करी जो एक दूसरो थान लायोहूं सो आप अंगीकार करें ॥ तब श्रीगुसांईजीनें वैसेही कियो ॥ फेर वा ब्राह्मणनें वा मलमलके वागा पहिरके श्रीनाथजीके दर्शन किये ॥ सो वे ब्राह्मण ऐसे कृपापात्र भगवदीय हते ॥ वार्ता संपूर्ण ॥ वैष्णव ॥ ३० ॥ ॐ ॥ ॥ ॥

श्रीगुसांईजीके सेवक गणेशव्यासकी वार्ता ॥ सो वे गणेशव्यासकुं श्रीनाथजी सातुभाव हते ॥ वे गणेशव्यास एकदिन श्रीनाथजीके लीयें सामग्री लावते हते ॥ तब रस्तामें बरसात पडयो सो गामबाहिर देवीके मंदिरमें आयके डेरा कियो तब लोगननें कही जो मनुष्य रात इहां रहे ताकुं ये देवी तो स्वाय जायहै ॥ तब गणेशव्यासनें देवीको मंदिर घायके देवीके कानमें अष्टाक्षर मंत्र सुनायो ॥ और आप उहां सोयरहे तब वा देवीनें गामके राजाकुं स्वप्नमें कही जो अब मैं वैष्णव भईहूं तुम दो बकरा मोकुं नित्य पठावत हो सो मत पठेयो ॥ और तुम

सब वैष्णव होय जावो नहिंतो सबकुं दुःख देऊंगीये बात राजाकुं देवीनें स्वप्नमें कही तब वे राजाने सवारे गणेश-व्यासके पास जायके सब वार्ता पूंछी जब गणेशव्यास राजाकुं संग लेके आये ॥ सो श्रीगुसांईजीके सेवक कराये सो वे गणेशव्यास ऐसे कृपापात्र हते ॥ जिनके संगसुं देवी तथा राजा वैष्णव भये ॥ प्रसंग ॥ १ ॥ वा गणेशव्यासके ऊपर श्रीगुसांईजी खीजते हते ॥ तब वे गणेशव्यास अपने भाग्य मानते ॥ और श्रीगुसांईजी विनके पीछे उनकी बहुत सराहना करते ॥ तब एक वैष्णवनें पूंछी आप उनपर खीजतेहो और पीठपाछे सराहना करोहो सो कैसे ॥ तब श्रीगुसांईजीनें आज्ञा करी जो वैष्णवतातो याहीको नाम हैं जो रीसकरें तोहुं अभाव न आवें ॥ सो वे गणेशव्यास ऐसे कृपापात्र हते जिनपर श्रीगुसांईजी खीजते पर वे अभाव न लावते ॥ वार्ता संपूर्ण ॥ वैष्णवा ३ १ ॥ श्रीगुसांईजीके सेवक मधुसूदनदासकी वार्ता ॥ एकसमय मधुसूदनदास श्रीगोकुल आये और श्रीगुसांईजीके दर्शन करे ॥ और मनमें ऐंसी आई जो श्रीगुसांईजीको सेवक होऊं तो ठीक ॥ जब श्रीगुसांईजीसों विनती करी जो मोकुं शरण लेओ ॥ जब श्रीगुसांईजीनें आज्ञा करी जो नाहाय आवो तब वे नाहाय आये ॥ तब श्रीगुसांईजीनें कृपा करिके नाम निवेदन करायो ॥ जब मधुसूदनदासको चित्त बहुत प्रसन्न भयो जब श्रीगोकुलमें मन लाग्यो पुष्टिमागकी रीती सीखवेकुं श्रीगोकुलमें रहि गए ॥ और भिक्षावृत्तिकरके निर्वाह करवे लगे ॥

एकदिन श्रीगुसाईजीनें पूछी जां तुम भिक्षा कहां कहां मांगो हो ॥ विननें कही सवनके घरसों मांग लावुं जब श्रीगुसाईजीनें कही जो हमारे सेवक तथा भट्ट तथा हमारे नौकर विनके घरसुं तुमारे भिक्षा लेनी नहीं, कारण विनके घरमें हमारो द्रव्य आवेहै देवद्रव्य गुरुद्रव्य ब्राह्मणको द्रव्य इनके अंश लीयेंसों बुद्धि अष्ट होवे है जब मधुसूदनदास वैसेही करन लागे जब मधुसूदनदासकी चित्तवृत्ति स्थिर देखके श्रीगुसाईजीनें श्रीनाथजीके पानघरकी सेवा दीनी ॥ और मधुसूदनदासकुं सेवामें ऐसो चित्त लग्यो जो जन्मभर श्रीनाथजीकी सेवा कीनी ॥ तातें इनकी वार्ता कहां ताई लिखियो ॥ वार्ता सं० वैष्णवा ३२। ॥ श्रीगुसाईजीके सेवक ब्रह्मदास हते तिनकी ० सो वे ब्रह्मदास गोपालपुरमें रहते हते और व्रजमें फिन्चो करते मानसीसेवा करते मानसी जीनकुं साक्षात्कार होयगई हति और राधाकुंडपर एक बंगाली कृष्णचैतन्यको सेवक रहतो हतो सो वे ब्रह्मदासजीको मित्र हतो वेहु मानसी करतो और सदाही दूध पीके रहतो हतो फेर थोडे दिनपीछे दूध छोडदियो और छाछपीवेलग्यो एकदिन वा बंगालीनें मानसी सेवा करि जब मानसीमें दूध भोग धन्यो तब प्रसादिदूध मानसीमें पियो फेर नित्यकी छाछ लेवेको समय भयो फेर वा बंगालीनें शिष्यनकुं नहि कहि तोहुंवाके शिष्यननें जीरंछु छाछप्याई कारण जो वाने मानसीमें दूध पियो है सो शिष्यनकुं खबर न हती पाछे वा बंगालीकुं ज्वर आयो सो वे ब्रह्मदासजी वा बंगालीकुं

देखवे आये सो वे ब्रह्मदास वैद्यकमें बहुत चतुर हते तब ब्रह्मदासजीनें देखके कहि तुमनें दूधके ऊपर छाछ लीनीहि जासौं ज्वर आयोहै फेर वा बंगालीके शिष्यननें कहि इननें दूध नहिं पीयोहै तब वे बंगाली बोल्यो अपने शिष्यनसुं तुमकुं कहा खबर है जाघरको हमनें दूध पियोहै ये बाई घरके सदैव रहवे वारैहै और जब हमनें दूध पियो जब ये देखते हते सो वे ब्रह्मदासजी श्रीगुसांईजीके ऐसे कृपापात्र हते जो कोई और मनुष्य मानसीसेवा करतो सो अपनी मानसीके प्रतापतें और श्रीगुसांईजीकी कृपातें सबकि मानसी जानजाते ॥ वार्ता संपूर्ण ॥ वैष्णव ॥३३॥

॥ श्रीगुसांईजीको सेवक नरुवैष्णव हतो सो द्वारिकाके रस्तामें रहेतो तिनकी वार्ता:—सो एकसमें श्रीगुसांईजी द्वारिका पधारते हते सो वैष्णव श्रीगुसांईजीकुं अपने घर पधरायके डेरा कराए ॥ वाको घर बहुत छोटी हतो तोहुं वाको आग्रह देखके श्रीगुसांईजी उहां डेरा किये ॥ और श्रीगुसांईजीनें वा वैष्णवसों पूछी जो तुम निर्वाह कैसे करौहो ॥ जब वा वैष्णवनें कही गामके बाहेर एक वृक्षहै सो वाके नीचे आपने आगें डेराकन्यो हतो सो वा वृक्षके पास बैठके भगवद्वार्ता करहुं और वैष्णव गाममें कोउ नहीहै ॥ जब श्रीगुसांईजीनें कही वृक्ष भोळुं दिखाव जब वे वैष्णव श्रीगुसांईजीकुं पधरायके वा वृक्ष पास लगयो ॥ जब वा वृक्षनें श्रीगुसांईजीकुं आते देखके दंडवत करके मूलसे उखरि पन्यो ॥ जब श्रीगुसांईजीनें मनुष्यनकुं कही याको पत्र डाल सब उठाय

लेचली याको सर्वांग अंगीकार भयो ये वृक्ष आगले जन्ममें वैष्णव हतो और लोगनके दोष देखतो याहीतें वृक्ष भयो हे ये बात सुनके वे वैष्णव उहाँतें आश्चर्य पायो ॥ फेर श्रीगुसांईजी द्वारिका पधारे ॥ और वा वैष्णवके घर जो कछु हतो सो सब भेटकरदियो सो वे वैष्णवऐंसो कृपापात्र हतो जाकुं श्रीगुसांईजीने लौकिक निर्वाह पूछो जब विनने अलौकिक निर्वाह बतायो ॥ वैष्णवनकुं ऐं-सोही चाहिये तातें इनकी वार्ता कहा कहिये ॥ वार्ता संपूर्ण ॥ वैष्णव ॥ ३४ ॥ ❀ ॥ ॥ ॥ ॥

॥ श्रीगुसांईजीके सेवक पाथोग्जरी तिनकी ० सो पाथोग्जरी आन्योरमें रहते हते ॥ सो पाथोग्जरी एकदिन बेटाके लीयें छाक लेजात हती रस्तामें श्रीनाथजीने कही ये दही भात हमकुं दे तव विनने दियो जब श्रीनाथजी आरोगे जब आरोग चुके इतनेमें शंखनाद भये जब श्रीहस्त धोये दिना मंदिरमें पधारे तव श्रीगुसांईजीने श्रीनाथजीके दही भातके श्रीहस्त देखिके पूछी जो आप कहाँ आरोगे है तव श्रीनाथजीने कही जो पाथोग्जरीके पासतें लीयो हतो ॥ वादिन श्रीगुसांईजीने पोरियासो कही जो पाथोग्जरी जब आवै तव किवार खोल दीजियो ॥ जब श्रीनाथजी आज्ञा करते तादिन पाथोग्जरी पायके अरोगवाय जाती जादिनतें श्रीगुसांईजीने कुनवारामें मुख्य सामग्री दही भातकी राखी है सो वे पाथोग्जरी ऐंसी कृपापात्र हती ॥ वार्ता संपूर्ण वैष्णव ॥ ३५ ॥

॥ श्रीगुसांईजीके सेवक एकबजबासीकी बहू

तिनकी वार्ता:-जब वे बहू सासरें आई जादिन बिनकी भेंसखोय गई ॥ तब वाके घरके मनुष्य कहने लगे या बहूके पांव आछे नहीं हैं जादिन आई तादिनही भेंस गई ॥ जब वा बहूके मनमें चिंता उपजी ॥ तब वानें श्रीनाथ-जीकुं सवासेर माखन मान्यो तब पांच सात दिनमें वाकी भेंस मिली ॥ जब वे बहू भेंसकी छाल विलोवे लगी जब रोज एक छटांक माखन चुरायलेवे और दूसरे दिन वा माखन ताजामें मिलायके ताजो काढ लेंवें ऐंसे करत करत जब सवासेर माखन पूरो भयो जब लेके श्रीनाथ-जीकुं अरोगवायवे चली ॥ घरसुं बाहेर निकसी जब ऐंसी विचार कन्यो जो मोकुं कोई देखेगो तो कहा कहेगो जब ऐंसी चिंता उत्पन्न भई न पाछे आयो जाय न आगें गयो जाय ॥ तब श्रीनाथजी वाकुं चिंतातुर देखके पधारे श्रीनाथजीनें ऐंसी जानी जो ये मेरे विना दूसरो देव जानें नहींहैं जासुं पधारे ॥ और वाको माखन लेके आ-रोगे सो वे बहू ऐंसी कृपापात्र हती ॥ वार्ता संपूर्ण वैष्णव ॥ ३६ ॥ ❀ ॥ ॥ ॥ ॥ ॥

श्रीगुसाईंजीकेसेवकगोपीनाथदासग्वालकी ०
सो गोपीनाथदास ग्वालवनमें गाय भेंस चरावत हते ॥ सो एकदिन गोपीनाथदासकुं वनमें भूंख लगी ॥ जब श्रीनाथजीनें आठ लहूवा राजभोगकी सामग्रीमेंसो वनमें लायके गोपीनाथदासकुं दिये ॥ तब बिननें विचार कन्यो जो ये लहूवा श्रीगुसाईंजीकी आज्ञा विना खाने नहीं ॥ जब वे लहूवा श्रीगुसाईंजीके पास लेआये ॥ और श्रीगु-

साईंजीकुं वीनती करी तव श्रीगुसाईंजीनें आज्ञा करिके ल-
 डुवा श्रीनाथजीनें दीनेहैं सो तुम खावोसो गोपीनाथदास
 श्रीगुसाईंजीकी आज्ञा विन कछु करत नहीं हते ॥ सो एक
 दिन गोपालदास भीतरियाकुं वनमें श्रीनाथजीनें कही जो
 मोकुं सूख लागीहै ॥ जब भीतरियानें आयके श्रीगुसां-
 ईंजीसों वीनती करी तव श्रीगुसाईंजी सब सीतल सामग्री
 तयार करके आप वनमें पधारे ॥ तव तडका बहोत हतो
 तव गोपीनाथदास ग्वालने श्रीगुसाईंजीसों वीनती करी
 जो महाराज ऐसी घाममें काहेको पधारेहै ॥ श्रीनाथ-
 जीतो वालकहै यासूं आप पाछे पधारे ॥ तोहूं श्रीगुसां-
 ईंजी वनमें पधारे ॥ जब जायके श्रीनाथजीकुं सामग्री
 अरोगवाई ॥ तव गोपीनाथदास ग्वालने श्रीनाथजीसों
 वीनती करी जो महाराज आपनें ऐसी घाममें श्रीगुसां-
 ईंजीकुं काहेको श्रम करायो ॥ आप आज्ञा करते तो
 वहुत सामग्री आयजाति तव श्रीनाथजीनें आज्ञा करी
 जो इनके हाथ विना मोकुं दूसरेके हाथकी भावे नहींहै ॥
 और इनके कहे विना दूसरेके हाथकी अरोगुंइं नहीं हूं
 ये बात मुनके गोपीनाथदास चुप कर रहे ॥ याहीतें
 श्रीरघुनाथजीनें श्रीगुसाईंजीको नाम नामरत्नाख्य-
 ग्रंथमें ॥ तन्निमंत्रणभोजकः ॥ ऐसो वर्णन क्यो है सो
 वे गोपीनाथदासग्वाल ऐसे कृपापात्र हते ताते इनकी
 वार्ता कहांताई लिखिये ॥ वार्ता संपूर्ण ॥ वैष्णव ॥ ३७ ॥
 ॥ श्रीगुसाईंजिके सेवक दोभाई तिनकी ॥
 वे दोनो भाई पटेल गुजरातके हते श्रीजीद्वारमें रहिके श्री-

नाथजीकी सेवा करते सो एकदिन वे दोउनके मनमें ऐंसी आई जो हमनें द्रव्य खरचके श्रीनाथजीकुं सामग्री नहीं अरोगवाई है तब वे दोनो उहांते चले सो एकतलाव खुदावतो हतो सो उहां कंठी तिलक छिपायके मजूरी करन लगे सो रातकुं रसोई करते दिनकुं मजूरी करते एसें करत करत बहुत दिन बीते सो विनकुं कोई नें वैष्णवहें ऐंसी जान्यो तब विन दोउनकी खात्री करने लागे और थोड़ी मजूरी करावन लागे तब विननें विचार क्यो जो धर्म वेचके पैसा कमावनो ये बात आछी नहीं जब वे उहांसों श्रीजीद्वार आये और पैसा जो लाये हते सो श्रीगुसांईजीकुं देके श्रीनाथजीकुं अंगीकार कराए जब श्रीगुसांईजीकुं सब बात कही तब श्रीगुसांईजीनें आज्ञा करी जो वैष्णवधर्म प्रकट करके पैसा लावे वे पैसा श्रीनाथजी अंगीकार नहीं करेहें ॥ वे दोनोभाई ऐंसे कृपापात्र हते जिननें मजूरी करी तोहुं वैष्णवधर्म प्रकट कियो नहीं ताते इनकी वार्ता कहा कहिये ॥ वार्ता संपूर्ण ॥ वैष्णव ॥३८॥

॥ श्रीगुसांईजीके सेवक गोपालदास भीतरिया की वार्ता:-सो वे गोपालदास गुजरातमेंते श्रीगुसांईजीके संग आए ॥ और श्रीगुसांईजीनें गोपालदासजीकुं श्रीनाथजीकी सेवा सोंपी ॥ श्रीनाथजी गोपालदासके उपर ऐंसी कृपा करते जाठिकाणें गोपालदास सेवामें भूलते ताठिकाणें श्रीनाथजी सिखावते ॥ और गोपालदासजी को प्रसंग गोपीनाथदास ग्वालकी वार्तामें लिख्योहै ॥ श्रीनाथजी गोपालदासकुं संग वनमें लेजाते और जो

सामग्री गोपालदासजीकुं न आवती सो श्रीनाथजी आप
वतायके करायल्ले ऐसे अनेक रीतके अनुभव करादते
सो वे गोपालदास ऐसे कृपापात्र हते ॥ वार्ता संपूर्ण ॥

॥ वैष्णव ॥ ३९ ॥ * ॥ ॥ ॥ ॥ ॥

॥ श्रीगुसांईजीके सेवक एक ब्राह्मण ति० ॥

सो ब्राह्मण गंगाजीके तीरपर एक झोंपडी वनायके श्री-
ठाकुरजी पधरायके दोनो स्त्रीपुरुष सेवा करते सो वे
ब्राह्मण भिक्षाकरि लावते और एकदिनको सीधो होयतो
दूसरे दिनके लिये कोई देवे आवे वाके पास लेंते नहीं ॥
और जब श्रीठाकुरजीको राजभोगसरे पीछे जितने वैष्ण-
व आये होंय सबकी पातर करते और भगवत्सेवा और
भगवद्दर्शन विना विनको चित्त दूसरे ठिकाने जातो न
हतो ॥ ऐसे करत करत बहुत दिनवीते तब एक पंडित
गंगाजीके तट पर तप करवेकुं आय रह्यो सो पंडित ब-
हुत विद्वान हतो और सामुद्रिकशास्त्र पढयो हतो और
वा ब्राह्मणके घरके पास रहतो हतो ॥ और वा पंडितकुं
महाप्रसादकी पातर वे ब्राह्मण धरतो हतो पाछे एकदिन
वा पंडितने ज्योतिषके बलसूं तथा सामुद्रिकसूं ऐसे
जान्यो जो या ब्राह्मणके ऊपर काल चोरीको सुहा आ-
वेगो और राजाके मनुष्य पंकड ले जायंगे और राजाके
हुकुमसों या ब्राह्मणकुं फांसी देंगे ॥ सो पंडित अपने
मनमें अनेक संकल्प विकल्प करवे लगे दसघडी दिन
काल चढेगो तब या ब्राह्मणके प्राण जाएंगे ऐसे विचार
करत वा पंडितको सगरो दिन गयो सो वे जब समय

धकी निवृत्ति नहीं होयहै मेरी रोमरोममें कीडा पढने चहीये जब मेरो अपराधनिवृत्त होयगो ऐसे अनन्यताके बचन सुनिके श्रीरामचंद्रजी हस्ये और आज्ञा करी जो जाओ श्रीनाथजीके दर्शन करौ श्रीरामचंद्रजीके बचन सुनके वाको कोढ भिटगयो और आयके श्रीनाथजीके दर्शन करे सो वे वैष्णव ऐसे अनन्य हते विनकी अनन्यता देखिके श्रीनाथजी बडे प्रसन्न भए ॥ और सब प्रकारसु अनुभव जताए ॥ वार्ता संपूर्ण ॥ वैष्णव ॥ ४१ ॥ ❀

॥ श्रीगुसाईजीके सेवक एक कुनबी पटेल हतो तिनकी वार्ता ॥ सो वैष्णव गुजरातके संगमें ब्रजजात्राकुं चले ॥ रस्तामें वा संगके वैष्णवनकी मेहेनत मजुरी करत चलयो ॥ जब श्रीजीदार एकमजल रह्यो जादिन वा वैष्णवकुं ज्वर आयो जब वाने सबको कही जो मोकुं काल गाढीपर वेठाइयो ॥ परंतु वाकी बात कोईने सुनी नहीं तब वाकुं चिंता उत्पन्न भई जोमोकुंसवारें श्रीनाथजीके दर्शन कैसें होयंगे या चिंताके लीयें वाकुं आखी रात नीद नहीं आई ॥ वाकी चिंता श्रीनाथजी सहि न सके जब श्रीनाथजीने श्रीगुसाईजीसों कही जो वाकुं बहुत चिंता मेरे दर्शनके लीयें भईहै जासुं मोकुं नीद नहीं आवेहै ॥ ये बात सुनके श्रीगुसाईजीने कही आप सुखसें पोढें वह सबसों पहले आय जायगो ॥ जब श्रीगुसाईजीने वाकुं गाढी भेज सबसुं पहलें बोलायलिये और श्रीनाथजीके दर्शन कराए ॥ दर्शन करत मात्र वाकी देहदशा मूलगई जब श्रीगुसाईजीने याकी ये व्यवस्था देखिके

चरणस्पर्श कराए ॥ तब बाकुं स्मृति आई जब श्रीगुसांईजीकुं साष्टांग दंडवत करी जब श्रीगुसांईजीनें वासों सब समाचार पूछे जब वे संग आयो जब श्रीनाथजीनें श्रीगुसांईजीसों कही इनको दर्शन मत करन देवो जब श्रीगुसांईजीनें वीनती करी जो जीवतो सदैव अपराधसुं भरेहे इननें वैष्णव जानके अपराध नहीं कियोहे ॥ जब श्रीनाथजीनें कही अब इनको दर्शन करावो वैष्णव जानके अपराध करै तोमैं अंगीकार न करुंगो फेर श्रीगुसांईजीनें विनकुं समझाये आज पीछे कोईदिन वैष्णवको अपराध मत करियो ऐसे समझायके फेर विनकुं दर्शन करवेकी आज्ञा भई सो पटेल श्रीगुसांईजीको ऐसो कृपापात्र हतो ॥ जिनकी आर्ती श्रीनाथजी न सहि सके ॥ वार्ता संपूर्ण ॥ वैष्णव ॥ ४२ ॥ ❀ ॥ ॥ ॥

॥ श्रीगुसांईजीके सेवक एक साहूकारके बेटाकी बहूकी वार्ताः—सो वे बहू एकदिन बारीमें बैठीहती ॥ सो एक तुरकनें देखी सो वा तुरककी वामें आसत्ती भई ॥ वा बहूको देखे विना वो तुरक जल नलेवे जब गाममें बहूत चर्चा होवे लगी और ज्ञातमें निंदा भई जब वा बहूके घरके मनुष्य वा बहूकूं श्रीगोकुल लेगये ॥ या बातकी खबर तुर्ककुं परी सो वे विनकेपाछे दौरचौ ॥ सो रस्तामें जाय मिल्यो ॥ वे लोग कहेने लगे जा दुखके मारे घर छोडयो सो दुख तो साथ मे आयो ऐसे करते श्रीगोकुल पहुंचे फेर नाववालेकूं वा साहूकारनें कही याकूं पार मत उतारियो ॥ सो वह तुरक यमुनाजीके

किनारे बैठ रह्यो ॥ वा साहूकारनें जायके श्रीगुसांईजीके तथा श्रीनवनीतप्रियाजीके दर्शन किये ॥ जब वा साहूकारनें महाप्रसाद लेवेकि तैयारी करि तब श्रीगुसांईजीनें पांच पातर धराई ॥ वा तुर्ककुं मनुष्य पठाय श्रीगुसांईजीनें बुलाय लियो जब वे पांचजने दूरदूर प्रसाद लेवे बैठे श्रीगुसांईजी विनके सामें आयके विराजे ॥ सो वे चार जनेतो प्रसाद लेके उठे और वा तुर्ककी दृष्टी और मन तो श्रीगुसांईजीके चरणारविंदमें लग रह्यो ॥ और कछ देहानुसंधान रह्यो नहीं जहां सूधी श्रीगुसांईजी वा तुर्कके सामें विराजे रहे ॥ जबसूधी दर्शन करत रह्यो जब श्रीगुसांईजी उठके भीतर पघारे तब वाकीदेह छूटिगई ॥ ये बात श्रीगुसांईजीनें जानी जब श्रीगुसांईजीनें आज्ञा करी वा तुर्ककुं अग्निस्स्कार कराओ ॥ या बातको कारण वैष्णवनें श्रीगुसांईजीसों पूछो तब श्रीगुसांईजीनें कही ये आगले जन्ममें ब्राह्मण वैष्णव हतो ये वहु वाकी स्त्री हती ॥ सो एकदिन एक वैष्णवसुं एकांत भगवद्वार्ता करत हती वामें कछ दोष हतो नहीं तब याके मनमें वा वैष्णव ऊपर या स्त्रीकोदोष आयो हतो या अपराधतें याको म्लेच्छके घर जन्म भयो और वाकी स्त्री हती सो या क्षत्रीके बेटाकी स्त्री भईहै जब या वहुकुं याने देखी तब वा तुर्ककुं याके नेत्रनमें श्रीगोवर्धननाथजीके दर्शन भये जासुं या वहुमें वाको मन लग गयो जब श्रीगोकुल आयो यमुनाजलपान कन्यो तब याको अपराध निवृत्त भयो अब ये भगवल्लीलामें प्राप्त भयो है ॥ ये बात सुनके

वाँवहूँ विरहताप भयो जब वाकी देह छूटगई ॥ सो वे भगवल्लीलामें प्राप्त भई ॥ सो वे बहु श्रीगुसांईजीकी ऐसी कृपापात्र हती ॥ वार्ता संपूर्ण ॥ वैष्णव ॥ ४३ ॥ ❀ ॥

श्रीगुसांईजीके सेवक साठोदरा नागर गुजरा-
तके वासी तिनकी वार्ता:- सो वे वैष्णव जा गाममें रहते वा गाममें एक दूसरौ वैष्णव रहतो हतो सो दोनो पर-
स्पर मिलाप राखते हते और हिलमिलके भगवत्सेवा क-
रते हते सो एकदिन दोउ जनें जल भरके आवते हते र-
स्तामें एक वेश्याको घर हतो वाकी बेटी नृत्य करती
हती सो साठोदरा वैष्णवनें देखी सो वेश्याकी बेटी दैवी
जीव हती जासुं वे देखवेकुं ठाढ़े रहि गये तब दूसरो वै-
ष्णव अपने घर आयो वह दूसरो वैष्णव मनमें समझ्यो
ये विपईहैं याको संग न करनौ और स्त्रीसों कहि जो सा-
ठोदरा वैष्णव मोकुं बोलायवे आवे तौ तुम कहियो घर-
में नहिं है पीछे वा साठोदरा वैष्णवनें वेश्यासों ठराव क-
रके वाकी बेटीकुं घर ले आये रात्रीकुं न्हायके शृंगार
करायके और अष्टाक्षरमंत्रसुनायके श्रीठाकुरजीके सं-
निधान नृत्य करायो और श्रीठाकुरजी वाको गान सु-
नके बहुत प्रसन्न भये और वेश्याकी बेटीमें इतनी साम-
र्थ्य भई जो संस्कृत बोलवे लगी और भगवद्रूपमें मन
लग्यो और वा वैष्णवको बहुत उपकार मान्यो और द्रव्य
न लियो और मनमें ये विचार क्यो जो नित्य ऐसै वै-
ष्णवनको सत्संग होय तो बहुत आछौं और वेश्याको
कर्म छोड दियो और वा वैष्णवको सत्संग करवे लगी

फेर वह दूसरो वैष्णव जो गाममें रहेतो हतो वाकी स्त्रीकुं श्रीठाकुरजीनें कही में अब तुमारे घरमें नहीं विराजूंगो तुमनें वा साठोदरा वैष्णवको वृथा दोष देख्यो है तब वो वैष्णव साठोदरा वैष्णवके पावन पन्यो और अपराध क्षमा करायो जबसुं साठोदरानागर और दूसरो वैष्णव तथा वेश्याकी बेटीदोनो मिलके भगवद्दार्ता नित्य करते सो वा साठोदरा वैष्णवके संगते वेश्याकी बेटी परम वैष्णव भई तातें इनकी वार्ता कहा कहिये ॥ वार्ता संपूर्ण ॥ वैष्णव ॥ ४४ ॥ ❀ ॥ ॥ ॥ ॥ ॥

श्रीगुसाईंजीके सेवक एक वेश्याकी बेटी ति० वा वेश्याकी बेटीनें साठोदरा वैष्णवके घर श्रीठाकुरजीके आगे आखीरात नृत्य कन्यो जब सवारो भयो तब वाकुं कछु देहकी झुझी रही नहीं भगवदावेशमें मग्न भई तब डे-हपहर दिन चढ गयो वाके घरके बुलायवे आये जब कछु बोले नहीं और कछु सुनेहुं नहीं फिर वाके घरके मनुष्य वाकुं पकडके लेगये सो घरमें जाय बावरी होय गई कछु खाय नहीं बोले नहीं सो घरके आदमीनकी दृष्टी बचायके वा वैष्णवके घर आई उहां आळी रीतसूं बोली और भगवद्दार्ता करी और प्रसाद लियो या रीतसूं नित्य करे वाके घरके मनुष्यननें राजद्वारमें पुकार करी जो या वैष्णवनें हमारी बेटीकुं बावरी करदीनी है जब राजाके मनुष्य वा वैष्णवकुं पकडके लेगये जब राजाने वा वैष्णवकुं देख्यो तो वैष्णव परम भगवदीय हतो भगवत्तेज वाके मुखपर विराजे है तब राजा बोल्यो ये झूठी बात है ये

मंत्र जंत्र कल्लु करै नहीं वो वैष्णव अपने घर आयो और
 वैश्याकी बेटीकुं वाके घरके मनुष्यननें बावरी जानके
 निकास दीनी अब वे वाई वैष्णवके घरमें आयके रही इत-
 नमें श्रीगुसांईजी पधारे वा बाईकुं नाम निवेदन करायो
 जब वे वाई फेर वैष्णवके घर प्रचारगी करवे लगी एक-
 दिन वा साठोदरा वैष्णवकुं श्रीठाकुरजीनें कही जो मेरी
 सेवा शृंगार ये वाई करेगी और तुम रसोईकी सेवा करौ
 जब ये वैष्णव बहुत प्रसन्न भयो और वह वाई शृंगार क-
 रन लगी और वे रसोई करन लयो और जब वे वैष्णव
 व्याहृतीकुं जाय तब वा वाईसुं श्रीठाकुरजी बोले वत-
 लावे सो वे वाई श्रीगुसांईजीकी ऐसी कृपापात्र भई जासुं
 वैष्णवको संग सर्वथा करनो॥वार्ता संपूर्ण॥ वैष्णवा ४५।
 ॥श्रीगुसांईजीके सेवक वाघजीरजपूत ति०॥
 सो वे वाघजी रजपूत तथा विनकी स्त्री घरमें श्रीठाकुर-
 जी पधरायके भलीभातिसुं सेवा करते हते और एक दो
 वैष्णवनकुं नित्य नेमसो प्रसाद लेवावत हते एकदिन
 वाघजीनें एक वैष्णवकुं न्योतो दियो और तवापूरीकी
 सामग्री कराई सो वा दिन शृंगार करके वाघजीरजपूत
 राजाकी असवारीमें गयो घरमें घी थोडो हतो सो वाघ-
 जीकी स्त्रीनें थोडो घी राजभोगमें धरयो तब वाघजीके
 श्रीठाकुरजीनें वाघजीकुं जताई जो घी थोडोहै और त-
 वापूरी गलेमें चुभतहै तब वाघजीकुं बढी आतुरता भई
 जब तहांसुं दोहै और बजारमेंसुं घी लेके और दोडके श्री-
 ठाकुरजीके आगे धर दियो सब कपडा पेहेरे मंदिरमें

चले गये कछु सुध न रही श्रीठाकुरजीकुं श्रम होवेगो ये बात ध्यानमें रही अनाचार मीलियो येबात ध्यानमें न रही तब घी धरके फिर राजाकी अस्वारीमें गयो वा समें वो वैष्णव वहां बैठो हतो वाके मनमें ऐसी आई जोडी पेहरके मंदिरमें जायके घी धन्यो जासुं ये आचार विचार कछु राखे नहींहि इनके घरको प्रसाद लेनो नहीं ये विचारके उठगयो फिर वाघजी जब आयो वा वैष्णवकुं बुलायवे गयो जब वे वैष्णव छिप गयो फिर वाघजी घरमें आय दोनो स्त्रीपुरुष खूंखे रहे ऐसे तीन दिन सूधी वह वैष्णव आयो नहीं सो वाघजी तीन दिन सूधी खूंखे रहे जब वा वैष्णवके श्रीठाकुरजीनें स्वप्नमें वाकी स्त्रीकुं जताई जो मैं तुमारे घरते जाउंगो तुमनें वाघजी ऊपर वृथा दोष धन्यो है वाको चित्ततो मेरेमें लग्यो हतो और देहको भान कछु हतो नहीं जासुं तुमारे घर नहीं विराजुंगो ये सुनके वा वैष्णवकी स्त्री जागपडी और अपने पतीसों कह्यो जब वो वैष्णव आयके वाघजीके पावन पन्यो और अपराध क्षमा करायो और दोनोनें मिलके महाप्रसाद लियो सो वे वाघजी ऐसे कृपापात्र हते जिनका दुःख श्रीठाकुरजी सहि न सके इनकी वार्ता कहा कहिये ॥ वार्ता संपूर्ण ॥ वैष्णव ॥ ४६ ॥ * ॥ ॥ ॥

॥ श्रीगुसांईजीके सेवक अजबकुंवरबाई ति० ॥

सो वे अजबकुंवर बाई मेवाडमें रहेती हती मीरांबाईकी देरांनी हती और उहां एक दिन श्रीगुसांईजी पधारे जब अजबकुंवर बाईकुं साक्षात् पूर्णपुरुषोत्तमके दर्शन भये

जब अजबकुंवर श्रीगुसांईजीकी सेवक भई और अष्टप्रहर श्रीगुसांईजीके चरणारविंदमें चित्त लग्यो रहै जब श्रीगुसांईजी पधारवे लगे तब अजबकुंवर वाईकुं मूर्छा आई तब श्रीगुसांईजी वाकी ऐसी दशा देखके चारदिन उहां विराजै और अजबकुंवर वाईकुं पादुकाजी पधराय दीये तब अवजकुंवर वाई शुद्ध पुष्टिमार्गकी रीती प्रमाणे सेवा करन लगी और श्रीनाथजी अजबकुंवरवाईके संग नित्य चोपर खेलते और अजबकुंवरवाईके मनमें ऐसी हती जो श्रीनाथजी सदैव इहां विराजै तो आछौ एक दिन अजबकुंवरवाईके ऊपर श्रीनाथजी प्रसन्न भये और कही जो कछ मांग तब अजबकुंवरनें माग्यो जो आप सदा इहां विराजो तब श्रीनाथजीनें कही श्रीगुसांईजी और श्रीगुसांईजीके सात लालजी जहां सूधी भूतल ऊपर मेरी सेवा करेंगे तहांसूधी गोवर्धन पर्वत नहीं छोड़ंगो फेर पीछे इहां पधारंगो और तहांसूधी नित्य आवजाव करूंगो ऐसे वचन सुनके अजबकुंवरवाई मनमें बहुत प्रसन्न भई जासुं श्री नाथजी मेवाडमें अजबकुंवरवाईको वचन सत्य करवेंके लीये अवसूधी विराजेहें इनकी वार्ता कहा कहिये ॥ वार्ता संपूर्ण ॥ वैष्णव ॥ ४७ ॥ ❀ ॥ ॥ ॥ ॥

श्रीगुसांईजीकी सेवक वीरबलकी बेटी ति० ॥

एकदिन श्रीगुसांईजी आगरे पधारे हते वीरबलकी बेटीकुं श्रीगुसांईजीके दर्शन साक्षात् पूर्णपुरुषोत्तमके भये जब वीरबलकी बेटी श्रीगुसांईजीकी सेवक भई और नित्य कथा सुनवेकुं श्रीगुसांईजीके पास जाती और कथामें जो

सुनती सो मनमें लिख राखती एक अक्षर श्रूलती न हती
 और दिवस रात वा कथाको अनुभव करत हती, एकदिन
 वीरवलकुं पादशाहनें पूंछी के साहेबको मिलनो कैसे. हो-
 वेंहें ये निश्चयकरके हमकुं कहो तब वीरवलनें सब पंडित
 और महंतनसुं पूंछी परंतु विनकी कही कछु नजरमें आई
 नहीं ॥ तब बहुत चिंतातुर भये और ऐसो डरलखयो जो
 पातशाह लूट लेवेगो जब बेटीनें कही याको उत्तर श्रीगु-
 साईंजी देवेगे जब वीरवल श्रीगोकुल आये श्रीगुसाईंजी
 कुं बीनती करी तब श्रीगुसाईंजीनें आज्ञा करी जो उत्तर
 पादशाहकुं एकांतमें देउंगो जब वीरवलनें पादशाहसौं
 कही तब पादशाह श्रीगोकुल आये वीरवलहुं संग आये
 जब वीरवल आयके पादशाहके डेरापर श्रीगुसाईंजीकुं
 पधरायलेगये जब पादशाहनें एकांतमें श्रीगुसाईंजीसौं
 पूंछी जो साहेब कैसे मिलेंहें सो उपाय बतावो जब श्रीगु-
 साईंजीनें लौकिक रीतसौं उत्तर दियौं, कही जैसें तुम
 हमकुं मिले ऐंसे साहेब मिलतेहें तब पादशाहनें कही याको
 कारण समझावो, तब श्रीगुसाईंजीनें कही हम हजारन
 उपाय करैं तो तुमको मिलनो कठिन है और तुम वि-
 चाय्येतो घडीहुं न लगीतुर्त हमकुं मिललिये ऐंसें जीव
 हजारन उपाय करे तौहुं साहेब नहीं मिलता है और सा-
 हेब विचारे तो झट जीवकुं अपनी करलेवे है, जीवके हाथ
 कछु नहीं है साहेबकी मर्जी होवै तो क्षणएक न लगे ये
 सुनके पादशाह बहुत प्रसन्न भये और श्रीगुसाईंजीकुं दं-
 डवत करी और बीनती करी जो कछु मेरो अंगीकार करो

तव श्रीगुसांईजीनें कही जो हमकुं गोपालपुर एक घंटामें पहांच्यो जाय एंसी अस्वारी होवैतो ठीक जब पादशाहनें एंसी घोडो भेट क्यो जो एक घंटामें दशकोष जाय और घोडाके खरचमें श्रीगोकुल और गोपालपुर ये दो गाम दीये और दंडवत करके आगरेमें गये वा घोडापर बैठके श्रीगुसांईजी नित्य गोपालपुर पधारते और पाछे श्रीगोकुल आयजाते वा घोडाकी बात गोपालदासजीनें सप्तमवल्लभाख्यानमें गाईहो॥“दुरंग चाले वायुवेगें उतावला जाणे नौका चाली सिंधु तरवा”॥ ऐंसी रीतीसुं गोपालदासजीनें वर्णन क्यो है सो वीरवलकी बेटी ऐंसी कृपापात्र हती और श्रीगुसांईजीके ऊपर एंसी विश्वास हतो इनकी वार्ता कहा कहियो॥वार्ता संपूर्ण॥वैष्णव४८॥

॥ श्रीगुसांईजीकी सेवक एक कूंजरी तिलकी ० एकदिन श्रीगुसांईजी गोपाल पुरतें श्रीगोकुलपधारते हते रस्तामें एक कूंजरी प्याससों घबरायके पडी हती तव श्रीगुसांईजीनें खवाससों कहिये कौन पडी है तव खवासनें कहि प्यासके मारे यालुगांईके प्रान निकसहैं तव आपनें खवाससुं कही आपणी झारीमेंतें याकुं जल प्यावो तव खवासनें कही झारी छिवाय जायगी तव श्रीगुसांईजीनें आज्ञा करी जो झारीतो दूसरी आवेगी परंतु याके प्राणतो बचेंगे तव वाकुं जल प्यायो जब वो चेतन भई फिर वे कूंजरी अपना सब द्रव्य लेके श्रीगोकुलमें आयके रही दिनकुं दुकान मांडके बैठे रातकुं गामबहार जायके रहे कारण जो श्रीगोकुलमें बडी जातवालेकुं रात रहेवैको

पृथ्वीपती अकबर बादशाहको हुकम न हतो सो ऐसेमें
 कुंजरी वाहेरसों उत्तम मेवा लायके श्रीगोकुलमें बेचे
 और जो कोई मंदिरमें मेवा पहुँचावे वाके पास दाम
 थोड़े लेवे मनमें ऐसे समझे जो मेरो द्रव्य या रीतसुं
 अंगीकार होयगो ऐसे करत करत वा कुंजरीनैं आखो
 जन्म श्रीगोकुलमें संपूर्ण करयो और श्रीगुसाईंजी यमुना
 जीके घाटपर पधारते जब वा कुंजरीकुं नित्य दर्शन होते
 सो साक्षात् पूर्णपुरुषोत्तमके होते जासुं वे कुंजरी श्रीगुसां
 ईंजीकुं पूर्णपुरुषोत्तम जानके श्रीगोकुलमें रही हती जहां-
 सृधी वाकी देह रही तहांसृधी वाकुं वेसेही पूर्णपुरुषोत्त-
 मके दर्शन होते सो वे कुंजरी श्रीगुसाईंजीकी एसी कृपा-
 पात्र भगवदीय हती ॥ वार्ता संपूर्ण ॥ वैष्णव ॥ ४९ ॥
 ॥ श्रीगुसाईंजीके सेवक प्रेत हतीत पतीत ह्यथ
 भाईतिनकी वार्ता ॥ दोऊ हतीत पतीत महानदीके तीरऊ-
 पर रहेते हते जो कोई रस्तामें निकसतो जाकुं मारडा-
 रते ऐसे सब लोगनकुं खबर पडी सो वे रस्ता उजाड
 भयो कोई आवतो जातो न हतो वा ठेकाणसुं चार चार
 कोश सृधी उजाड भयो हतो कोई खेती करवहुं न आ-
 वतो वे ऐसे प्रेत जबर हते कोई मंत्र जंत्रके वश न हते,
 जो कोई जातो ताकुं मारडारते सो एकदिन चाचाहरि-
 वंशजी गुजराततें श्रीगोकुल जाते हते सो मूलकेवे रस्ता
 निकसे तब दोनो प्रेत पर्वत बनके रस्तापर आयके
 पडे एकतो जायवेके रस्तापर आयके पडयो और दूसरो
 पाछें फिरवेके रस्तापर आयके पडयो तब चाचाजीनैं

जान्यो के ये कोई प्रेतहैं जब चाचाहरिवंशजीनें चरणामृत मिलायके विनके ऊपर जल डाल्यो तब विननें चाचाहरिवंशजीको प्रताप जान्यो ये कोई बडे महापुरुषहैं हाथ जोडके वीनती करन लगे कहीजो हमारो उद्धार करौ, चाचाहरिवंशजीनें विनकुं अष्टाक्षर मंत्र सुनायो नाम-सुनतहीं विनकी दिव्यदेह भई और भगवल्लीलामें प्रवेश भये फेर चाचाजी श्रीगोकुल गये और श्रीगुसांईजीसों वीनती करी जब श्रीगुसांईजीनें आज्ञा करी सोवर्ष पहले ये दोऊ ठग हते और वैष्णवको बेप वनायके फिरते हते एक ठिकाणे वैष्णवके घर जायके उतरे हते सो वैष्णवतो घरमें हतो नहीं वाकी स्त्री हती सो रातकुं वाके घर रहिके वा स्त्रीकुं मारके गहेनो लगये, फेर रस्तामें विनकुं चोर मिले सो चोरननें विनकुं मार डाल्ये गहेनो लगये जैसो विनने कृत्यो तैं सो मुक्त्यो तो सही परंतु वैष्णवकुं माल्यो हतो और वैष्णव वनके ठगाई करते हते या अपराधतें प्रेत भये हते जो तुम इनको उद्धार न करते तो कल्पभरसुधी प्रेत रहेते वैष्णवको अपराध ऐसोहैं सो वैष्णवविना वैष्णवको अपराध क्षमा करवेकुं कोई सामर्थ्य नहींहैं श्रीठाकुरजीद्वक्षमा न करें ये बात अंबरीषके आख्यानमें प्रसिद्धहै जासूं वैष्णवके अपराधसूं डरपतरहेनो ऐंसे चाचाहरिवंशजीकुं श्रीगुसांईजीनें आज्ञा करी ये सुनके सब वैष्णव प्रसन्न भये सो वे हतीत पतीतकुं चाचाहरिवंशजीनें श्रीगुसांईजीकी कृपातें उद्धार कियो और गोपालदासजीनें ऐंसे बल्लभाख्यानमें गायोहै ॥ हतीत पतीतनो जुओ

तुमें प्रकटईघाण ॥ सो वे श्रीगुसाईंजीकी कृपातें भगव-
ल्लीलामें प्रवेश भये ॥ वार्ता संपूर्ण वैष्णव ॥ ५० ॥ ❀

॥ श्रीगुसाईंजीके सेवक गंगाबाई क्षत्राणी-
तिनकी वार्ता ॥ सो गंगाबाईकी माता महावनमें रहेती
हती और श्रीगुसाईंजीकी सेवक हती और श्रीगुसाईंजी-
के स्वरूपमें चित्त लग रह्यो हतो और वाके मनमें श्री-
गुसाईंजीके स्वरूपमें कामबुद्धि रहेती हती परंतु श्रीगुसां-
ईजीकीतो ऐसी प्रतिज्ञा हती जो परस्त्रीके सामें काम दृ-
ष्टीसों देखनो नहीं ये बात वे क्षत्राणी महावनवालीकी
श्रीगुसाईंजीनें जानी तब श्रीगोकुलमें आयवेको वा क्ष-
त्राणीकुं बंदकन्यो ॥ बार वर्ष पर्यंत श्रीगोकुलमें न आ-
यवेदीनी सो महावनमें विप्रयोगकी भावनासुं श्रीगुसां-
ईजीको ध्यान करत हती ॥ एकदिन वाकुं स्वप्न भयो
जब वाकुं गर्भस्थिति भई सो वे गंगाबाई जन्मे तब वि-
नकी मातातो भगवल्लीलामें प्राप्त भई सो गंगाबाई जब
बढि भई तब वे गंगाबाई श्रीगुसाईंजीकी सेवक भई और
महावनसुं गोपालपुरमें आयके रही हती और विनसुं
श्रीगोवर्धननाथजी हंसते खेलते बातें करते सब लीलाके
दर्शन करावते और गंगाबाई तैंसि लीलाके पद बनायके
श्रीनाथजीके आगें गावति और गंगाबाईनें जितने पद
बनाये ॥ श्रीविठ्ठलगिरिधरन ऐसी छापधरीहे और सोळेसैं
अष्टाईशमें विनको जन्म हतो और सत्रेंसो छत्तीश वर्ष-
सुधी वे मृतल पर रही हती एकसो आठवर्ष सुधी रही
हती और मेवाडमें श्रीनाथजीके संग आई हती सो इन-

की विशेष बात श्रीनाथजीके प्राकट्यमें लिखी है एकदिन श्रीनाथजीने श्रीहरिरायजीकुं सेवाडमें कही जो गंगावाईकुं वस्त्र आभूषण अतिसुंदर पहिरायके रातकुं जग-मोहनमें बैठाय देवो तव बैठायदीनी तव रातकुं जग-मोहनमें ते श्रीनाथजी गंगावाईकुं देहसहित लीलामें लगये सो वे गंगावाई श्रीनाथजीके ऐसि कृपापात्र भगव-दीय हती तातें इनकी वार्ता कहा कहिये ॥ वार्ता सं-पूर्ण ॥ वैष्णव ॥ ५१ ॥ ❀ ॥ ॥ ॥

॥ एक श्रीगुसांईजीके सेवक राजा तिनकी वार्ता सो वे राजाको मन दिवसरात भगवत्सेवामें हतो भगवत् उपयोग विना द्रव्य खरचतो न हतो और वृथा-लाप वृथाक्रिया वृथाध्यान तीनों करके रहत हतो लौ-किकमें अवश्य होवे वितनो बोलै, वैष्णवको संग दिवस-रात छोडे नहीं और वैष्णव विना कोईके उपर रीझे नहीं वा राजाके गाममें एक भवैया आयो सो भवैया बहोत चतुर हतो और खेलमें ऐसो चतुर हतो जो सबकुं री-झावे बहूत दिन सूधी वा गाममें रह्यो परंतु वाको राजा खेल देखे नहीं वे भवैया ऐसो प्रयत्न करनेल्यो जो कोई उपायसुं राजा मेरो खेल देखे तो ठीक सो वा भ-वैयानें राजाके कामदारनकुं मिलके ऐसो प्रयत्न करके राजा खेल देखे ऐसो ठराव कन्यो जब वो भवैया रातकुं ख्याल करन ल्यो और सब कामदार तथा राजा खेल देखेवे बैठे सो वा भवैयानें बहोत खेल करे और बहूत तन्हेंके स्वांग बनाये परंतु राजा रीझ्यो नहीं ॥ वा

भवैयाकुं मनमें बढो पश्चात्ताप भयो और राजाके मनुष्यनसुं पृच्छन ल्यो जो राजा कोनशी रीतीसुं रीझिगो सो तुम बतावो तब राजाके खवासनें कह्यो जो वैष्णव विना राजा औरके उपर न रीझिगो तब राजाके मनुष्यनके सिखायेतें वे भवैया वैष्णवको स्वांग पेहेरके तिलक मुद्रा माला धरके राजाकी सभामें आयो तब राजानें उठके वा वैष्णवकुं साष्टांग दंडवत कन्यो और छातीसुं लगायके मिल्यो और गादीपर बैठायके आप राजा पंखा करन ल्यो और वा वैष्णवसुं भगवद्वार्ता करन ल्यो और भंडार खोलाय दियो और जो चाहिये सो लेवो ऐंसे कहेके वा वैष्णवकी बहुत टहेल करी यद्यपि राजा जानतो हतो जो ये भवैया है और वैष्णवको स्वांग बनायके आयो है तोहूं राजाको वैष्णव वेषपर ऐसो विश्वास हतो जैसे साक्षात् श्रीठाकुरजी उपर होवै ॥ सो वे राजा हरीगुरु वैष्णवभे भेद रंचकहुं जानतो न हतो तातें इनकी वार्ता कहा कहिये ॥ वार्ता संपूर्ण ॥ वैष्णव ॥ ५२ ॥ ॥

॥ श्रीगुसांईजीके सेवक दयाभवैया तिनकी वार्ता ॥ सो वा दया भवैयानें वैष्णवको स्वांग धरके और राजाकुं रिझायके और राजासुं विदाहोयके अपने डेरापर चलयो ॥ मनमें ऐंसो विचार करन ल्यो जो बहुत दिनकी मेहेनत सफल भई जव रस्तामें पाछे देखे तो चार स्त्री संग पाछे चली आवतिहै और भवैया ठाढो रहैतो चार स्त्री ठाढी रही जाएं और वेचले तो संग चलवै लगजाए ॥ सो देखके वाके मनमें आश्चर्य

भयो ये कौनहै फेर वे भवेया विनखीनसुं पूंलवे लम्यो
जो तुम कौनहो और मेरे संग काहेकुं आवत हौ जब
वे स्त्री बोलवे लगी जो हम चार हत्या हैं तेरे शरीरमें
सदा रहैंजब तूं मरेंगो तब तोकुं नरकमें लेजाएंगी
और अब तैने वैष्णवको वेष धारण क्योहै जासुं तेरे
शरीरमेंसुं हम बाहिर निकसीहैं वैष्णवसुं हम बहुत दूर रहैं
है वैष्णवकी दृष्टीमें हम आवेंतो भस्महोयजाएहै ये बात
सुनके दयाभवेया पाछें फिरयो और जायके राजाके पावन
परयो और कही जो हमकुं वैष्णव करौ और सब वृत्तांत ह-
त्यानको कह्यो जब राजानें उठके विन चारखीनकुं देख्यो
वे तुरत भस्महोयगई तब दयाभवेयाकुं श्रीगुसाईंजीको
पत्र लिखदेके अडेल पठायो सो वे दया भवेया जायके श्री-
गुसाईंजीको सहकुं टुंव सेवक भयो और श्रीठाकुरजी पध-
रायके भगवत्सेवा करन लम्यो सो कितने दिन अडेलमें र-
हिकेपुष्टिमार्गकी सेवार्की रीत सीखके फिर वा राजाके पास
जन्मसूची रह्यो और दोनो मिलके भगवद्दार्ता करें और
वा भवेयाकुं ऐसो निश्चय भयो जो वैष्णवधर्मतें अन्य
धर्म सब तुच्छहैं जो मैंने वैष्णवको झूठो वेष पेहेन्यो तो
हैं हत्या दूर भागगई और साचो रहंगो तो श्रीगुसाईं-
जीकी कृपातें निश्चय करके मोकुं भगवल्लीलाकी प्राप्ती
होयगी ऐंसे करत करत वा भवेयाकुं भगवल्लीलाकी स्फूर्ती
भई और श्रीठाकुरजी सानुभाव जनावन लगे सो वे दया-
भवेया वा राजाके संगतें परम भगवदीय भयो ॥ वार्ता
संपूर्ण ॥ वैष्णव ॥ ५३ ॥ * ॥ ॥ ॥ ॥ ॥

॥श्रीगुसाईजीके सेवक एक कुणबी गुजरातके वासीकी वार्ता—सो वे वैष्णव तादृशी हतो ॥ श्रीठाकुरजी विनकुं सातुभाव जनावत हते सो वैष्णव चाचाजीके संग श्रीगुसाईजीके दर्शनकुं ब्रजमें गयो रस्तामें एक गाम हतो वा गाममें एक ब्राह्मणी हती वा ब्राह्मणीकुं गलित कोढ भयो हतो और कीडा पडगये हते सो वा ब्राह्मणीको बेटा नदी उपर माकुं धोवेकेलिये लेगयो हतो तव वे कुणबी वैष्णव न्हाय पेहेले धोती धोवतो हतो सो वाकी धोतीके छीटा वा ब्राह्मणीके उपर पडे सो जा ठिकाणे छीटा लगे इतने शरीरमेंसो कोढ मिटगयो तव वे ब्राह्मणी वैष्णवके पावन पडी और कह्यो जो मेरे शरीरकी ये व्यवस्थाहै परंतु तुमारी धोतीकी छीटते मेरो शरीर इतनो नीको भयोहै तव वा कुणबी वैष्णवने कही मैतो शूद्रहुं तुम ब्राह्मण होयके मेरे पावन मति पडो जब वा ब्राह्मणीने हाथ जोडके कही तुमतो बडे महापुरुषहो मेरो दुःख तुमविना दूसरो कोई दूरकरवेकुं सामर्थ्य नहीं है जासुं मेरे उपर कृपा करौ तव वे वैष्णव ब्राह्मणीकुं चाचाहरिवंशजीके पास लेगयो और सब वृत्तांत कह्यो तव चाचाजीने वाकुं नाम सुनायो और चरणामृत दीयो तव वा ब्राह्मणीको सब कोढ मिटगयो और सब अंग नीको भयो जब वह ब्राह्मणी आछी रीतीसुं अपने घरगई वाको शरीर नीको भयो देखके वा गामके लोक सब मिलके चाचाहरिवंशजीके पास आयके पावन पडे और सबने नामसुन्यो और पुष्टिमार्गकी रीती शीखे और सब गामके लोग वै-

ष्णव भये और वे ब्राह्मणी तथा बाकी वेटा वा वैष्णवके संग श्रीगोकुल गये जायके श्रीगुसांईजीके सेवक भये श्रीनवनीतप्रियाजीके तथा श्रीगोवर्धननाथजीके दर्शन करके बहुत प्रसन्न भये और ब्रजयात्रा करके श्रीठाकुरजी पधरायके अपने देशमें आये सो वे कुणवी वैष्णव ऐसे कृपापात्र हते जिनकी धोतीके छीटानतें कोढ़ मिटगयो तातें इनकी वार्ता कहा कहिये॥वार्ता संपूर्ण॥वैष्णव॥५४॥

॥ श्रीगुसांईजीके सेवक एक बाईक्षत्रानी की वार्ता ॥ वे क्षत्राणी भोरी बहोत हती और श्रीठाकुरजीकी सेवा भलीभांतिसों करत हती और श्रीठाकुरजी विनकुं बालभाव जनावत हते और छातीसुं लपटते और गोदमें बैठते और घड़ी घड़ी भूखे होयके खायवेकुं मागते और वे बाईकुं बहार जावे देते नहीं और जब वे बाई बाहेर जाती तो श्रीठाकुरजी रुदन करते या रीतसुं बालभाव जनावते एकदिन घरमें बिलाई लडवे लगी जब श्रीठाकुरजीनें वा बाईसुं कही मैं बहोत डरपतडूं ऐसे कहिके वा बाईकी छातीसुं लपट गये जब वा बाईनें कही जो तुमनें पूतना आदिक दैत्य मारेहें जबतो डरपे नहीं अब काहिकुं डरपतहो तव श्रीठाकुरजी वा बाईसुं बोलें नहीं तीनदिन सूधी कछु मागेंडूं नहीं जब वा बाईनें बहुत प्रार्थना करके और रोवे लगी जब श्रीठाकुरजी फेर बोलवे लगे जासुं वैष्णवनकुं ऐसे विचार राखनो नहीं॥ श्रीठाकुरजीकुं भूख नहीं लगे है और शीत नहीं लगे और प्यास नहीं लगे ये सर्व सामर्थ्यहैं ऐसे विचारके जो श्रीठाकुरजीकी

सेवा करें हैं विनकी सेवा निष्फल होवें हैं श्रीमहाप्रभुजीने निबंधमें कहा है ॥ सो श्लोक ॥ माहात्म्यज्ञानपूर्वस्तुमु-
दृढश्रवतोधिकः ॥ स्नेहो भक्तिरितिप्रोक्ता तयासुकिर्न-
चान्यथा ॥ १ ॥ जासुं माहात्म्यज्ञान पूर्वक सुदृढ सर्वते-
अधिक स्नेह श्रीठाकुरजीमें राख्यो चाहिये जैसे कोल
राजा होवे तो हुं राजाकी माताके मनमें ऐसे रहे है मेरो
बेटा सुखो होयगो और मेरे बेटाकुं ठंड लगती होयगी
यारीतीसुं वैष्णवनकुं श्रीठाकुरजी उपर स्नेह राख्यो च-
हिये सो वे वार्द्धक्षत्रानी ऐसी कृपापात्र हती ॥ वार्ता संपूर्ण
वैष्णव ॥ ५५ ॥ ❀ ॥ ॥ ॥ ॥ ॥

॥ श्रीगुसांईजीके सेवक एक पटेलकी वार्ता ॥

सो वे पटेल गुजरातके संगमें श्रीगोकुलगये और श्रीगु-
सांईजीके सेवक भये और श्रीगुसांईजीके लालजी सात
श्रीगुसांईजीकुं काकाजी कहते हते सो पटेल विनवालक-
नके सुखतें मुनके श्रीगुसांईजीकुं काकाजी कहते ॥ वा
पटेलकुं ऐसो भोरो जानके श्रीगुसांईजीने गायनकी सेवा
करवेकेलीये खिरकमें राख्यो ॥ सो वे पटेल गायनकी
ऐसी सेवा करतो जैसे गाय सुखी होवे गायनके नीचे
झाडतो और नित्य गायनके नीचे रेती बिछावतो और
वे रेती नित्य बहार काढडारतो नित्य नई नई रेती बिछा-
वतो वह पटेल मनमें ऐसे विचारतो के गायनके शरी-
रमें जीव न पडे और गायनकुं ठंड न लगे गायनकी
ऐसीटेहेल देखके श्रीनाथजी वा पटेलपर प्रसन्न भये और
वह पटेल गायनकुं घास धोयकेखावतो कारण जो गाय-

नके दूधमें रज आवेगी तो श्रीनाथजी कैसे आरोग्येंगे सो वे पटेल कोईदिन पातर लेवे जाय और कोईदिन नजाय गायनकी टेहेलमें अवार होयजायतो पातरलेवे नजाय मूखो टेहेल कन्यो करे जब वाकुं श्रीनाथजी लडुवा देवे सो वे पटेल खायके गायकी सेवा कन्यो करे ॥ एकदिन वा पटेलसुं श्रीगुसाईंजीनें पूछी जो तूं नित्य पातर लेवे क्युनहीं आवेहें जब वा पटेलनें कही काकाजी महाराज कोईदिन श्रीनाथजी लडुवा देवे जब पातर लेवे नहीं आवुंई जब लडुवा न देवे तव पातर लेवे आवुंई ये बात सुनके श्रीगुसाईंजी बहोत प्रसन्न भये और कही जो तेरी पातर नित्य खिरकमें पठावेंगे सो वे पटेल नित्य गायनकी टेहेल कन्यो करतो ॥ एकदिन वा पटेलनें कही जो अब मेरी पातर मति पठावो मोकुं श्रीनाथजी नित्य लडुवा देवेंहे ये सुनके श्रीगुसाईंजीनें आज्ञा करी जो तुम लडुवा सब खायजावोहो के रूछ राखो हो ॥ तव वाने कही आधो लडुवा मेरे पास है जब वे श्रीगुसाईंजीनें आधो लडुवा मगायो ॥ देखेंतो शय्याभोगको लडुवाहै जब श्रीगुसाईंजी देखके वाके उपर बहोत प्रसन्न भये ॥ फेर एकदिन मेघ बहोत वरस्यो हतो जब वे पटेल मूखो रह्यो जब श्रीनाथजी झारीबंटालेके वा पटेलके पास आयके वाकुं लडुवा दियो और झारीबंटा उहां छोडके श्रीनाथजी गये ॥ जब वे पटेलझारीबंटा लेके श्रीगुसाईंजीकी बैठकमें लायके श्रीगुसाईंजीकुं दीये और कही जो रातकुं श्रीनाथजी खिरकमें भूलगयेहें जब श्रीगुसाईंजीनें आज्ञा

करी अब तुम सिंघपोरपें रखवारी करो तब वे पटेल सिंघपोरपर बैठे रहेंते एकदिन श्रीनाथजी सिंघपोरतें बहार पधारन लगे तब वा पटेलनें नाही कही जो रातकुं गहेनो पेंहेरके मतजाओ जो जाओगे तो काकाजी मेरे ऊपर स्त्रीजेंगे तब श्रीनाथजी पधारे ॥ तब वह पटेल पा-
 छें गयो जब वृंदावनमें जायके श्रीनाथजीनें रास कन्यो तब वा पटेलकुं दर्शन भये और उहां आश्रूषण जो ब्रज-
 भक्तनके पहे सो सब पटेल वीनके लायो फेर लायके श्रीगुसाईंजीके आगें धरे और कही जो श्रीनाथजी माने
 नहीं हैं और रातकुं मंदीरमेंछुं हजारन स्त्री श्रीनाथजीके संग गई हती जब खबर न पडी वे स्त्री कहांरहती होएंगी
 में विनको गहेनो वीनलायोहुं ये सुनके श्रीगुसाईंजी बहोत प्रसन्न भये जब श्रीगुसाईंजीनें मनमें विचार क-
 न्यो जो याकुं स्वाभाविक प्रपंचकी स्मृती खूलाई है और भगवत्स्वरूपमें आसक्ति भई है याकुं गायनकी
 सेवामें निरोधसिद्ध भयोहै याके भाम्यकी बढाई कहा-
 करनी जिनके अरसपरस श्रीनाथजी होय रहेंहें विचा-
 रके वा पटेलकुं श्रीगुसाईंजीनें आज्ञा करी जो तूं सिंघ-
 पोरीकी रखवारी कन्यो कर ॥ जहां श्रीनाथजीजाएँ
 विनकुं जायवेदीजो तूं नाहीं मतकरियो और तोकुं संग
 ले जाएंतो जईओ नहींतो मति जईओ ये सुनके वा
 पटेलनें वीनती करी गहेनोखोइ आवेतो कैसे करनो तब
 श्रीगुसाईंजीनें कही हमारे घर गहेनो बहोत हैं जब सु-
 नके वह पटेल चुपकर रह्यो और सिंघपोरीपर बैठो रहे-

तो जब श्रीनाथजी पधारते जब वाकुं जगायके कही जा-
ते ॥ और इच्छाहोतीतो संग ले पधारते वे पटेल श्रीगु-
साईंजीके ऐसे कृपापात्र भगवदीय भये ॥ वार्ता संपूर्ण ॥
॥ वैष्णव ॥ ५६ ॥ ❀ ॥ ॥ ॥ ॥ ॥
॥ श्रीगुसाईंजीके सेवक एकविरक्त वैष्णवकी ०
सो वे वैष्णव ब्रजमें पर्यटन करते सो चुकटी मागके
निर्वाह करते ॥ एकदिन कोकिला वनमें रसाईं करी वा
दिन डोल उत्सव हतो सो वे भूलगये हते जब
रसाईं करसुके तब डोलउत्सव याद आयो जब
बढो पश्चात्ताप क्यो पाछे विचार क्यो भगवद
इच्छा ऐसी है जब कुंजकी लता बांधके डोल क्यो और
श्रीठाकुरजीकुं झुलायो और दार वाटी करी हती सो
तीनो भोगनमें दार वाटी समर्पी सो या वैष्णवको ऐसो
भाव देखके श्रीठाकुरजी बहुत प्रसन्न भये और श्रीठाकु-
रजी प्रसन्न होयके श्रीगुसाईंजीकुं जताये जब श्रीगुसाईं-
जीनें मनमें ऐसी जानिके वा वैष्णवके धन्य भाग्य है फेर
एकदिन वे वैष्णव श्रीगुसाईंजीके पास गये तब श्रीगुसां-
ईंजीनें वा वैष्णवकुं डोलके समाचार कहे तब वा वैष्ण-
वनें कही श्रीठाकुरजी जो कछु मानतेहैं सो आपकी कान-
नतें मानतहैं यामे जीवकी सामर्थ्य कछु नहींहैं सो वे वै-
ष्णव ऐसे कृपापात्र हते जिनके भावतें श्रीठाकुरजी वश्य
होय गए हते सो वा वैष्णवको ऐसो भाव हतो तातें इनकी
वार्ता कहांताईं कहिये जाकुं देखके श्रीठाकुरजी प्रफुल्लित
रहते हते ॥ वार्ता संपूर्ण ॥ वैष्णव ॥ ५७ ॥ ❀ ॥ ॥ ॥

॥ श्रीगुसांईजीके सेवक एक विरक्त तिनकी ॥
 सो वा वैष्णवनें ऐसो नेम लीयो नित्य गिरिराजकी परि
 क्रमा करनी एंसे करते बहुत दिन बीते एकदिन वाके म-
 नमें ऐसी आई कोई दिन श्रीगुसांईजी भोसुं बोले नहींहैं
 सो बहुत चिंता नित्य करे एकदिन वा वैष्णवके पांवमें
 ठोकर लगी जब परिक्रमा करवे न जायसकयो वा दिन
 अन्नकूटकी उत्सव हतो सो वा वैष्णवके मनमें ऐसी आई
 जो या रस्ता ऊपर आज श्रीगुसांईजी पधारेंगे सो वे रस्ता
 झान्यो और कांकर वीनडारे फेर गोवर्धन पूजाके दर्शन
 कीये और फेर श्रीगुसांईजीके दर्शन करवे गयो जब श्री-
 गुसांईजीनें कही आवो वैष्णव बैठो जब वा वैष्णवनें बी-
 नती करी जो महाराजाधिराज कोई दिन आप मोसों
 बोले नहींहैं आज कृपा करके बोलेहैं याको कारण कहा
 जब श्रीगुसांईजीनें कही आज तुम पुष्टिमार्गकी रीतीप्र-
 माणें चलेहो जासुं हम प्रसन्न भयेहैं जब वा वैष्णवनें बी-
 नती करी जो मैं नित्य गिरिराजकी परिक्रमा करुं
 जब श्रीगुसांईजीनें आज्ञा करी जो ये तो तेरी देहको सा-
 धन करुं और आजतो तेंनें श्रीठाकुरजीको सुख विचा-
 न्यो है पुष्टिमार्गमेंतो जैसे श्रीठाकुरजी सुखी होवे वैष्ण-
 वकुं वैसीही कृती करणी चहीये ये सुनके वे वैष्णव बहुत
 प्रसन्न भये और सब साधन छोडके सेवा करन लगे सो
 वे वैष्णव ऐंसे कृपापात्र हते ॥ वार्ता संपूर्ण ॥ वैष्णवा ॥ ५८ ॥
 ॥ श्रीगुसांईजीके सेवक एक क्षत्री ति० ॥
 सो वे क्षत्री हीरानकी धरती परखतो हतो एक वरसमें व-

रसाद न वरस्यो सो वाकी खेतीमें कछु भयो नहीं और सरकारनें मसूलके पैसा मांगे सो वाके पास हते नहीं तब सरकारनें वाको घर छुट लीयो वाके घर कछु रह्यो नहीं फेर वाकी स्त्री चरखा कांतके जो कछु पैसा आवतो वासुं निर्वाह करते परंतु दीय मनुष्यनको चित्त ऐसो रहेतो श्रीठाकुरजीकुं श्रम होवैहै ये विचार करके ये परदेश चलयो सो जादेशमें हीरा होते हते वाई देशमें गयो उहां एक वेपारीसुं मिल्यो वासुं ठराव कय्यो जो मैं हीरानकी धरती परखुंहुं तुमकुं मैं जो धरती परखदेवुं सो तुमलेउ जो माल निकसे सो आघो मेरो और आघो तुमारो ऐंसे कइल करायके वासुं धरती लेवाई सो धरती खोदाई ॥ जब माल बहुत निकस्यो ता पाछें वा वेपारीनें वा क्षत्री वैष्णवकुं कछु दियो नहीं फेर वे क्षत्रीवैष्णव दूसरे वेपारीसुं मिले वासो नकी लिखत पढत करके फेर वा देशमें धरती लेवाई फेर वाने धरती खोदाई जब हीरा बहुत निकसे जब विनसुं आघो माल वाटके अपने देशकुं चलयो इतनेमें जो पेहेलो वेपारी हतो वाके घरमें अग्नी लगी सो सब माल जर गयो जब वे वेपारी आयके वैष्णवके पावन पय्यो जो मेरो अपराध क्षमा करो अब मेरे पास कछु रह्यो नहींहै जब वा वैष्णवकुं दया आई फेर वाकुं धरती परख दीनी सो वैष्णवनके ऐंसे धर्महोवैहै जो बुराकरे तासुं भलो करणी फिर वह क्षत्री वैष्णव अपने देशकुं चलयो दो चार नोकर राखके अपने देशकुं चलयो जब रस्तामें एक तलाव जंगलमें हतो वा तला-

वके ऊपर ग्यारे ठग उतरे हते उहां क्षत्री वैष्णवनें डेरा कन्यो और अपने मनुष्यनकुं कही तुम चार जने गाम-मेसुं सामग्री ले आवो तब वे मनुष्य गये जब ठगननें ऐसो विचार कन्यो याकुं मारके सब माल लेजाएतो ठीक तब ठग मारवे लगे जब वैष्णवनें कही मोकुं न्हाय लेवे देओ तब ठगननें कही जो भलें ॥ फेर वे वैष्णव तला-वमें न्हायवे लग्यो ॥ उहां न्हायके श्रीगुसाईंजीको ध्यान कन्यो श्रीगुसाईंजी परमदयालहें भक्तविरह कातर करुणा मयहें भक्तनकुं छोडै नहींहैं जहां तहां भक्तनके पाछें फिरहें जासुं वा क्षत्री वैष्णवकुं वा तलावमें दर्शन दिये जब वा वैष्णवनें वीनती करी जो मेरो कहा अपराधहै तब श्रीगुसाईंजीनें आज्ञा करी ये आगले जन्ममें ग्यारें चोर हते और तुम सरकारकी नोकरीमें हते तब तुमनें इनकुं मारे हते अब ये तेरो वैर लेवेकुं आयेंहैं इतनो आछो है जो एक जन्में ग्यार जने तुमकुं मारेंहैं नहीतो ११ जन्म तुमकुं लेने पढते और एक एक जन्ममें न्यारो न्यारो वैर लेते वो क्षत्री श्रीगुसाईंजीकी आज्ञा लेके बहार आय और विन ठगनसों कही अब तुम मोकुं मारौ ॥ परंतु विन ठगननें श्रीगुसाईंजीकी वाणी सुनी हती दर्शन न भये हते वा वाणी श्रवणके प्रतापतें विनकी बुद्धी निर्मल होय गई हती जैसे भगवानके पार्षदनकी वाणी सुनके अजामेलकी बुद्धि निर्मल भई हती जब यमदूत अजामे-लकुं मारवे लगे हते तब भगवत् पार्षदननें छुटायो हतो वाही समय जो भगवत् पार्षदननें यमदूतनकुं भगव-

घश सुनायो हतो सो अजामेलनें सुन्यो अजामेलकुं अ-
 मृतको विंदु पान कह्योहै सो श्रीमहाप्रभुजीनें जलभेदमें
 लिख्योहै ॥ तादृशानांक्चिद्वाक्यंदूतानामिववर्णितं ॥
 अजामिलकर्णनवादिंदुपानंप्रकीर्तितं ॥ १ ॥ ऐसे विनठ
 गनकुं अमृतकी बूंदनको पान भयो जब वे ठग कहन
 लगे तुमनें तलावमें कौणसुं बातें करीहैं और पहले ज-
 न्मको वृत्तांत तुमकुं कौन कहतो हतो सो कृपा करके
 कह्यो अब हम तुमारे दास होएंगे अब तुमकुं नहीं मारेंगे
 और हमारे द्रव्य नहीं चाहिये तुम सत्य बोलो जो को-
 नसुं वात करीहै जब वे क्षत्री वैष्णवनें जो वात भई हती
 सो कहि दीनी जब वे सब ठग विनके पांवन परे और
 कही जो हमकुं श्रीगुसाईंजीके सेवक करावौ पाछें वे क्षत्री वै-
 ण्णव रसोई करके सवनकुं प्रसाद लेवायके अपने गाम आ-
 यो और आछे हीरानको श्रीगुसाईंजीके लीयें हार करायो
 और दशहजारके हीरा बेचडारे सब घरके खरचकी वं-
 दोवस्ती करी और फेर अपने श्रीठाकुरजी पधरायके
 और स्त्रीकुं संग लेके और विन ठगनकुं संग लेके श्री-
 गोकुल आयो फेर श्रीगुसाईंजीके दर्शन करे और सब
 ठगनकी वात कही जब वे ठग श्रीगुसाईंजीकी प्रेमपूर्वक
 शरण गये और श्रीगुसाईंजीकी कृपातें भगवत्स्वरूप और
 श्रीमहाप्रभुजीको स्वरूप और श्रीगिरिराजको स्वरूप
 और श्रीयमुनाजीको स्वरूप और ब्रजको स्वरूपनको
 विन ठगनकुं श्रीगुसाईंजीकी कृपातें ज्ञान भयो सो क्षत्री
 वैष्णव ऐसे कृपापात्र भगवदीय हते॥वार्ता संपूर्णा॥वै०॥५९

श्रीगुसाईजीके सेवक एक विरक्त तिनकी वा० सो वैष्णव श्रीगोकुलमें रहतो और चुकटी मागके निर्वाह करतो और वा गाममें एक क्षत्राणी वैष्णव हती सो वाके पास द्रव्य बहोत हतो और विरक्त वैष्णव क्षत्राणीके घर बहोत जातो और भगवद्वार्ता करतो परंतु लोग निंदा बहोत करते एकदिन वा वैष्णवसुं श्रीगुसाईजीनें पूछी जो तूं वा क्षत्राणीके घर क्यूं जायहें तब वानें कही जो महाराज भेरो वासुं कछ्छ मतलब नहीं है कदाचित् कछ्छ द्रव्यको काम पडे तो वह काम वासुं निकसे तब श्रीगुसाईजीनें आज्ञा करी जो वैष्णवकुं द्रव्यपात्रकी खुशामद नकरी चाहिये त्यागीकुं खुशामद नकरणी श्रीमद्भागवतमें कह्योहै ॥ श्लोक ॥ सत्यांक्षितौ किंकशिपोःप्रयासैर्वाहौस्वसिद्धेस्युपवर्हणेःकिं ॥ सत्यंजलौकिंयुरुधाऽन्नपांश्या दिग्बल्कलादौसतिकिंदूकूलैः ॥१॥ चीराणिकिंपथिनसंतिदिशंतिभिक्षां नैवांघ्रिपाःपरश्रुतः सरितोऽप्यशुष्यन् ॥ रुद्रागुहाःकिमजितोऽवतिनोपसन्ना नृकस्माद्भजन्तिकवयोधनदुर्मदांधान् ॥ २ ॥ ऐसे बहोत रीतीसुं वा विरक्तकुं श्रीगुसाईजीनें समझायो परंतु वो वैष्णव समझो नहीं तब श्रीगुसाईजी परमदयालहें वा वैष्णवकुं संसारमें डूबतो देखके श्रीगुसाईजीनें लौकिक चरित्र रच्यो वा वैष्णवकुं कही हमकुं रुपैया पांच हजार उधारे चाहिये महिना एकमें पाछे देवेंगे वा क्षत्राणीसों तुम बीच पढके तुमारे नामसुं उधारे लिवाय देवो जब वा क्षत्राणीकुं कहिके रुपैया पांच हजार वे वैष्णव अपने नामसुं ले-

आयो सो श्रीगुसांईजीकुं दीने तव लेके रुपैया श्रीगुसां-
 ईजीनें धरतीमें गढाय दीने महिना दोढ पीछे वा क्षत्रा-
 णीनें वा वैष्णवसुं रुपैया मागे तव श्रीगुसांईजीनें वा वैष्ण-
 वसों कही जो हमतो वर्ष दो वर्ष पीछे परदेश जाएंगे जव
 रुपैया आवेंगे तव देंगे तव वा वैष्णव सुनके चुप कर रह्यो
 जव वा क्षत्राणीनें वा वैष्णवकुं सिपाईनके पेहेरेमें वैठाय-
 दियो चुकटि मागवे जाने न दिये और घरमें आवे न
 दिये एक वार दर्शन करवे सिपाईके संग जावे देवे तव
 मनमें ऐसो विचार कऱ्यो याकुं वहोत दुःख देखंगी तो
 श्रीगुसांईजी रुपैया देंगे जव वो वैष्णव श्रीगुसांईजीके
 दर्शन करवे गयो चार सिपाई संग गये तव श्रीगुसांई-
 जीनें पूंछयो वैष्णव ये कहाहै तव वे वैष्णव रोय पडयो
 और अपनी संपूर्ण हकीकत कही जव श्रीगुसांईजीनें
 कही वा क्षत्राणी तेरी मित्रहै वाके पास चार पांच लाख
 रुपैयाको द्रव्य है खावेवारो कोई है नहीं पांच हजारके
 लीयें तोकुं ऐसो हेरान कऱ्यो अब तुम कैसे करोगे तव वा
 वैष्णवनें कही जो एकवार क्षत्राणीके रुपैया चूके तो
 जन्मसूधी वाको सुख न देखंगो तीनदिन भयेहै मैंनें अ-
 न्नजल लीयो नहीहै ये सुनके श्रीगुसांईजी बहोत कृपा करि-
 के वह द्रव्य कढाय दियो और वा वैष्णवकुं कही जो हमारे
 कछ द्रव्य चाहितो न हतो तेरी आसक्ती छुढायवेकेलीयें
 इतनो काम करनो पडयो तव द्रव्य लेके वा वैष्णवनें
 क्षत्राणीकुं दियो और अपने मनमें समझ्यो जो श्रीगु-
 सांईजी विना ऐसी कृपा कौनकरै और संसारमें डूवते

नकुं कौन काटै ऐसो विचारके वा वैष्णवनें ऐसो नेम
लियो वा क्षत्राणीको सुख न देखुंगो सो वे वैष्णव ऐसो
कृपापात्र हतो जिनकुं श्रीगुसाईजीनें संसारासक्ति छुडाई
॥ वार्ता संपूर्ण ॥ वैष्णव ॥ ६० ॥ ❀ ॥ ॥ ॥

श्रीगुसाईजीके सेवक ब्राह्मण स्त्रीपुरुष देवीके
उपासीतिनकी वार्ता—सो वे ब्राह्मण आगरेमें रहेतो हतो
सो वे ब्राह्मणस्त्रीपुरुषनें ऐसे देवीको मंत्र साधे जो देवी
आयके नित्य मध्यरात्रीमें दर्शन देवै और बातें करे ऐसे
करतकरत बहोत दिन बीते एकदिन चाचाहरिवंशजी
श्रीगोकुलमेतें आगरेगये सो ज्येष्ठमास हतो धूप बहोत
पडती हती सो तापकेलीये रस्तामें अवार होयगई, रात
पेहेर गई जब आगरे पहुँचे सो बहोत श्रमित भये सो
वा ब्राह्मणके चोतरापर डेरा क्यो उहां हवा आळी
जानके सोयरहे जब मध्यरात्री भई जब वह देवी ब्राह्म-
णके घर आई देखेतो वा ब्राह्मणके चोतरापर पांच वै-
ष्णव सोयरहेहैं देवी प्रसन्न होयके अपने बडे भाग्य मा-
नके विन वैष्णवनकुं पंखा करन लगी और मनमें येस-
मझीके ये भगवद्भक्त सुतेहैं सो इनकुं उलंघके कैसें जाउं
और वे ब्राह्मणतो देवीके दर्शनकेलीये बहोत आतुर ह-
तो सो दोनो स्त्रीपुरुष बहोत प्रार्थना करन लगे और
स्तुती करन लगे और आवाहन करन लगे तोहुं देवी
आई नहीं आखीरात चाचाजीकुं देवी पंखा करती रही
जब रात चारघडी रही तब चाचाजी उठे और संतदा-
सके घर चले जब देवी भीतर गई विनस्त्रीपुरुषनकुं द-

र्शन दिये जब वे ब्राह्मण हाथजोडके पूछन लय्यो जो आज काहेकुं रातकुं नहीं पधारे हमारो कहा अपराधहै जब देवीनें कही जो तुमारे घरके आगे वैष्णव सुतेहते में विनकुं पंखा करती हती तव वा ब्राह्मणनें हाथजोडके कही जो वैष्णव तुमसां अधिकहैं कहा ॥ तव वा देवीनें कही जो वैष्णव त्रिलोकीसुं अधिकहैं साक्षात् भगवान् जिनके वशमेंहैं और मेरे जैसे देवता तो विनकी टेहेल करवेकी अभिलाषा राखेंहैं परंतु येटेहेल मिले नहींहैं ये सुनके वे ब्राह्मण बोल्यो जो तुम कृपाकरके ऐसे वैष्णव-नके दर्शन हमकुं करावो जब वा देवीनें कही जो मैं तु-मारे ऊपर प्रसन्न भईहुं और तुमारो साचो भाव मेरे-मेंहै जासुं मैं तुमकुं कहूँहुं जो तुम दोउजने वा वैष्णवके पास जायके श्रीगुसाईंजीके शरण जावो जब वे ब्राह्मण स्त्रीसहित संतदासजीके घर जायके चाचाहरिवंशजीकुं मिले और सब वत्तांत कथ्यो तव विनदोउनकुं चाचा-जीनें नाम सुनायो और मारगकी रीती सिखाई फेर विनदोउनस्त्रीपुरुषनकुं चाचाजी श्रीगोकुल ले गये और श्रीगुसाईंजीके दर्शन कराये और सब प्रकार जणायो तव श्रीगुसाईंजीनें कृपाकरके विन स्त्रीपुरुषनकुं नाम निवेदन करायो जब वे स्त्रीपुरुष श्रीनवनीतप्रियाजीके दर्शन करके बहोत प्रसन्न भये और श्रीमदनमोहनजीकी सेवा माथेपधराई और सेवा करन लगे और श्रीनाथजीके दर्शन श्रीगुसाईंजीके संग जायके करे सो वे ब्राह्मण और ब्राह्मणी बहोत प्रसन्न भये तव श्रीगुसाईंजीसुं विदा होयके

आगरे आये और एक महिनासूधी चाचाहरिवंशजी हमारे पास रहें ऐसी वीनती श्रीगुसांईजीकुं करके चाचाजीकुं संग ले आये जब चाचाहरिवंशजीनें कृपाकरके विनकुं मारगकी रीती सिखाई सो वे स्त्रीपुरुष श्रीगुसांईजीके ऐसे कृपापात्र भये ॥ वार्ता संपूर्ण ॥ वैष्णव ॥६१॥

॥ श्रीगुसांईजीके सेवक कृष्णदासतथाईश्वरदास दोउ भाईकी वार्ता—सो वे दोनो भाई निष्किचन होते और सदा श्रीगुसांईजीके पास रहते और श्रीगुसांईजी परदेश पधारते तो संग जाते और जलघराकी सेवा करते होते और दोउ भाई अफीम बहोत खाते होते ॥ एकदिन श्रीगुसांईजीनें विनकुं अफीम खाते देखे जब श्रीगुसांईजीनें विनकुं कही तुम अफीम छोडदेवो विननें वीनती करी महाराज अफीममें कहा दोषहै तब श्रीगुसांईजीनें आज्ञा करी जो अफीम भगवत्स्वरूपकुं सुलावेहै और अफीम पुरुषार्थ घटावेहै और तत्त्वनिश्चयकुं सुलायके अतत्त्वमें मन लगावेहै और जब अफीम न मिले तब कोई बातमें चित्त नहीं लगेहै ये बात सुनके विन दोउन भाईनें अफीम छोडदीनी और भगवद्रसमें लुके रहते विनकुं सदा भगवद्रसको अमल रहेतो जासुं भगवद्वार्ता विना दूसरी बात नहीं करते सो वे दोउभाई श्रीगुसांईजीके ऐसे कृपापात्र भगवदीय हते ॥ वार्ता संपूर्ण ॥ ॥ वैष्णव ॥ ६२ ॥ * ॥ ॥ ॥ ॥ ॥

॥ श्रीगुसांईजीके सेवक एक साहुकारके बेटाकी बहूकी वार्ता—सो वे साहुकारके बेटाकी बहू सूरतगाममें

रहेती हती बाकी रूप बहोत सुंदर हतो और वे सती हती एकदिन अपने घरमें कवांड लगायके नहाती हती सो एक म्लेच्छ पादशाहको नौकर घोडापर बैठके जातो हतो सो बाकी नजर वा स्त्रीके ऊपर गई और देखके कामातुर भयो तव घोडा कुदायके वा के घरके भीतर जायपयो सो वे स्त्री नग्न नहाती हती बाकी हाथ पकरलियो जब वह स्त्री बोली इतनी तसती कहिकुं लेहो मैं तुमारी चाकरहुं तुम कहो जैसे करुंगी अवी मोकुं वस्त्र पेहेरे लेवेदेवो ये मुनके वह म्लेच्छ प्रसन्न भयो और कही जो तुम कपडा पेहेरके हमारे संग चलो ये कहेके वा स्त्रीको हाथ छोडदियो वा स्त्रीने कपडा पेहेरके और वा म्लेच्छके मुखमें एक तमाचो मारके एक कोठामें कवाडदेके चली गई तव म्लेच्छ सरमायके घर गयो फेर मनमें ये विचार कयो जितनो द्रव्य अपने पास है खरचके या लुगाईसुं विवाह करनो याकुं छोडनी नही ऐंसे विचारके उपाय हूठवे लगयो वा स्त्रीके घरके पास एक डोकरी रहेती हती बहोत गरीब हती वा डोकरीसुं वा म्लेच्छनें पेहेचाण करी और नित्य बाके घर जाय ॥ कोईदिन आठ आना कोई दिन रुपैयो कोई दिन दो रुपैया वा डोकरीकुं दे आवै ऐंसे करते करते वा डोकरीसुं कही जो या सेठके बेटाकी बहूको नाम और बापको नाम सासु सुसरा धणी याको नाना नानी मामा मामी सबको नाम और याके शरीरके चिन्ह और बाकी अवस्था और जन्मको वरस तथा महिना दिवस याकुं पृछके मोकुं लिखायदे तो पचाश

मोहर देऊंगो तब वा डोकरीनें कबूल कन्यो और नित्य वाके घर जाय और वा बहूको तेलकांकसी करे और सब वार्ते पृच्छे और आयके वा स्लेच्छकू लिखाय देवै ऐसे करते जब सब वृत्तांत लिखाय चुकी तब वा स्लेच्छनें एक वेश्याकी छोरी मोल लीनी और साहुकारके बेटाकी बहूको नाम हतो सो नाम धन्यो और वाकुं सव सगानके नाम लिखाय दिये जब वह वेश्याकी बेटी हुशार भई सो वा साहुकारके घरके पाछे वा वेश्याकी बेटीकुं ठाडी राखी और सूबाके आगे जायके पुकान्यो जो असुकी साहुकारके बेटाकी बहू मेरे संग सुसलमान होवैकुं खुश है और मेरे संग पर्णवेकुं खुश है सो वाके घरके पाछे ठाडी है वाकुं सरकार बुलायके पूछलेवै जब हाकमनें वाकुं बोलायो और वे बात सब पृच्छी और सगानके सब नाम लिखलिये और स्लेच्छ बोल्यो येपाछे फेर बदल जायगी और सुसराके घर चली जायगी जासुं सरकार पको करलेवै जब वा हाकमनें वासुं पक्की लिखत करलीनी फेर वाकुं रजा दीनी फेर वा स्लेच्छनें वेश्याकी बेटीकुं वेश्याके घर पठाय दीनी और पंदरे दिन पाछे वा सूबाके आगे पुकार करी जो वा साहुकारके बेटाकी बहूनें मेरे संग खान पान करके फेर वाके घर गई है तब सूबाने हुकम करके वा बहूकुं पकडाई फेर वाको सुसरा वाको वाप और सब गामको पंच एकठे होयके वा सूबाके पास गये परंतु सूबाने मानी नहीं कह्यो ये बाई मेरे पास आयके लिखाय गई है बहोत तकरार भई तब वाके सुस-

रानें कही ये कोईदिन बहार नीकसी नहींहै जासुं हम दिल्लीमें अकबर पादशाहके पास पुकारेंगे जहांसूधी हमारो दिल्लीमें न्याय नहांवे तहांसूधी वा बहूको धर्म अष्ट नहोवे और म्लेच्छ या बहूकुं स्पर्श नकरे ऐसे सूवासों नक्की करलियो फिर सूवाको बंदोवस्ती लेके दिल्ली गये तब अकबर पादशाहने न्याय क्यो वा म्लेच्छके लाभमें हुकम क्यो जब वे बहू ऊंचे स्वरसुं रोवन लगी और कहेन लगी ॥ हे ईश्वर जो तुम सत्य होतो मेरे प्राणलेवो में या बातमें कछु जानत नहींहुं वाकी व्यवस्था देखके दिल्लीपतीके मनमें ऐसी आई जो वा स्त्रीको मन जो म्लेच्छमें रोहित होतो तां ऐसी रुदन न करती जासुं प्रभु मेरे न्यायमें खामी नपाड तो बहोत आछो सो परमेश्वर मेरो धर्म राखेंगे ऐसे विचारके हुकुम दीयो और कचेरीमें ऐसो कह्यो जो या न्यायमें कछु खामिहै वरोवर नहीं दीसे है। फेर वा म्लेच्छके संग कर दिनी सो म्लेच्छ कचेरीसुं ले चल्यो और वे बहू ऊंचेस्वरसुं रुदन करे और छाती कूटे हजारन लोक तमाशा देखवेकुं एकट्टे भये वा बहूकुं म्लेच्छ ले चल्यो वाई दिन श्रीगुसाईंजी श्रीविठ्ठलनाथजी दिल्ली पधारे हते जहां श्रीगुसाईंजीको डेरा हतो वा रस्ता होयके वो म्लेच्छ निकस्यो और वह स्त्री रुदन करती हती और बहोत मनुष्यनकी भीड संग हती जब श्रीगुसाईंजीने देखी और पूछयो जो ये कहाहै जब सब वृत्तांत सुन्यो तब वा तुरककुं और वा बहूकुं बुलायो और सब समाचार पूछे और मुनके पृथ्वीपतीकुं खबर कराई जो हम

याको न्याय पंदरें दिनमें करदेवेंगे ये सुनके पृथ्वीपती प्रसन्न भयो और कही जो एक महिनाके भीतर जो श्रीगुसाँईजी करें सो न्याय मेरे कबूल है ऐसे कहेके वीरवल दिवानकुं श्रीगुसाँईजीके पास पठायो सो वीरवलनें वीनती आयके करी ये सुनके श्रीगुसाँईजीनें स्लेच्छकुं और ठिकाणे रहेवेको डुकूम दियो और वा बहकुं सासु सुसराके पास राखी और दोउनकुं बुलायके विनकी सब हकीकत सुनी फेर एकदिन श्रीगुसाँईजीनें दो पींजरा मंगाये एक पींजरामें वा तुरककुं बैठायो एक और पींजरामें वा बहकुं बैठाई और दोनु पींजरा मैदानमें धराय दिये और आखीरात वे पींजराकी पास कोई मनुष्य जायनहीं ऐसी बंदोबस्ती करदीनी और एक मनुष्य दिल्लीपतीकी खातरीको छानो छानो रातकुं वा पींजरेके पास बैठायो जैसे दो उनकुं खबर न पडे ऐसी रीतीसुं वे मनुष्य बैठो रह्यो फेर वा पींजरामें मध्यरातपीछेवह बह बोली वा स्लेच्छसुं कही जो अब मैंतेरी भईहुं और तेरे संग जन्म काढ़ंगी जासुं कछ तुमारो पराक्रम जाणुं तो मेरो चित्त प्रसन्न होवै जो तुमनें कैसी रीतीसों ये उपाय रच्यो सो तुम मोसों कहो तो मोकुं धीरज आवै तो मेरे मनकुं धिरजदेउं मैंने कोईदिन तुमकुं देख्यो नहिं है जो तुमारे पराक्रम नहीं कहोगे तो मेरे प्राण पींजरासुं माथा फोडके काढ डारुंगी जब वो स्लेच्छ सुनके बहोत प्रसन्न भयो और बोल्यो जो तुम मेरे पराक्रम अब सूधी जानें नहीं है जो तोकुं कछ खबर है नहीं तोहुं इतनो कर दिखायो

है फेर वा म्लेच्छनें सब वृत्तांत कह्यो वा डोकराकी और
 वा वैश्याकी छोरीकी सब रीती जैसी बनीहती सब कही॥
 ये सुनके वे बहू बोली अब मेरे प्राणरहेंगे अब तेरे वश
 होयके तेरे पास आवृगी ये सुनके वे म्लेच्छ प्रसन्न भयो
 और फेर आपणी बडाई करनलभ्यो तब वे मनुष्य जो
 छिपके बैठो हतो वानें दोननकी बातें आखीरात भई हती
 सो सब लिख लीनी हती जब सवारो भयो जब श्रीगुसां-
 ईजीनें दोनो पीजरा मंगाये और वे मनुष्यनें लिख्यो
 हतो सब वांच्यो जब श्रीगुसांईजीनें वे दोनो पीजरा और
 वे लिख्यो हतो सो पृथ्वीपतीके पास पठाय दीये सो अ-
 कबरपादशाह ये लिखत वांचके वा तुरककुं जन्मकैद दीनी
 और वा सूबाकुं दूर कियो और सूवासों कही जो जासमें
 ये स्त्री तेरे पास लिखायवेकुं आइहती वा ईसमें तेनें या
 स्त्रीके वापकी और सुसराकी बुलायके सही क्युं न लीनी
 और वा वैश्याको और डोकराकी घर लूटलियो और
 वा बहूकुं छोडदीनी जब वा बहूनें अपने सगानसों कही
 जो मोकुं श्रीगुसांईजीनें जीवती राखीहै जासुं मैं इनकी
 सेवक होउंगी फेर वह बहू श्रीगुसांईजीकी सेवक भई और
 वाके सासुसुसरा और माबाप वाको धणी और जितने
 वाके संग गये हते सब श्रीगुसांईजीकेसेवक भये और
 श्रीठाकुरजी पधरायके अपने देशकुं आये सो वे बहू अपने
 सत्यमें रही तो वाके संगसुं सब वैष्णव भये सो बहू ऐसी
 कृपापात्र हती ॥ वार्ता संपूर्ण ॥ वैष्णव ॥ ६३ ॥ ❀ ॥
 ॥ श्रीगुसांईजीके सेवक हरिदास स्ववास स-

नोडिया तिनकी वार्ता ॥ सो वे हरिदास श्रीगुसाईंजीकी खवासी करतेहते सो हरिदासकुं श्रीगुसाईंजीनें दोवातनकी शिक्षा दीनी ॥ एकतो हमारे द्रव्यको स्पर्श न करनो और एक परस्त्रीसों एकांत वात न करनी हमारो द्रव्य स्पर्श करतें बुद्धी भ्रष्ट होय जाय ॥ और परस्त्रीके एकांत करतें चित्त चलायमान होवै सो भगवदावेश हृदयमें न होवै ॥ सो हरिदासनें जन्म पर्यंत श्रीगुसाईंजीकी आज्ञा पाली ॥ और एकदिन हरिदासनें श्रीगुसाईंजीसों वीनती करी जो मेरे श्रीमद्भागवत सुनवेकी इच्छा है तब श्रीगुसाईंजीनें आज्ञा करी जो तुम उज्जेनमें जायके कृष्णभट्टजीके पास श्रीमद्भागवत सुन आवो जब हरिदास उज्जेन गये और कृष्णभट्टजीसों कही जां सोकुं श्रीमद्भागवत सुनाओ तब श्रीकृष्णभट्टजीनें वैष्णुगीतको प्रसंग सुनायो सो ॥ श्लोक ॥ बर्हापीडनटवरवपुःकर्णयोःकर्णिकारं विभ्रद्वासःकनककपिशिवैजयंतीचमालाम् ॥ रंध्रान्वेणो रधरसुथया पूरयन्नगोपहृदैवृदारण्यंस्वपदरमणं प्राविशद्द्वीतकीर्तिः ॥ १ ॥ या श्लोककी सुबोधिनीको प्रसंग जामें तीनप्रकारकी सुधाको वर्णन क्योहै ॥ एकतो सर्वश्रेष्ठया सुधा और दूसरी देवभोग्या सुधा और तीसरी भगवद्भोग्या सुधाको स्वरूप श्रीठाकुरजीनें वैष्णुगीतमें वर्णन करके ब्रज भक्तनकुं आपके स्वरूपको बोध करायो और वर्णन करवेकी सामर्थ्य दीनी ये प्रसंग हरिदास सुनके मूर्छा खायगये सो एक पहेर पाछे चेतन भये फेर हरिदासजीनें कृष्णभट्टसों कही अब श्रीमद्भागवतको

प्रसंग और सुनाओ तब कृष्णभट्टजीनें कही जो मोकुं अवकाश नहीं है॥ और मनमें कृष्णभट्टजी डरपे जो इनकी दशमी अवस्था होय जायगी तो श्रीगुसांईजी खीजेंगे तब कृष्णभट्टजीनें हरिदासजीसों कही तुम जायके श्रीगुसांईजीकी सेवा करौ फेर हरिदासजी आयके श्रीगोकुलमें श्रीगुसांईजीकी खवासी करन लगे ॥ प्रसंग ॥ १ ॥ एकदिन हरिदासजीनें एक साचोराके घरको वैगणको शाकलियो हतो जब हरिदासजीके मनमें ऐसी आई जो मोकुं इतने वर्ष भयेहें श्रीगुसांईजीकी सेवा करुं और कछु पगार नहीं लेउं जासुं कछुक द्रव्य श्रीगुसांईजीको लेके चल्यो जाउं तो ठीक जब श्रीगुसांईजीकी बहूजीके आभूषण एक हजार रुपैयाके लेके उहांसुं चले सो हरिदासजी हंदावन होयके और आगे चले सो एक तलाव हतो उहां एक साधुकी जगह हती उहां हरिदास सामान धरके और खरचुं गये और तलाव उपर न्हाये तब उहां पवन आई और ब्रजकी रज उडके हरिदासके मुखमें पडी जब हरिदासजीकी बुद्धी शुद्ध भई और पेटमेंसुं सब आसुरावेष निकस गयो तब हरिदासकुं ऐसी पश्चात्ताप भयो मैंनें कहा काम कन्यो जब हरिदास गांठडी लेके श्रीगोकुल फेर आये और आयके श्रीगुसांईजीकुं आभूषण दिये और बीनती करी जो मेरी बुद्धी ऐसी क्युं भई तब श्रीगुसांईजीनें आज्ञा करी जो हमारे सेवक और हमारी ज्ञातीके भट्ट और हमारे जलघरिया प्रचारक रसोइया मुखिया भितरिया तिनके घर हमारौ वि-

नाप्रसादी द्रव्य जायहै विनके घरको जे कोई वैष्णव
खावै विनकी बुद्धी ऐसी होवै जैसे तुमारी भई ॥ हरी गुरु
वैष्णवमें विनकी विषम बुद्धी होयजायहै ॥ जहांसूधी तु-
मारे पेटमें वा साचोराको साक रह्यो तहांसूधी तुमारी
बुद्धी बिगडी रही जब तुमारे मुखमें भगवद इच्छातें ब्रज
रज पडी और तुमकुं उलटी भई जब वे अंश निकस
गयो तब तुमारी बुद्धी निर्मल भई यातें सब वैष्णवकुं गुरु
तथा श्रीठाकुरजीके अनप्रसादीद्रव्यको ऐसो डर राख्यो-
चहिये सो वे हरिदास श्रीगुसांईजीके ऐसे कृपापात्र हते
॥ वार्ता संपूर्ण ॥ वैष्णव ॥ ६४ ॥ ❀ ॥ ॥ ॥

श्रीगुसांईजीके सेवक प्रेमनिधिमिश्रकी वार्ता
सो प्रेमनिधिमिश्र आगरामें श्रीगुसांईजीके सेवक भये
और श्रीठाकुरजी पधरायके सेवा करन लगे और प्रेम-
निधिमिश्र विशेष करके अपरसमें रहते यवनकी बस्ति
जानके बहार नहि निकसते और प्रेमनिधिमिश्रको ऐसो
नेम हतो सवापहर रात रहै गागर कंतानमें बांध राखते
सो गागर लैके जमुनाजीपें जाय और नहायके फेर गा-
गर भर लावते सो एकदिन बरसात बहुत भई जहांतहां-
कीच भई तब प्रेमनिधीकुं चिंता भई जो अधरामें जहां-
तहां पांव पडजायगो और दिनकुं म्लेच्छ छीजाएंगे या
चिंताके लीयें आखीरात नीद न आईसो वाकि चिंताको
देख श्रीगोवर्धननाथजी सहि न सके जब सवापेहेर रात
रहि तब प्रेमनिधि यमुनाजीपें चले घरसुं बाहेर निकसे
तो एक दश बरसको छोरा मसाल लेके आवेहै तब प्रेम-

निधिनै जानि ये कोईको पाँचायके जायहै याके पाछें पाछें जाउंतौ ठीक जहांसूधि ये या रस्तापै जाय तहांसूधि याके पाछें चलयो जाउंगो फिर जायगो तव यमुनाजीपै जाउंगो ऐसे करतेवे छोरो यमुनाजीसूधि आयो पीछे अंतर्धान होयगयो तव वाकुं बढो आश्चर्य भयो ये कौन होयगो कहाहोयगो कोई भूत प्रेतकी सामर्थ्य तो नहींहै जो मेरिट्टिमें आयसके ऐसे विचार करन लग्यो फेर नहायके गागरभरके प्रेमनिधि चले तव मसाल लेके वह छोरा फेर आयगयो तव विचार कन्यो जो यासों पूछं कोनहैं पांचसातपेड़ चलयो इतनेमें एककोसभर घरहतो सो आय गयो कछु पूंछ सक्यो नहि तव वह छोरा चलयो गयो फिर यानें घरमें विचार कन्यो जो कोसभर रस्ता एक पांचसातपेड़में आय गयो ये कार्य श्रीनाथजीके हैं जासुं बहूत पश्चात्ताप भयो और वा छोराके रूपमें मन लग रह्यो और नेत्रनमेसुं जल आवे लगगयो सो वे प्रेमनिधि मिश्र ऐसे श्रीगुसांईजीके कृपापात्र हते जिनके लीयें श्रीनाथजीकुं मसाल लेनी पढी ॥ प्रसंग ॥ १ ॥ और प्रेमनिधि कथा ऐसी वांचते जो कोई मुनवे आवतो वाको मन हरणहोयजातो और भगवत्स्वरूपको ज्ञान होयजातो जासुं स्त्री और पुरुष बहूत मनुष्य कथा मुनवेकुं आवते ॥ सो ये बात वा प्रेमनिधीके परोसी जो दुष्ट हते विननसुं सही न गई, विनदुष्टनने जायके पृथ्वीपतीसों पुकार करि तव पृथ्वीपतीनें चोबदार पठाये तव वाहीसमय प्रेमनिधीनें न्हायके उत्थापन किये हते और झारि उठाई हती और

दूसरि भरवेकुं विचार करते हते तब चोबदारनें जायके पकडके पृथ्वीपतीके पास लेगये और श्रीठाकुरजी जलविना रहेगये तब पृथ्वीपतीनें पूछी तुम कथा वांचोहो जो स्त्रीनको क्यौ आवे देवोहो तब प्रेमनिधि बोले जहां भगवत्कथा होवेहै जो सुनवे उहां आवे विनको उठाय देनो और विनको धमकावनो और विषयदृष्टिसौ देखनो और भगवन्नाम सुनवेमें प्रतिबंध करनो यामें दोष बहुत लगेहै जासुं मैं कोईको नाहिं नहिं कहूँ तब पृथ्वीपतीनें कहि तुमकहो सो बात और है और तेरी गलीके लोगननें कहि सो बात और है जहां सूची निर्धार नहिं होयगो तहांसूची तुम नहिं छूटोगे ऐसे कहिके विनकुं कैद पठायदियो तब श्रीठाकुरजीनें पृथ्वीपतीको इष्ट जो पीर वाकोरूप धरके और पृथ्वीपती रातको सूतो हतो जहां गये तब स्वप्नमें वाकुं कहि सोकुं प्यास लगीहै वानें कहि आप जल पीवो तन्हें तन्हेंके जल मेरे घरमेंहै अनेक प्रकारकी सुर्गधिवाले जलहैं तब श्रीठाकुरजी बोले कौन पियावेगो तब वो पृथ्वीपती बोल्यो जो आप फरमावोगे सोई पियावेगो तब श्रीठाकुरजीनें वाकुं लात मारी और कहि तु मेरीबात चित्त देके सुनें नहिं जाके हाथको मैं जल पिउंहुं वाकुं तेनें कैद कय्यो है ऐसे वचन सुनकेवह पृथ्वीपती उठ बैठी तब मनुष्य पठायके वा प्रेमनिधि मिश्रकुं कैदमेंसुं बुलायो और उठके वाके पांव पकड लीये और कहि मेरे अपराध क्षमा करौ और साहेब प्यासे हैं तुम जायके जल प्यावो औरके हाथको नहिं पीवेंहैं एक तुममें

रीझें जासुं तुम जायके साहेबकुं जल प्यावो और मैं तुमारे ऊपर राजीहूं जैसे कथा वांचोहो तैसे वांचो और कोई देश कोई गाम मैं तुमारि भेट करूं सो लेवो तव प्रेमनिधि बोलै हमकुं कछु नहिं चाहिये द्रव्य पायके को-ईको आछो नहिं भयो है जिननें द्रव्य पायेंहैं विनकि बुद्धि स्थिर नहिं होवेंहैं विनको बहुत प्रकारके विगाड होवेंहैं जासुं मैं द्रव्य नहिं छिउंगो तव पृथ्वीपति बहुत हरप्यो और कही कछु फरमावो तव प्रेमनिधिनें कही तुम कीई दिन मोकुं बुलाइयो मती ॥ येहि मागुं तव दोचार मनुष्य और मसाल संग देके वाही समें प्रेमनिधि जीको घर पठाये तव घर जायके और न्हायके झारि भरि तव श्रीठाकुरजीकुं धीरज आई और शांत भये वे प्रेमनिधिमिश्र श्रीगुसांईजीके ऐसे कृपापात्र हते ॥ वार्ता संपूर्ण ॥ वैष्णव ॥ ६६ ॥ ❀ ॥ ॥ ॥ ॥

॥ श्रीगुसांईजीके सेवक ब्राह्मण स्त्रीपुरुष तिनकी वार्ता ॥ सो वे ब्राह्मण इटाए गाममें रहते हते सो देविउपासि हते रातकुं देवि विनके पास आवती और एकदिन चाचाजी इटायामें गये रात बहुत गई जब ब्राह्मणके चौतरापें डेरा किये सो उहां सोयरहे तव रातको देवि आई सो वैष्णवको उलंघन नकरसकि उहां ठाडी रहि विष्णुकि माया जो देवि सो वैष्णवको स्वरूप आछि रीतीसुं जानति हति सो पाछी गई और वे ब्राह्मण अनेक प्रकारके मंत्र तथा जप तथा आवाहन करन लभ्यो जब रात दौघडि रहि तव चाचाजी उठके चले फेर देवि वा ब्रा-

ह्यणके घरमें गई तब ब्राह्मणनें पूंछी क्युं रातको नहिं पधारे
 तब देवीनें कहि चोतरापर वैष्णव सोयेहते बिनको उल्लंघन
 कैसें करुं तब वा ब्राह्मणनें पूंछी वैष्णव कहा तुमसुं बडेहै
 ॥ तब देवीनें कहि अनन्य वैष्णव सबतें बडेहै इनतें वडो
 कोई नहिं तेतीस करोड देवता विराटके रोमरोममें है
 सो विराट भगवान ब्रह्मांडरूपहैं ऐसे अनंत कोटि ब्र-
 ह्मांड श्रीठाकुरजीके एक एक रोममेंहैं ऐसे भगवानको
 जिनने वस करेहैं ऐसे जो वैष्णव तिनसों वडो कौनहै जि-
 नके पाछे पूर्णपुरुषोत्तम फिरेहैं तब ब्राह्मणनें कहि मोकुं
 वा वैष्णवके दर्शन करणेहैं तब देवीनें कहि गाम वाहर
 जावो, अबी तुमकुं जाते मिलेंगे तब वे ब्राह्मण जायके
 चाचाजीसों मिले और कहि जो मेरे घर पाछे पधारो
 और सब बात कही तब चाचाजीनें कहि हम दशपंद्रे दिन
 पीछे आवेंगे और वा ब्राह्मणको एक उपरना दियो कहा
 जो वा देवीको ये उपरना दीजो फेर ब्राह्मण घरमें आ-
 यके एक खुटीपैं उपरना धरदियो और न्हायके गायत्री
 जप करन लग्यो और वा ब्राह्मणकी स्त्री रसोई करन
 लगी तब पवनचल्यो सो उपरना उडके वा ब्राह्मणके
 माथे ऊपर जाय पडयो तब वाकि लुमाई वा ब्राह्मणकुं
 कुतिया जैसी दीसवे लगी तब वो ब्राह्मण बोल्यो तु कुति-
 या क्युं होयगईहैं वा स्त्रीनें विचार कन्यो जो याको कहा
 भयोहै ये बावरोतो नहिं भयोहै तब वा ब्राह्मणनें माथेसो
 उपरना उतारलियो फेर वे स्त्री वाकुं मनुष्य जैसी दीस-
 वे लगि तब वा ब्राह्मणनें विचारी या उपरनामें चम-

त्कार हे तब वा लुगाईसुं कहिये उपरना ओढके तूं मोकुं देख तब वा लुगाईनें उपरना ओढके देख्यो तब वा ब्राह्मण बाकुं गधाजेसो दिस्यो तब वा लुगाईनें कहि तुम मोकुं गधाजेसें दिसोहो तब ब्राह्मण उपरना ओढके बजारमें चलयो सो कोई गधा कोई कुत्ता कोई घोडा कोई डंट ऐसे अनेक प्रकारके पशुदीसें परंतु मनुष्य कोई न दीसें सो आखे गाममें फीरे दोजने एकदुकानपें मनुष्य देखे तब विनकुं जायके पूछि जो तुम कौनसे धर्ममें हो विननें कहि हम वैष्णवहैं और श्रीगुसाईजीके सेवकहैं और तूं क्युं पूछिहैं तब ब्राह्मणनें सब बात कहि तब वे वैष्णव पछतायवे लगे जो चाचाजी या गाममें आवे हमकुं तो मिलेहैं नहिं अब आवे तो हमकुं खबर करियो फिर वा ब्राह्मणनें मनमें विचार क्योकरे जो अब चाचाजी आवे तो मैं वैष्णव होबुं फिर थोडेदिन पीछे चाचाजी आवे सो वा ब्राह्मणके घर उतरे और दोनो स्त्रीपुरुषनको चाचाजीनें नाममुनाये फिर दोनो जने वैष्णव भये श्रीगोकुलमें आयके श्रीगुसाईजीकी कृपातें श्रीनवनीतप्रियाजीके दर्शन किये फिर श्रीगुसाईजीके मुखसों कथा सुनि फिर श्रीनाथजीके दर्शन करे और श्रीठाकुरजी पधरायके इटायमें आयके भगवत्सेवा करन लगे और कितनेक दिन बीते पीछे श्रीठाकुरजी विनकुं अनुभव जतावन लगे वे ब्राह्मण श्रीगुसाईजीके ऐसे कृपापात्र हते जिनको श्रीगुसाईजीनें चाचाजीद्वारा प्रमेयबल दिखायके अंगीकार करलीये ॥ वार्ता संपूर्ण ॥ वैष्णव ॥ ६६ ॥

श्रीगुसाईजीके सेवक श्यामदास विरक्तकी ०
 सो वे श्यामदासके ऊपर श्रीगुसाईजीकी संपूर्ण कृपा हती
 और श्रीठाकुरजी अनुभव जनावत हते एकदिन लालदास
 ब्राह्मण श्रीगुसाईजीको सेवक भयो और लालदासनें वी-
 नती करि महाराज में कैसे करूं मेरो चित्त स्थिर नहिं रहेहै
 तब श्रीगुसाईजीनें कहि जो तुम एक वर्षसूधि श्यामदासको
 सत्संग करौ तब लालदासनें श्यामदाससां कहि जो मैं तु-
 मारो एकवर्षसूधि सत्संग करूंगो श्रीगुसाईजीनें आज्ञा
 करि है ॥ तब श्यामदासनें कहि घेरे परदेश जानोहैं तब
 लालदासनें कही मैहूँ तुमारे संग तुमारी टेहेल करतो च-
 लंगो तब वे श्यामदास चले लालदास विनके संग चले
 रस्तामें एक गाम आयो वा गाममें एक वैष्णवके घर भं-
 डाण हतो वानें वाई दिन पांचसे मनुष्य जिमायवेको
 विचार कन्यो हतो सो विननें श्यामदास तथा लालदा-
 सकुं न्योतो दियो तब दोनो जने प्रसाद लेवे गये उहां
 जायके बैठे सो श्यामदासको पातलमें सब कीडाकीडासे
 दीसे तब श्यामदासकुं श्रीठाकुरजीनें ऐसी जताई ये द्रव्य
 कन्याविक्रयकोहै सो मैं कोईदिन अंगिकार करूं नहिंहुं
 और याहीते ये सामग्री में नहिं अरोग्योहुं यातें तुम प्र-
 साद मतलीजो तब श्यामदासनें प्रसाद लेवेकि नहिं करि
 तब सब वैष्णव श्यामदासकुं समझावे लगे श्यामदासतो
 उठके चले गये सो वा गाममेंसुं दूसरे गाम चले गये और
 लालदासतो उहां बैठे रहे मनमें ये विचार कियो जो
 श्यामदास स्यानो वैष्णव नहिंहै वैष्णवनको कद्यो नहिं

माने है ऐसे समझके लालदास प्रसाद लेवे बैठे प्रसाद लेके श्यामदासके पास गये वादिनतेँ श्यामदास विनसों कछ्छ बोलते नहिँहते पातलधरदेते ऐसे करते करते एकवर्ष भयो तव श्रीगोकुल गये तव लालदासनेँ श्रीगुसाँईजीसों वीनती करी जो श्यामदास कछ्छ समझे नहिँहै पाँचसे वैष्णवनको कछ्छो न मान्यो महाप्रसाद न लियो तव श्रीगुसाँईजीनेँ आज्ञा करि जो तुमने हमारी आज्ञा और वैष्णवकि आज्ञा मानि नहिँ ॥ तुमकुं कछ्छो हतो जो तुम श्यामदासको सत्संग करौ जव तुमनेँ पाँचसे वैष्णवनके कहे सों प्रसाद क्यों लियो वह कन्याविक्रयको द्रव्य हतो श्रीठाकुरजीनेँ नहिँ अरोग्यो हतो जासुं तुमनेँ प्रसाद लियो अबतो दो वर्ष पर्यंत श्यामदासकी टेहेल करोगे तव श्रीठाकुरजी प्रसन्न होवेंगे तव वे लालदास श्रीगुसाँईजीकी आज्ञा लैके श्यामदासजीकी टेहेल करन लगें सो वे श्यामदास श्रीगुसाँईजीके ऐसे कृपापात्र हते जिनकुं श्रीठाकुरजीनेँ ऐसी जताई सो कन्याविक्रयके द्रव्यनेँ शुभकार्य होवै सो व्यर्थ जाय ॥ वार्ता संपूर्णा ॥ वैष्णव ॥ ६७ ॥

॥ श्रीगुसाँईजीके सेवक एक वैष्णवकी बेटीकी वार्ता ॥ सो वैष्णवकीबेटीको विवाह श्रीरामचंद्र उपासीके इहां भयो हतो वे बाई बालपनेसुं श्रीगुसाँईजीकी सेवक भई हती और भगवत्सेवापै तत्पर भई और श्रीठाकुरजी पधरायके सेवा करन लगी और बालपनेसुं भगवद्धर्मनको आचरण करने लागी श्रीमद्भागवतमें कहाँहै ॥ श्लोक ॥ कौमारआचरेत्प्राज्ञोधर्मान्भागवता-

निह ॥ याको अर्थ प्राज्ञजेबुद्धिमानहैं सो बालअवस्थासुं भगवद्धर्मनको आचरण करें ऐसे वा वैष्णवकी बेटी अनन्य श्रीकृष्णचंद्रकी भक्त हती सो वे बाई जब वाकेपतीके घर गई जब वाको पति श्रीरामचंद्रजीको उपासी हतो सो देखके वह बाई वाके पतिसुं भाषण करती नहीं एक दिन वाके पतीनें पूंछी जो तुमारे श्रीकृष्णचंद्रकहा करतेहैं वा बाईने कही जो बाललीला और दान लीला और रासलीला और चौर लीला मानलीला जन्मलीला वनलीला विहारलीला सबलीला जितनीहै सो एककालावच्छिन्न करतेहैं जब वाके पतिनें कही जो हमारे श्रीरामचंद्रजी राजलीला करतेहैं ऐसे करते नित्य झगडो विन दोउनको चलतो सो श्रीठाकुरजी नित्य आयके विनको झगडो चुकावते और कहते सर्वत्र मैं हूं तुम मेरेमें अभेद जानो मेरेमें भेद नहींहैं वा स्वरूपमें वा स्त्रीकुं श्रीकृष्णचंद्रजी दीखते और वा पुरुषकुं श्रीरामचंद्रजी दीखते जब वे स्त्रीपुरुषनको नित्य ऐसे करते आखोजन्म झगडत गयो और नित्य श्रीठाकुरजी झगडा चुकावतरहे जन्मसूधी विनकुं संसार व्यवहारयाद आयो नहीं सो वे बाई वैष्णवकी बेटी श्रीगुसांईजीकी ऐसी कृपापात्र भगवदीय हती ॥ वार्ता संपूर्ण ॥ वैष्णव ॥ ६८ ॥ ❀ ॥ ॥ ॥ ॥ ॥ ॥

श्रीगुसांईजीके सेवक आठ वैष्णव हते ति०
सो वे आठजने एकगाममें रहते हते सो वे श्रीगोकुल श्रीगुसांईजीके दर्शनकुं आये सो सातजनेनके पास द्रव्य हतो और एक दुर्वल हतो वाके पास कछु भेट कर-

वेकां श्रीफल नहीं हतो सो सात जनेननें जब भेटकरी
 और एक वैष्णव जो दुर्बल हतो वाने कछु भेट नकरी वाके
 पास एक सेरभर चोखा हते सो वे चोखा वा वैष्णवनें
 छिपाय राखे हते जो कोईकुं खबर न पडेगी जब श्रीनवनी-
 तप्रियाजीके भंडारमें धर देउंगो ये समझके वाने छिपाय
 राखे हते जब सवने भेट करी तव वो वैष्णव सरमायके
 बेटरह्यो जब वाकुं श्रीगुसाईंजीनें आज्ञा करी तेनें चोखा
 छिपाय राख्येहे सो लावो ॥ जब श्रीगुसाईंजीनें चोखा
 श्रीगुखसों वा वैष्णवके पासतें मागलीये जैसे श्रीठाकुर-
 जीनें गुदामाके पास तंदुल मांगे हते जो वे चोखा अर्ध-
 तो श्रीनाथजीके भंडारमें पठाये और अर्ध तो श्रीनवनी-
 तप्रियाजीके भंडारमें पठाये ॥ प्रसंग ॥ १ ॥ फेर एकदिन
 वे आठ वैष्णव गोपाल पुरमें श्रीनाथजीके दर्शन करवेकुं
 आये जब वे सात जने तो आछी जगामें उतरे और वे
 दुर्बल वैष्णव तो जहां तहां पडरह्यो और कछु खायवेकुं
 तथा ओढवेकुं वाके पास हतो नहीं सो भूखे पड रह्यो ॥
 सात जनाने वाकी खबर काढी नहीं जब श्रीनाथजी
 मध्य रातकुं शय्या भोगको लडुवा और ओढवेकी सु-
 फेती लेके वा वैष्णवकुं दीनी और कही जो श्रीगुसाईंजीनें
 मोकुं तेरे पास पठायोहे वा वैष्णवनें श्रीनाथजीकुं पेहे-
 चाने नहीं जब सवारो भयो तव लोगननें श्रीनाथजीकी
 सुफेती वा वैष्णवकुं ओढी देखी तव श्रीगुसाईंजीकुं लो-
 गननें कही जो ये आपके घरसुं श्रीनाथजीके वस्त्र कैसे
 ले गयोहे जब श्रीगुसाईंजीनें मनमें ऐसी जानी जो श्री-

(१४८) दोसौबावन वैष्णवकी वार्ता.

नाथजीनें दीयेहें फिर मंगलाके सभें श्रीनाथजीनें श्रीगु-
साईजीसुं आज्ञा करी जो ये सात जणातो याकी खबर
राखें नहींहें परंतु मेरे वैष्णवकुं दुःख पडे सो मैं कैसे स-
हीसकुं ये सुनके श्रीगुसाईजीनें बिन सातजनानकुं बुला-
यके कही जो तुम एकएकजना वार प्रमाणें याकी टहेल
करौ श्रीनाथजी तुमारी सेवा मानेंगे और जादिन श्री-
नाथजीकी सेवाको काम होवै तोहूं तुमारे यांकी टहेल
छोडनी नहीं श्रीनाथजीकी सेवासुं शतगुणी गुरूकी सेवा
विशेषहै गुरूकी सेवासुं सतगुणी वैष्णवकी सेवा विशेषहै
परंतु वैष्णव निर्लोभी निष्कपटी और अन्याश्रय रहित॥
पुष्टिमार्गकी रीती बिना दूसरी रीती न जाणे और लोग-
नकुं अपनी वैष्णवता न जनावे और पुष्टिमार्गकी रीतीसें
कुशल होवै ऐसे वैष्णवनकी सेवा सर्वतें अधिक है यासुं
अधिकी कछु नहींहै सो तुम सात जना याकी टहेलमें
तत्पर रहो ॥ प्रसंग ॥ २ ॥ फेर एकदिन वे आठ वैष्णव
श्रीगोकुल गये ॥ और नित्य उहां दर्शन करते और नित्य
श्रीगुसाईजीके सुखसुं कथा सुनते एकदिन सब वैष्णव
आये और वे दुर्बल वैष्णव आयो नहीं तब श्रीगुसाईजी
पुस्तक खोलके विराजे रहै तब वैष्णवननें बीनती करी
आप कथा वांचो तब श्रीगुसाईजीनें आज्ञा करी जिनके
लीये कथारस श्रीमहाप्रभुजीनें प्रकट क्योहें वे आवेंगे
जब बांचेंगे जब वे दुर्बल वैष्णव आयो तब कथाको आ-
रंभ श्रीगुसाईजीनें क्यो जब वाहीसमय एक दब्य पात्र
बैठो हतो वाने कही जो येतो मजूर जैसो है यामें कहाहै

जब श्रीगुसाईजीने कही तुमने जो धन एकठो कऱ्यो है सो सब इहां छोडजाओगे और याने जो भगवद्रस और भगवद्रुणालुवाद एकठो कऱ्यो है सो ये संग लेजायगो जासुं मजूर ये भये के तुम भये ये सुनके वो द्रव्यपात्र बहुत लजायो और सब धंदो छोडके वा दुर्वल वैष्णवको सत्संग करन लग्यो सो वह दुर्वल वैष्णव ऐसो कृपापात्र हतो और वे सात वैष्णव श्रीगुसाईजीकी आज्ञा तें जन्म पर्यंत वाकी टहेलमें लगे रहते सो वे आठ वैष्णव ऐंसे कृपापात्र भगवदीय हते ॥ वार्ता संपूर्ण वै० ॥ ६९ ॥ ❀ ॥

॥ श्रीगुसाईजीके सेवक तीन तूवावाले वैष्णव ० ॥

सो वे वैष्णव विरक्तहते सो एकतूवा खासाको और एक सेवकीको और एक बहारकी ऐंसे तीन तूवा राखते हते और जा गाममें जाते तहां भगवदिच्छासुं निर्वाह करते एक गाममें गये जहां मेह बहुत बरस्यो कछु रसोईकी उपाय बन्यो नहीं जब तीन दिन सूधी भूखे रहे चौथे दिन बरसात बंद भयो सो वे वैष्णव तलावपें नहायवे गये तब वा गामको ब्राह्मण वैष्णव नहातो हतो सो वा विरक्त वैष्णवकुं वह ब्राह्मण वैष्णव अपने घर ले गयो आछी रीतीसुं वाकी टहेल करी वो ब्राह्मण वैष्णव ऐंसे समझ्योके मेरे घर साक्षात् भगवान पधारेहै और तीन दिन सूधी विनकुं राख्यो महा प्रसाद लेवायो और वा विरक्त वैष्णवके हृदयमें सदा भगवदआवेश रहतो हतो सो वे प्रसन्न भये और भगवद आवेशतें बोलें जो कछु माग जो तुमारो मनोरथ होयगो सब पूरण होयगो तब वह ब्राह्मण

वैष्णव हाथ जोड़के बोल्यो जो मेरे तो कछु मनोरथ नहीं है परंतु या गामको राजा बहुत धर्म वालोहै और ब्राह्मणकी भक्ती वा राजाकुं बहुतहै ब्राह्मणकी रक्षा आछी भांतीसुं करेहैं साठवर्षको भयोहैं वाकुं पुत्र नहींहै सो होवै तो बहुत आछो ॥ ये सुनके वो विरक्तवैष्णव भगवद आवेशसोंभरे हते और भगवद इच्छासुं बोलेजो राजाके चार बेटा होवेंगे और राजावैष्णव होयगो तब ऐसे कहके वैष्णव गये फिर वह ब्राह्मणवैष्णव राजाके पास गयो और जायके आशीर्वाद दियो तब राजानें वा ब्राह्मणकुं आदर करके बैठायो और वीनती करी आप जैसेनको आवनो बहें भाग्यनतें होवैहै और हम जैसे गृहस्थ दीनचित्त वालेनकुं आपबिना कौन पावन करे हम आपके दर्शनमात्रसुं पवित्र भयेहैं परंतु आपके आयवेको कारण कहो ये बचन राजाके सुनके वह ब्राह्मण वा वैष्णवको बचन स्मरण करके और राजाकी भक्ती देखके बहुत प्रसन्न भयो और कहवे लग्यो राजा मेरे घर एक परम भगवदीय आयो हतो सो वह वैष्णव कहिगयोहै जो राजाके चार बेटा होयगि जब राजानें कही जो ब्राह्मण तुम सुनो मैंने बेटाके लीयें बहुत उपाय कियेहैं सो तुम सुनो या गाममें एक विश्वनाथ ब्राह्मण रहेहै वा ब्राह्मणकुं महादेवजी दर्शन देवेंहैं और महादेवजी संपूर्ण कृपा वा ब्राह्मण ऊपर राखेहैं जो वा ब्राह्मणनें मोकुं यज्ञ करवेकी कही और जब वा ब्राह्मणके कहेसुं मैंने चार बखत महारुद्र यज्ञ कय्यो तोहुं मेरे पुत्र न भयो फेर वा विश्वनाथ-

ब्राह्मणनें श्रीमहादेवजीसों पूंछी जो या राजाके पुत्र क्युं नहीं होवेंहें मैंने चार वार महारुद्र यज्ञ करायो है तोइं याके पुत्र नहीं भयो तब महादेवजीनें कही मैं श्रीठाकुरजीसुं वीनती करुंगो फेर महादेवजी वैकुंठमें जायके श्रीठाकुरजीसों प्रणाम पूर्वक वीनती करी जब श्रीठाकुरजीनें कही जो या राजाके सात जन्म पर्यंत पुत्र नहीं लिख्योहै तब ये मुनके श्रीमहादेवजीनें वा ब्राह्मणकुं कही जो तुं कछु प्रयत्न मति कर और हठहं न कर वा राजाके कर्ममें पुत्र नहीं लिख्योहै जब वह ब्राह्मण बैठरह्यो वह ब्राह्मण मोसों ऐंसी बोलगयो और तुम कहोहो चारपुत्र होवेंगे ये बात कैसे बनेगी तब वह वैष्णवब्राह्मण बोल्यो जो यामें कछु खर्च नहीं लगेहै और कछु मेरे चहीयेइं नहीं मैंतो तुमकुं यातें कहेवे आयोइं जो और लोग कहेंगे हमनें वेटा दियेहें सो तुम और कोईको कह्यो मानियो मति ॥ और मेरे कहेको विश्वास राखो ॥ ये कहेके वे वैष्णवब्राह्मण अपनें घर गयो और शुद्धचित्तसुं भगवत्सेवा करन लग्यो फेर भगवदिच्छातें वा राजाकी चार स्त्रीनकुं गर्भ रह्यो और दसमहिनावीते पीछे राजाके चार वेटा भये जब राजानें वा वैष्णव ब्राह्मणकुं बुलायके कही जो तुम कोनसे धर्मप्रमाणें चलोहो और कोनदेवकी उपासना करोहो सो कृपाकरके कही और जो वैष्णव तुमकुं मेरे पुत्र होएंगे ऐंसी आशीर्वाद दियो हतो सो वैष्णव कहाहै और वाकुं और तुमकुं कहा चहीयेहै सो कही जब वा ब्राह्मण वैष्णवनें कही जो हमकुं तो कछु नहीं चहिये और वे वै-

षण्व हमारो गुरुभाईहै और मेरे गुरुनके पासहैं और
 विरक्त दशमें हैं ॥ वाकुं तो कछु अपेक्षा नहींहै और इहां
 बुलायसुं वे आवेंगे नहीं जब राजानें कही जो मोकुं तु-
 मारे गुरुके दर्शन कराओ जब वा ब्राह्मणवैष्णवनें श्रीगु-
 साईंजीकुं वीनती पत्र लिख्यो फेर श्रीगुसाईंजी कृपाकरके
 श्रीगोकुलतें पधारे और वा राजाकुं दर्शन दिये और वा
 राजाकुं साक्षात् पूर्णपुरुषोत्तमके दर्शन भये। और वे राजा
 श्रीगुसाईंजीको सेवक भयो और अपने सर्व परकर और
 कुटुंब सबकुं श्रीगुसाईंजीके सेवक कराये और श्रीठाकुर-
 जी श्रीमदनमोहनजी पधरायके सेवा करन लग्यो और
 श्रीगुसाईंजी फेर श्रीगोकुल पधारे फेर एकदिन वा विश्व-
 नाथब्राह्मणनें महादेवजीसों वीनती करी जो तुमनें कही
 हती जो या राजाके सात जन्म सूची पुत्र नहीं होयगी
 सो चार पुत्र कैसे भये तब श्रीमहादेवजीनें जायके श्री-
 ठाकुरजीकुं कही जब श्रीठाकुरजीनें आज्ञा करी मेरे जो
 अनन्य भक्तहै विनके मैं अधीनहूँ और वे चाहेसो कर-
 सकैं और जिननें मोकुं तनमन प्राण समर्पण कियोहै
 वीनकुं कोन सो अर्थ बाकी रह जायहै वे चाहेतो मोकुंहुं
 जन्म लेनो पडे और पुत्र दें यामें कहा आश्चर्य है ये
 कछु बडो आश्चर्य नहींहै जासुं ये शंका तुम करौ मति
 वैष्णवनको कियो वृथा नहींहोवेहें वैष्णव त्रिगुणातीतहैं
 और कालके वश नहींहैं और कोईके वश नहींहैं जासुं
 तुम शंका छोडके जाओ तब महादेवजीनें वा विश्वनाथ-
 ब्राह्मणकुं कही जो वैष्णव त्रिलोकीकुं पवित्र करे हैं और

श्रीठाकुरजी विनके पाछें फिरेंहें जैसे गौ पीछें बत्स फिरेंहें
 ऐसे वैष्णवनके लीयें श्रीठाकुरजी अनेक प्रकारके अवतार
 लेनेहें वैष्णव जैसे इच्छा आवै ऐसे करेंहें जिनकुं भगव-
 चरणारविंदको दृढ आश्रय है सो कहानहिं करसकेंगे
 श्रीभागवतमें कह्यो है ॥ श्लोक ॥ यत्पादपंकजपरागनिषे
 वत्सायोगप्रभावविधुताखिलकर्मबंधा ॥ स्वैरंचरतिमुन
 योपिननह्यमाना इति ॥ वे वैष्णव स्वतंत्र आचरण करेंहें
 विनके ऊपर कोईको द्रुकम नहींहै जीत्योहै काम क्रोध
 लोभ मोह मद मत्सर जिननें ऐसे वैष्णव सर्व करण समर्थ
 हैं ये मुनके विश्वनाथ ब्राह्मणनें महादेवजीसों कही मोकुं
 वैष्णव करौ तव महादेवजीनें कही जो वा ब्राह्मण वैष्णव
 जिननें राजाकुं वैष्णव क-योहै विनके पास तुम जाओ
 और हमारो नाम देके कहो तो वे तुमकुं वैष्णव करेंगे
 फेर विश्वनाथ वा ब्राह्मण वैष्णवके घर गयो जायके वा
 ब्राह्मण वैष्णवकुं सब समाचार कहे तव वा ब्राह्मण वै-
 ष्णवनें विश्वनाथ ब्राह्मणकुं आदर करके बैठायो और
 श्रीठाकुरजीके दर्शन करवाये और महाप्रसाद लेवायो
 फेर पत्र लिखके विश्वनाथ ब्राह्मणकुं श्रीगोकुलपठायो
 फेर विश्वनाथ ब्राह्मण श्रीगोकुल जायके श्रीगुसांईजीको
 सेवक भयो सो वे विरक्त वैष्णव तीनर्त्वावाले ऐसे भग-
 वदीय हते जिनकी कृपातें वा राजाको सब देश वैष्णव
 भयो ॥ वार्ता संपूर्ण ॥ वैष्णव ॥ ७० ॥ * ॥ ॥ ॥
 श्रीगुसांईजीकी सेवक एक ब्राह्मणीकी वार्ता ॥
 वा बाई वैष्णव जा गाममें रहेती हती वा गाममें एक म-

हादेवजीको पूजारी रहेतो हतो सो शिवको निर्माल्य खातो हतो शिवनिर्माल्य खायवेको दोष पद्मपुराणमें लिख्योहै पार्वतीजीनें शिवनिर्माल्य खावेवालानकुं शाप दियो है सो वे महादेवको पूजारीकी देह छूटी सो वाकुं एक वृक्षनीचे अग्निसंस्कार करवे गये सो वाको धूवां आकाशमें गयो एक देवताको विमान जातो हतो ताकुं धूवांको स्पर्श भयो सो वे देवता विमान सहित श्रुमिपर आयके परधो तब वाकुं देखके बहोत लोग एकठे भये सो वा गाममें बढी सोर भयो तब गामको राजा देखवेको आयो सो वे देवता कहेनलयो जिननें अश्वमेध यज्ञ कन्यो होय सो वाको फल देवेतो विमान सहित स्वर्गमें जाऊं जब राजानें सब पंडित एकठे करै कोईकुं कछु उपाय सूझो नहीं सो वे पंडित राजाके कहेते उपाय करन लगे कोई पाठ करे कोई हवन करे कोई वेद पाठ करे परंतु विमान तो कोई उपायसुं स्वर्गमें जाय नहीं जब वे बाई जल भरवे गई हती सो वा ब्राह्मणीनें पूछयो ये काहेकी भीडहै जब सब बात लोगननें कही जब वे ब्राह्मणी गागर धरके जायके कही जो तुम सब दूर होय जाओ मैं विमानकुं स्वर्गमें पठाउंगी जब सब लोग सरक गये वा ब्राह्मणीनें हाथमें जल लैके कही जो मैं जलकी गागर लाडुंहुं सो एक पैडकी फल तुमकुं देउंहुं ऐसे कहेके वा विमानपर जल छांटयो सो वे देवता जल पडत मात्र वा ब्राह्मणीकी स्तुती करते करते विमान सहित स्वर्गमें गये ये बात देखके वे राजा और सब गाम वे ब्राह्मणीके पां-

वन परे और कहेन लगे जो हमकुं तीन दिन मेहेनत करते भईहैं और हमने तीन दिन सूधी अन्न जल लियो नहींहै और बहोत उपाय कीयेहै परंतु कछु भयो नहींहै और तुमनें सहज विमान स्वर्गमें पठाय दियो वाको कारण कहा जब वे वाई बोली ॥ श्लोक ॥ विप्राह्विषड्गुण-युतादरविंदनाभपादारविंदविमुखात्श्वपचंवरिष्ठं ॥ मन्ये-तदर्पितमनोवचनेहितार्थप्राणंपुनातिसकुलंनतुभूरिमानः ॥ वा ब्राह्मणीनें ये श्लोक कह्यो याको अर्थ—कोई ब्राह्मणहै और द्वादशगुण सहितहै और पद्मनाभजो श्रीठा-डुरजीके चरण कमलतें वहिसुखहै ऐसे ब्राह्मणसुं भगवानकी भक्तिकरनार जो चांडाल सो श्रेष्ठहै कैसेहो जो चांडाल जानें मन और वाणी भगवानके अर्पण करीहै और भगवानके विरहसुं आतुरहै मन जाको ऐसो जो चांडाल सो अपनी कुल सहित प्राणनकुं पवित्र करेहैं और वे ब्राह्मणहै सो प्राणपवित्र न करे सो कुलकुं कहा करेगो ये बात सुनके वे राजा और पंडित सब वे ब्राह्म-णीके घरमें आये और आयके ब्राह्मणीकुं कही जो तूं कछु गामले और खर्चले और हमकुं पवित्र कर तव वा ब्राह्मणीनें सुनके कही जो मैं तो निरपेक्षहूं और मोकुं कछु चाहिये नहीं और तुमारे पवित्र होवेको विचार होवेतो श्रीगुसाईंजीके शरण जाओ जब वा राजानें वा ब्राह्मणीके नामको बिनती पत्र लिखके श्रीगोकुलपठायो और श्रीगु-साईंजीकुं वा गाममें पधराये और सब सेवक भये तब वा राजाकुं श्रीगुसाईंजीके दर्शन साक्षात् पूर्णपुरुषोत्तमके भये

(१५६) दोसौवावन वैष्णवकी वार्ता.

जब वे राजा श्रीगुसाईंजीके आगे वा ब्राह्मणीकी बहोत ब-
 ढाई करी और भगवद सेवा माथेपधरायके सेवा करन ल-
 ग्यो जब वा राजाने वीनती करी जो महाराजभगवदस्वरू-
 पमें प्रेम और आसक्ती और व्यसन कैसे होवै जब श्री-
 गुसाईंजीने वा राजाकुं श्रीनवनीतप्रियार्जिके स्वरूपको
 ज्ञान करायो और भक्तिवर्धिनी ग्रंथ पढायो सो वे बाई
 ब्राह्मणी ऐसी कृपापात्र हती जाके संगते सब गामवैष्णव
 भयो ॥ वार्ता संपूर्ण ॥ वैष्णव ॥ ७१ ॥ ❀ ॥ ॥
 ॥ श्रीगुसाईंजीके सेवक एक सेठको लडको हतो
 तिनकी वार्ता ॥ जब श्रीगुसाईंजी परदेश पधारे तब वा
 लडकाने श्रीगुसाईंजीके श्रीमुखते कथा सुनी सो दश-
 मस्कंधके द्वादशअध्यायकी श्रीसुबोधिनीजी सुनी ॥
 ॥ सो श्लोक ॥ कृष्णः कमलपत्राक्षः पुण्यश्रव
 णकीर्तनः ॥ स्तूयमानोऽनुगैर्गोपैः साग्रजो ब्रजमाव्रजत
 ॥ १ ॥ या श्लोककी सुबोधनीमें नित्य श्रीठाकुरजी गौ-
 चारण करके ब्रजमें पधारतेहै ये लीला नित्य है ये बात
 वा लडकाने सुनी और श्रीगुसाईंजीसुं वीनती करी जो
 महाराज ये लीला अबी है के नहीं तब श्रीगुसाईंजीने
 आज्ञा करी ये लीला नित्य है और अखंड है और सर्वत्र
 व्यापक है ये बात सुनके वो लरका ब्रजमें गयो और स्या-
 मढाकके पास जायके वैठो सांझ पढी गौ आवैकी विरीयां
 भई जब वाकुं दर्शन न भये तब वाकुं बहोत ताप भयो
 जो सांझपढी तोहूँ ठाकुरजी पधारे नहीं तब वाको विप्र-
 योग देखके श्रीनाथजीने दर्शन दिये और सब गोपवा-

लक संग वैष्णुनाद करते गायनके संग श्रीनाथजी पधारै
 सो देखके वा लडकाकुं देहदशा झूल गई और नयो देह
 धरके वा गोपनके लडकानके संग नित्य लीलामें प्रवेश
 कियो सो वैष्णवको लडका श्रीगुसांईजीके ऐसे कृपापात्र
 हते जिनकुं नित्य लीलाके दर्शनदेके श्रीनाथजीने अपनी
 लीलामें अंगिकार कियो ॥ वार्ता संपूर्ण ॥ वैष्णव ॥ ७२ ॥
 श्रीगुसांईजीके सेवक आसकरणराजाकी वा ०
 सो वे आसकरणजी नरवरगढमें रहते विनकुं रागसुन-
 वेको व्यसन बहुत हतो सो गान सुनायदेके लायें देशदे-
 शके कलावत गवैया उहां आवते हते और सबकुं आद-
 रपूर्वक सन्मान करते हते और रागकी परीक्षा बहुत
 आछी हती ये बात तानसेनजीने सुनी तब तानसेनजी
 आसकरनजीके पास आये सो आसकरनजीके पास वि-
 ष्णुपद गायो सो पद ॥ राग सारंग ॥ कुंवरवैठे प्यारीके-
 संग अंगअंगभरेरंग बलबलवल त्रिभंगी युवतिन सुख-
 दाई ॥ ललितगती विलासहास दंपतिमन अतिउल्हास
 विकसित कच सुमनवास स्फुटत कुसुमनिकर तैसीहै
 शरद रेन जुन्हाई ॥ १ ॥ नवनिर्कृज मधुपगुंज कोकि
 लकल कृजत पुंजसीतल सुंगधमंद वहतपवन अति-
 सुहाई ॥ गोविंदप्रसुरसजोरिनवकिशोरनवकिशोरी नि-
 रखमदनफोज मोरीछैलछबीले नवलकुंवरब्रजवृपकुलम-
 निराई ॥ २ ॥ ये पद सुनके राजा आसकरन बहुत प्रसन्न
 भये और तानसेनसुं कही जो मैंने बहुत पद सुनेहैं परंतु
 ऐसो विष्णुपद कोईदिन सुन्यो नहीं है सो तुमने ऐसे पद

कहाते सीखेहैं सो हमकुं शिखाओ जब तानसेनजी बोले श्रीगोकुलमें श्रीविठ्ठलनाथजी श्रीगुसाईंजीहैं विनकेसेवक गोविंदस्वामीहैं विननें ऐसे सहस्रावधी पद कियेहैं परंतु श्रीगुसाईंजीके सेवक विनावे औरकुं शिखावते नाहीहैं मैहूं विनके संगतें श्रीगुसाईंजीको सेवक भयोहूं जायुं मैहूं कोईकुं शिखावत नाही हूं जब राजा आसकरननें कही तुमकुं जो गाम अथवा द्रव्य चहीये सो लेवो परंतु ऐसे पद सिखावो तब तानसेनजीनें कही जो मैं तुमारे पास द्रव्यकेलीये नहीं आयोहूं मैनें ऐसी सुनीहै जो राजा आसकरन गुणकी परीक्षाबहुत आछी करेंहैं सो बात देखवेकी लीये आयोहूं जैसी सुनीहती तैसी देखी तो सही और कछु मेरे काम नहींहै और कछु मोकुं चहिये नहींहै ये बात सुनके राजा आसकरननें कही मैहूं श्रीगुसाईंजीको सेवक होउंगो और गोविंदस्वामीकुं मिलंगो तुम दश पंदरे दिन इहां रहौ और कृपाकरके मोकुं संग लैचलो जब तानसेनजी उहां रहे और थोडे दिन पीछे राजा आसकरनजीकूं संग लैके श्रीगोकुल गये जब श्रीगुसाईंजी ठुकरानी घाटपर संध्या करते हते सो राजा आसकरनजीकुं साक्षात् पूर्णपुरुषोत्तम कोटि कंदर्पलावण्य ऐसे स्वरूपके दर्शन भये जब श्रीगुसाईंजीकुं साष्टांग दंडवत करके ठाडे रहे जब श्रीगुसाईंजीनें आज्ञा करी आसकरनजी बोहोत दिन भये काहां सूधी श्रीठाकुरजी तुमारि बाट देखेंगे तब आसकरननें कही श्रीठाकुरजी आप भटकवेकी पार लावेंगे तो कछु ढील

नहिं लगेगी तब श्रीगुसांईजीनें कही न्हायके मंदिरमें आवो जब आसकरनजी न्हाय आये जब श्रीगुसांईजीनें कृपा करके आसकरनजीकुं नाम निवेदन करवायो वाई समय गोविंदस्वामी श्रीनवनीतप्रियाजीके सन्निधान कीर्तन करते हते श्रावण मास हतो ॥ सो पद ॥ राग मल्हार ॥ आईजु स्याम जलदघटा ओल्हर चहुंदिशतें घनघोर ॥ रंपतिपरस्परबाहीजोटीविरहतकुमुमवीनतकालिंदीतटा ॥ १ ॥ बडीबडीबूंदनवरपनलाग्योतेसीलहेकतबीजलटा ॥ गोविंदप्रभुपीयप्यारीउठचलेओढेलापटदोरलियेजाय - बंसीवटा ॥ २ ॥ येपद गोविंदस्वामी श्रीनवनीतप्रियाजीके संनिधान गावते हते ॥ सो राजा आसकरननें सुन्यो और तानसेनसों कही जो ये बहूत सुंदर गान करेहें यामें मेरो मन बहोत लगगयो है येही गोविंदस्वामी होयंगे और तब तानसेननें कही ये गोविंदस्वामीहिं जब राजा आसकरनजी नित्य गोविंदस्वामीके पास जाते रमणरेतीमेंहुं संग फिन्यो करते ॥ प्रसंग ॥ १ ॥ फेर राजा आसकरननें श्रीगुसांईजीसुं बीनती करी जो महाराज अब मेरे कहा करनो जब श्रीगुसांईजीनें ये आज्ञा करी भगवत्सेवा करौ ऐसे कहेके श्रीमदनमोहनजीको स्वरूप पथराय दियो जब राजा आसकरननें बीनती करी जो मैं भगवत्सेवाकी विधी समझत नहींहुं आप कृपा करके मोकुं समझावें जब श्रीगुसांईजीनें सेवाकी रीती कही सवारे उठके माला और यज्ञोपवीत संभारनो मालादास्य धर्महै जनेउ वैदिकधर्महै जनेउको अधिकार नहोवै तो मालामात्र

संभारनो और श्रीमहाप्रभुजीको और श्रीठाकुरजीको ध्यान करके नाम लेके दंडवत करके बाहेर आवनो फिर देह कृत्यकरके चरणाभूत लेके सूर्योदय पहले दातुन करनो तेल लमाय सुखशुद्ध्यर्थ बीडो खानो ॥ जादिन व्रत होवै तादिन न खानो स्नानकर श्रीयसुनाजीकी रज ले भगवत्पादाकृती तिलक करिये दश प्रकारके तिलक सकामहै भगवानके चरणकमलते मनुष्यकुं अंतरायपाडेहैं सो दशप्रकारके तिलक न करनै ॥ श्लोक ॥ वर्तुलतिर्यगच्छिद्रं ह्रस्वदीर्घतरंतनुम् ॥ वक्रं विरूपं वद्वाग्रं भिन्नमूलं पदच्युतं ॥ अर्थ ॥ वर्तुल (गोलतिलक) १ तिर्यक् (वांको) २ अछिद्र (चीन्याबिनाको) ३ ह्रस्व (वहोतछोटो) ४ दीर्घतरं (वहोतनासीकासुधीलांबो) ५ तनुं (वहोतपातलो) ६ वक्रं (आडो) ७ विरूपं (नीचेसुंसांकडोनेउपरसुंपहोलो) ८ वद्वाग्रं (उपरसुवांध्यो) ९ भिन्नमूलं (नीचेसुंदोय लकीर जुदी जुदी) ये जो दशप्रकारके तिलक हैं सो भगवानके चरणारविंदसुं दूर करेहैं सो ये दश तिलक छोडके ऊर्ध्वपुंड्र तिलक करनो पाछे पंचमहाभूत जो या देहमें है तिनकी भीतर शुद्धि और बाह्यशुद्धि करनी तब राजा आसकरनै पूछयो हे प्रभो पंचमहाभूतकी शुद्धीके प्रकार आप कहैं तब श्रीगुसांईजी हंसके प्रसन्न होयके कहने लगे जो छे मुद्रा करियतो पंचमहाभूतकी बाह्य शुद्धि होवै, सो सुनो पद्म धारणतें पृथ्वीकी शुद्धी और शंखधारणतें जलकी शुद्धी और चक्र धारणतें अग्नीकी शुद्धी और गदाधारणतें वायुकी शुद्धी और नाम मुद्रा-

धारणतें आकाशकी शुद्धी, और संप्रदाय मुद्राधारणतें भक्तीकी प्राप्ती होतहै अब पंचमहाभूतकी अम्यंतर शुद्धी सुनो रजचरणाभूततें पार्थवांशकी शुद्धी, और जलचरणाभूततें जलांशकी शुद्धी, और प्रसादी तुलसीतें अश्वयंश शुद्धी, और भगवदीयके संगतें वायवीयांश शुद्धी, और गुरुदर्शन तथा भगवद्दर्शनतें आकाशकी शुद्धी, या प्रकार पंचमहाभूतकी शुद्धी वाहेर और भीतर करके भगवत्सेवा करनी तब भगवतमंदिरके पास जायके दंडवत करके ये श्लोक बोलनो ॥ श्लोक ॥ नमोनमस्तेऽस्तृष-
भायसात्वतांविदूरकाष्ठायमुद्गःकुयोगिनाम् ॥ निरस्त-
साम्यातिशयेनराधसा स्वधामनिब्रह्मणिरंस्यतेनमः ॥
॥ १ ॥ ये श्लोक पढ़के मंदिरमें जानो तब तिष्ठि शारी वंटा बीडी उठायके प्रसादी पात्रमें ठलायके मांजके ठिकाणे धरके मंदिर सार्जन करनो ॥ और सृत्तिकाकी पृथ्वी होवै तो लीपनो और गच्ची वा पाषाणकी धरती होवै तो भीनो वस्त्र फेरके सूको वस्त्र फेरनो ॥ सिंहासन उठायके झटकके नित्य प्रमाणें विछावनो फेर शारी भरके सिंहासन पास तबकडीमें धरनी ॥ और मंगल भोगकी सामग्री सिंहासन पास ढाँक धरनी ॥ पीछे तीन बेर घंटा बजायके तब श्रीठाकुरजीकुं जगावनें ॥ और जगायवेकी विर्या जगावेके पद अथवा यथाधिकार पाठ करके जगायके सिंहासन पर पधरायके ऋतु अनुसार उढायके टेरा देनो ॥ फेर शय्या उठायके झटकके मंदिर वस्त्र करके फेर शय्याविछाईये ॥ और शय्याके कसना डोलतैलेके

प्रबोधिनी पर्यंत बांधने ॥ शीतकालमें नहीं बांधिये ॥ फेर आचमनकी झारी भरके मंगल योग सराईये ॥ तिथीमें आचमन कराय सुखवस्त्र करकेबीडा अरुगवायके मंगलआर्तीउतारिये ॥ पाछें एक परातमें पीढा विछायके वाके ऊपर वस्त्र विछाईये और हाथकुं सुहातो जल लेके श्रीठाकुरजीकुं स्नान कराईये ॥ और अंगवस्त्र कराईये ॥ और श्याम स्वरूप होवै तो न्हावाय पीछें फुलेल लगाईये ॥ फेर अंगवस्त्र करिये ॥ और गौर स्वरूप होवै तो स्नान पीछे फुलेल न लगाईये और अतर लगाईये ॥ पाछें शृंगार कराईये ॥ वस्त्र तथा आभूषण मेण शलाका कतरनी ये सब वस्तु पासे लै बैठीये शीतकाल होवै तो स्नानतें पहिले अंगीठी धरिये श्रीठाकुरजी बालकहैं यातें सूकोसेवा साखन मिश्री धरके शृंगार कराईये ऋतु प्रमाणे वस्त्र पहिराईये यथा रुची शृंगार कराईये ॥ उत्सवके दिन उत्सवके शृंगार कराईये पाछें राजभोग धरिये परंतु श्रीठाकुरजीकुं ऐसो समय देखके जगाईये ॥ जो मंगलापीछें शृंगार और शृंगार पीछें राजभोग धरवेकू ढील न लगे श्रीप्रभुनकू श्रम न होवै ॥ फेर राजा आसकरनजीनें पूंछी जो आपके इहांतो गोपीवल्लभभोग आवेहैं और ग्वाल बोलेहैं ग्वालके समय घेयामथके अरोगे हैं सो तो आपनें कही नहीं याको कारण कहा तब श्रीगुसाईंजीनें कृपा करके कब्यो जो गोपीवल्लभ और ग्वाल और संध्याभोग और संध्या-आरती और सांझके समयको ग्वाल वैष्णवनके घरमें नहीं होवै ये अधिकार हमारे कुलकोहै औरकुं नहींहैं

जब राजा आसकरननें वीनती करी हेमहाराज कृपानाथ आपनें मोकुं श्रीमदनमोहनजी पधरायदीयेपरंतु श्रीमदनमोहनजीके स्वरूपमें कौनसी लीला प्रकटहै सो कृपा करके कहें तब श्रीगुसाईजीनें ये सुनके कही जो श्रीमदनमोहनजीके स्वरूपमें फलप्रकर्णके प्रथम अध्यायकी लीला प्रगटहै और प्रकर्णकी लीला गुप्तहै जब श्रीमदनमोहनजीनें वेणुनाद कय्यो सो ब्रज भक्तनकुं आकर्षण कीये फेर ब्रजभक्त वेणुनाद सुनके जा कारजमें लगे हते सो कारज छोडके ब्रजभक्त तुरत गमन कीये जब श्रीठाकुरजीके पास गये तब श्रीठाकुरजी बोले ॥ सो श्लोक ॥ स्वागतं वीमहाभागाः प्रियं किं करवाणिवः ॥ ब्रजस्यानामयं कश्चिद्भूतागमनकारणं ॥ १ ॥ रजन्येषाघोररूपाघोरसत्त्व निषेविता ॥ प्रतियात ब्रजेनेहस्थेयस्त्रीभिः सुमध्यमः ॥ २ ॥ ये गमन वाक्य कहे सो सुनके ब्रजभक्तनकुं चिंता भई जासुं वाक्य ग्रहण न कीये, फेर सो चिंता आतुर होयके विनके नेत्रनमेंतें जल चलवे लग्यो फेर ब्रजभक्त श्रीठाकुरजीके वाक्य विचारे सो वाक्यनमेंसुं सुमध्यमा ऐसो पद निकस्यो और ये रात घोर रूप नहींहै ऐसे वचनको विचार कीये जब ब्रजभक्त अपने मनमें ऐसे समझे येतो व्यंग वाक्यहै फेर संपूर्ण श्रीअंगके दर्शन भये सो प्रसुनको स्वरूप गौर देख्यो जब ऐसो विचारे जो हमारो भाव देखके प्रसू मोहित भयेहै सो तन्मयता निश्चय भई जो प्रसुनको चित्त हमारेमेंहै ॥ नहीं होवै तो गौर कैसे होवै ॥ फेर चरणारविंदको दर्शन भयो सो चरणाविंद

साधन भक्ति रूपहै और पादुकाहैसो अंतराल हैं जैसे वाक्य व्यंगहैं जो वाक्य श्रीअंग सुखद होवैतो ब्रजभक्त ग्रहण करें ॥ नहींतो नकरें ॥ फेर देखेंतो दक्षिणचरणारविंदको अंगुलीको स्पर्शमात्र पादुकाजीको देख्यो जव दास्यभक्तीकी स्फूर्ती भई ॥ फेर फलरूप भक्ती जो श्रीसुख तिनके दर्शन भये सो फलरूप भक्तीके आगें चार प्रकारकी सुक्ती तुच्छहै ऐसे दर्शन भये ॥ स्वरूपसुक्तीकुं प्राप्त भई जो अलक सो फलरूप भक्ती जो सुखारविंद ताको आश्रय करेंहैं यातें स्वरूपसुक्ती करके कहा ॥ सो स्वरूपसुक्ती भक्तीके आगें तुच्छहै ॥ फेर सांख्ययोगरूपी जो कुंडल विनके दर्शन भये सो सामीप्य सुक्तीकुं प्राप्त हैं ॥ अतिनिकटहैं परंतु फलरूपभक्ती जो श्रीसुख ताको आश्रय कियो हैं ॥ यातें सामीप्य सुक्ति करके कहा ॥ सालोक्यसुक्तीमें अक्षरानंदको अनुभव है सो गंडस्थल युक्त जो अधराद्युतके आगें अन्य रस तुच्छहैं सो अक्षरानंदरस तुच्छ है सालोक्यसुक्तिकरके कहा ॥ और सायुज्यसुक्तिमें ब्रह्मानंदको अनुभव है ॥ वाक्य ॥ जलेनिमग्नजलपानवत् ॥ जैसे जलमें डूबके जल पीवनो ऐसो ब्रह्मानंदको अनुभव है सो हास्य सहित जो अवलोकन वामें जो भक्तिरस है वा भक्तीके आगें ब्रह्मानंदरसको अनुभव कहं कामको ॥ ऐसे भक्तिरसके आगें चतुर्विध जो सुक्ती ब्रजभक्तनकुं तुच्छ लगैहैं ये निश्चय भयो ॥ ॥ सो ॥ श्लोक ॥ वीक्ष्यालकावृतमुखंतवकुंडलश्रीगंडस्थलाधरमुधंहसितावलोकं ॥ दत्ताभयंचमुजदंडयुगंवि-

लोक्यवक्षःश्रियैकरमणंचभवामदास्यः ॥१॥ ऐसो दास्य
 रसतें प्राप्त भये जो ब्रजभक्तनके भाव तिनकुं देखके आप
 बहुत प्रसन्न भये यद्यपि आत्माराम हते तोहुँ विनको प्रेम
 देखके आपने रमण कियो ॥ वाक्य ॥ आत्मारामोप्यरीरम-
 त् ॥ ऐसो ब्रजभक्तनके भावतें श्यामस्वरूप हते सो गौरभ-
 ये या रीतीको श्रीमदनमोहनजीको स्वरूप राजा आसकर-
 ननें श्रीगुसांईजीके मुखतें मुनके श्रीमदनमोहनजीकुं
 पधरायके और तानसेनजीकुं संग लैके राजा आसकरन
 अपने देशमें आये और ब्रजभक्तनके भावसों सेवा करन
 लगे राजकाज सब दिवानकुं सोंपदीये और श्रीमदनमो-
 हनजीकी सेवा तथा कीर्तन करनलगे और जब अनव-
 सर होंवै तब राजा मानसीसेवा करे ऐसे करते करते व-
 होत दिन वीते ॥ प्रसंग ॥ २ ॥ फेर एकदिन राजा आस-
 करनके ऊपर दक्षिणको राजा चढ़ि आयो जब राजा
 आसकरनकुं खबर भई तब राजा आसकरन लडाई क-
 रवेकुं चले जब शत्रुकी सेनाकेपास आये तब वरसाद भ-
 यो सो राजा आसकरनकी सेनापर तो जलको वरसाद
 भयो और शत्रुनकी सेना पर पथ्थरकी सिलानको बर-
 सात भयो शत्रुनकी सेना मारीगई जब राजा आसकरन
 जीतके पाछें फिरे घोडापर असवारभये और मानसी-
 सेवा करनलगे फेर सब सेवा करी रसोई सिद्धकरी और
 भोग समर्प्यो सो कढीकी हांडी भोग धरवेकुं जाते हते
 इतनेमें घोडा कूद्यो जब राजा आसकरनको ध्यान से-
 वामेंसुं बहार निकस्यो और ऐसे मालूम पढयो जो क-

ढीकी हांडी भेरे हाथतें पडगई और कढी डुलाय गई सो
 बाहार देखतो सब वस्त्र कढीछुं भरगये जब दिवाननें पूं-
 छयो जो ये कहा जब आसकरनजीनें कही जो सोकुं क-
 ढी बहोत भावेहें याछुं हांडी भरके में कमरसों बांध राखी
 हती सो फूटगईहै ऐंसे कहेके सो बात गुमराखी फेर राजा
 आसकरननें मनमें ये विचार कियो जो तनुजा सेवा और
 वित्तजा सेवा ॥ मानसी सेवा सिद्धहोवेके लीयें करनी
 कहीहै ॥ अब मानसी सेवा श्रीगुसाईंजीकी कृपातें सिद्ध
 भईहै जब राज और घर कहाकामकोहै ये विचारके भ-
 तीजेको राज्य देदियो और श्रीठाकुरजी वस्त्रआसूषण सब
 तथा पात्र श्रीगुसाईंजीके इहां पठायदिये और आप श्री-
 गोकुलमें जायके रहे सब लीलके दर्शन साक्षात् होवै लगे
 जैसे लीलके दर्शन होवै तैसे पद करके गावन लगे ॥ प्र-
 संग ॥ ३ ॥ एकदिन राजा आसकरन न्हायवे जाते हते ॥
 सो श्रीठाकुरजीनें गुरली बजाई सो राजा आसकरनजी
 सुनके श्रीठाकुरजीकी आढी दौड गये उहां श्रीठाकुरजी
 ठाडेहै और अलौकिक सब लीलाहै और सब ब्रजभक्त
 आवेंहैं और हारीको खेल होवेंहैं ऐंसे दर्शन राजा आस-
 करनजीकुं भये तव राजा आसकरनजी देहदशा मूल
 गये और दर्शन करके धमार गायवे लगे ॥ सोधमार ॥
 यागोकुलकेचौहटे रंगराची ग्वाल ॥ मोहनखेलेफाग नै-
 नलेनेरी रंगराचीग्वाल ॥ येधमारमें जैसेदर्शनकरतगये
 तैसेगातेगये ऐंसे तीनदिनसूधी गायोकरे और कछु सुध
 न रही जब श्रीगुसाईंजीनें मनुष्यनमुं कही राजा आस-

करनजी तीनदिनसुं नहीं दीखेहैं सो कहाहै जब लोगननें कही जो तीनदिनसों रमणरेतीमें ठाढ़ेहैं जब श्रीगुसाईं-जीनें मनुष्य पठायके बुलाय लीये जब श्रीगुसाईंजीके मनुष्य विनकुं ले आये देखेंतो उन्मत्त जैसे होय गये हैं तब श्रीगुसाईंजीनें कही अब इनकुं लौकिक सुधि नाहीहैं भगवल्लीला साक्षात्कार होयगईहैं ये ब्रजमें जहां इनकी इच्छा होवै तहां ये फिरेंगे इनकुं कछु कहो मती ॥ प्रसंग ॥ ४ ॥ एकदिन राजा आसकरन सेनभोग आयहते जब जगमोहनमें बैठे हते सो ब्रजभक्त दूधको कटोरा हाथमें लेके यशोदाजीकुं कहैहै जो ये दूधबहुत उत्तमहै कपूर मि सरी मील्यो है तुम श्रीठाकुरजीकुं अरुगावो जब जशोदाजी दूधको कटोरा लेके श्रीठारजीकुं आरोगावै पधारे जब श्रीठाकुरजी सखामंडळीमे बीराजते हते जब जशोदाजी कहेवेलगे जो लाल तनक दूध पीवो तब ये सब दर्शन आसकरनजीकुं साक्षात् भये जब आसकरनजीनें यह पद गायो ॥ राग केदारी ॥ कीजेपान ललारेओटयोदूधला-ईहैजशोदामैया ॥ कनककटोराभरपीजिब्रजबाललाडले-तेरीवेनीवढेगीभैया ॥ १ ॥ ओट्योनीकोमधुरोअहृतोरु-चिसो करीलीजेकन्हैया ॥ आसकरनप्रभुमोहननागरपय-पीजेसुखदीजेप्रातकरोगी घैया ॥ २ ॥ जब श्रीयशोदाजी तथा रोहिणीजी श्रीठाकुरजी तथा श्रीबलदेवजीकुं सेन-भोगधच्यो और सब सखा सहित जेमन लगे तब ये दर्शनआसकरनजीकुं भये जब आसकरनजीनें येपद गायो ॥ रागकान्हरो ॥ वियारु करत है घनश्याम ॥ खुरमा-

खाजागुंजा मठरीपिस्तादाखबदाम ॥ १ ॥ दूधभातघृतसां-
 निथारभरि लेआईब्रजवाम ॥ आसकरनप्रभुमोहननाग-
 रअंगअंगअभिराम ॥ २ ॥ रागकेदारो ॥ मोहनलालवि-
 यारूकीजे ॥ व्यंजनमीठेखाटेखारेरुचिसौभाग जननी-
 पैलीजे ॥ १ ॥ मधुमेवापकवानमिठाई ताऊपरतातोपय-
 पीजे ॥ सखासहितमिलीजेमोरुचिसौ जूठिनआसकरन-
 कोदीजे ॥ २ ॥ येसुनके श्रीगुसांईजी बहुत प्रसन्न भये फेर
 श्रीगुसांईजीने ये विचार कियो जो प्रभु कैसे दयालहे
 आसकरनके ऊपर कैसे कृपा करहि जो लौकिकके रा-
 जानकुं राजके अंतमें नर्क मिलेहे और आसकरनकुं रा-
 जके अंतमें भगवत् लीलाके दर्शनभयेहे औरलीलाकी
 प्राप्तिहे होयगी ऐसे श्रीप्रभुनकी कृपा विचारके श्रीगुसां-
 ईजी बहुत प्रसन्न भये पाछे सेनसमयमें दर्शन राजा आ-
 सकरनने करे ता पाछे राजाआसकरनने श्रीठाकुरजीके
 नेत्रनमें नीद झमक रही है एसो देख्यो और एक सखी
 हाथजोडके श्रीठाकुरजीके आगेठाडीहोयके धीनती
 करे हे जो आपकुं नीद आय रहीहे सो पोढो ॥ येदर्शन
 लीलासहित राजा आसकरनकुं भये जब राजा आसक-
 रनने येपद गायो ॥ रागकेदारो ॥ पोढीये पिय कुंवरक-
 न्हाई ॥ युक्तिनवलविविधकुमुमावलिमेंअपनेकरसेजब-
 नाई ॥ १ ॥ नाहिनसखी समयकाहूकोग्वालमंडलीसब-
 वोरआई ॥ आसकरनप्रभुमोहननागराधाकोललितालेआई
 ॥ २ ॥ रागकेदारो ॥ तुमपोढोही सेजबनाउं ॥ चापूंचरन-
 रहुंपायनतर मधुरेंस्वरकेदारोगाउं ॥ १ ॥ सहेचरिचतुर-

सवेञ्चुरिआई दंपतिसुखनयननदरसाउं ॥ आसकरनप्र-
 भुमोहननागरयहसुखश्यामसदाहोपाउं ॥ २ ॥ रागकेदारो ॥
 पोठरहोघनश्यामबलैयालेहूं ॥ श्रमितभयेहोआजगोचा-
 रतघोपपरतहैधाम ॥ १ ॥ सीरीवियार झरोखनकेमगआ-
 वतअतिसीतलसुखधाम ॥ आसकरनप्रभुमोहननागरअं-
 गअंगअभिराम ॥ २ ॥ या रीतीसुं राजाआसकरनजीकुं
 जैसी जैसी लीलाके दर्शन होते सोईसोई पद गावते और
 श्रीगुसाईंजी इनके उपर सदैव प्रसन्न रहते और गोविंद-
 स्वामीके सतसंगते नित्य श्रीनाथजी आसकरनजीसों
 बातें करते और खेलते ॥ प्रसंग ॥ ५ ॥ सो एकदिन राजा
 आसकरन श्रीजी द्वार आये ॥ और श्रीनाथजीके दर्शन
 करे ऐसी लीलाके दर्शनभये सब ब्रजभक्तयशोदाजीके
 घर मिलके उराहनो देवे आयेहैं और श्रीठाकुरजीकुं
 यशोदाजीके पास ठाढे देखके उराहनोदेवे भूलगयेहैं
 और श्रीठाकुरजीके स्वरूपमें विनकोमन मोहित भयोहै
 ऐसी लीलाके दर्शन आसकरनजीकुं भये जब आस-
 करनजी चकित होयरहै जब चतुर्भुजदासजी दर्शन कर
 ते हते विननें येपद गायो ॥ राग आसावरी ॥ भूलरीउरा-
 हनेकोदेवो ॥ परगयेदृष्टिश्यामघनसुंदरचकितभईचिते-
 वो ॥ १ ॥ चित्रलिखीसी ठाडीगवालिन कोसमजेसमझे-
 वो ॥ चतुर्भुजप्रभुगिरिघरमुखनिरखत कठिनभयोघर-
 जेवो ॥ २ ॥ ऐसो पद आसकरनजी सुनकेबहुत प्रसन्न
 भये और विचार क्यो जैसे अलुभव मोकुं भयोहै ऐसी
 कृपा चतुर्भुज दासके उपरहूं है ऐसी विचारके श्रीगुसाईं-

जीकुं बीनती करी जो महाराज आपकी कृपा चतुर्भुज-
दासके उपरं बहुतहै तब श्रीगुसाईजीनें आज्ञा करी जो
कुंमनदासजीके वेटाहैं जिनकुं श्रीगोवर्धननाथजी विना
क्षणभर रह्योनजाय ऐंसेनकोवेटा ऐंसे होवै यामें कहा
आश्रय ह फेर एकदिन आसकरनजी सांझके समय
गोविंदकुंडके पास ठाडे हते देखे तौ ब्रजभक्तनके यूथ
चले आवैंहैं और आयके सब गोपीजन ठाडी भई इतनेमें
श्रीनाथजी गाय चरायके घरमे पधारतेहैं गायनके संग
गोरजसुं व्यापतहै मुखारविंद जिनको ऐंसे प्रसूके दर्शन-
नकुं रस्तामें गोपीजन आवैंहैं ऐंसे दर्शन आसकरनजीकुं
भये जब आसकरनजीनें ये पद गायो ॥ राग गौरी ॥
मोहनदेखिसिरानेनेना ॥ रजनीसुखआवतगायनसंगस-
धुरबजावतवैना ॥ १ ॥ म्वालमंडलीमध्यविराजतसुंदर-
ताकोऐना ॥ आसकरनप्रसु मोहननागर वारोंकोटिक-
मैना ॥ २ ॥ आसकरनजीनें ऐंसे पद बहोत गाये फेर
आसकरनजी रातकुं श्रीगुसाईजीके पास कथा सुनवेको
नित्य जाते जैसे वचनासृत सुनते तैसो अतुभव होतो
हतो ॥ फेर एकदिन श्रीगुसाईजी श्रीनाथजीकुं जगायवेकुं
पधारे वाहीसमय अपने अपने घरतें सब ब्रजभक्त सद्य
माखण और मलाई और दूध और अनेक प्रकारकी
सामग्री लैके सब पधारेहैं और गोपीजन यशोदाजीकुं
कहैंहैं हे यशोदाजी लालजीकुं जगाओ हम तुमारे लाल-
जीके दर्शनकरके और सामग्री अरोगायके जो दही बे-
चवे जायेंहैं तो हमकुं दशगुणो लाभ होवैंहैं यातें हम तु-

मारे घर आईहैं सो लालजीकुं जगाओ तो इनको मुख
 देखके जावें ॥ तब ऐसे दर्शन आसनकरनजीकुं भये
 जब आसकरनजीनें पद गायो सो पद ॥ राग विभास ॥
 प्रातसमयघरघरतेंदेखनकोआईगोकुलकीनारी ॥ अपनी
 कृष्णजगाययशोदाआनंदमंगलकारी ॥ १ ॥ सबगो-
 कुलकेप्राणजीवनधनयासुतकीवलिहारी ॥ आसकरनप्र-
 मुमोहननागर गिरिगोवर्धनधारी ॥ २ ॥ राग विभास ॥
 उठोमेरेलाललाडिलेरजनीवीतीतिमिरगयोभयोभोर ॥ घ-
 रघरदधिमथनियाघूमेअरुद्विजकरतवेदकीघोर ॥ १ ॥ करि
 कलेउदधिओदनमिश्रीवांटिपरोसोंओर ॥ आसकरणप्र-
 मुमोहननागरवारोंतुमपरप्राणअंकोर ॥ २ ॥ फेर आस-
 करनजीकुं बाललीलाके दर्शन भये यशोदाजी दहीवि-
 लोवेंहैं और श्रीठाकुरजी बालकचेष्टा करेंहैं और दोड
 दोडके दही मथन करतें रैकुं पकडेहैं यशोदाजीकुं देवे
 नहींहैं और यशोदाजी श्रीठाकुरजीकुं समझावेंहैं जो
 लाला बहूत अवार भईहैं मोकुं दधि मथन करन दे ऐसे
 दर्शन राजा आसकरनजीकुं भये हैं ॥ जब आसकरन-
 जीनें ये पद गायो ॥ सो पद ॥ राग रामकली ॥ मोहेदधि-
 मथनदेवलिगई ॥ जाउबलबलवदनउपरछांडमथनीरई ॥
 ॥ १ ॥ लालदेउंगीनवनीतलींदाआरतुमकितठई ॥ सुत-
 हितजानविलोक्यशोमतिप्रेमपुलकितभई ॥ २ ॥ लेउछंग
 लगायउरसोप्राणजीवनजइ ॥ बालकेलिगुपालजूकीआस
 करणनितनई ॥ ३ ॥ ये पद सुनके श्रीगुसाईंजी बहूत प्रसन्न
 भये और ये विचारे जो आसकरनकुं प्रसुनको स्वरूप

लीलासहित हृदयारूढ भयोहै सो सब लीला सहित प्रभु इनकु दर्शन देतैहैं ऐसे विचारके श्रीगुसाईजी बहोत प्रसन्न भये प्रसंग ॥६॥ फेर एकदिन आसकरनजी श्रीगोकुलमें आये श्रीनवनीत प्रियाजीके दर्शन करवेकुं गये तब आसकरनजीकुं ये लीलाके दर्शन भये श्रीयशोदाजी श्रीठाकुरजीकुं पालने झुलावैहैं और गोपीजन मिलके यशोदाजीके पास आईहैं और गोपीजन कहेहैं जो हमारो ऐसो नेम है ज्यांसूधी तेरे लालकुं हम खेलावै नहीं और हम पालना झुलावै नहीं तहां सूधी हमारो चित्त घरके काममें नहीं लग्येहैं और जो कदाचित्त घरकी काम करै तो सब काम बिगडेहैं जायुं हम सगरी सूती उठके तुमारे लालकुं खिलावन आईहैं ऐसे सब गोपीजन कहेहैं और यशोदाजी हसेहैं ऐसी लीलाके दर्शन आसकरणजीकुं भये जब आसकरणजीनें ये पद गायो ॥ राग रामकली ॥ यहनित्यनेमयशोदाजुमेरें तिहारोईलाललडावनकुं ॥ प्रातसमयउठपलनाझुलाउं शकटभंजनयशगावनकुं ॥ १ ॥ नाचतकृष्णनचावतगोपीकरकटताल बजावनकुं ॥ आसकरणप्रभुमोहननागरनिरखवदनसञ्चुपावनकुं ॥ २ ॥ सो ऐसे अनेक प्रकारकी लीलाको अनुभव होतोहतो सो राजा आसकरण ब्रजमें फिरते हते और ज्यास्थलमें जाते वाई स्थलमें श्रीठाकुरजी वेसी लीलाके दर्शन देते हते एकदिन राजा आसकरन दानघाटीपर जाते हते उहां देखेतो श्रीनाथजी कामली ओढके हाथमें लकुटी लेकेसखामंडली

संग लेके ठाढ़ेहें और ब्रजभक्त दहीं बेचबेकुं जातहें और सब सखादेखके गोपिनकुं पकडतहें और कहेंहें हमारो दहिंको दान लगेहै सो देजाओ गोपीजन कहेंहें जो दहींको दान हमनें सुन्यो नहींहैं और तुम कबके दानी भये जब आसकरणजीनें पद गायो सो ॥ राग बिभास ॥ नंदकिशोरयहवोहनीकरननपाई ॥ गोरसकेमिषरसहिंद-टोरतमोहनमीठीताननगाई ॥ १ ॥ गोरसमेरेघरहिविके-हेंक्यांवृंदावनजाय ॥ आसकरणप्रभुमोहननागरयशो-मतिजायसुनाय ॥ २ ॥ राग बिभास ॥ कवतें भयोहेंद-धिदानी ॥ मटुकीफोरतहरवातोरतयहवातमेंजानी ॥ १ ॥ नंदरायकीकानकरतहुं और जसोदारानी ॥ आसकरण-प्रभुमोहननागरगुणसागरअभिमानी ॥ २ ॥ सो ऐसी लीलाके दर्शन राजा आसकरणजीकुं दानघाटीपर भये फेर एकदिन राजा आसकरण परासौलीमें गये उहां श्रीठाकुरजी वैष्णुनांद करेंहें और ब्रजभक्त पधारतहें अ-तिउत्कंठासहित श्रीठाकुरजीके पास गमन करतहें ऐसे दर्शन आसकरणजीकुं भये तब ये पद गायो ॥ राग के-दारो ॥ गोपमंडलीमध्यमनोहरअतिराजतनंदकेनंदा ॥ शोभितअधिकशरदकीरजनी उडुगणमानोपूर्णचंदा ॥ १ ॥ ब्रजयुवतीनिरखमुखठाढीमानतसुंदरआनंदकेनंदा ॥ आसकरणप्रभुमोहननागरगिरिधरनवरसरसिकगोविंदा ॥ २ ॥ यारीतीसों राजा आसकरणकुं अनेक लीलाके दर्शन भये ॥ श्रीगुसांईजीकी कृपातें सो राजा आसकरण ऐसे कृ-पापात्र हते ॥ प्रसंग ॥ ७ ॥ और राजा आसकरण ब्रजमें फि-

ज्यो करते हते कोईदिन श्रीगोकुलमें कोईदिन श्रीजी द्वार-
में कोईदिन ब्रजके और स्थलनमें फिरते खान पानको
कछु उपाय न राखते विनकी ऐसी दशा देखके
श्रीगुसाईंजीनें सब वैष्णवनकुं और मुखिया भीतरिया-
नकुं और वहुवेटीनकुं कहि राख्यो हतो जो राजा आ-
सकरण जब आवै इनकुं खावेको जोहाजरहोवै सो ध-
रदेनो कारण जो दोदो चारचार दशदश दिनमें जो
यह और भगवदिछासुं जोभिलेहै सो लेलेवेहैं ऐंसे श्रीगु-
साईंजीने कहेराखि सो एकदिन श्रीगोकुलमें आसकर-
णजी आये तब श्रीगोपिनाथजीके बेटीजी लक्ष्मी
बेटीजी सत्यभामा बेटीजी बालपणेशों विधवा हते
और श्रीनवनीतप्रियाजीकी रसोईकी सेवा करते हते
और नवनीतप्रियाजीके राजभोग साजवेके समय
आसकरणजीकुं आये देखके बेटीजीनें विचार क-
ज्यो वैष्णव भूखो जायगो तो फेर पांच
सात दिनमें आवेगो और श्रीनाथजी याके हृदयमें वि-
राजेहैं आपकोश्रम होवेगो येविचारके लक्ष्मी बेटीजीनें
सत्यभामा बेटीजीसुं कहि तुम श्रीनवनीतप्रियाजीके लीयें
दूसरी सामग्री तैय्यार करौ और येमें आसकरणजीकुं
धरदेऊं इनके हृदयमें श्रीनवनीतप्रियाजी अरोगेंगे ऐंसे
विचारके वो थार आसकरणजीके आगें धरदियो तब आ-
सकरणजी सबलेगये फेर और सामग्री सिद्ध करके तब
श्रीनवनीतप्रियाजीकुं राजभोग धरे पाछें भोग सराये
तब श्रीगुसाईंजी आरती उतारवेकूं पधारे तब श्रीनवनी-

तप्रियाजीको सुखारविंद बहुत प्रसन्न देखके श्रीगुसां-
ईजीनें पूछी आजकहाहै तब श्रीनवनीतप्रियाजीनें कहि
आज हम दुगुणो राजभोग अरोगेहैं तब श्रीगुसांईजीनें
कहि सामग्रीतो अधिक भै नहिहैं तब श्रीनवनीतप्रिया-
जीनें कहि या बातकुं बेटीजी जानेहैं फेर श्रीगुसांईजीनें
भोजन करवेकेसमय बेटीजीकुं पुंछि तब लक्ष्मी बेटीजी
मनमेंडरपके और हाथ जोडके सब बात कही ये बात
सुनके श्रीगुसांईजी बहुत प्रसन्न भये और आज्ञा करी जो
वैष्णवको स्वरूप ऐसोहिहै जाण्यो जायतो ॥ परंतु जहां-
सुधी आप न जणावैं तहांसुधी जीवको कोई उपाय नहि
है ऐंसे कहेके आप चुप कररहै सो वैं आसकरणजी ऐंसे
कृपापात्र हते जो विनके हृदयमें विराजके श्रीनवनीतप्रि-
याजी अरोगें सो ये बात श्रीगुसांईजीनें गोपालदासजीके
हृदयमें प्रवेश करके बल्लभाख्यानमें गाईहै ॥ सोतुक ॥
लक्ष्मीसत्यभामावेउअग्रजनीअनुहाररेरसना ॥ श्रीनव-
नीतप्रियजेनें रीझव्या सेव्या विविधि प्रकाररेरसना ॥
॥ १ ॥ या आख्यानमें सातबालक और सात बहूजी
और छे बेटीजीनको वर्णनहै परंतु श्रीनवनीतप्रियाजीकुं
रिझाए ऐंसे शब्द लक्ष्मीबेटीजी और सत्यभामा बेटीजी
विना औरमें नहि कह्योहै सोवे आसकरणजी श्रीगुसां-
ईजीके ऐंसे कृपापात्र हते ॥ वार्ता संपूर्ण वैष्णव ॥७३॥

।श्रीगुसांईजीके सेवक दोउ भाई साचोरा ति० ।
सोवे दोउ भाई साचोरा गुजरातमें रहते हते ॥ एक
समय श्रीगुसांईजी गुजरात पधारे ॥ तब दोउ भा-

ईसकुं नाम निवेदन कराए तब वे दोनौ भाई श्रीठा-
 कुरजीकी सेवा करन लगे और दिवसरात्र भगवद्दार्ता
 करते और श्रीसुबोधनीजी वांचते और कछु धंदा
 नहीं करते भगवदिच्छासुं निर्वाह करते एक दिन वै-
 ष्णवनको साथ श्रीगोकुलजातो हतो तब वा गाममें वा
 साचोरानके घरमें जाय के उतरे दिनके घर कछु हतो
 नहीं जब विन दोनो भाईनने विचार क्यो जो
 ये वैष्णव आयेहैं सो हमारे घरतें प्रसाद लीये विना न
 जाय तो ठीक तब वीनने ऐसोविचार क्यो जो
 अमुक बनियाकी दुकान अपने परोसमें है और वो आ-
 पनो मित्र है वाकी दुकान खोलके जितनी सामग्री चाहिये
 इतनी काढ लेवें फेर ये बनिया आवेगो जब दाम चुकाय
 देवेंगे ऐसे विचारके रातकुं वाकी दुकान खोली और
 जेसामग्री जितनी चहीती हती इतनी तोलके लीनी तब
 बडो भाई सामग्री लैके घर आयो और छोटे भाई दु-
 कान बंद करवेकुं रह्यो जब सरकारके मनुष्यनने वाकुं
 चोर जानके पक्यो फेर छोटे भाईने बडे भाईकुं खबर
 दीनी जो तुम रसोई करके वैष्णवनकुं प्रसाद लेवाईओ
 और मैं राजसुं निवटके काल आवुंगो ये बात वासाचो-
 राके परोसीनने जानी विनने राज्यमें जायके कही में
 इनके परोसमें रहूँ ये नित्य बहोत चोरी करके घरमें ला-
 वेंहैं और लोगनकुं छुट लावेंहैं और सब जगामें डाको
 पाडेहैं ऐसे झूठी बातें बनायके सरकारके मनुष्यनकुं सम-
 झायो याकुं मारडारो तो बहुत आछो तब सरकारके

मनुष्यननें वा परोसीकी बात साँची मानके वाकुं मार-
 ढा-न्यो और गामके दरवाजापर वाको माथो टांग दियो
 और वृक्षसों वाको घड बांध दियो और गाममें जाहेर
 क-न्यो जे कोई मनुष्य चोरी करेगो वाके ये हाल होवेंगे
 और वाको बडो भाई तो घरमें न्हायके रसोई करके
 भोग धरके वैष्णवनकुं प्रसाद लिवाये ॥ विन वैष्णवनकुं
 जावेकी उतावलहती सो दो पातर घरमें करधरी एक अफ-
 नी और भाईकी जब भाई आवेगो तब प्रसाद लेउंगो ऐसे
 विचारके दो पातर ढांकके विन वैष्णवनकुं पहुँचावे ग-
 यो गामके दरवाजा पर देखे तो भाईको घड और माथो
 टांगयो है ॥ देखके बहुत उदास भयो और सेवामें न्हायो
 हतो छोटी भाई मान्यो गयो ऐसी खबर बडे भाईकुं पेहेले
 पडी न हती जब दरवाजापर देखके रोवे लग्यो और वो-
 घड हतो सो हाथ जोडके वैष्णवनकुं जयश्रीकृष्ण करन
 लग्यो सो वैष्णवदेखके बहुत चकित भये और वाको घड
 छोडके और शीश छोडके घडके उपर मिलाय दिथो
 और श्रीनाथजीको प्रसादी बख हतो सो वाके गलामें
 बांध दियो और चरणामृत वाके मुखमें मेल्यो सो वैष्ण-
 वनकी कृपातें छोटी भाई जीवतो भयो और उठके वै-
 ष्णवनकुं दंडवत करन लग्यो और वैष्णवनकुं वीनती
 करी आजको दिन कृपा करके इहां रहो इतनेमें वा रा-
 जाके मनुष्यननें राजाकुं खबर करी जो वा ब्राह्मणकुं
 आज सवारि मरायो हतो सो वैष्णवननें जीवतो क-न्यो
 तब वे राजा सुनके बहोत डरप्यो आयके वैष्णवनके पां-

वन पन्यो और वीनती करी मेरे अपराधक्षमा करौ और मोकुं तुमारो दास करौ और जैसे बने तैसे मोकुं शरण लेउ फेर वा राजानें वा साचोरा दोनो भाईनके परोसीकुं पकडायके मार डारवेको हुकम कन्यो तब वैष्णवननैं छोडायो फेर राजानें कही ये वैष्णव द्रोही और धर्मद्रोही मेरे गाममें नहीं चाहिये राजानें वाकुं देशमेंसुं वाहेर काढ्यो और वाको घर लूट लियो फेर राजा विन वैष्णवनके संग श्रीगोकुल गयो और वैष्णव भयो सो वे दोनो भाई साचोरा ऐसे कृपा पात्र हते जिनकी चित्तकीवृत्ती दिवस रात्र श्रीगुसांईजीके चरणारविंदमें और वैष्णवनकी सेवामें रहती हती ॥ फेर वाराजानें दोनों भाई साचोरानकुं आजीविकाकर दीनी सो वे दोउ भाई साचोरा ऐसे कृपा पात्र भगवदीय हते ॥ वार्ता संपूर्ण ॥ वैष्णव ॥ ७४ ॥

॥ श्रीगुसांईजीके सेवक रामदास खंभातके वासीकी वार्ता.- एक समें श्रीगुसांईजी गुजरात पधारे जब रामदासजीकुं नाम निवेदन करायो फेर रामदासजीन श्रीगुसांईजीसुं पूछी अब कहा आज्ञा है तब श्रीगुसांईजीनें कही अष्टाक्षर तथा पंचाक्षरको जप करौ तब रामदासजी एकांतमें बैठके जप करते ॥ फिर रामदासजीकुं श्रीगोवर्धननाथजीनें दर्शन दिये और कही जो तुम ब्रजमें आयके हमारी सेवा करौ तब रामदासजी ब्रजमें जायके श्रीगुसांईजीकी आज्ञा लेके श्रीनाथजीके शाकघरकी सेवा करन लगे फेर श्रीनाथजी शाक घरमें आयके रामदासजीसों वार्ता करे फेर एक दिन गुलाल

कुंडपर श्रीनाथजी पधारे और रामदासजीकुंड कही गये तुम शीतल सामग्री लैके गुलालकुंडपर आईयो सो रामदासजी लैके गये उहां श्रीनाथजी आरोगे सब सखासंडली कुंड वाट दीये सो रामदासजीकुंड सब लीलाके दर्शन भये इतनेमें शंखनाद भये श्रीनाथजीतो झट मंदिरमें पधारे और रामदासजीतो धीरे धीरे भोगके दर्शन सुखे आय पहाँचे और अपने मनमें बहोत डरपे जो श्रीगुसांईजी कहा कहेंगे तव श्रीनाथजीनें श्रीगुसांईजीसों कही जो रामदासजी मेरे संग गये हते जासुं तुम कछु इनकुं मत कहो तव श्रीगुसांईजीनें रामदासजीसों कही जो श्रीनाथजी तुमकुं संग लेजाय तहां नित्य जाओ तुमारे वडे भाग्यहैं शाकधरमें दूसरो मनुष्य करेंगे और तुमकुं अवकाश होवै जब शाकधरमें सेवा करियो फेर एकदिन श्रीनाथजी रामदासजीकुंड कदमखंडीपर लगये और उहां रासकिये और गोविंदस्वामी कीर्तन गाते हते और स्यामदास सृदंग बजावते हते ऐसे अनेक लीलानके दर्शन श्रीनाथजीनें रामदासजीकुंड कराये सो वे रामदासजी ऐंसे कृपापात्र अष्टाक्षरमंत्रके जप करके भये सो नारद पंचरात्रीमें कहाहै ॥श्लोक॥ किंमंत्रैर्वदुभिर्विनश्वरफलैरायाससाध्यैर्मखःकिंचिल्लोपविधानमात्रविफलैःसंसारदुःखावहैः॥एकःसन्नपिसर्वमंत्रफलदोलोपादिदोषोज्झितःश्रीकृष्णः शरणंभमेतिपरमोमंत्रोयमष्टाक्षरः ॥ १ ॥ सो अष्टाक्षर जप करते रामदासजीकुंड लीलानके दर्शन श्रीनाथजीनें पुष्टिमार्ग राखवैके लीये कराये जो कोई वैष्णव अष्टाक्षर मंत्रको

जप करेंगे विनके सब मनोरथ पूर्ण होंगे ॥ वार्ता संपूर्ण ॥ वैष्णव ॥ ७५ ॥ ❀ ॥

श्रीगुसाईजीके सेवक ताराचंद भाईकी वार्ता ॥
 सो ताराचंद भाई श्रीगोकुलमें श्रीगुसाईजीके दर्शनकुं
 आये तब श्रीगुसाईजीके दर्शन कीये साक्षात् पूर्ण पुरुषो-
 त्तमके दर्शन भये फेर ताराचंदभाईने नाम निवेदन कि-
 ये और श्री नवनीतप्रियाजीके स्वरूपमें आसक्त भये
 फेर कोईदिन ताराचंदको मन चलायमान होवै लयो
 वृथा विचार करन लगे तब श्रीगुसाईजीने आज्ञा करी
 जो वैष्णवनकुं वृथा लाप तथा वृथा क्रिया तथा वृथा
 ध्यान बजितहै सो ये सुनके ताराचंदभाईने विचार क-
 य्यो जो मेरे मनकी आपने अंतर्यामी पणसुं जानीहै
 जासुं बडे भाग्य माने और बहुत शिक्षा मानी और अ-
 पने मनकुं स्थिर करवेकुं उपाय दूढवे लगे फेर सर्वोत्त-
 मजीने दूढ्यो सो ॥ श्लोक ॥ श्रद्धा विशुद्धबुद्धिर्यःपठत्य-
 तुदिनंजनः ॥ सतदेकमनासिद्धिसुक्तांप्राप्नोत्यसंशयः ॥
 ॥ १ ॥ यारीतिसुं ताराचंदभाईने विचार कियो जो श्रद्धा
 सहित शुद्धबुद्धिसहित जो श्रीसर्वोत्तमजीको पाठ करेंहै
 और एकसो आठ नामनको अर्थ चित्तमे धारण करेंहै
 विनको मन स्थिर होवैहै और कृष्णाधरामृतरूपी जो
 सिद्धीहै वा जीवकुं प्राप्त होवैहै यामें संशय नहीं ऐसे वि-
 चारके ताराचंदभाई श्रीगुसाईजीकी आज्ञाते सर्वोत्तम-
 जीको पाठ करनलगे फेर थोडेदिनमें श्रीठाकुरजी अनु-
 भव जतावन लगे सो वे ताराचंद श्रीगुसाईजीके ऐसे क-

पापात्र हते ॥ वार्ता संपूर्ण ॥ वैष्णव ॥ ७६ ॥ ❀ ॥ ॥
 ॥ श्रीगुसांईजीके सेवक एक ब्राह्मणकी वार्ता ॥
 सो वे ब्राह्मण पंडित बहुत हतो और कर्ममार्गमें आसक्त
 हतो फेर वह ब्राह्मण श्रीगोकुल आयो और श्रीगुसांई-
 जीको सेवक भयो और भगवत्सेवा करन लग्यो एकदिन
 वा ब्राह्मणवैष्णवने श्रीगुसांईजीके मुखते देवीजीवनके
 लक्षण गुने जो लौकिककर्म तथा वैदिककर्म जो देवीजीव
 करेहें सो कपटते करेहें नहीं करें तो विनकुं कछु बाधा ना-
 हीहै ॥ लोकशिक्षार्थ करेहें सो पुष्टिप्रवाहमर्यादाग्रथमें क-
 ह्योहै ॥ सो श्लोक ॥ लौकिकवैदिकत्वकापटघातेषु नान्य
 था ॥ वैष्णवत्वंहिसहजंततो न्यत्र विपर्ययः ॥ १ ॥ यि वात मुनके
 मनमें विचार कन्यो जो कर्ममार्गमें ते आसक्ती छोड़ी च-
 हीये फेर श्रीठाकुरजी पधरायके अपने देशमें आयके सेवा
 करन लग्यो चुकटी मागलावे और निर्वाह करे और श्री-
 ठाकुरजीकी मंगलाते सेन पर्यंत आखोदिन सेवा करे
 कर्मकरवेको अवकाश आवे नहीं फेर एकदिन बहुत अ-
 वार भई जव झटपट बुहारी करन लग्यो बुहारीकी दोरी
 तूटगई तब जनेउ उतारके बुहारी बांधी परंतु श्रीठाकुर-
 जीकुं अवार न होवें ऐसो मनमें समझो फेर श्रीठाकुरजी
 वा ब्राह्मणकुं देखके हैसे और कहने लगे जो मैं तेरेपर
 प्रसन्नहूं जो तूं जानेहैं जो ब्राह्मण वेदकर्म न करे तो नर-
 कमें जाय ऐसे तू जानेहैं तोहूं मेरे लीयें नर्क जानो कबूल
 कन्यो जासुं मैं तेरेपर प्रसन्नहूं और तूं मांगेगो सो देउंगो
 तब वा ब्राह्मणने हाथ जोडके कही जो महाराज मोकुं

कछु नहीं चहीये आप सदा मौसुं बोलो और वातचीत करौ यासुं अधिक में कछु मातु नहींहुं श्रीगुसाईंजीकी कृपातें मोकुं ऐसो सुख भयो है तब श्रीठाकुरजीनें कही जो अब जनेउ पेहेर लेवो तब वा ब्राह्मणनें कही जो अब मोकुं कर्ममार्गसों कहा काम है तब श्रीठाकुरजीनें कही जो लोगनके दिखायवेकुं जनेउ पेहे-यो चहिये तब वो ब्राह्मणनें जनेउ पेहेरके सेवा करन लय्यो और नित्य श्रीठाकुरजी वासुं बोलते और सब अनुभव जतावते सो वे ब्राह्मण श्रीगुसाईंजीको ऐसो कृपा पात्र हतो जिननें न-कर्म जानो कबूल क-यो परंतु प्रसुनकुं अवार न होयवे दीनी ॥ वार्ता संपूर्ण ॥ वैष्णव ॥ ७७ ॥ ❀ ॥ ॥

॥ श्रीगुसाईंजीके सेवक हरिदास तथा मोहन-दासकी वार्ता ॥ सो वे हरिदास घरमें श्रीठाकुरजीकी सेवा करते हते और मोहनदास बिनके घर आयके उतरे हते सो दिवस रात दोनो जने भगवद्रसमें छके रहेते और ह-रिदासजी मोहनदासमें बहोत आसक्त भये सो मोहन-दास बिना एक क्षण रहे न सकते और भगवत्सेवा क-यो करते और ग्रंथ देखे करते और साक्षात् श्रीठाकुरजीकी आविर्भाव मोहनदासजीमें मानते और जब मोहनदास जायवेकी बात करते तब मुनके हरिदासजीकुं सूच्छा आय जाती और ऐसी भावना करते जो जन्मपर्यंत मो-हनदासजी इहांसों न जायतो आछो तब एकदिन मोहन-दासनें निश्चय क-योके सवारे जानोहै तब हरिदासजीनें स्त्रीसुं कही जोतू घर और श्रीठाकुरजी और बेटा सब सं-

भार राखो मेरे प्राण नहीं रहेंगे जब मोहनदास इहांतें जाएंगे तब सर्वथा मेरे प्राण नहीं रहेंगे ऐसे हरिदासजीनें स्त्रीसों कही तब स्त्रीनें सुनके विचार कियो जो मोहनदास न जाय और मेरे पतीके प्राण रहें एसो उपाय करनो ये विचारके रातकुं वेटाकुं विप दियो जब पाछली रातभई तब वेटानें प्राण छोडे तब रोयउठी तब मोहनदास तैयारी करत हते सो कमर छोडके वास्त्रीकुं जायके पूछी जो ये तुमारा वेटा रातकुं आछो हतो आज कहा भयो सो तुम साँच कहो तब हरिदासकी स्त्रीनें साँचो कह्यो ये सुनके मोहनदासजी चकित भये और एसो विचार कियो जो इनको कैसे सोह है और मैं कैसे कठिन हुं ऐसे विचारके वा बालकके मुखमें चरणामृत दियो और भगवन्नामको उच्चार कियो और श्रीठाकुरजीकुं वीनती करके वा बालकके कानमें अष्टाक्षर कह्यो तब वे बालक जीवतो भयो तबतें मोहनदारुनें एसो नेम लीयो जो आज पीछे हरिदासजी धक्का मारके काढेंगे तोहूँ इहांतें नहीं जाउंगो फेर जन्मपर्यंत मोहनदास हरिदासके घरमें रहे सो वे हरिदास तथा हरिदासकी स्त्री ऐसे कृपा पात्र हते जिननें वैष्णवको संग न छोडचो या वातकेलीये पुत्र जेसी वस्तु त्याग करी तब तें श्रीठाकुरजी हरिदासजीको एसो स्नेहदेखके बहोत प्रसन्न भये और कहां ताई कहिये वार्ता संपूर्ण ॥ वैष्णव ॥ ७८ ॥ * ॥ ॥ ॥ ॥

॥ श्रीगुसांईजीके सेवक एक चोरकी वार्ता ॥
सो चोर श्रीनवनीतप्रियाजीके मंदिरमें रातीकुं छिप रह्यो

पात्र तथा आसूषण तथा वस्त्र सब एकट्ठे करके एक गांठ बांधी और उठायवे लय्यो तब गांठ उठी नहीं बाने आखी रात उपाय तो बहोत करे परंतु सवारसूधी गांठ न उठी फेर वह चोर पकडचो गयो तब श्रीगुसांईजीके पास लेगये तब श्रीगुसांईजीने कही जो याकुं छोडदेओ पृथ्वी-पतीकुं खबर पडेगी तो याकुं मारडारेगो सो श्रीगुसांई-जीकुं बहोत दया आई और चोरकुं छुडाय दियो फेर वा चोरके मनमें ऐसी आई जो मेरे प्राण जाते श्रीगुसांई-जीने मेरेपर कृपा करके मोकुं प्राण दान दियेहे; इनेकी शरण जाउं तो ठीक फेर वो चोर श्रीगुसांईजीको सेवक भयो तब श्रीगुसांईजीने आज्ञा करी जो अब तु चोरी मत करे जब वा चोरने हाथ जोडके कही जो महाराज चोरी करे बिना मोसुं रह्यो नहीं जायगो तब श्रीगुसांईजीने कही जो तुं निर्दय होयके चोरी मत कर जाके पास सो रुपैया जितनो द्रव्य होवे तब वा की दोरुपैया जितनी चोरी करे तो वाको मन न दूखे ॥ और सत्य भाषण करे तो श्रीप्रभुजी दयालूहे तेरो मन फेर डारेंगे और आपके चरणारविंदमें लगावेंगे ॥ ऐसे कहके वा चोरकुं वैष्णव-ताकी रीती सिखायके विदा कियो फेर वा चोरने ऐसो विचार कियो जो कोई राजाकी चोरी करंतो एक बार काम होयजायगो गरीबकी चोरी अब नहीं करंतो ऐसे वाके मनमें विचार आयो फेर वे चोर एक राजाके घर चोरी करन गयो सो आछो मनुष्य बनके गयो राजाकी पौरी पर जो पूछे वाके आगे सत्य बोले जो तुम कहां जा-

ओहो जब वो कहे हम चोरी करवे जावेंहें तो श्रीठाकुरजीकी प्रेरनातें सबके मनमें ऐसी आई जो ये मस्करी करेहें जासुं बाकुं कोईनें रोकयो नहीं वे राजाके घर निःशंक होयके भीतर घुस गयो फेर चोरी करके चल्यो आयो जो पूछे जासुं सत्य कहे सो सबनें वाकी हांसी जानी फेर पीछे जब खबर परी जो घरमेसुं जवहरात गये फेर बाकुं पकडलाये ॥ फेर राजानें वा चोरवैष्णव सों पूछ्यो जो तेनें कैसे चोरी करी वानें सब सत्य कइयो और कइयो जो मैंने सबकुं कहीहै परंतु तुमारे मनुष्यननें मेरी बात साँची मानी नहीं फेर राजानें या बातकी तपास करी तो सब बात वा चोरकी साँची निकसी तब राजानें वा चोरकुं नोकर राख्यो और सब काम सोंप्यो सो वे चोरनें सब राजाको काम माथे उठाय लीयो फेर श्रीगुसाँईजीकुं पधरायके बहोत द्रव्य भेट कयो और श्रीठाकुरजी पधरायके सेवा करन लग्यो सो श्रीगुसाँईजीकी कृपातें परम भगवदीय भयो वा चोरकुं श्रीगुसाँईजीकी आज्ञाको ऐसो विश्वास हतो यातें वाके लौकिक अलौकिक सब सिद्ध भयो ॥ वार्ता संपूर्ण ॥ वैष्णव ॥ ७९ ॥

श्रीगुसाँईजीकेसेवक एक दयालदासबनीया ०
 सो वा दयालदासके पास लाख रुपैया हते सो धरतीमें गाढदीय और एक पैसा खर्च न करनो ऐसो नेम लीयो ॥ फेर एक दिन श्रीगुसाँईजी उहां पधारे जब वो दयालदास सेवक भयो और कही जो महाराज एक पैसा खर्च न होवै और मेरो कल्याण होवै ऐसी रीति सिखावो ॥ वारे आना

नित्य कमाई लाबुंई और चार आना नित्य खरचुंई तब श्रीगुसांईजीनें कही जो तूं मानसी सेवा कर ॥ फेर वानें मानसी सेवाकी रीती सब सीख लीनी फेर नित्य वे मानसी सेवा करतो दोपेहेर सूधी और कछु काम करतो नहीं ऐसे करते करते एक दिन मानसी सेवामें खीर करी वामें खांड बहुत पढगई सो फेर काठनल्यो तब श्रीठाकुरजीनें वाको हाथ पकन्यो और आज्ञा करी जो यामें तो तेरो खर्च नहीं ल्यो है सो तूं खांड क्युंकाटे हैं ये बात सुनके वाके अंतःकरण खुलगये और भगवत्स्वरूप साक्षात्कार होय गयो और लक्ष रुपैया हते सो श्रीगुसांईजीकुं पठाय दिये जेसो वाको द्रव्यमें चित्त हतो तैसो श्रीठाकुरजीमेंल्यो ॥ सो वह दयालदासवनिया ऐसो कृपा पात्र हतो वाकुं फलरूप मानसी सेवा सिद्ध भई ॥ वार्ता संपूर्ण ॥ वैष्णव ॥ ८० ॥ ❀ ॥ ॥ ॥ ॥

॥ श्रीगुसांईजीके सेवक स्त्री पुरुष हते तिनकी वार्ता- सो वे दोनो जनें श्रीगुसांईजीके सेवक भये और श्रीठाकुरजी पधरायके सेवा करन लगे एक दिन स्त्री परोसीके घर गई वाके घर वैभव बहुत देख्यो सो वाकुं पूछी तुमारे घर वैभव कैसे भयो तब वानें कही हम देवीकी पूजा करे हैं यातें भयोहै फेर वा परोसननें कही तुम देवीकी पूजा करौ तो तुमारे घर वैभव बढजाय फेर वैष्णवकी स्त्री परोसनकी देवीकी मूर्ती लेआयके घरमें बैठाई और पतीसों कह्यो जो देवीकी पूजाको सामान लावो और वैष्णव पैसा बेचतो हतो सो पैसा बेचन गयो

तब एक पसारीकी दुकानसुं देवीकी पूजाको सामान लेवै बैठो ॥ सो सामान लियो और पैसानकी कोथळीके बदले भूलमें पसारीकी रुपैयानकी कोथली उठायलीनी तब पसारी पकडके सरकारमें लेगयो उहकि हाकेमनें ये न्याय क्यो याकुं गद्दापर बैठायके गाममें फेरनो तब वाकुं गद्दाके ऊपर बैठायके गाममें फेरयो तब वैष्णवके मनमें आई मनें अन्याश्रय क्यो जब ये फल भयो जब घरमें जायके तत्काल देवीकी स्वरूप पाछो पढोसीके घर धराय दियो फेर चित्त लगायके श्रीठाकुरजीकीसेवा करन लगे तब वाके मनमें ऐसो निश्चय भयो वैष्णवनकुं अन्याश्रय सर्वथा बाधा करे हूँ जासुं वैष्णवनकुं अन्याश्रय न करनो अन्याश्रयतें अनिष्ट होवैहै और श्रीठाकुरजी अप्रसन्न होवैहै जासुं सर्वथा अन्याश्रय न करनी ऐसी शिक्षा वा वैष्णवकुं लगी सो वे स्त्री पुरुष ऐंसे कृपापात्र हते जिनसुं अन्याश्रय छुडायके श्रीठाकुरजी बोलन लगे ॥ वार्ता संपूर्ण ॥ वैष्णव ॥ ८१ ॥ * ॥ ॥

॥ श्रीगुसांईजिके सेवक देवाभाई पटेलकी वार्ता-सो देवाभाई पटेल गुजरातमें रहते और श्रीठाकुरजी पधरायके सेवा करते और नित्यनेमसुं वैष्णवनको प्रसाद लेवावते . जादिन कोई वैष्णव प्रसाद लेवेवालो न मिले तो तादिन देवाभाई तथा देवाभाईकी स्त्री भूखे रहते और भगवद्रसमें छकेरहेते ॥ फेर एकदिन श्रीगुसांईजी गुजरात पधारे हते तब देवाभाईके बेटानें श्रीगुसांईजीसुं वीनती करी जो महाराज जादिन वैष्णव नहीं आवे तब देवा-

भाई शूखे रहैं ॥ और भैंतो प्रसाद लेके खेतीकरवे जा-
उंइ और मातापिताकुं शूखो राखके भैं प्रसाद लेउंइ ये
अपराध कैसे मिटे ॥ ये बात देवाभाईके वेटाकी सुनके
श्रीगुसाईजी बहुत प्रसन्न भये और आज्ञा करी जो तुम
नित्य न्हायके श्रीठाकुरजीके चरणस्पर्शकरो ॥ और भो-
गधरो तो तुमारो अपराध निवृत्त होवेगो ॥ और देवा-
भाईकुं श्रीगुसाईजीनें कही जादिन कोई वैष्णव नआवे
तब गौकु पातर धरके तुमकुं प्रसाद लेनो ॥ तब ते देवा-
भाई ऐसे करन लगे और देवाभाईको वेटा खेती करतो-
हतो वामें द्रव्य बहोत आवतो सो जितनो द्रव्य घरमें
खर्च होतो सो करते और अधिकीको द्रव्य श्रीनाथजी-
द्वार पठाय देते वे देवाभाई पटेल श्रीगुसाईजीके ऐसे कृ-
पापात्र हते ॥ वार्तासंपूर्ण ॥ वैष्णव ॥ ८२ ॥ ❀ ॥
॥ श्रीगुसाईजीके सेवक एक डोकरीधानीपुनी-
वालीकी वार्ता ॥ वह डोकरीनें श्रीगुसाईजीकुं बीनती
करके श्रीठाकुरजी माथे पधराये तब सेवा करन लगी ॥
तब वह डोकरी सूतकाँतेके निर्वाह करती ॥ जब कातवे
बैठे तब श्रीठाकुरजी वा डोकरीके पासकी पुनीमें आय-
के बिराजते और बाललीला करते और वा पुनीकी गादी
तकीया करके बैठते और एक एक पुनी वा डोकरीके
हाथमें काँतवेकुं देते और शूख लागती तो डोकरी पास
धानी मागते सो एकदिन डोकरीकी व्यवस्था श्रीबाल-
कृष्णजी श्रीगुसाईजीके तीसरे लाललीनें देखी और वा
डोकरीसुं कही ये लालजी हमकुं दे तब वा डोकरीनें ला-

लजी पधराय दिये फेर डोकरी श्रीठाकुरजीविना बहुत दुःखी भई श्रीठाकुरजी वा डोकरीकी आर्ति सही न सके तब श्रीठाकुरजीनें बालकृष्णजीसुं कही जो डोकरीके घर पहुँचायदेव धानीपूनी विना मोकुं नहिं चले ॥ तब श्री-बालकृष्णजीनें वही रातमें आयके श्रीठाकुरजीकुं डोकरीके घर पधराय लाये और कही जैसे नित्य करते हो-वो तैसेही करौ श्रीठाकुरजी तेरेपर प्रसन्न हैं सो वे डोकरी ऐसी कृपापात्र हती जिनविना श्रीठाकुरजी रहे न सके ॥ वार्ता संपूर्ण ॥ वैष्णव ॥ ८३ ॥ * ॥ ॥ ॥

॥ श्रीगुसांईजीके सेवक वैष्णवक्षत्रीमथुरामें रहते तिनकी वार्ता ॥ सो वे क्षत्री वैष्णव श्रीठाकुरजी पधरायके सेवा भलीभांतिसुं करते और भगवद्वार्ता बहुत आछी करते और पुष्टिमार्गके ग्रंथ तथा विनके भावार्थ श्रीगुसांईजीसुं सुनते हते ॥ तब मथुराके वैष्णव भगवद्वार्ता सुनवेकुं वा क्षत्रीवैष्णवके घर आवते हते ॥ और नित्य क्षत्रीवैष्णव अपने हाथनतें चना शेकके भोग धरते हते ॥ और मंडलीमें वांटते हते ऐसे करते करते बहुत दिन भये एक शेठ द्रव्यपात्र वा मंडलीमें आयवे लग्यो ॥ तब वो चनाको प्रसाद लेके डारदेवे ॥ तब श्रीमहादेवजी वैष्णवको रूपधरके भगवन्मंडलीमें नित्य आवते हते कोईकुं खबर न पडती ॥ एक वा क्षत्री वैष्णव पहेचानते हते सो जब चना वह शेठ डारदेतो हतो तब महादेवजी वीनलेते ॥ तब एकदिन क्षत्रीवैष्णवनें महादेवजीकुं चना वीनते देखे पाछें वा शेठकुं मंडलीमें आवेकी नही कही

तब वे शैठ श्रीगोकुल गयो तब श्रीगुसाईंजी वासुं बोले नहीं और श्रीनवनीत प्रियाजीनें वा शैठकुं दर्शन न दीये फेर वो शैठ मथुरामें पाछो आयो और जायके वा क्षत्रीवैष्णवके पावन पन्यो तब क्षत्रीवैष्णवनें कही तुमनें भगवत्प्रसादको अपमान कन्योहै जासुं तुमकुं मंडलीमें आयवेको अधिकार नाहीहै ॥ फेर वो शैठ दीनता करके पावन पडयो फेर वा शैठकुं मंडलीमें आयवे दियो तब श्रीगुसाईंजीनें और नवनीतप्रियाजीनें दर्शन दीयो सो वैष्णवनकुं जहां न्यातिव्यवहार बाधा न करे ऐसो प्रसाद मिलेतो सर्वथा अपमान न करनो ऐसो विचार राखनो सो वह क्षत्रीवैष्णव श्रीगुसाईंजीके ऐसे कृपापात्र हते जिननें करोडपतीशैठकुं तुच्छ गण्यो और जिनके लिये श्रीगुसाईंजीनें और श्रीठाकुरजीनें वा शैठकुं त्याग कियो सो वे क्षत्रीवैष्णव ऐसे कृपापात्र अगवदीय हते ॥ वार्ता संपूर्ण ॥ वैष्णव ॥ ८४ ॥ * ॥ ॥ ॥

श्रीगुसाईंजीके सेवक निष्किंचन स्त्री पुरुषकी वार्ता ॥ सो वे स्त्रीपुरुष श्रीठाकुरजीकी सेवा करतेहते सो वा गाममें एक शैठ रहेतो हतो वा शैठके घर वा वैष्णवकी स्त्री एक दिन श्रीठाकुरजीके दर्शन करवे गई सो वैभव बहुत देख्यो मनमें ऐसी आई जो मेरे घर ऐसो वैभव श्रीठाकुरजीकोहोय तो आछो फेर अपने घर आयके पतिसुं कही जो मैं तो वैभवसो सेवा करुंगी वाके पतिनें कही जो द्रव्य तो बहोत है परंतु द्रव्यमें अनर्थ बहुत होवेहै जब द्रव्य होवे तब कोईकी वात मनमें आवे नहीं और

खरचवेको मन होवै नहीं और द्रव्यको अभिमान आयविना रहे नहीं और द्रव्यवान अपराधसुं डरपे नहीं और द्रव्यवान गरीबसुं प्रीती करे नहीं और द्रव्यवान आळे बुरेकी परीक्षा करे नहीं और द्रव्यवान गरीबनकुं अपमान वद्वत करे जासुं द्रव्यमें बहुत अनर्थ होवैहैं, और द्रव्यवान सत्संग करे नहीं और द्रव्यवान कोईको अहित करतें डरपे नहीं जासुं तुं द्रव्यकी अपेक्षा छोड दे परंतु वो स्त्री मानी नहीं कहिवे लगी वैभव विना सेवा नहीं करुंगी और रिसायके बैठ रही एंसे दो दिन सूधी सेवा न करी ॥ वाको पति एकलो सेवा करे तीसरे दिन वाके पतिनें कही जो इहांतें एक कोश दूर एक वृक्ष हे वाके नीचे जायके द्रव्य चहिये जितनी लेआवो तव वह स्त्री टोकरा लेके गई जब वा वृक्षके नीचे धरती खोदी तव द्रव्य बहुत निकस्यो तव वो स्त्री टोकरामें भरवे लगी तव वा वृक्षको भीतरगुं वाणी भई जो तुं हमकुं कछु देके द्रव्य लेजा तव वा स्त्रीनें कही जो तेरे कहा चहिये तव वानें कही जो तेरे घर श्रीठाकुरजी विराजे हैं सो तुम झारी भरोहो जितनी झारीको फल दे जा और इतने टोकरा द्रव्यके भर लेजा और तव वा स्त्रीनें कही जो अब द्रव्य लेजाऊं जो झारी भरुंगी तो एकझारीको फल नित्य तोकुं देउंगी और नित्य टोकरी भरके लेजाउंगी और जब तेरो द्रव्य नहीं लेजाउंगी जब झारीको फल नहीं देउंगी तव वो वृक्ष बोल्यो अब जो तुं झारी भरेंगी वा झारीको फल नहीं चहिये कारण जो तेरे पास द्रव्य होय

सो जब तेरी झारी श्रीठाकुरजी अंगिकार न करेंगे ॥ वा
स्त्रीनें कहि काहेते अंगिकार न करेंगे ॥ तब वृक्षनें कहि
तेरो चित्त द्रव्यमें रहेगो श्रीठाकुरजी चित्त लगाय बिना
अंगिकार कैसे करेंगे आज तैं पेहेले जो तुमने झारी भरीहै
बिनको फल देवो तो द्रव्य ले जाव तब वा स्त्रीनें कही जो
निष्किनपणेकी झारी श्रीठाकुरजी अंगिकार करे हें वे
निश्चय मोकुं तुमारे कहेंतें भयो है वा झारीको फल नहीं
देउंगी और तेरो द्रव्य मोकुं चाहिये नहीं मैं निष्किचन
होयके नित्य झारी भरुंगी जो प्रसू अंगिकारतो करेंगे
ऐसे कहेके वा स्त्रीनें द्रव्य डार दियो और ऐसी चली आई
और आयके अपने पतीसुं कही मैं निष्किचन होयके
झारी भरुंगी मैंने तुमारी कछोन मान्यो और द्रव्यपात्र
शेठके घर दर्शन करवेकुं गई जो मेरी दोदिन सेवा छूटी
और द्रव्य मेरे घरमें आवेगो तो कहा जानें कितनी सेवा
छूटेगी नोकर राखुंगी सब सेवा बिनकुं देउंगी और मैं
वैभवकी रक्षा करुंगी जासुं मेरे द्रव्य नहीं चाहिये ऐसे
कहिके सेवा करन लगी सो वे स्त्री पुरुष श्रीगुसांईजीके
ऐसे कृपापात्र हते जिननें भगवत्सेवा छोडके द्रव्य ग्रहण
न कियो ॥ ता तैं इनकी वार्ता कहा कहिये ॥ वार्ता
संपूर्ण ॥ वैष्णव ॥ ८५ ॥ * ॥ ॥ ॥ ॥

॥ श्रीगुसांईजीके सेवक पटेलवैष्णवकी वार्ता ॥
सो वे पटेल गुजरातसुं आयके श्रीगुसांईजीको सेवक भयो ।
तब सब ब्रजयात्रा कर आयो एकदिन श्रीगुसांईजी कथा
कहेते हते तब श्रीयमुनाष्टककी कथा वा पटेल वैष्णवनें

सुनी वा पटेलनें पूछो हे महाराज आठ श्लोकमें अष्ट-
सिद्धि आपनें आज्ञा करीहै परंतु कौनसे श्लोकमें कौनसी
सिद्धी वर्णन करीहै सो कृपाकरके समझावो॥ तब श्रीगुसां-
ईजीनें आज्ञा करी साक्षात् सेवोपयोगी देहकी प्राप्ति जो सि-
द्धिसो पहिले श्लोकमें कहीहै तत्तल्लीलावलोकन जो सिद्धी
सो दूसरे श्लोकमें कहीहै और तद्रसानुभवरूपी जो सिद्धी
सो तीसरे श्लोकमें कहीहै ॥ और सर्वात्मभावरूपी जो सि-
द्धी सो चौथे श्लोकमें कहीहै और यमुनाजीको स्वरूप पद्-
गुणसंपन्न सो चौथे श्लोकमें कहीहै ॥ और भक्तिदातृत्वरू-
पी जो सिद्धी सो पांचमें श्लोकमें कहीहै ॥ और भगवत्तात्प-
र्यज्ञत्वरूपी जो सिद्धी सो छठे श्लोकमें कहीहै और भगवद्-
शीकरणत्व रूपी जो सिद्धी सो सातमें श्लोकमें कहीहै और
भगवद्रसपोषकत्वरूपी जो सिद्धी सो आठमें श्लोकमें क-
हीहै और जिनके ऊपर भगवत्कृपाहै और श्रीयमुनाजी कृ-
पाकरेहें विनकुं एकएक श्लोकमें अष्टसिद्धी दर्शन देवेंहें
ऐसे श्रीगुसांईजीनें आज्ञा करी तब वा पटेलकुं श्रीयमुना-
जीनें वैसेही दर्शन दीये जैसे श्रीगुसांईजीनें कहीहती तैसे
दर्शन वा पटेलकुं भये सो वे वैष्णव पटेल श्रीगुसांईजीके
ऐसे कृपापात्र हते ॥ वार्ता संपूर्ण ॥ वैष्णव ॥ ८६ ॥ ❀ ॥
श्रीगुसांईजीके सेवक एक ब्रजवासीकी वार्ता
सो वे ब्रजवासी श्रीनाथजीकुं परे कहेतो ॥ सो ब्रजवासी
गायनकी खिरकमें सेवा करतो हतो और एक सीधो
भंडारमेंसुं लेजातो हतो और आठ पेहरे गायनकी सेवा
मनलगायके बद्धत आछी करतो हतो ॥ एकदिन कोई

वैष्णवकुं श्रीगुसांईजी श्रीठाकुरजी पधराय देते हते सो वा ब्रजवासीनें देख्यो फेर एकदिन श्रीगुसांईजीकुं वा ब्रजवासीनें वीनती करी जो मोकुं श्रीठाकुरजी पधराय देवो ॥ वाही समय श्रीगुसांईजी न्हायके पधारते हते ॥ जब आगे एकपत्थर पढयो हतो ॥ वा पत्थरकुं श्रीगुसांईजीके खडाउकी ठोकर लगी सो दूरजाय पढयो और उहां वे ब्रजवासी ठाडो हतो ॥ श्रीगुसांईजीनें कही परेपरे ऐसे कहके श्रीगुसांईजी भीतर पधारे ॥ जब वो पत्थर ब्रजवासीनें उठाय लियो फेर वा ब्रजवासीनें मनमें ऐसो समझो ये मोकुं श्रीगुसांईजीनें श्रीठाकुरजी पधरायदीये और परेपरे श्रीठाकुरजीको नाम कहि दीयोहै ॥ ऐसो भोरो हतो सो वे पत्थरकुं ठाकुरजी मानके पधराय लेगयो फेर मनमें समझयो जो सीधोतो एक आवै सो परे कहा खावेगो ॥ और मैं कहाखाउंगो ऐसे समझके भंडारीसुं कही अब हमकुं दो सीधा देओ ॥ भंडारीनें दो सीधा दिये सो फेर जायके रसोई करी और ब्रजवासी भोरो बहुत हतो ॥ जब वानें दो पात्र करदीनी फेर कही आव भाई परे एक पातर तेरी और एक पातर मेरी जब श्रीठाकुरजी आये नहीं तब वो ब्रजवासी कहेनल्यो जो भाई तूं आयके अपनी पातर संभार ले ॥ जो बरोबर है के फेर फार है जो तूं नहीं आवेंगो तो मैं दोनो पातर तलावमें डार देउंगो तब श्रीठाकुरजी वाको शुद्ध भाव जानके और भोरो जानके पधारे और साक्षात्स्वरूप धरके जीमन लगे ॥ ऐसे नित्य कृपा करके पधारते ॥ एकदिन

श्रीगुसाईजीनें पूछी जो तूं दो सीधा कहा करेंहैं ॥ जव वानें कही जो आपने वो परे पधराय दीयोंहैं सो एकपा-
 तर वे खाय है और एक पातर में खाउंहुं ये वात सुनके श्री-
 गुसाईजी सुसकायके चुप कररहैं फेर एक दिन भंडारीनें वा
 ब्रजवासी सुं कही जो तुम सूरत गाममें जायके भेट ले
 आवो ॥ जव ब्रजवासीनें कही सूरत गाम काहा होवेहैं ॥ भं-
 डारीनें कही सूरत गाम सहेर है जव वा ब्रजवासीनें कही भे-
 टपत्र और प्रसादकी थेली देवो तो मैं सूरत जाउं ॥ जव
 उहांसुं प्रसाद और पत्र लेके और रसोई करके सूरतकी तै-
 यारी करी और कही जो भैया परे मैं तो सूरत जाउं गो और
 तूं आवेगो के नहीं आवेंगो ॥ जव श्रीठाकुरजीनें कही जो मैं
 आवुंगो जव वानें कही जो तेरे छोटे छोटे पांव हैं ॥ और
 छोटे छोटे हाथ हैं तूं कैसे चलसकेंगो जव श्रीठाकुरजीनें
 कही मैं थोडो थोडो चलुंगो ॥ और थोडीवार तेरे कधि-
 पर बैठुंगो ॥ ये बात ऋहिके श्रीठाकुरजी ब्रजवासीके साथ
 चले वे उहांते ब्रजवासी चले जव दो तीन कोस आये तव
 श्रीठाकुरजीनें कही मैं थक्योहुं ॥ जव वा ब्रजवासीके
 कांधा उपर बैठे जव थोरी दूर चले तव सांझ भई तव श्री-
 ठाकुरजीनें कही जो आज इहां सोपरहो फेर काल सूरत
 चलेंगे फेर उहां सोय रहे फेर सवारे उठे सो ऐसे ठिकाणे
 उठे जाहांसुं सूरत दीयकोश रही हती ॥ तव उहांतिं चले
 फेर सूरत आये उहां गाम बाहेर डेरा कीये और उहां श्री-
 ठाकुरजीकुं बैठायके वो ब्रजवासी पत्र और प्रसाद लग-
 यो ॥ गाममें वैष्णवनकुं पूछके दियो ॥ वे पत्र वांचके वै-

ष्णवननें विचार कियो जो एकदिनमें पत्र कैसे आयो होय-
 गो ॥ जब ये विचार कियो यामें भेद कछु अवश्य होयगो ॥
 तब वैष्णवननें वाकुं सामग्री दिवाई और एकदिनमें सब
 ठिकाने फिरके पांच हजार रुपैया एकठे करके और हुंडी
 करायके तब ब्रजवासीकुं दीनी ॥ सो ब्रजवासी लेके और
 परेकुं संग लेके उहांतें चले ॥ फेर रस्तामें आयके सोय
 रहे फेर सवारे उठके पहैर दिन चढयो गोपालपुरमें आये
 फेर भंडारीके पास गयो और दो सीधा मागे ॥ जब भं-
 डारीनें कही सूरत क्युं गयो नहीं जब वानें कही सूरत
 जाय आयोहुं पत्र और वस्त्र लायोहुं ॥ सो भंडारीकुं दीये
 ॥ जब भंडारीनें पांच हजारकी हुंडी और वस्त्र और वै-
 ष्णवनके कागद देखके चकित होयगयो ॥ जो एकरातमें
 कैसे गयो होयगो और कैसे आयो होयगो सो ये बात-
 की वीनती श्रीगुसाईंजीके आगे करी श्रीगुसाईंजी सुनके
 ऐसी आज्ञा करी जो ए सब श्रीनाथजीके काम है आज
 पीछे या ब्रजवासीकुं कछु काम मत बताईयो और जन्म
 सूधी दोय सीधा याकुं नित्य दीजियो और नित्य वा ब्र-
 जवासीकुं बुलायके श्रीगुसाईंजी परेकी बातें पूछो करते
 आज परेनें ये कही आज परेनें ये कही ऐंसे नित्य कन्या
 करे सो वे ब्रजवासी भोलो हतो जन्मसुं श्रीठाकुरजीकुं
 परे समझो करे ऐंसो कृपापात्र हतो ॥ वार्ता संपूर्ण ॥
 वैष्णव ॥ ८७ ॥ * ॥ ॥ ॥ ॥ ॥

श्रीगुसाईंजीके सेवक एक स्त्री पुरुष हते ति०
 सो वे स्त्रीपुरुष गरीब हते और नित्य लकडीको भारो ला-

यके गाममें वेचके निर्वाह करते और नित्य पैसा अधेला जो वचे सो धरराखते और कोई वैष्णव आवे बिनके संग महाप्रसाद वांटके लेते ॥ एकदिन अचानक आठ वैष्णव आये जब वा स्त्रीपुरुषनें विचार क्यो जो कहा करणो जब वा स्त्रीनें कही जो मेरी साडी पेहेरवेकी एक है सो तुम वेचके सामग्री लावो सो वे पुरुष सामग्री लायो ॥ तब वा स्त्रीनें किवार ढाकके रसोई करी और श्रीठाकुरजीकुं भोग धन्यो फेर वाके पतीसुं कही जो मैं कोठीमें वैठी हूं तुम भोगसरायके अनवसर करके वैष्णवनकुं पातर धरो वा पुरुषनें ऐसेही क्यो तब वैष्णव कहने लगे जो तुमारी स्त्री कहाहि तब वा वैष्णवनें कही स्त्रीको लाजकी स्वभाव बढत है जासुं बहार नहीं आवेहे ॥ वाकी प्रकृती बढी खराब है ऐसे वा पुरुषनें कही ॥ जब वैष्णव बोले वह आवेगी तो हम प्रसाद लेवेंगे याको कारण ये है ॥ वैष्णव है के नहीं हमकुं खबर कैसे पढे ॥ वैष्णव न होवे तो वाके हाथकी रसोई कैसे लेवे ॥ ये बात सुनके वो वैष्णव विचारमें पडगयो ॥ जब मंदिरमें मदनमोहनजी श्रीस्वामिनीजीसहित विराजते हते ॥ जब श्रीस्वामिनीजी बोल्ये श्रीठाकुरजीसुं कही जैसे द्रौपदीके चीर बढ़ाये हते तो या वाईके चीर बढ़ायते तुमकुं कहा हरकत है ॥ ऐसे कहेके श्रीस्वामिनीजीनें और श्रीठाकुरजीनें कोठीमें जायके वा लुगाईकुं दर्शन दिये ॥ ओर उहां वस्त्र पेहेराय दिये वे वाई हाथ जोडके बोली हे महाप्रसु हे महामंगलरूप हे शरणागतवत्सल हे अशरणशरण आपकुं ऐसो श्रम

मेरे लीयें भयो ॥ मैंनें आपकुं श्रम दियो और मैंनें ऐसो काम क्यो ऐसे आपकुं श्रम भयो सो मोकुं धिक्कारहै ऐसे कहिके वा बाईको हृदय भर आयो ये सुनके श्रीठाकुरजी बहुत प्रसन्न भये और अलौकिक वस्त्र दान क्ये ॥ जलमें भीनें होजाय और बहार सूके होये जाएं ॥ नीचोवनें और सुकावनें न परें ॥ ऐसे वस्त्र सदा वाके पास रहें कोईदिन घटे नहीं ॥ तब वे बाई बाहेर आयके वैष्णवकुं परोसन लगी तब वैष्णव प्रसन्न होयके प्रसाद लेन लगे फेर वे वैष्णव प्रसाद लेके बिदा होयके गये ॥ तबतें वा कोठीमेंतें कोईदिन अन्न खूटतो नहीं ॥ जब काढते तब भरी रहेती ॥ काहेतें श्रीठाकुरजीनें वा कोठीमें वा बाईकुं दर्शन दिये हते ॥ सो वे स्त्रीपुरुष श्रीगुसाईजीके ऐसे कृपापात्र हते ॥ वार्ता संपूर्ण ॥ वैष्णव ॥ ८८ ॥

॥ श्रीगुसाईजीके सेवक एक विरक्त तथा शेट आगरेमें रहेते तिनकी वार्ता ॥ सो वे विरक्त वैष्णव चुकटी मागके निर्वाह करते और श्रीठाकुरजीकी सेवा भलीभांतिसे करते ॥ और श्रीठाकुरजी वाके उपर बहुत प्रसन्न रहेते ॥ फेर कोईदिन वा शेटके वा विरक्त वैष्णवसुं मिलाप भयो ॥ तब वा शेटनें कही तुम श्रीठाकुरजी पधरायके मेरे घरमें रहो और तुम हम हिलमिलके सेवा करें सो तब विरक्तनें ऐसो क्यो वा शेटके घरमें जायके रह्यो ॥ और बहारकी जे सामग्री चहीती सो विरक्त खरीद लावतो ॥ एकदिन बजारमें नयो खरबूजा पहिली पहिली आयो हतो सो वे विरक्त वैष्णव खरबूजा लेने

लग्यो सो एक रुपैया खरबूजावालेनें कीमत करी हती सो विरक्त रुपैया देने लग्यो उहां बडी जातवालो आयो वो बोल्यो नें सवारुपैया देउंगो जब वैष्णव बोल्यो में देह रुपैया देउंगो ऐसे करते दोनोजनें सामा सामी बढे ॥ वो बडी जातवालो पांच बोल्यो तब वे वैष्णव दस बोल्यो जब वो बीस बोल्यो तब वैष्णव तीस बोल्यो जब वो चालीस बोल्यो ऐसे करते हजार रुपैया सूधी दोनो जनें बढगये ॥ जब वा वैष्णवनें हजार रुपैया में खरबुजा लियो फेर घर लेके गयो और खर्च लिखायो तोहुं वा शेठनें कछु पृच्छी नहीं ॥ के या खरबुजाके हजार रुपैया कैसे दिये एसो विश्वास वैष्णवके ऊपर हतो कछु मनमेंहुं ये बात नलाये फेर ठाकुरजीनें खरबूजा उठाय लियो और सिंहासन ऊपर खेलवे ल्यो जब उत्थापन भये तब खरबूजा शेठनें श्रीठाकुरजीके पास देख्यो तब शेठ बढत प्रसन्न भयो और श्रीठाकुरजीसुं वीनती करी जो खरबूजा मोकुं देवे तो समारके भोग धरुं तब श्रीठाकुरजीनें कही ये खरबूजा में काल आरोगुंगो ॥ ये खरबूजा मोकुं बढत प्रिय है ॥ ये सुनके शेठ बढत प्रसन्न भये और मनमें कही जो विरक्त धन्य हैं हजार रुपैया खरचते डन्यो नहीं सो वे विरक्त वैष्णव और शेठ ऐसे कृपापात्र हते जिननें हजार रुपैया खरचे तोहुं शेठके मनमें दोष न आयो सो वे दोनो ऐसे कृपापात्र भगवदीय हते ॥ वार्ता संपूर्ण ॥ वैष्णव ॥ ८९ ॥ ❀ ॥ ॥ ॥

॥ श्रीगुसांईजीके सेवक परमानंददास सोनी

तिनकीवार्ता ॥ सो परमानंददाससोनीकुं श्रीमद्भागवत और चार वेद और पुराण और सुबोधिनीजी सब जिबहाप्र हते और श्रीगुसाईंजी कथा वांचते सो नित्य परमानंददास मुनते और विनको हार्द सब समजते और कथामें जो कोई वैष्णव प्रश्न करतो तब श्रीगुसाईंजी आज्ञा करते के परमानंददासकुं पूंछलेउ तब श्रीगुसाईंजी ऐसी कृपा राखते हते ॥ जो कोई आयके पूंछते तो परमानंददास उत्तर दे शकते, फेर एकदिन पंडित चार आये श्रीगुसाईंजीके पास आये जब श्रीगुसाईंजी सेवामें न्हाएहते जब वे चार पंडितनकुं परमानंददास सोनीनें आदर दैके बैठाये ॥ फेर उहां चर्चा निकसी जो जगत सत्य है के असत्य है ॥ तब पंडितननें कही जगत असत्य है ब्रह्मके स्वरूपमें जगत कल्पना मात्र है ॥ जैसे डोरीमें सर्प जैसे सीपमें रूपो कल्पना मात्र है ऐसे जगत ब्रह्ममें कल्पना मात्र है ॥ जब परमानंद सोनीनें पूंछी जो जैसें डोरीमें सर्प और सीपमें रूपो कल्पना मात्र है सो दूसरे ठकाणे सर्प तथा रूपो देखे विना कल्पना नाहीं होवेहै ॥ ऐसो जो ब्रह्ममें जगत मिथ्याहै तो कल्पना करवेवाले मनुष्यने सत्य जगत कहा देख्यो है सो बतावो ॥ ये मुनके पंडित पीछें फिरगये सो परमानंददास सोनी ऐसे विद्वान हते जिनकुं श्रीगुसाईंजीकी वाणीपर अत्यंत विश्वास हतो सो परमानंददास ऐसे कृपापात्र हते जिनकुं सर्व शास्त्र हस्तामलक हते ॥ तिनकी वार्ता कहाताईकहिये ॥ वार्ता संपूर्ण ॥ वैष्णव ॥ ९० ॥ * ॥ ॥ ॥ ॥

॥ श्रीगुसांईजीके सेवक एक खंडनब्राह्मणकी ०
 सो श्रीनंद गाममें रहेतो हतो ॥ सो वह खंडनब्राह्मण शा-
 स्र पढ्यो हतो सो जितने पृथ्वीपर मतहै सबको खंडन
 करतो ऐसो वाको नेम हतो याहीतेँ सब लोगनने वाको
 नाम खंडन पाढ्यो हतो ॥ सो एकदिन श्रीमहाप्रभुजीके
 सेवक वैष्णवनकीमंडलीमें आयो सो खंडन करन लग्यो
 वैष्णवननेँ कही जो तेरे शास्त्रार्थ करनो होवै तो पंडिनके
 पास जा हमारी मंडलीमें तेरे आयवेको काम नहीं ॥ इहां
 खंडन मंडन नहींहै ॥ भगवद्दार्ताको काम है ॥ भगवद्वश
 सुननो होवै अथवा गावनो होवै तो इहां आवो तोड़ वानेँ
 मानी नहीं नित्य आयके खंडन करे ॥ ऐंसे वाकी प्रकृती
 हती फेर एकदिन वैष्णवनको चित्त बहुत उदास भयो ॥
 जब वो खंडनब्राह्मण घरमें सूतो तब चार जनेँ वाकुं सु-
 द्र लैके मारन लगे जब वानेँ कही तुम मोकुं क्यों मारो-
 हो ॥ जब चार जनेँनेँ कही तुम भगवद्धर्म खंडन करोहो ॥
 और भगवद्धर्म सर्वोपर है ॥ सर्व धर्मनतेँ श्रेष्ठ है ॥ केवल
 भगवत्परायण हैं ॥ भगवदर्पण क्यो हैं तन मन धन
 जिननेँ विनको कोई अर्थ वाकी रह्यो नहींहैं ॥ शास्त्रमें
 कहाहै जिननेँ आत्मनिवेदन क्यो है विनकुं कछु अर्थ
 वाकी रह्यो नहींहै ॥ सर्व सिद्ध भये हैं ॥ ऐंसे धर्मनकुं खं-
 डन करेँहैं जासुं तोकुं मार देवेँहैं ॥ ये सुनके खंडनब्राह्मण
 विन चार जनेँनेँ पावन पढ्यो ॥ और दूसरे दिन भगव-
 न्मंडलीमें आयके वैष्णवनके पावन पढ्यो और वैष्णवन-
 सुं वीनती करी के मोकुं कृपाकरके वैष्णव करी और वैष्ण-

वनकुं संग लैंके श्रीगोकुल आयके श्रीगुसांईजीको सेवक भयो और श्रीगुसांईजीके पास रहिके मार्गके अनुसार सब शास्त्र पढ्यो ॥ और भगत्सेवा करन ल्ययो और भगवद्गण गान करन ल्ययो और अपनो जन्म सफल करमान्यो ॥ सो वे खंडनब्राह्मण श्रीगुसांईजीकी कृपातें मंडन भयो और साकार ब्रह्मको स्थापन करन ल्ययो सो देवीजीव हतो सो आसुरीजीवनकी संगतीतें बाकीबुद्धी फिर गई हती बाकुं देवीजीव जानके श्रीठाकुरजीनें जोरसुं खेंचलीयो सो फिर मंडनब्राह्मण बाकी नाम भयो ॥ वार्तासंपूर्ण वैष्णव ॥ ९१ ॥ * ॥ ॥ ॥

॥ श्रीगुसांईजीके सेवक एक पटेलकी वार्ता ॥ सो वे पटेल गुजरातमें रहेतो हतो ॥ सो श्रीगुसांईजी गुजरातमें पधारे तब वह पटेल सेवक भयो हतो ॥ सो परामें रहेतो हतो ॥ और गाममें नित्य भगवद्दार्ता सुनवे जातो हतो ॥ गामके और पराके बीचमें एक कोसको रस्ता हतो ॥ सो नित्य वह पटेल भगवद्दार्ता सुनवे जातो हतो और एकदिन एकादशीको व्रत हतो सो भगवन्मंडलीमें जागरण भयो सो रातके दोबजे पाछे पटेल उहांसुं चलयो और रस्तामें आवते एकप्रेत मिल्यो वा प्रेतनें रस्ता रोक्यो ॥ जब पटेल पाछेफिन्योफेर आडो आयके प्रेतनें रस्ता रोक्यो ॥ जब वो पटेल बोल्यो जोतुं को नहै ॥ और क्युं चरित्र करेंहैं ॥ जब वो प्रेत बोल्यो मैं प्रेत हूं तोकुं खाउंगो ॥ तब पटेल बोल्यो क्युं खावेनहींहै ॥ जब प्रेतनें कही तेरे पास आवुंहुं ॥ परंतु आयो नहीं जाय है ॥ जब पटेल बोल्यो ॥ जो तूं मोकुं स्पर्श कर-

वैकुंठ सामर्थ्य नहीं है ॥ जब ये सुनके प्रेत दोब्बो और पटेलके पास आयो तब प्रेतके अंगमें अग्नीको दाह होवै लख्यो ॥ जब प्रेत पुकारवे लख्यो महापापी हतो ब्रह्मराक्षस हतो ॥ ये देखके वा पटेलके मनमें दया आई तब जललेके प्रेतपर छांटयो ॥ जब वो प्रेतकुं बोलवेकी शक्ती भई और भगवत् स्वरूपको ज्ञान भयो और विचार आयो जोये कोई महापुरुष है ॥ जब प्रेत कहेन लख्यो ॥ हे वैष्णवराज मैं तेरी शरणहुं मेरे अपराध क्षमा करो मेरो उद्धार करौ तब वा पटेलनें तलावमेंसुं जल लेके और अष्टाक्षर मंत्र पढके वा प्रेतके ऊपर दूसरीवार डाल्यो सो तत्काल वे प्रेतयोनीसुं सुक्त भयो और जय जय करतो वैकुंठ गयो सो वे पटेल वैष्णव श्रीगुसांईजीको ऐसो कृपापात्र हतो सो वे प्रेत भगवत्पार्षद होयके जिनके चरित्रनकुं वैकुंठमें गायो करतो ॥ वार्ता संपूर्ण ॥ वैष्णव ॥ १२ ॥ ❁ ॥ ॥ ॥ ॥

श्रीगुसांईजीके सेवक निष्किंचन वैष्णव ति०
 सो वे निष्किंचन वैष्णव स्त्री पुरुष मथुराजीमें रहेते हते ॥ सो आंबके दिन हते सो वे वैष्णव दो पैसाके आंब लेवे गयो सो एक टोकरा आंबको एक मालीकेपास हतो सो मालीनें कही आखो टोकरा एक रुपैयामें ल्यो तो देउं तब वा वैष्णवनें रुपैयामें वह टोकरा लेनो कन्यो और टोकरा लेके यमुनाजीके किनारे आंब धोये ॥ और आंब धोय धोयके एक एक आंब श्रीठाकुरजीकुं भोग धरते गये और श्रीठाकुरजी आरोगते गये ॥ जब सब

आंब आरोग चुके तब वा मालीकुं निष्किचन वैष्णवने कही जो रुपैया रोक नहीं हैं दश पंदरे दिनमें देउंगो ॥ तब मालीनें कही मेरे आंब पाछे देवो तब माली आंबले चलयो फेर एक दूसरो शेठ गाममें रहितो हतो वाके मनुष्यनें आंब लीये और शेठके घर लेगयो जब वा शेठनें आंबा लेके भोग धरन लययो जब श्रीठाकुरजीनें कही ये आंब तो मैं पेहेले अरोग्योहुं असुक वैष्णवनें मोकुं भोग धन्ये हैं तब शेठनें कही हेमहाराज आप रस्तामें कैसे आरोगो तब श्रीठाकुरजीनें कही जो श्रीगुसाईंजीकी वाणी सत्य करवेके लीये अरोग्योहुं श्रीगुसाईंजीनें बल्लभाष्टकमें कह्यो है ये मारग आपने आपकेलीये प्रकट कन्यो है ॥ कोई कछु वस्तु कोई ठेकाणें अर्पण करे है सो वस्तु आप साक्षात् वदनकमलमें आरोगोहो ऐसे मैं मारुहुं ॥ सो श्लोक ॥ प्रादुर्भूतेनभूमौत्रजपतिचरणांभोजसेवाख्यवर्त्मप्राकटयंत्यत्कृतं तैतदुतनिजकृतेश्रीहुताशेतिमन्ये ॥ यस्मादस्मिन्स्थितोयत्किमपिकथमपिकाप्युपाहर्तुमिच्छत्यद्वातद्गोपिकेशस्ववदनकमलेचारुहासेकरोति ॥ १ ॥ ऐसे श्रीगुसाईंजीनें कह्योहै जो कोई वैष्णव जा ठेकाणे कछु हमकुं समर्पेगो सो हम सब अरोगे ॥ ये सुनके वे शेठ बहुत प्रसन्न भयो और आंब उठायके प्रसादीमेंधरे और वा वैष्णवकुं बुलायो और वासुं पूछी जो तुमने आंब कसु लीय नहीं ॥ वानें कही रुपैया रोक नहीं हतो जासुं माली पाछो लेगयो ॥ तब शेठनें कही तुमनें आंब तो आरोगायलीये तब लेवेकी मतलब कहा रही ॥ जब वो वैष्णव बोल्यो आरोगवेवारे जाने के तुम जानौं ॥

॥ तब शैठ उठके वा वैष्णवके पांवन पच्यो और छातीसुं
 लगाय लीयो और कही श्रीठाकुरजीकी आज्ञा है तुम इहां
 महाप्रसाद लेवो ॥ तब वा शैठके घर वा निष्किचन वै-
 ष्णवने महाप्रसाद लियो सो निष्किचन वैष्णव ऐसो कृपा
 पात्र भगवदीय हते ॥ वार्ता संपूर्ण ॥ वैष्णव ॥ ९३ ॥ ❀ ॥
 ॥ श्री गु० से० नानचंद बनिया राजनगरमें रहेते
 हते तिनकी वार्ता ॥ सो वे नानचंद द्रव्यपात्र हते ॥ और
 श्रीगुसाईजीकुं पूर्णपुरुषोत्तम जाणते हते ॥ इतनेमें श्रीगो-
 कुलनाथजीको विवाह आयो तब नानचंदके ऊपर श्री-
 गुसाईजीनें कुंकुमपत्री लिखी ॥ जब नानचंदनें सब दे-
 शमें वैष्णवनकुं समाचार दिये ॥ सब वैष्णव गुजरातके गो-
 कुलनाथजीके विवाह ऊपर श्रीगोकुल आये ॥ सो जितने
 वैष्णव विवाह पर गये सवनके संग पांच पांच रुपैया भे-
 टके दिये और हजार रुपैयाकी हुंडी भेट पठाई ॥ सो सब
 लोग कहेवे लग्ये नानचंद लोभीहै एक हजार रुपैया भेट
 पठाईहै ॥ ये बात कोईनें श्रीगुसाईजीके आगे कही तब
 श्रीगुसाईजीनें आज्ञा करी जो नानचंदके अंतःकरणकी
 हम जानत हैं वाको भाव गुप्तहै ॥ लोगनके देखत हजार
 रुपैया पठायेंहैं ॥ परंतु दश हजार वैष्णवके संग पांच पांच
 रुपैया पठायेंहैं सो गुप्तरीतीसुं पचास हजार पठायेंहैं ॥ सो
 वाके अंतःकरणकी बात हम जानतेहैं ॥ सो वे नानचंद ऐसो
 कृपापात्र हते जिननें गुप्तरीतीसुं सेवा करी ॥ वार्ता संपूर्ण
 ॥ वैष्णव ॥ ९४ ॥ ❀ ॥ ॥ ॥ ॥ ॥ ॥
 ॥ श्रीगुसाईजीके सेवक एक डोकरीकी वार्ता ॥

सो वा डोकरीके माथे वालकृष्णजी विराजते हते॥ सो भलिभातिसुं सेवा करती हती सो एकदिन वा डोकरीको काल आयो सो डोकरीकुं साक्षात् मूर्तिमान् काल देखायो जब वा डोकरीने कालसो कह्यो अब मैंतो नहीं आहुं तब काल फिरगयो ऐस करके डोकरीने आठवेर कालकुं फेऱ्यो फेर कालने धर्मराजासुं कही मैं आठवेर पाछो फिर आयोहुं ॥ जब जाउंहुं तब भगवत्सेवामें लगी होवै ॥ और दूरसुं मोकुं आवतो देखके हाथसुं नाहीं करे ॥ फेर वाके शरीरमें ऐसो कछु तेज दीखे है के वाके पास मोसुं गयो नहीं जाय ॥ जब यमराजानें कही वे डोकरी तेरे दंडमें नहीं आवेगी येतो भगवद्भक्तहै ॥ कालके माथे पांव धरके भगवल्लीलामें पहांचेगी ॥ फेर एकदिन श्रीगुसांईजी राजनगर पधारे तब वा डोकरीने श्रीठाकुरजी श्रीगुसांईजीकुं पधराय दीये और देहत्यागके भगवल्लीलामें प्राप्त भई सो वे डोकरी कैसे हती जाने आपकी इच्छासुं देहत्याग करी ॥ वार्ता संपूर्ण ॥ वैष्णव ॥ १५ ॥ ❀ ॥ ॥

॥ श्रीगुसांईजीके सेवक एक डोकरीकी वार्ता ॥

सो वा डोकरी राजनगरमें रहती हती ॥ डोकरीके माथे श्रीगुसांईजीने श्रीठाकुरजी पधराय दीयेहते ॥ सो भली भातिसो सेवा करती हती ॥ सो वह डोकरी निष्कचन हती ॥ वाके घर चमचा नहीं हतो सो सामग्री सीरी करके नित्य भोग धरती ॥ एकदिन वो डोकरी सामग्री करसुकी हती ॥ तब ऐसी खबर भई के श्रीगुसांईजी पधारेहैं ॥ तब श्रीठाकुरजीकुं ताती सामग्री

भोग घरी और चमचाके ठिकाणे एक दातन धन्यो और श्रीठाकुरजीसों वीनती करी जो आप ये सामग्री दातनसुं सीरी करके अरोगेंगे में दर्शन करी आहुं जब श्रीठाकुरजीकी आज्ञा लेके गई फेर दर्शन करके आई दोचार वैष्णव वा डोकरीके संग आये फेर वा डोकरीनें भोग सरायके विन वैष्णवनकुं दर्शन करायके श्रीठाकुरजीके अनवसर कन्ये वैष्णव डोकरीके संग जो आये हते विननें दातन देख्यो जब अपने घरमें जायके कोईनें एक कोईनें दोय कोईनें चार कोईनें पचास कोईनें सो दातन श्रीठाकुरजीकुं भोग धन्ये सो ऐसे करते बहूत लोग घरवे लगे दोचार दिन पीछे एक वैष्णवके घर चाचाहरिवंशजी आये सो दातन भोग धन्ये देखे जब पूछी ये दातन क्युं भोग धन्येहें तब वा वैष्णवनें कही और सब वैष्णव धरेंहें ॥ जब चाचाजीनें श्रीगुसाईंजीके पास सब वैष्णवनकुं एकट्टे कन्ये और दातनकी पूछी सबनें कही वा डोकरीके घर देखके हम सबननें धन्ये हैं जब चाचाजीनें वा डोकरीकुं पूछी जब डोकरीनें कही मेरे घर चमचा नहीं हतो सो मोकुं दर्शनकी उतावल हती सो मैंनें एकदिन एक दातन चमचाके ठिकाणे धन्यो हतो ॥ वादिन इन वैष्णवननें देख्यो है ॥ तब श्रीगुसाईंजीनें आज्ञा करी ये डोकरीनें तो ठीक कन्यो और तुमनें तो देखादेखी करी ॥ सो वाजवी नहीं ॥ जासुं वैष्णवकुं भगवत्सेवाकी रीती पूछके और समझके करनी ॥ देखादेखी करनी नहीं ॥ देखादेखी करे तो भगवत्सेवामें कहे जो प्रतिबंधहें सो

होवै और समझके करतो भगवत्सेवामें कहेंहैं सो फल
होंवै ॥ जासुं वैष्णवकुं सेवाकी रीति पूछके करनी ॥ सो
वे डोकरी जो सेवाकरती सो पूछके और विचारके करती
सो वा डोकरी ऐसी कृपापात्र हती ॥ वार्ता ॥ सं० वै० ९६
॥ श्रीगुसाईजीके सेवक एक भगवदीय और
एक तादृशीकी वार्ता—सो वे गुजरातके वासी हते ॥ जि-
ननें आपुसमें परीक्षा लीनी ॥ सो भगवदीय वैष्णव राज-
नगरमें रहते हते ॥ और तादृशीवैष्णव धौलकामें रहते
हते ॥ और एक दूसरेकुं मिलवेकुं मन बहुत करते हते सो
एक समय भगवदीयकी बेटीको विवाह आयो तब ता-
दृशी वैष्णवकुं कुंकुमपत्री लिखी जब तादृशी वैष्णवजा
समय कन्यादानको समय हतो तब भगवदीयके घर आये
ता समय भगवदीय लौकिककार्य छोडके और तादृशी
वैष्णवकुं मिले और घरमें लायके न्हायके महाप्रसाद
लेवायके और बिनकुं सुवायके फेर कन्यादान करवेकुं
बैठे ॥ फेर दूसरे दिन जब उठवेको समय भयो तब ता-
दृशी वैष्णव श्रीठाकुरजीके मंदिर आगे सूतेहते फेर दूसरे
दिन भगवदीय वैष्णव न्हायके एक पहेर ठाडे रह्ये परंतु
वा तादृशीकुं जगायो नहीं ॥ मनमें ये जान्यो के इनकुं
कैसे जगायो जाय ॥ और तादृशी जानके सोय रहे ॥
जब पहेर दिन चढ्यो जब जानके उठे जब तादृशीनें
पूछी तुम कबके न्हायेहो जब वा भगवदीयनें कही अबी
न्हायोहुं ॥ जब वो तादृशी मनमें समझ्यो याके भगव-
दीयपनेंमें कसर नहींहै ॥ फेर तादृशी आपने गाम धौ-

लका गयो फेर तादृशी वैष्णवको लग्न भयो ॥ तब राज-
नगरसुं भगवदीय वैष्णवकुं धौलका बुलाये वाही समय
वरघोडो पर्णवेकुं चढ्यो हतो ॥ वाई समय भगवदीय जाय
पहोंच्यो ॥ तब वे वैष्णव घोडा ऊपरसुं उतरके और वि-
नकुं घरमें लेगये और न्हावाय घोवाय महाप्रसाद लेवा-
यके फेर आयके परणवेकुं बैठे सो वे भगवदीय वैष्ण-
वनें या रीतिसुं परीक्षा लीनीऔर मनमें कह्यो याके ता-
दृशीपणामें कसर नहीं है सो वे दौउ वैष्णव ऐसे कृपापात्र
हते जिननें एक दूसरेकेलीये लौकिक कारज छोडदियो
और देहकुं अनित्य जानके भगवदीयकोमिलाप मुख्य
राख्यो ॥ वार्ता संपूर्ण ॥ वैष्णव ॥ ९७ ॥ ❀ ॥ ॥

॥ श्रीगुसाईंजीके सेवक एक पटेलकी वार्ता ॥

सो वह पटेल वैष्णव राजनगरमें रहेतो हतो ॥ वा पटेल
वैष्णवके दो बेटा हते और एक स्त्री हती और बडेबेटाकी
दोय स्त्री हती और छोटे बेटाकी एक स्त्री हती ऐसे सात
मनुष्य श्रीगुसाईंजीके शरण आये और श्रीठाकुरजी प-
धरायके सेवा करन लगें ॥ तब लजनेनको मन तो श्रीठा-
कुरजीमें लग्यो हतो और एक बडेबेटाको मन लौकिकमें
बहुत हतो ॥ सो कछु भगवत्संबंधी कार्य करतो नहीं हतो
और लौकिकमें तद्रूप होय रह्यो हतो एकदिन वाके पि-
तानें एक वैष्णवसुं कही जो याको मन प्रभूमें लगे तो
आछो तब वा वैष्णवनें कही जब श्रीगुसाईंजी कृपा क-
रेंगे तब लगोगो फेर बहुत दिन बीते एकदिन वा वैष्णव
वा पटेलकी दुकानपर गयो और वाको बडो बेटा चोप-

डामें नामो लिखतो हतो ॥ सो दो तीन घडीसूधी वैष्णव
 बैठरह्यो ॥ परंतु वा पटेलके बडे बेटानें कछु वैष्णवकुं
 बोलायो नहीं ॥ जब वा वैष्णवनें जायके वाके कानमें
 कही जो ऊठ चेत ॥ तीन दिन पीछे तेरो मृत्यु आयो
 हैं ॥ ऐसे कहेके वो वैष्णव चलयो गयो ॥ सो वाको चित्त
 उदास होय गयो दुकान बंद करके सोय रह्यो ॥ कछु
 खावेमें पीवेमें मन, न ल्यो वैद्यको औषध करे तोहुं ल्यो
 नहीं फेर पितासो कही अमके ठकाणे वैष्णव रहे है वाकुं
 बुलाय लावो ॥ वाकुं जब बुलायवे गये तब वो वैष्णव
 आनाकानी करके दोदिन आयो नहीं ॥ तीसरे दिन
 आयो जब वाकी नाडी देखके कही जो तुमारे दोघडीमें
 मृत्यु है कोई दूसरो तुमकुं आवरदा देवे तो बचोगे ॥
 वानें सब घरकेनसुं पूंछी तब कोईनें आवरदा देनी कबूल
 करी नहीं फेर वो पटेलको बेटा रोयके कहेवे ल्यो हेवै-
 ष्णव में तेरी शरण हूं ॥ तुम मेरी रक्षा करो ॥ जब वा
 वैष्णवनें कही तूं नित्य भगवत्सेवा और भगवत्स्मरण
 और भक्तकथामें चित्त राखे तो तेरो काल फिर जाय-
 गो ॥ तब वानें हाथ जोडके कही अब जो जीवतो रहूं तो
 दिवस रात भगवत्सेवा तुमारी कृपातें करूं ऐसो कह्यो ॥
 जब वा वैष्णवनें आशीर्वाद दियो ॥ तब वे मर्यो नहीं ॥
 फेर भगवत्सेवा करन ल्यो ॥ जाकुं भगवत्सेवामें ऐसी
 आसक्ती भई जैसी लौकिकमें हती ॥ जासुं दशगुणी से-
 वामें भई सो वे पटेलवैष्णव ऐसो कृपापात्र भयो ॥ वार्ता
 संपूर्ण ॥ वैष्णव ॥ ९८ ॥ * ॥ ॥ ॥ ॥

॥ श्रीगुसांईजीके सेवक मा वेटाकी वार्ता ॥
 सो वे मा वेटा तीर्थ करवेकुं गये सो तीर्थ करते करते
 श्रीगोकुल गये ॥ सो श्रीगुसांईजीके दर्शन साक्षात् पूर्ण-
 पुरुषोत्तमके भये तव विन मा वेटानें वीनती करी हमकुं
 सेवक करौ तव श्रीगुसांईजीनें विनको कृपा करके नाम
 निवेदन करायो ॥ और श्रीगुसांईजीकी आज्ञा लैके श्री-
 नाथजीके दर्शन कर आये परंतु श्रीगुसांईजी विना एक
 दिन रहे न शकते ॥ वा वेटाकी ऐसी आसक्ती श्रीगु-
 सांईजीमें भई ॥ फेर ऐसे कितनेक वर्ष श्रीगोकुलमें श्री-
 गुसांईजीके पास रहेते तव श्रीगुसांईजीनें आज्ञा करी अब
 देशमें जाओ तव विननें कही महाराज आपके दर्शन
 विना कैसे रह्यो जाय ॥ तव श्रीगुसांईजीनें विनकुं
 ऐसी स्वरूप पधराय दियो जो आप वा स्वरूपसुं
 नित्य दर्शन देवें और बातें करें ॥ और भोजनकरें और
 शृंगार सेवा करें ॥ ऐसी रीतीसुं वे मा वेटा जन्मपर्यंत
 श्रीगुसांईजीके स्वरूपकी सेवा घरमें कर्ते और कछु ज-
 न्मपर्यंत आसक्ती ससारमें जिनकी भई नहीं ॥ वा स्व-
 रूपमें आसक्त रहे और वेगुप्त रीतीसुं सेवा करते कोईकुं
 खबर न पढीकें जो विनके घर श्रीठाकुरजी विराजते हैं
 ॥ ऐसे जन्मपर्यंत गुप्त रीतीसुं सेवा करी ॥ वे मा वेटा
 ऐसे कृपा पात्र भगवदीय हते ॥ वार्ता संपूर्ण ॥ वैष्णव ॥ १९ ॥
 ॥ श्रीगुसांईजीके सेवक देवजीभाई पोरबंदरमें
 रहेते हते तिनकी वार्ता-सो वे देवजी भाई लुवाणा
 वैष्णव हते ॥ सो नित्य भगवद्वाता सुनवेकुं जाते हते ॥

सो एक दिन देवजीभाईकुं ज्वर आयो सो सात दिन सूधी प्रसाद लेवायो नहीं और न्हायेहुं नहीं उठये हुं नहीं सातमें दिन सब वैष्णव मिलके देवजीभाईके घर आये और विन वैष्णवनकुं आये जानके देवजी भाईकुं अपार हर्ष भयो ॥ और आनंदके आवेशसुं नृत्य करण लगे ॥ आनंदके आवेशसुं ज्वर गयो और सर्व वैष्णवननें प्रसन्न होयके कहि जो कल्ल मागो ॥ जब देवजीभाईनें कही भोकुं जन्मपर्यंत तुमारे भगवदीयको सत्संग न छूटे ये मागयो सो वे देवजीभाईकी सत्संगमें ऐसी आसक्की हती जैसी सत्संगमें वृत्रासुरकुं हती ॥ चदर्थी ॥ लोक ॥ अमोत्तमश्लोकजनेषुसख्यंसंसारचक्रेअमृतःस्वकर्मभिः ॥ त्वन्माययात्माऽत्मजदारगोहेष्वासक्तचित्तस्य ननाथश्रूयात् ॥ १ ॥ वार्ता संपूर्ण ॥ वैष्णव ॥ १०० ॥ ❀

श्रीगुसाईजीके सेवक स्त्री पुरुष राजनगरवासी की वार्ता—सो वे स्त्री पुरुष राजनगरमें श्रीठाकुरजीकी सेवा करते हते ॥ दिवस रात जिनकी वृत्ती श्रीठाकुरजीमें हती ॥ और वैष्णव आये गयेको सत्कार बहुत करते ॥ ता पाळे एक समय दुष्काल पडयो अन्न बहुत महंगो हतो ॥ घास मिलतो नहीं हतो सो एकदिन वा वैष्णवके घर गेहुं खरीद लाये हते ॥ सो घरके चोकमें डारे हते ॥ सो एक गाय दूबरी बहुत हती ॥ सो आयके खावे लगी ॥ जब वे गाय हाकेसां जाय नहीं ॥ जब वा वैष्णवकी स्त्रीनें गाय हातसुं सरकाई जब गाय पडगई सो गायके प्राण छूट गये ॥ वा वैष्णवकुं बहुत पश्चात्ताप भयो ॥ सब वैष्णवननें वाके माथे हत्याको दोष देके दूर कन्यो ॥ तब

वा स्त्री पुरुषनें अन्नजल्ल्याग कियो और प्राण छोडदेवें
 ऐसो विचार कियो ॥ दो दिन पीछे श्रीगोकुलनाथजी
 राजनगर पधारे ॥ सब वैष्णव दर्शनकुं गये ॥ तब या
 बातकी श्रीगोकुलनाथजीकुं खबर परी जब श्रीगोकुल-
 नाथजी परमदयालु अशरणशरण भक्तवत्सल दीनबंधु
 पतितपावन ऐसे आपकोविरद विचारके या वैष्णवकुं
 बोलायो ॥ वाहुं सब बात पूछी और दूसरे वैष्णवनकुं
 पूछी ॥ सब वैष्णवनकी बात सुनके ऐसी आज्ञा करीके
 याके साथे हत्या नहीं है जब वा वैष्णवकुं आज्ञा करीके
 तूं जायके सेवा कर और निष्किचन वैष्णवकुं बुलायके
 प्रसाद लेवाय जब वा वैष्णवनें ऐसे कन्यो फेर श्रीगोकु-
 लनाथजीनें वा वैष्णवके हाथको जल अरोगे सो वे वै-
 ष्णव ऐसो कृपापात्र हतो ॥ अवगुण छिपायो नहीं ॥
 वार्ता संपूर्ण ॥ वैष्णव ॥ १०१ ॥ ❀ ॥ ॥ ॥
 ॥ श्रीगुसाईंजीके सेवक दोउ पटेल राजनगरमें
 रहते तिनकी वार्ता-सो वे दोनोंभाईविननें भाईलाको-
 ठारीके घरमें श्रीगुसाईंजीके पास नाम पाये हते ॥ और नि-
 त्य भगवद्वार्ता सुनवे जाते ॥ और विनकेपर ऐसी कृपा हती
 जो भगवद्वार्ता सुनते सो कंठ होय जाती ऐसे करते करते
 बहुत दिनमें सुबोधनीजी सर्व कंठाग्र होय गई ॥ फेर वे
 दोउभाई श्रीगोकुल आय रहे और श्रीनवनीतप्रियाजीके
 दर्शन किये ॥ फेर श्रीगुसाईंजीकी आज्ञा लेके ब्रजयात्रा
 करवे गये ॥ और फेर श्रीनाथजीके दर्शन करके श्रीगि-
 रिराजकी तरेटीमें कोठडी लेके रहे ॥ और नित्य श्रीनाथ-

जीकी सेवा करते और भगवद्दार्ता करते और भगवद्दार्ताके आवेशमें आवते तब श्रीनाथजी आयके सुनते ॥ और कहते और श्रीनाथजीकुं दोउभाई विना रह्यो नहीं जाय जैसे गायकुं बछड़ा विना रह्यो नहीं जाय ॥ या रीतीसुं श्रीनाथजी विनके पाछे फिरते ॥ सो वे दोउ भाई पटेल श्रीगुसाईंजीके ऐसे कृपापात्र हते ॥ वार्ता संपूर्ण ॥ वैष्णव ॥ १०२ ॥ ॥ ॥ ॥ ॥ ॥
 ॥ श्रीगु०से० एक श्रोता वक्ता दोनोनकी वार्ता ॥
 सो वे श्रोता वक्ता अपने देशमेंसुं श्रीगोकुल गये सो श्रीनवनीतप्रियाजीके दर्शन करे और श्रीगुसाईंजीके सुखारविंदसुं कथा सुनवे लगे ॥ और सुनके दिवस रात भगवद्दार्ता कन्यो करते ॥ सो भगवद्रसमें ऐसे लीन होयजाते ॥ पांच पांच सात सात दिन विनकुं देहकी छुट्टी न रहेती ॥ ऐसे भगवदावेशयुक्त होयजाते ॥ सो कोईदिनमें विन दोउ जनेनकी देह छूटी ॥ जब अग्नि संस्कार वैष्णवननें कन्यो तब एक श्रोता वैष्णवके हाडकानमें छेद देखे तब वैष्णवननें श्रीगुसाईंजीकुं वीनती करी जो महाराज या श्रोता वैष्णवके हाडनमें छेद क्युं पढगये ॥ तब श्रीगुसाईंजीनें आज्ञा करी जो या वैष्णवकुं भगवद्दार्ता सुनवेकी ऐसी आतुरता हती जो याके रोम रोममें श्रवण होयजाते ॥ और भगवद्दार्ता सुनवेकी उत्कंठा रोम रोममें होजाती ॥ भगवद्दार्ता सुनवेकी ऐसी आतुरता चाहिये ॥ ये बात सुनके वैष्णव बहुत प्रसन्न भये ॥ सो वे श्रोता वक्ता ऐसे कृपापात्र हते ॥ वार्ता संपूर्ण ॥ वैष्णव ॥ १०३ ॥ ❀

॥ श्रीगुरुसाईजीकं सेवक एक बनिया ति० ॥

सो वह बनिया वैष्णव गुजरातमें रहेते हते ॥ सो श्रीठाकुर-
जीकी सेवा भली भांतिसुं करते और वैष्णव आवते तिनकी
टहेल भली भांतिसुं करते और घरमें भगवद्दार्ता होती और
वाके गाममें देवीको मंदिर हतो सो वे देवी वाके घर भ-
गवद्दार्ता सुनवेहुं आवती और कोई देखतो नहीं हतो ॥
और ये वैष्णव देखतो ॥ सो एकदिन वा वैष्णवके घर वै-
ष्णव आये तव वरसाद बहुत भई हती ॥ लकडी सब भिज
गई हती ॥ रात बहुत गई हती ॥ सो वा वैष्णव लकडी ले-
वेहुं चलयो ॥ रस्तामें देवीको मंदिर हतो ॥ अंधारी रात
हती सो देवी दरवाजामें बाहेर निकलके ठाडी हती देवीनें
कही वैष्णव कहां जाओहो ॥ जव वा वैष्णवनें कही लकडी
लेवे जाउहुं ॥ जव देवीनें कही अंधारी रात और वरसाद
पडेहै लकडी कहां हंडोगे ॥ और मेरे कमाड नये करनेहैं
जासुं एकझूनो कमाड उतार लेजाओ ॥ जव वा वैष्णवनें
एक कमाड उतार लियो और घरमें टुकटुक करके लेगयो
॥ और काम चलायो सब सामग्री करी और वैष्णवनहुं
महाप्रसाद लेवायो ॥ वा वैष्णवके परोसमें एक ब्राह्मण
रहेतो हतो वा ब्राह्मणकी स्त्रीनें वा वैष्णवकी स्त्रीसुं पूछी जो
तुमारे लकडी छाणा सब भीजगये वरसादमें तुम लकडी
कहांसुं लाये ॥ वा स्त्रीनें कही हमतो देवीके कमाड उतार
लायेहैं ॥ फेर दूसरे दिन वा ब्राह्मणकी स्त्रीनें अपने पतिसुं
कही देवीके कमाड तुमहुं उतार लावो ॥ तव वा ब्राह्मण
देवीके कमाड रातकुं उतारवे गयो ॥ जव वाके कमाडसुं

हाथ चोट गये सो हाथ छूटे नहीं वे ब्राह्मण तो बहुत दुःखी भयो ॥ और एक पेहर सूधी ठाडो रह्यो ॥ कछु उपाय लगे नहीं ॥ जब वा ब्राह्मणकी स्त्री पतीकुं दंडवे गई उहां जायके देखे तो पतीकी ये व्यवस्था भईहै ॥ तब वाकी स्त्रीने कमाडकुं पकडके पतीके हाथ छुटावन लगी जब स्त्रीके हाथदंड चोट गये ॥ जब वे स्त्रीपुरुष दोनों रोवन लगे और देवीकी प्रार्थना करन लगे ॥ सो आखीरात रोयो करे ॥ जब दोघडी रात रही तब देवी बोली जो तुम भेरे दो कमाड नये कराय द्यो और तुमारे परोसमें बनिया वैष्णव रहे हैं वाके घर एक भारो लकडीनको नित्य पहोंचावो तो तुमकुं छोडूं ॥ जब वा स्त्रीपुरुषने ये बात कबूल करी ॥ फेर वे ब्राह्मण ब्राह्मणी घरमें आये नये कमाड करायके देवीके मंदिरकुं लगाये और बनिया वैष्णवके घर लकडीको भारो नित्य पोहोंचावन लगे ॥ ऐसे करत करत चातुर्मास बीत गयो और बनिया वैष्णवके घर लकडा बहुत होयगये तब वा बनिया वैष्णवने ब्राह्मणकुं कही अब लकडी मत लाव ॥ मैं देवीकुं कहंगो तब वा बनिया वैष्णवने देवीसों कही ॥ जो अब या ब्राह्मणकुं छोड द्यो तब देवीने छोडदियो तब वा ब्राह्मणने बनिया वैष्णवकुं कही जो देवी तुमारो कह्यो मानेहैं याको कारण कही ॥ तब वा बनियाने कही जो वैष्णवधर्म ऐसोहीहै तब वा ब्राह्मणने कही हमकुं वैष्णव करौ ॥ तब बनियवैष्णवने वा ब्राह्मणकुं श्रीगोकुल पठायो तब वे स्त्रीपुरुष श्रीगोकुलमें जायके श्रीगुसाईजीके सेवक भये और श्रीनाथजीके द-

शन करके और सेवा पधरायके फेर देशमें आये सो वे
 बनियावैष्णवके ऊपर श्रीगुसाईजीकी ऐसी कृपाहती ॥
 जिनसुं श्रीठाकुरजी बोलते चालते ऐसे परम कृपापात्रहते
 ॥ वार्ता संपूर्ण ॥ वैष्णव ॥ १०४ ॥ ॥ ॥ ॥
 ॥ श्रीगुसाईजीके सेवक एक वेश्याकी वार्ता ॥
 जाको माधवदाससों स्नेह हतो ॥ वा वेश्याकुं जबसुं मा-
 धवदासनें त्याग करीतवतें वे लृण और टिकडा खाती
 हती ॥ और घी नहीं खाती हती ॥ और शाक दाल
 चावल तेल विगरे खाती नहती ॥ ऐसे करते बारें बरस
 बीते ॥ तब श्रीगुसाईजी पधारे जब वह वेश्यादर्शनकुं गई
 और श्रीगुसाईजीके मनुष्यनसों कही जो श्रीगुसाईजीकुं
 बीनतीकरौ मोकुं शरणलेंवें ॥ मनुष्यननें कही जो श्रीगु-
 साईजी तुमकुं शरण नहीं लेंवेंगे जब वेश्यानें अन्न
 जल छोड दियो और प्राण छोडवेको संकल्प क्यो ॥
 दोदिन भये जब वानें अन्न जललियो नहीं ॥ तब उ-
 हाकि वैष्णवननें श्रीगुसाईजीसों बीनती करी जो जादि-
 नतें माधवदासजीनें वाको त्याग कियो है वादिनतें
 यानें वेश्यापनो छोडचोहै और वादिनसुं नोन टिकडा
 खायहै और आपके पधारवेकी बाट देखे है ॥ बारें वर्ष
 भये हैं और आपने वाकुं शरणलेंवेकी नाहीं कही है ॥
 जासुं वह देह छोडे है ॥ यातें आप कृपाकरके वाकुं
 शरणलेंवेंतो ठीक ॥ सब वैष्णवनकी बीनती सुनके श्री-
 गुसाईजीनें आज्ञाकरी जो वाकुं अबी बुलावो और वाकुं
 शरण लेंगो ॥ तब वा वेश्याकुं वैष्णव बुलायलाये और

श्रीगुसाईजीनें कृपा करके नाम निवेदन करायो और भगवत्सेवा पधराय दीनी ॥ तवतें वेश्या श्रीमदनमोहनजीकी सेवा करन लगी और त-हेत-हेके शृंगार और सामग्री करके श्रीमदनमोहनजीकुं अंगीकार करावन लगी ॥ फेरकितनेकदिन पीछे श्रीगुसाईजीकी कृपातें श्रीमदनमोहनजी साबुभाव जनावन लगे ॥ सो वे वेश्या ऐसी परम कृपापात्र भगवदीय हती ॥ वार्तासंपूर्ण ॥ वैष्णव ॥ १०५ ॥ ❀ ॥ ॥ ॥ ॥ ॥

॥ श्रीगुसाईजीके सेवक पटेल वैष्णवकी वार्ता सो वे पटेल गुजरातमेंतें एक संग श्रीगोकुल जातो हतो सो वा संगमें पटेल गयो रस्तामें घास खोद लावे और बेचके निर्वाह करे ॥ सो श्रीगोकुल गयो और घास खोदके दरात बेचके श्रीगुसाईजीकुं भेट करी ॥ श्रीगुसाईजीतो अंतरयामी हैं तब वा पटेलकुं बुलावें और पास बैठवें तब दूसरे वैष्णवननें कही यामें कहा गुण है याकुं बुलावोहो तब श्रीगुसाईजीनें आज्ञाकरी यानें सर्वस्व अर्पण कऱ्यो है ॥ जासुं श्रीठाकुरजी याके उपर बहुत प्रसन्न हैं ॥ दो दिनसूधी मूरख्यो रह्यो और हातनसुं घास खोद लायो जब दरात लीनी कोईकी आशा नहीं राखे है ऐसे निष्किचन वैष्णव हमकुं बहुत प्रिय हैं ॥ सो श्रीगुसाईजीनें सर्वोत्तमजीमें श्रीमहाप्रसुजीको नाम कऱ्यो है सो ॥ स्वार्थोज्झिताऽखिलप्राणप्रियः ॥ याकोअर्थसंपूर्ण स्वार्थ जिननें त्याग करयो हैं ऐसे जो वैष्णव है प्राणनसों प्रिय जिनकुं सो वे पटेल श्रीमहाप्र-

शुजीकुं प्राणनसों प्यारे लगेहैं ॥ ऐंसेनके हृदयमें श्री-
 ठाकुरजी विराजे हैं जायुं याके भाग्यकी कहा बडाई
 करनी ॥ सो पटेल वैष्णव ऐंसी कृपापात्र हतो ॥ वार्ता
 संपूर्ण ॥ वैष्णव ॥ १०६ ॥ ॥ ॥ ॥

॥ श्रीगुसांईजीके सेवक वेणिदास और दामो-
 दरदासतिनकी वार्ता ॥ सो वे दोनो भाई राजनगरमें
 कपडाखरीद करने गये ॥ उहां श्रीगुसांईजीके सेवक भये
 और श्रीगुसांईजीकुं पधरायके सूरत गाममें लाये और
 सब घरके मनुष्यनकुं नाम निवेदन कराये फिर सब
 कुटुंब लैके ब्रजयात्रा गये और ब्रजमें श्रीठाकुरजी प-
 धरायके सेवा करन लगे और कुटुंब सगरो देशमें पाछे
 पठायो और वे दोउ भाई उहां रहे ॥ सांझ और सवार
 और मध्यान श्रीगुसांईजीकी खवासी करते और रसोई
 करते और श्रीठाकुरजीकी सेवा करते ॥ एक दिन श्री-
 ठाकुरजी प्रसन्न होयके आज्ञा किये जो कछु मागो तव
 विन दोउ भाईनने कही जो हरी गुरु वैष्णव तीनोंके
 ऊपर हमारो सरखो भाव रहें और तीनोंके दास हम
 होयके रहें ये मागो तव श्रीठाकुरजी प्रसन्न होयके आज्ञा
 दीनी जो ऐंसेही होयगो तव ऐंसे करते पांच सात वर्ष
 उहां रहे फिर विनके बेटानकुं द्रव्य बहुत मिल्यो तव
 विनके बेटा कुटुंब सहित ब्रजमें आयके विन दोउ भा
 ईनकुं और श्रीठाकुरजीकुं सूरत गाममें पधराय लाये
 सब मिलके सेवा करन लगे हरी गुरु वैष्णवकी सेवा सि-
 द्ध होवै लगी इच्छा आवे जैंसे मनोरथ करन लगे सोवे

दोनों भाई ऐसे कृपापात्र भगवदीय भये और जैसे जो मनोरथ करते श्रीठाकुरजीकुं पूछके करते और संसारमें आसक्त न हते द्रव्यमें जिनको चित्त नहीं हतो केवल श्रीगुसांईजीके चरणारविंदमें जिनको चित्त हतो इनके भाग्यकी बहोत बढाई कहांताई कहिये ॥ श्रीगुसांईजी जिनकी सराहना करते ॥ वार्ता संपूर्ण ॥ वैष्णव ॥ १०७ ॥

॥ श्रीगुसांईजीके सेवक एक ब्रजवासीकी वार्ता एक समय श्रीगुसांईजी द्वारका पधारे सो जामनगरमें एक बनिया सो जोडा बेचतो सो बाकी दुकानपर ब्रजवासी जोडा ल्वे गये सो जोडालिये और बाकुं पैसा देवे ल्यो जब वा बनिया और काम ल्यो हतो तब वा ब्रजवासीकी बात सुनी नहीं ॥ तब वा ब्रजवासीने वा बनियाकुं लात मारी और पैसा दिये ॥ फेर दूसरेदिन वा बनियाने वा ब्रजवासीकुं देख्यो ॥ जब बनियाके मनमें आई जो मैं देवीको उपासी हुं और जाकुं कहूं जोमरजा सो मनुष्य मरजायहै ॥ या ब्रजवासीकुं काल्ह मैंने मरजायवेको शापदियोहतो सो ये मर न गयो ॥ याको कारण कहा ॥ तब वा बनियाने अपनी देवीकुं पूछी जो वह ब्रजवासी मर्यो नहीं याको कारण कहा ॥ तब देवीने कही येतो वैष्णव है यासुं तो मैं डरपुई वैष्णवसुं तो ब्रह्मारुद्रशेषलक्ष्मी इत्यादिक सब डरपेहैं तब वा बनियाने कही मैंहुं वैष्णव होउंगो ॥ फेर जायके वा ब्रजवासिसों मिलके श्रीगुसांईजीके शरण गयो नामनिवेदन करके रीतिभांती शीखके श्रीठाकुरजी पधरायके सेवा

करन लग्यो ॥ सो वे ब्रजवासी श्रीगुसांईजीको ऐसो कृपापात्र हतो ॥ जिनकुं देवी प्रतिबंध न करसकी ॥ वार्ता संपूर्ण ॥ वैष्णव ॥ १०८ ॥ ॐ ॥ ॥ ॥ ॥

॥ श्रीगुसांईजीके सेवक एक बनियाकी वार्ता ॥ सो वे बनियादेवीकी उपासना छोडके ब्रजवासीके संगतें वैष्णव भयो तवतें जोडावेचनेको धंदा छोडदियो जब वाकुं दशपंधरे दिन सेवा करते भये हते ॥ वाकुं एक ब्राह्मण वैष्णव मिल्यो ॥ सो वह बनिया वैष्णव अपने घर लायो ॥ और आदरसत्कार कन्यो और अनसखडी महाप्रसाद लिवायो ॥ पाछें वा ब्राह्मणकुं खबर पडी जो ये बनिया थोडेदिन पहेले मोचीको धंदा करतो हतो ॥ तब वाके मनमें बहुत ग्लानी उपजी ॥ जो या बनियाके हाथकों बंधू खायो ॥ तब वा ब्राह्मणकुं कोट्ट निकर्यो तब वा ब्राह्मण वडो दुःखी भयो तब श्रीगुसांईजीके पास वह ब्राह्मण गयो ॥ और जायके सब बात कही तब श्रीगुसांईजीनें आज्ञा करी हरिदासकी बेटीके घर जाओ वे तुमारो उपाय करेगी ॥ तब वह ब्राह्मण हरिदासजीकी बेटीके घर आयो ॥ तब हरिदासजीकी बेटीकुं सब बात कही ॥ तब हरिदासजीकी बेटीनें मनोरथ करके वैष्णववनकुं बुलाये और ध्वजा चढाई और सब वैष्णववनकुं प्रसाद लिवायो तब वैष्णववनकी जूठण वा कोट्टवाले ब्राह्मणकुं लिवाई तब वा ब्राह्मणको कोट्ट मिट गयो ॥ वैष्णववनकी जूठणको प्रताप श्रीभागवतमें लिख्योहै नारदजीनें व्यासजीनें व्यासजीसों कहिहै ॥ सो श्लोक ॥ तेमय्यपेता

(२२२) दोसौबावन वैष्णवकी वार्ता.

खिलचापलेऽर्धकेदातेऽधृतक्रीडनकेऽनुवर्तिनि ॥ चक्रुःकृ
पांयद्यपितुल्यदर्शनाःशुश्रूषमाणेशुनयोऽल्पभाषिणि ॥ १ ॥
उच्छिष्टलेपाननुमोदितोद्विजैःसकृत्समंजुजैतदपास्तकि
ल्विषः ॥ एवंप्रवृत्तस्यविशुद्धचेतसस्तद्दर्मएवात्मरुचिःप्र
जायते ॥ २ ॥ चार महापुरुष चातुर्मासमें एक ठेकाण रहे
हते ॥ विनकी टहेल नारदजीकी मा करती हती और
जूठन लायके खाती हती और बेटाकुं खवावती हती वा
जूठनके प्रतापसुं नारदजी कहेहें ॥ व्यासजी में नारद
भयोहुं और साक्षात् भगवत्स्वरूपको अनुभव करहुं ॥
और भगवदवतारनमें गिनती भईहै सो भगवदीयकी
जूठनको ये प्रताप हैं ॥ तब वे ब्राह्मणको कोढ़ सिट गयो ॥
और वैष्णव धर्मकुं सर्वोपर जानन लभयो ॥ सो वे बनिया
श्रीगुसाईंजीको ऐसो कृपापात्र भयो ॥ जाके वृथादोष
देखेतें वा ब्राह्मणकुं तुर्त कोढ़ भयो ॥ वार्ता संपूर्ण ॥ वै-
ष्णव ॥ १०९ ॥ * ॥ ॥ ॥ ॥ ॥

॥ श्रीगुसाईंजीके सेवक श्रीनाथजीके वीनका-
रकी वार्ता ॥ सो वे वीनकारजी श्रीनाथजीके पास वीन
बजावते हते ॥ और महाप्रसाद लेते हते और अधिकी
महाप्रसाद मिलेतो वैष्णवनकुं लेवाय देतेहते ॥ फेर को-
ई समय वीनकारके विवाहको दिन आयो ॥ जब वीन-
कारनें विचार कियो परदेशमें जायके कछ द्रव्य लाऊं-
तो ठीक ॥ विवाहको काम चलजाय तब श्रीनाथजीनें
ऐसे विचार्यो जो ये वीन बहुत आछी बजावेंहें न जा-
यतो ठीक ॥ तब श्रीनाथजीनें वाकी वीनमें सोनाकी

कटोरी धरदीनी स्वारे वीन वजावे आये सो वीनमेंसु
कटोरी निकसी ॥ तव वीनकारनें श्रीगुसाईंजीके आगे
जायके वीनती करी जो ये कटोरी मेरी वीनमेंसु नि-
कसीहैं ॥ तव श्रीगुसाईंजी जानगये जो श्रीनाथजीनें दीनी
होयगी ॥ तव श्रीगुसाईंजीनें आज्ञा करी जो तुमनें परदेश
जायकेको विचार कियोहैं सो श्रीनाथजीकी आज्ञानहीं है
जाहुं तुम मतिजाओ तुमारी कारज होवै इतनो द्रव्य
हमारे पास ल्यो ॥ तव वा वीनकारनें वीनती करी जो
में देवद्रव्य और गुरुद्रव्य नहीं लेउंगो ॥ आपकी कृपाते
सब कारज सिद्ध होऐंगे ॥ तव वा वीनकारजीनें विचार
कियो अब परदेश जानो नहीं ॥ जो इच्छा होयगी सो
होवेगी ॥ तव गुजरातमेंसों संग आयो और वा संगमें
एक वैष्णव हतो बाहुं वीनकारजीकी वातकी सब खबर
पडी तव वाने वीनकारकुं बुलायके वाको विवाह रुपैया
पांचसे खर्चके कर दियो तव श्रीनाथजी बहुत प्रसन्न
भये ॥ सो वे वीनकारजी श्रीगुसाईंजीके ऐसे कृपापात्र
हते ॥ जिनविना श्रीनाथजीकुं रह्यो न गयो ॥ वार्ता
संपूर्ण ॥ वैष्णव ॥ ११० ॥ ❀ ॥ ॥ ॥ ॥

॥ श्रीगुसाईंजीके सेवक प्रेमजीभाई लुवा-
णाकी वार्ता ॥ सो वे हालारमें रहते हते सो वे प्रेमजी-
भाई ब्रजयात्रा करवेकुं गये सो उहां जायके श्रीगुसाईं-
जीके सेवक भये और ब्रजयात्रा करके श्रीनाथजीके दर्शन
करके फेर प्रेमजीभाईनें श्रीगुसाईंजीसुं वीनती करी जो
महाराज मोकुं सूक्ष्म सेवा पधराय दें ॥ तव श्रीगुसां-

ईजीनें कृपा करके वस्त्रसेवा पधराय दीनी ॥ फेर प्रेमजी-
भाई श्रीठाकुरजी पधरायके देशमें आये ॥ फेर भलीभां-
तीसुं सेवा करन लगे ॥ फेर एकदिन प्रेमजीभाईके मन-
में ऐसी आई जो और वैष्णवनके इहां तो स्वरूप विरा-
जेंहें और अपने इहांतो वस्त्रसेवा है सो श्रीठाकुरजी कैसे
अरोगत होएंगे ॥ फेर उत्थापनके समय ऐसे दर्शन भये
जितने वस्त्रजीमें तारहते सब स्वरूपात्मक दीखवे लगे ॥
जब प्रेमजीभाईकुं ऐसे दर्शन भये तब प्रेमजीभाईनें म-
नमें निश्चय कियो जो श्रीठाकुरजीके स्वरूप सब एक-
हिंहें सोकुं तृथा संदेह होवेंहें ॥ तब प्रेमजीभाईको संदेह
श्रीठाकुरजीनें सब मिटाय दियो ॥ सो वे प्रेमजीभाई
ऐसे कृपापात्र हते ॥ वार्ता संपूर्ण ॥ वैष्णव ॥ १११ ॥ ❀
॥ श्रीगुसाईंजीके सेवक बृंदावनदास छबील-
दासकी वार्ता ॥ सो वे दोउभाई आगरेमें रहते हते ॥
तब वे दोनो भाई संतदासजीके घरमें भगवद्वार्ता सुनवे
जाते हते सो वे नित्य कथा प्रसंग सुनते हते ॥ एकदिन
ऐसो प्रसंग आयो जो नामनिवेदन विना भगवत्प्राप्ति
नहीं होवेंहें ॥ और भगवत्सेवाको अधिकार न होवें ॥
तब विन दोनों भाईननें ऐसो नेम लियो जो नाम निवे-
दन विना जल न लेनो ॥ सवारे उठके श्रीगोकुलगये सो
रातकुं श्रीगोकुल पहाँचे ॥ तब श्रीगुसाईंजीके दर्शन कियो ॥
देहवत करी ॥ तब श्रीगुसाईंजीनें आज्ञा करी जो महा-
प्रसाद ल्यो तब विननें बीनती करी जो हमनें रातसुं
ऐसो नेम लियो है जो नामनिवेदन विना जल न

लेनो ॥ तब श्रीगुसांईजी दिनकी आर्त देखके कृपा करके नाम सुनाये ॥ और जल लेवेकी आज्ञा करी फेर दूसरे दिन श्रीनवनीतप्रियाजीके संनिधान निवेदन करायो तब वे दोनो भाईनकुं बहुत आनंद भयो ॥ फेर श्रीगुसांईजीकुं वीनती करी जो अब हमारे कहा करनो ॥ तब श्रीगुसांईजीनें आज्ञा करी ॥ भगवत्सेवा करौ और आगरेमें हृषीकेशजीको सत्संग करौ ॥ तब मुनके बहुत प्रसन्न भये तब श्रीठाकुरजीकी सेवा माथे पधराई और भलीभांति सुं सेवा करन लगे और वृंदावनदास और छविलदास ऐसे कृपापात्र भये जिनकुं निवेदनकी ऐसी आरति भई जिनसों एक दिन रह्योन गयो ॥ तातें इनके भाग्यको पार नहीं ॥ वार्ता संपूर्ण ॥ वैष्णव ॥ ११२ ॥ ॥

॥ श्रीगुसांईजीके सेवक एक घोवीकी वार्ता ॥ सो वे घोवी श्रीनाथजीके वस्त्र धोवतो हतो सो श्रीगुसांईजीनें एक दिन देख्यो तब श्रीगुसांईजीनें पूछी जो तूम ऐसो प्रयत्न करके श्रीनाथजीके वस्त्र धोवै है सो इनको तुं कहा स्वरूप जाने हैं ॥ तब वा घोवीनें कही जो महाराज ये वस्त्र श्रीनाथजीके श्रीअंगको स्पर्श भये हैं सो साक्षात् भगवत्स्वरूप हैं और मैंनें इन वस्त्रनको स्पर्श कियो है सो मैंहुं भगवत्स्वरूप होउंगो तब श्रीगुसांईजीनें हंसके कही अस्तु फेर वा घोवीकी देह छूटी जब भगवत्स्वरूप होय गयो मारवाडमें एक राजाके गाममें राजाके इहां वे घोवी श्रीठाकुरजीभयो तब सेवा पूजा प्रतिष्ठा बहुत भई और बडे वैभवसुं राजा सेवा क-

रन लय्यो तब वा गाममें चाचाहरिवंशजी गये और एक
 बनियाकी दुकानपर उतरे तब वा बनियानें वा गामके
 श्रीठाकुरजीकी बहुत बडाई करी फेर चाचाजीनें संगके
 वैष्णवनसुं कही चलो देखें कहा है तब चाचाजी देखके
 कही ये तो श्रीनाथजीको घोबी है परंतु दिव्यदृष्टीसुं दे-
 ख्यो जायहै तब चाचाजीनें माथो धुणायो तब राजा
 सेवा करतो हतो तब राजानें देख्यो तब राजानें मनुष्य
 पठायके चाचाजीकुं बुलवायो और कही जो तुमनें मा-
 थो क्युं धुणायोहै तब चाचाजीनें सब बात कही ॥ तब
 राजानें कही जो ये बात मेरे मानवेमें कैसे आवै ॥ तब
 चाचाजीनें कृपा करके वा राजाकुं दिव्यदृष्टी दीनी ॥
 तब वा राजाकुं सब पदार्थ अलौकिक दीखवे लय्ये ॥
 जैसे अर्जुनकुं श्रीठाकुरजीनें दिव्य नेत्र दिये जब वानें
 श्रीठाकुरजीको विश्वरूप देख्यो और जैसे प्राचीनव-
 हिंराजाकुं नारदजीनें दिव्य दृष्टी दीनी ॥ तब जितने
 पशु यज्ञमें मारे हते सो सब पशु दीखवे लगे ॥ ऐसे चा-
 चाजीनें श्रीगुसांईजीकी कृपातें वा राजाकुं दिव्यदृष्टी
 दीनी ॥ तब वे ठाकुरजी राजाकुं घोबी दीखे तब वे राजानें
 तत्काल चाचाजीसुं वीनती करी मोकुं शरण ल्यो तब
 चाचाजीनें श्रीगुसांईजीकुं पधरायके वे राजा और रा-
 जाको गाम सब श्रीगुसांईजीके सेवक कराये सो वे घोबी
 श्रीनाथजीके वख घोवत घोवत तद्रूप भयो ॥ वार्ता सं-
 पूर्ण ॥ वैष्णव ॥ ११३ ॥ * ॥ ॥ ॥ ॥

॥ श्रीगुसांईजीको सेवक एक राजा घोबी ठाकु-

रजी सेवतो तिनकी वार्ता ॥ जब राजाकुं श्रीठाकुरजी
 धोवी निश्चय भयो तव राजानें चाचाजीकुं कही जो
 श्रीगुसाईंजीकुं पधरावो तव श्रीगुसाईंजीकुं पधरायके
 राजा वैष्णव भयो और भगवत्सेवा करन लग्यो और
 भगवद्दार्ता करन लग्यो ॥ और श्रीगुसाईंजीकुं बीनती
 करी जो चाचाजी सदैव मेरे पास रहें ॥ तव श्रीगुसाईं-
 जीनें आज्ञा करी जो वर्ष एकमें पांचदिन तुमारे पास
 चाचाजी रहेंगे ॥ तव राजानें कह्यो जो महाराज पांच
 दिन वारे महिनामें आवें तो मेरो निर्वाह कैसे होय ॥ तव
 श्रीगुसाईंजीनें आज्ञा करी जो श्रीमद्भागवतमें कह्यो है ॥
 एक क्षण भर चाचाजी जैसेनको सत्संग होवै तो वाके
 वरोवर स्वर्गको सुख और मोक्षको सुख वा एक क्षणभ-
 रके वरोवर नहीं होवेंहैं ॥ सो श्लोक ॥ तुलया मिलवेना
 पिनस्वर्गनापुनर्भवम् ॥ भगवत्संगिसंगस्यमर्त्यानांकि-
 सुताशिपः ॥ सो या श्लोकमें कह्यो है एक क्षणभर जो भ-
 गवत्संगीके संगको सुखहै वाके वरोवर और कोईसुख नहीं
 सो तुमकुंतो पांच दिन प्रतिवर्ष ये सुख मिलेगो ॥ तव
 राजानें हाथजोडके बीनती करी महाराज एक वर्षतो
 जरूर चाचाजीकुं मेरेपास राखें ॥ तव श्रीगुसाईंजीनें
 हां कही ॥ फेर एकदिन वा धोवी ठाकुरनें राजाकुं कही
 जो मोकुं तुमारे श्रीठाकुरजीके मंदिरके गोखलामें बैठाय
 देवो ॥ और एक पातलमहाप्रसादकी मोकुं नित्य धराय
 देवो और मेरो सब वैभव उठायके श्रीनाथजीके उहां
 पठायदेवो ॥ तव राजानें वैसेही कय्यो ॥ और एकवर्ष-

(२२८) दोसीबावन वैष्णवकी वार्ता.

सूधी चाचाजीनें उहां रहेके राजाकुं सब रीती पुष्टिमार्गकी
सिखाई ॥ सो वह राजा श्रीगुसाईंजीको ऐसो भगवदीय
भयो ॥ वार्ता संपूर्ण ॥ वैष्णव ॥ ११४ ॥ ❀ ॥ ॥

॥ श्रीगुसाईंजीके सेवक एक पटेलको बेटा
और पटवारीकी बेटीकी वार्ता—सो वे दोउनको बालप-
नेसां आपसमें स्नेह बहुत हतो ॥ तब वे पटवारीकी बे-
टीको विवाह भयो और परदेशमें सासरे गई सासरे जा-
यवेके समय वाके सगे पहांचायवे गये और पटेलको
बेटाहुं गयो ॥ जब वे सब पहांचायके पाछेंफरे तब पटे-
लको बेटा एक झाडपर चढके वाकी गाडी देख्यो क-यो ॥
जब वे गाडी दूर गई तब पटेलके बेटाकुं विरहताप भयो ॥
तब वाके प्राण छूटगये तब वा वृक्षके नीचे वा पटेलके
बेटाको चोतरा बनायो ॥ फेर बहुत दिन बीते ॥ पीछे
पटवारीकी बेटी पिहरमें आई सो वा वृक्षके नीचे गाडी
ठाडी राखी और पूछ्यो ये चोतरा इहां क्युं बन्योहै ॥
तब लोगननें सब समाचार कहे ॥ तब वा पटवारीकी बे-
टीको प्राण छूटगयो तब वाको चोतरा वा वृक्षके नीचे
बनायो ॥ फेर थोडे दिन पाछे श्रीगुसाईंजी वा देशमें प-
धारे और वा वृक्षके नीचे डेरा किये सो वा वृक्षके ऊपर
दोनो श्रुत होयके रहे हते ॥ सो बिननें श्रीगुसाईंजीको
पधारे जानके मनमें विचार क-यो हमारो उद्धार होवे
तो ठीक ॥ तब वे दोनो रातकुं श्रीगुसाईंजीके डेराकी
चौकि देवे लगे सिपाईनकुं जायके कही तुम सोय जावो
हम चौकि करेंगे तब सिपाईनें पूछि तुम कौनहो ॥ तब

विननें अपनी सब बात कहि ॥ तब वा सिपाईनें आयके चीनती करी तब श्रीगुसाईंजी विनकुं देखवे पधारे जब श्रीगुसाईंजीकी दृष्टि विनभूतनके ऊपर पडी तब वे दोनो भूतयोनीसुं छूटके दिव्य रूप होयगये ॥ और श्रीगुसाईंजीनें कृपाकरके विनको दृष्टिद्वारा नामनिवेदन करायो और आपके प्रतापबलसुं तुरत भगवल्लीलामें प्रवेश कराये ॥ सो वे श्रीगुसाईंजीके ऐसे कृपापात्र हते ॥ वार्ता संपूर्ण ॥ वैष्णव ॥ ११५ ॥ ॐ ॥ ॥ ॥ ॥

श्रीगुसाईंजीके सेवक दोप्रेत उन्दरे तिनकी वा ० एक समें श्रीगुसाईंजी गुजरात पधारते हते एक गाम बाहेर डेरा कियो ॥ श्रीगुसाईंजी कोईदिन वा गाममें पधारे नहीं हते ॥ तब सांझ पढगई तब श्रीगुसाईंजीनें डेरा कियो तब उहां दोप्रेत रहते हते सो विननें विचार कियो ॥ जो श्रीगुसाईंजी इहां पधारेहैं इनके शरण जाय तो कल्याण होय ॥ तब वे दोउ प्रेतननें श्रीगुसाईंजीके जलघरियाकुं दिखाई दीनी ॥ तब जलघरियानें श्रीसाईंजीकुं वीनती करी जो महाराज या कूवापें दोय प्रेत ठाडेंहैं ॥ विनकी दृष्टीको जल अपने काम आवेके नहीं ॥ तब श्रीगुसाईंजी देखवेकुं पधाच्ये तब वे दोनो प्रेतननें साष्टांग दंडवत करी ॥ तब श्रीगुसाईंजीनें विनके ऊपर कृपादृष्टी करके नामनिवेदन करायो ॥ सो तत्काल प्रेतयोनीसुं छूटके भगवल्लीलामें गये ॥ तब वा गाममें वैष्णव रहते हते ॥ विननें श्रीगुसाईंजीसुं पूछी जो ये दोनो आगले जन्ममें कौन हते ॥ तब श्रीगुसाईंजीनें आज्ञा करी ॥ ये दोनो

आगले जन्ममें स्त्रीपुरुष कान्यकुब्ज ब्राह्मण हते ॥ और मर्यादासार्गके वैष्णव हते ॥ सो मर्यादारीतीसुं सेवा करते हते ॥ जब वा ब्राह्मणकी देह छूटवे लगी तब वाकी स्त्रीनें पृच्छ्यो जो अब मैं कैसे करूं ॥ तब वा ब्राह्मणनें कही तूं अन्नजल त्यागके देह छोड दीजो ॥ सो वा स्त्रीनें वैसेहि कन्यो ॥ सो वानें भगवत्सेवा छोडके देह त्याग करी और वाके पतीनें देहत्यागको रस्ता बतायो ॥ या अपराधसुं दोनों प्रेत भये ॥ सो अब इनको उद्धार भयो है ॥ जासुं वैष्णवकूं सहज भगवत्सेवा न छोडनी और कोईकुं भगवत्सेवा छोडावनीहुं नहीं ॥ भगवत्सेवाके आगे सब धर्म तुच्छ हैं ॥ यासुं अधिकी कोई धर्म नहीं है ॥ श्रीठाकुरजीनें गीताजीमें कही है ॥ श्लोक ॥ सर्वधर्मान्परित्यज्य मामेकं शरणं व्रज ॥ इत्यादि वचनतें भगवत्सेवाके आगे सब धर्म तुच्छ हैं ॥ प्रल्हादजीनें कही है ॥ सो श्लोक ॥ देवो ह्युरो मनुष्यो वायक्षो गंधर्व एव च ॥ भजनमुकुंदचरणं स्वस्तिमान्स्याद्यथा वर्य ॥ या रीतीसुं भजनसो सेवा याके आगे सब धर्म तुच्छ हैं ॥ ये सुनके सब वैष्णव बहोत प्रसन्न भये ॥ सो वे दोनो प्रेत श्रीगुसाईंजीकी कृपातें भगवल्लीलामें गये ॥ वार्ता संपूर्ण वैष्णव ॥ ११६ ॥ ॥ ॥

॥ श्रीगुसाईंजीके सेवक राजा जोतसिंहजीकी वार्ता—सो वे राजाके पुरोहितको बेटा बडो पंडित हतो और भगवद्धर्ममें कुशल हतो और श्रीगुसाईंजीको सेवक हतो और भगवल्लीलाको अनुभव करतो हतो ॥ एकदिन राजाके पास गयो ॥ तब राजा रासाईं देवीकी

पूजा करती हतो ॥ तब वा पुरोहितनें राजासुं कही जो ऐसी देवीतो हजारनपंढरपुरमें जलभरेहें तब वा राजानें कही मोकुं दिखायदे फेर वे राजा और पुरोहितको वेटा पंढरपुरमें आये श्रीविठ्ठलनाथजीके दर्शन किये ॥ और वैभव कछु देख्यो नहीं ॥ तब वा पुरोहितसुं कही ॥ जो मेरी देवीको वैभव जितनोहै यासुं वीसमो भाग श्रीविठ्ठलनाथजीको नहींहैं तुम मोकुं काहेकुं लायेहो ॥ तब वा पुरोहितनें श्रीगुसाईंजीकीकृपातें वा राजा जोतसिंहकुं दिव्यदृष्टी दीनी ॥ तब श्रीविठ्ठलनाथजीके सब वैभवके दर्शन होवै लगे ॥ अनेक प्रकारकी रचना और अनेक प्रकारकी कुंज और अनेक प्रकारके मनुष्यनकुं सेवा करते और अनेक प्रकारके वैभव रत्नजडित स्तंभ किवाड सब दीखवे लगे ॥ तब राजा देखके विस्मित होय गयो ॥ और पुरोहितके वेटाके पावन पन्यो ॥ फेर पुरोहित वा राजाको हाथ पकडके दूसरी आडी लेगयो ॥ उहां देखे तो हजारन स्त्री जलभरके आवेहें ॥ और सब स्त्रीनसुं पाछे वा राजाकी रासाईं देवी जलभरके आवती हती ॥ सो वे राजानें देखी ॥ तब राजानें देवीसुं पूछयो जो येकहाहै ॥ सो वा देवीनें कही जो मैंतो सेवा करुंहे तेरे जो कछु पूछनो होवै सो पुरोहितसुं पूछ लीजो ॥ मैं तो अबी सेवामें जाउंहुं ऐसे कहिके वे देवी चलीगई फेर राजाके पुरोहितनें दिव्यदृष्टि खेंचलीनी तब साधारण रीतीसुं जैसे नित्य दर्शन होते ऐसे श्रीविठ्ठलनाथजीके दर्शन होवै लगे तब वे राजा हाथ जोडके पुरोहितसुं कह्यो जो मोकुं तुमारो

सेवक करौ॥तब पुरोहितनें कही जो मैं अडेलमें श्रीगुसां-
ईजीकी सेवक भयोहुं विनकी कृपातें असाधारण सुख हो-
वै है ॥ तुमहुं श्रीगुसांईजीके शरण जाओ तो सब कारज
सिद्ध होंवेंगे॥तब राजा पुरोहितकुं संग लैके अडेल जाय-
के श्रीगुसांईजीकीसेवक भयो और नामनिवेदन किये।जब
श्रीठाकुरजी पधरायके ब्रजमें श्रीनाथजीके दर्शन करके
वे राजा अपने घर आयो ॥ और पुरोहितकुं पास राखके
सब सेवाकीरीती सीखी ॥ और स्नेहयुं भगवत्सेवा करन
लगे ॥ थोडेदिन पीछे श्रीगुसांईजीकी कृपातें श्रीठाकुरजी
साधुभाव जतावन लगे सो वे राजा पुरोहितके संगतें भ-
गवदीय भयो ॥ वार्ता संपूर्ण ॥ वैष्णव ॥ ११७ ॥ ❀ ॥

॥ श्रीगुसांईजीके सेवक दोउविरक्त ति० ॥

सो एक विरक्त तादृशी भगवदीय हतो और एक साधा-
रण हतो ॥ तादृशी भगवदीय परदेश जायवे लग्यो तब वा
साधारण वैष्णवनें श्रीगुसांईजीसों बीनती करी अब मेरे
कहा करनो॥तब श्रीगुसांईजीनें आज्ञा करी तुम याके संग
परदेश जावो और याको सत्संग करौ ये कहे जैसे करौ ॥
तब वा वैष्णवनें कहि जो आज्ञा ॥ सो तादृशी भगवदीय
परदेश चलयो ॥ तब वो दूसरो विरक्त तादृशीके संग च-
लयो ॥ सो श्रीगुसांईजीकी आज्ञा लैके चलयो ॥ रस्तामें
एकदिन तादृशी भगवदीय पाछे रह्यो और साधारण
आगे चलयो ॥ सो एक गाम हतो वा गाममें बैठ रह्यो सो
जहां बैठो हतो वाके परोसमें वेश्याको नृत्य होवै लग्यो
और साधारण वैष्णव देखने लग्यो सो ऐसो मग्न भयो

जो कछु देहकी शुद्धी रही नहीं ॥ फेर वो तादृशी भगवदीय
 वाकुं डूढवे निकस्यो हूँढत हूँढत वा गाममें आयके मि-
 ल्यो ॥ परंतु वो वेश्याको चृत्यमें ऐसी मग्न हतो जो कछु
 वैष्णवकुं पहचान्यो नहीं, फेर वैष्णव वाकुं बहार खेंच ले-
 गयो तोहुं कछु शुद्धि आई नहीं, फेर भगवदिच्छासुं वा
 तादृशीकेपावनकी रज उठी सो पवनसुं वाके मुखमें गई
 तब वाको विषयावेश मिटयो तब वाको चेत भयो फेर सु-
 द्ध आई ॥ देखे तो वे तादृशी पास ठाढे है उठके वाके संग
 चल्यो फेर कोईदिन श्रीगुसांईजीके पास जब गये तब वा
 तादृशीनें श्रीगुसांईजीसुं सब समाचार कहे फेर श्रीगुसां-
 ईजीनें आज्ञा करी जो याकुं वेश्याकी रजको स्पर्श भयो
 हतो जासुं आवेश आयगयो ॥ फेर तेरे चरणकी रजको
 स्पर्श भयो जब याको विषयावेश उतन्यो ॥ सो वैष्णवकी
 चरण रजको ऐसी माहात्म्य है जिनके पावनकि रजकुं
 ब्रह्मा और शिव और शेष और सनकादिक इच्छा करे हैं
 परंतु प्राप्ती नहीं होवै है ऐसे वैष्णवके पावनकि रजसों वि-
 षयावेश मिटे यामें कहा आश्चर्य है सो तादृशी वैष्णव
 सुनके चुप होय गयो सो वे वैष्णव ऐसे कृपापात्र हते ॥
 वार्ता संपूर्ण ॥ वैष्णव ॥ ११८ ॥ ❀ ॥ ॥ ॥

॥ श्रीगुसांईजीके सेवक एक ब्राह्मणी अडेलमें
 रहैती तिनकी वार्ता ॥ सो वे ब्राह्मणीकुं श्रीगुसांईजीनें ना-
 मनिवेदन करायके आज्ञा करी जो श्रीनवनीतप्रियाजीकी
 परिचारगी करौ ॥ सो परिचारगी करन लगी ॥ एकदिन
 दारकी तपेलीमें माजतीवखत दाग रहिगयो तब कोईकुं

खबर न परी ॥ तब श्रीनवनीतप्रियाजीकुं राजभोग धर-
वेकुं श्रीगुसांईजी पधारि ॥ तब श्रीनवनीतप्रियाजीनें कही
जो राजभोगकी सामग्री छिवायगईहै तपेलीमें दाग रहि-
गयोहै ॥ तब श्रीगुसांईजीनें दूसरी सामग्री कराई और
श्रीनवनीतप्रियाजीकुं समर्पी और वा ब्राह्मणीकुं यमुना
पार उतार दीनी ॥ वे ब्राह्मणी यमुनाजीके घाटपर झूपडी
बनायके पडी रती और घाटपर गाय भैंस आवें सो गो-
बर थापे और उपलावेचे ॥ घाट उतरवेकुं लोग आवे उहां
रसोई करे ॥ विनकुं उपलादेवे ऐसे करके वो ब्राह्मणी नि-
र्वाह करे ॥ परंतु गोबर बहुत हतो जासुं उपलानको ढग-
लावहुत होयगयो ॥ एकदिन एक ब्रजवासी नाव लैके उ-
पला लेवेगयो तब वा ब्राह्मणीसुं पूछो ये उपला वेचेगी ॥
तब वा ब्राह्मणीनें ब्रजवासीकुं पहेचान्यो तब वा ब्राह्मणी
नें कही उपला काहेको चाहिये मंदिरके लीयें चाहिते होवै
तो लैजावो सब श्रीगुसांईजीकेहैं मेहुं श्रीगुसांईजीकी दा-
सीहुं ॥ तब ये मुनके उपला भरायके नाव लेगयो ॥ तब
श्रीगुसांईजीनें पूछी ये सुंदर उपला कहांसुंलायोहै ॥
तब वा ब्रजवासीनें वा ब्राह्मणीकी दंडवत कही और
सब समाचार कहे तब श्रीगुसांईजी प्रसन्न भये ॥
और आज्ञाकरी जो वा ब्राह्मणीकुं बुलाय लावो ॥
फेर वे ब्रजवासी दूसरी नाव लेगयो ॥ और उपला
भरके वा ब्राह्मणीकुं संग ले आयी फेर वे ब्राह्मणीनें श्री-
गुसांईजीके दर्शन कन्ये ॥ बहुत दिन भये हते तब अ-
पनी दोष विचारके आंखनमेंसुं जलबहेवे लगगयो श्रीगु-

साईंजी देखके वा ब्राह्मणीकुं धीरज दीनी और आज्ञाकरी जो रोवोमति अब श्रीनवनीतप्रियाजी तुमारेऊपर प्रसन्न भयेहैं ॥ जावो परिचारगीकी सेवा करौ ॥ फेर वे ब्राह्मणी अत्यंत श्रद्धासहित बहुत संभारराखके परिचारगी करन लगी ॥ थोडेदिन पीछे श्रीनवनीतप्रियाजी अनुभव जतावन लगे और वा ब्राह्मणीके ऊपर कृपाकरके बोलन लगे ॥ फेर एकदिन श्रीनवनीतप्रियाजीके खीरमें मेवा थोडो हतो सो वा ब्राह्मणीकुं श्रीनवनीतप्रियाजीनें आज्ञाकीनी जो खीरमें मेवा थोडो है ॥ तव वा ब्राह्मणीनें श्रीगुसाईंजीकुं वीनती करी तव श्रीगुसाईंजी सुनके बहुत प्रसन्न भये और विचार किये जो याके धन्यभाग्य है ॥ श्रीनवनीतप्रियाजीनें ऐसीकृपाकरीहैं सो वे ब्राह्मणी श्रीगुसाईंजीकी ऐसी कृपापात्र हती जाकुं काढदीनी तोहुं दोष न आयो और सदैव वा ब्राह्मणीको चित्त श्रीगुसाईंजीके चरणारविंदमें रहेतो ॥ वार्ता संपूर्ण ॥ वैष्णव ॥ ११९ ॥ ॐ ॥

॥ श्रीगुसाईंजीके सेवक दुर्गादासकी वार्ता ॥

सो वे दुर्गादास पूरवदेशमें रहते सो तीर्थयात्रा करवेकुं आये तव वे दुर्गादास श्रीगोकुलमें आये तव श्रीगुसाईंजी यमुनाजीके घाटपर विराजते हते ॥ तव साक्षात् पूर्णपुरुषोत्तम कोटिकंदर्पलावण्यस्वरूपके दर्शन भये तव दुर्गादासनें श्रीगुसाईंजीकुं वानती करी जो महाराज मोकुं शरणे ल्यो ॥ मैं बहुत जन्मसुं भटकत हुं ॥ तव श्रीगुसाईंजीकुं दया आई तव कृपा करके नामनिवेदन कराये ॥ फेर दुर्गादास ब्रजमें बहुत दिन रहे ॥ और श्रीगोवर्धन

नाथजीके सेवा दर्शन किये ॥ फेर दुर्गादास विदा होयके
देशकुं गये और श्रीठाकुरजी पधरायके सेवा करन लगे
जिनके संगतें बहुत वैष्णव भये और श्रीठाकुरजी दुर्गा-
दासके पास बालककीसी न्याई जो चाहे सो माग लेंते ॥
और बाललीलाको संपूर्ण अनुभव करावते ॥ सो वे दुर्गा-
दास ऐसे कृपापात्र हते ॥ वार्ता संपूर्ण ॥ वैष्णव ॥ १२० ॥
॥ श्रीगुसांईजीके सेवक चतुरबिहारीकी वार्ता ॥
सो चतुरबिहारी श्रीगोकुलमें आये हते ॥ और श्रीगुसां-
ईजीके दर्शन किये तब श्रीगुसांईजीकुं वीनती करी सोकुं
शरणलेउ ॥ तब श्रीगुसांईजीने कृपा करके नाम निवेदन
करायो ॥ तब श्रीनवनीतप्रियाजीके राजभोगको समय
हतो और चतुरबिहारीकुं लीला सहित दर्शन भये ॥ तब
चतुरबिहारीने नयो पद बनायके गायो ॥ सो पद ॥ “किये
जोचटकभटकठाढोरहतनघटपर” ॥ ये पद गायो और
ये सुनके श्रीगुसांईजी बहोत प्रसन्न भये ॥ तब श्रीगुसांई-
जीने जाण्यो के श्रीनवनीतप्रियाजीने इनकुं लीलाको
अनुभव करायो ॥ तब श्रीगुसांईजी बहोत प्रसन्न भये ॥
फेर चतुर बिहारीजी श्रीजीद्वारमें आयके श्रीगुसांईजीके
संग श्रीनाथजीके दर्शन किये ॥ तब मंगलाको समय
हतो चतुरबिहारीने नये पद गाये ॥ और राजभोगकेस-
मय श्रीनाथजीके संनिधान चतुरबिहारीजीने पद गायो
॥ सो पद ॥ “ अनतनजईएहोपियेरहियेमेरेमेहेल ” ॥ ये
सुनके श्रीगुसांईजी बहोत प्रसन्न भये ॥ सो वे चतुरबि-
हारीजी श्रीगुसांईजी पोढते तब पंखा करते और पद गा-

वते सो वे चतुरविहारी श्रीगुसांईजीके चरणारविंदकी
जन्मपर्यंत सेवा करते हते ॥ वार्तासंपूर्ण ॥ वैष्णव ॥ १२१ ॥
श्रीगुसांईजीके सेवक एक क्षत्राणीकी वार्ता ॥
सो श्रीगुसांईजी गुजरात पधारे तव वा क्षत्राणीनें वीनती
करी महाराज मोकुं शरण ल्यो ॥ तव श्रीगुसांईजीनें म-
नुष्यनकुं समस्या करिके कही याकुं न्हाओ सो न्हा-
यके श्रीगुसांईजीके संनिधान आई ॥ जव श्रीगुसांईजी
नाम मुनायवे लगे तव वा क्षत्राणीके मनमें ऐसी आई
जो श्रीगुसांईजी ऊंचेस्वरसुं बोलें तो ठीक तव श्रीगुसांई-
जी वाकुं धीरे धीरे नाम मुनावन लगे ॥ परंतु वे क्षत्राणी
जानके बोले नहिं ॥ तव श्रीगुसांईजी हेला करके बोले
जो मुनेहे के नहीं ॥ तव वे क्षत्राणी बोली जो आपके व-
चनामृत मुनवेके लीयें मैं जानके नहीं बोलीहुं ॥ तव श्री-
गुसांईजी प्रसन्न भये तव वा क्षत्राणीकुं नामनिवेदन
कराये ॥ फेर श्रीठाकुरजी पधरायके सेवा करन लगी ॥
थोडेदिन पीछे श्रीठाकुरजी वा क्षत्राणीकुं यशोदाजी जैसे
अनुभव करावन लगे ॥ श्रीठाकुरजी घरमें जैसे यशोदा-
जीसुं बालचेष्टा करते जैसे वा क्षत्राणीसुं बालचेष्टा करन-
लगे सो वे क्षत्राणी ऐसी परम कृपा पात्र हती ॥ वार्ता
संपूर्ण ॥ वैष्णव ॥ १२२ ॥ * ॥ ॥ ॥ ॥
॥ श्रीगुसांईजीके सेवक माधोदास कपूरकी ॥
सो माधोदास आगरेमें रहेंते ॥ एकसमय श्रीगुसांईजी
आगरे पधारे ॥ सो जनार्दनदास चोपडा क्षत्रीके घर उ-

(२३८) ; दोसौबावन वैष्णवकी वार्ता.

तरे ॥ उहां माधवदासजी दर्शनकुं गये ॥ सो साक्षात् श्री गोवर्धननाथजीके दर्शन भये ॥ तब माधवदास देखके विस्मित भये ॥ तब श्रीगुसाईंजीसुं वीनती करी महाराज मोकुं शरणल्यो ॥ तब श्रीगुसाईंजीनें कृपा करके नाम निवेदन करायो ॥ और सेवा पधरायदीनी ॥ तब माधव दासजी सेवा करन लगे ॥ सेवा करते करते माधवदासजीकुं श्रीठाकुरजीकी लीलाको अनुभव भयो ॥ कोईसमय तो श्रीनाथजी रासलीलाके दर्शन करावते और कोई समय दानलीलाके दर्शन करावते और कोई समय बाललीलाके दर्शन करावते ॥ ऐंसी अनेक प्रकारकी लीलानके दर्शन माधवदासजीकुं होते ॥ सो वे माधवदासजी श्रीगुसाईंजीके ऐंसे कृपापात्र हते ॥ वार्ता संपूर्ण ॥ वैष्णव ॥ १२३ ॥ ❀ श्रीगुसाईंजीके सेवक भीष्मदास क्षत्रीकी वा ० सो भीष्मदास पूर्वदेशमें रहेते सो तीर्थ यात्रा करवेकेलिये श्रीगोकुल आये ॥ सो श्रीगुसाईंजीके दर्शन कीये ॥ और श्रीगुसाईंजीकुं वीनती करी मोकुं शरण लेउ ॥ तब श्रीगुसाईंजीनें कृपा करके भीष्मदास और भीष्मदासके कुटुंबकुं नाम निवेदन करायो ॥ और भीष्मदासनें श्रीनाथजीके दर्शन किये ॥ और दर्शन करके बहोत प्रसन्न भये ॥ और श्रीगुसाईंजीकुं वीनती करी महाराज मोकुं भगवत्सेवा पधराय दीजे ॥ तब श्रीगुसाईंजीनें कृपा करके पधराय दीनी ॥ और श्रीबालकृष्णकी सेवा भीष्मदास भलीभांति सुं करन लगे ॥ फिर एकदिन भीष्मदासजीकुं श्रीबालकृष्णजीनें स्वप्नमें कही जो हमकुं नयो मंदिर करायदेवो ॥ तब भीष्मदा-

सजीने श्रीगोकुलमें नयो मंदिर करायो ॥ और श्रीगुसां-
ईजीकुं वीनतीकरके और श्रीठाकुरजीकुं नये मंदिरमें प-
धरायो ॥ और भीष्मदास तथा विनकी स्त्री भलीभांति सुं से-
वा करन लगे और जन्मपर्यंत श्रीगुसांईजीके जरणारविंद
छोडके कहुं गये नहीं ॥ और भीष्मदास नित्य सांझके
समें रमणरेतीमें जाते और उहां रासलीला आदिक सब
लीलानके दर्शन होते ॥ सो वे भीष्मदास परम कृपा पात्र
भगवदीय भये ॥ वार्ता संपूर्ण ॥ वैष्णव ॥ १२४ ॥ ❀ ॥

श्रीगुसांईजीके सेवक नारायणदास सनाढ्य
ब्राह्मणकी वार्ता ॥ सो वे नारायणदास अन्योरगाममें
रहते हते ॥ नारायणदास श्रीगुसांईजीके दर्शन करवेकुं
आये ॥ सो साक्षात् पूर्णगुरुपौत्तमके भये ॥ तव नारा-
यणदास श्रीगुसांईजीके शरण आये ॥ और नित्य श्री-
नाथजीकी सेवा कन्यो करते ॥ तव नारायणदासकुं
लौकिकमें सगे दुःख बद्धत देते ॥ तव नारायणदास श्री-
गोकुलमें आयके रहे ॥ और जन्मपर्यंत श्रीनवनीतप्रि-
याजीकी सेवा करते रहे ॥ विन नारायणदासकुं सेवामें
ऐसी आसकी हती जैसे अफीमखायवेवालेकुं अफीम-
विना रह्यो न जाय ॥ ऐसे नारायणदासजी सेवाविना न
रहेशक्ते ॥ और श्रीनवनीतप्रियाजी विनकुं सूते जगा-
यके सेवा करावते और सेवाके समय विनके पास आ-
यके बैठते और बातें करते और सेवा करवावते ॥ सो ना-
रायणदास श्रीगुसांईजीके ऐसे कृपापात्र हते ॥ वार्ता सं-
पूर्ण ॥ वैष्णव ॥ १२५ ॥ ❀ ॥ . ॥ . ॥ . ॥

॥ श्रीगुसाईजीके सेवक एक वैष्णव जमनादास दक्षिणमें रहेते तिनकी वार्ता ॥ सो वे वैष्णव दक्षिणमें रहेते हते एक समय श्रीगुसाईजी दक्षिण पधारे हते ॥ तब वे जमनादास श्रीगुसाईजीके सेवक भये हते ॥ और श्रीठाकुरजी पधरायके सेवा करन लगे ॥ वा देशमें म्लेच्छनको राज हतो ॥ जब चैत्र महिना आयो तब एक माली गुलाबके फूल बेचवे आयो और वे जमनादासजी फूलनके शौकी बहुत हते ॥ फेर वा मालीसों वा जमनादासनें पूछी जो या फूलनको कहालेंगे ॥ तब वाने कही एक रुपैया लेऊंगो ॥ तब उहां एक तुर्क आयो ॥ वाने कही फूल हमारे सरदारकुं चाहिये ॥ मैं दो रुपैया देऊंगो ॥ तब जमनादासनें पांच कहे ॥ तब वा तुर्कनें दस कहे ॥ ऐसे आपसमें दोउजने बढवे लगे जब लाख रुपैया सूधी वधे ॥ तब वे जमनादास लाख रुपैया देके एक फूल लाये ॥ और लायके श्रीठाकुरजीकी पाग उपर धरायो ॥ वाई समय श्रीगुसाईजी गिरिराजजी उपर श्रीनाथजीको श्रृंगार करते हते ॥ तब श्रीनाथजी झुक झुक जाएं ॥ तब श्रीगुसाईजीनें पूछयो जो वावा क्युं झुकोहो ॥ तब श्रीगोवर्धननाथजीनें श्रीगुसाईजीसुं कही जो आपके सेवक जमनादास दक्षिणमें रहेहें सो वाने लाख रुपयामें एक फूल लेके अपनं श्रीठाकुरजीकुं धरायो है ॥ सो वाके भावके बोझसुं लचक लचक जाउंहुं ॥ ऐसो वाको भावहै ॥ जानें मेरे लीयें एक फूलके लाख रुपैया खरचेंहैं ॥ ये बात सुनके श्रीगुसाईजी बहुत प्रसन्न भये ॥ और वा वैष्णवकुं

श्रीगुसाईजीने पत्र लिखके एक ब्रजदासी पठायो ॥ जो तुमनें अमकेदिन फूल धरायो है सो श्रीगोवर्धननाथजीने अंगिकार कियो है ये समाचार वा यमुनादास वैष्णवके पास पहुँचे सो पत्र वांचके बहुत प्रसन्न भयो ॥ और पांचलाख रुपैयाको हीरा लेके श्रीगुसाईजीकुं पठायो ॥ सो वे यमुनादास वैष्णव श्रीगुसाईजीके ऐसे कृपापात्र हते द्रव्यकुं तुच्छ जाणते ॥ वार्ता संपूर्ण ॥ वैष्णव ॥ १२६ ॥ ❀

॥ श्रीगुसाईजीके सेवक एक बंगालीकी वार्ता ॥ सो वे गौडिया वृंदावनमें रहेतो हतो ॥ और मजुरी करतो हतो ॥ एकसमय श्रीगुसाईजी वृंदावन पधारे तब वे श्रीगुसाईजीको सेवक भयो तब वाहुं वैष्णवजानके लोग मजुरी अधिकी देवे लगे ॥ तब वानें अपने मनमें विचार कियो जो धर्म वेचके खानो सो अतुचितहै ॥ शास्त्रमें लीख्योहै जो भगवानके नाम लेके भिक्षा मागे सो भिक्षा देवेवाले नरकमें जाय जासुं धर्म देखायके भिक्षा और रोजगार करनो नहीं ॥ ये विचारके वो गौडिया जब मजुरी करवे जातो तब तिलकसुद्रा धोतो और कंठी छिपाय राखतो ॥ ऐसे धर्म गुप्त राखके मजुरी करतो ॥ फेर एकदिन वो तिलक धोवते भूलगयो ॥ और मजुरी करवेकुं तैयार भयो ॥ तब श्रीठाकुरजी बोले जो तिलक धोयके जावो ये मुनके बहुत प्रसन्न भयो ॥ फेर नित्य श्रीठाकुरजी वासुं वातें करते और सब सुख देते वे गौडिया श्रीगुसाईजीको ऐसो कृपापात्र हतो ॥ वार्ता संपूर्ण ॥ वैष्णव ॥ १२७ ॥ ❀ ॥ ॥ ॥ ॥ ॥

(२४२) दोसौवावन वैष्णवकी वार्ता.

॥ श्रीगुसांईजीके सेवक एक ब्राह्मण भागनगरमें रहेते तिनकी वार्ता ॥ सो वे एक समय श्रीगुसांईजी-दक्षिण पधारे और वा ब्राह्मणकुं वेद पढते देखे ॥ तब श्रीगुसांईजीनें विचार्यो ये ब्राह्मण वेदको पाठ बहुत आछो करे है ॥ परंतु कछु समझे नहीं है ॥ कछु समझेतो आछो ॥ इतनेमें वा ब्राह्मणके मनमें ऐसी आई जो इनकी शरण जाऊं तो ठीक ॥ तब वह ब्राह्मण श्रीगुसांईजीके शरण गयो ॥ और कथा सुनवे लग्यो ॥ तब श्रीगुसांईजीकी कृपातें वा ब्राह्मणकुं वेदको अर्थ स्फुरित भयो ॥ तब वह ब्राह्मण श्रद्धासहित वेदको पाठ करन लग्यो ॥ तब एक दिन श्रीनाथजीनें श्रीगुसांईजीसों ऐसी आज्ञा करी जो ये ब्राह्मण हमारे निज मंदिरके आगे नित्य वेद पढे ॥ तब श्रृंगारसुं लेके राजभोग पर्यंत नित्य निज मंदिरके आगे वेद पढतो ॥ और कहुं अक्षर और मात्रा भूल तो श्रीठाकुरजी आयके बतावते ॥ वे ब्राह्मण ऐसो कृपापात्र भयो ॥ वार्ता संपूर्ण ॥ वैष्णव ॥ १२८ ॥ ॐ ॥

॥ श्रीगुसांईजीके सेवक माधुरीदास माली तिनकी वार्ता ॥ सो वे माधुरीदास नित्य फूलवीनके हार कर लावते ॥ सो एकदिन श्रीनाथजीनें माधुरीदासकुं शिखायो जो तूं या रीतीको हार गृथ ॥ तब माधुरीदासनें हार तैयार करके श्रीगुसांईजीकुं दियो ॥ तब श्रीगुसांईजीनें मुखियाकुं दियो ॥ तब मुखियानें श्रीनाथजीकुं धरायो ॥ सो वह हार बढो बहुत भयो ॥ तब मुखियानें श्रीगुसांईजीसों कही जो हार बढो है तब श्रीगुसां-

ईजीनें माधुरीदाससों कही नित्य तुमहार करोहो ॥
 आज ऐसो क्युं कन्यो ॥ तव माधुरीदासनें कही जो
 मोकुं श्रीनाथजीनें पास बैठके सिखायोहै ॥ तव श्रीगु-
 साईजी आप न्हायके हार धरायवेकुं पधारे ॥ तव श्री-
 नाथजीकुं हार धरायो ॥ तव हार पूरो भयो तव श्रीगु-
 साईजीनें श्रीनाथजीसुं पूछी याको कारण कहा ॥ तव
 श्रीनाथजीनें तीनकारण बताये एक तो तुमारे हाथ वि-
 ना कोईको हाथ सुहाय नहीं है ॥ और दूसरो कारण
 ऐसो हार रतन नको चाहिये सो बनवाओ ॥ और कार-
 ण ये मुखियाके मुखसुं वास आवे है तव तें श्रीगुसाई-
 जीनें आज्ञा करी मुखियासुं लेके जितने सेवक हैं सो सब
 मुख वांधके सेवा करौ वा दिनतें सब सेवक मुख वांधके
 सेवा करें हैं ॥ सो वे माधुरीदासमाली श्रीगुसाईजीके
 ऐसे कृपापात्र हते ॥ वार्ता संपूर्ण ॥ वैष्णव ॥ १२९ ॥ ❀

॥ श्रीगुसाईजीके सेवक धर्मदास सो अडिगमें
 रहते तिनकी वार्ता ॥ सो वे धर्मदास आंखनसुं नहीं दे-
 खते हते श्रीगुसाईजी नित्य घोडापर बैठके श्रीजीद्वार
 पधारते और श्रीगोकुलतें दौय घडीमें गोपालपुर आवते ॥
 और गोपालपुरसुं दौय घडीमें श्रीगोकुलपधारते ऐसे आ-
 वजाव नित्य होती ॥ एक दिन श्रीगुसाईजी अडिगसुं
 बाहिर निकसे ॥ रस्तामें एक आंधरो ब्राह्मण ठाडो हतो ॥
 और घोडा बाके ऊपर आवे लयो ॥ तव श्रीगुसाईजीनें
 घोडो थाभ्यो ॥ तो हुं वह ब्राह्मण घबराय गयो ॥ रस्ता-
 मेसुं इतउत जाय नसक्यो ॥ तव श्रीगुसाईजीकुं बहूत

(२४४) दोसीबावन वैष्णवकी वार्ता.

दया आई ॥ तब श्रीगुसांईजीनें नीचे उतरके वाके नेत्रऊपर जल छंटयो ॥ तब वाके नेत्र खुलगये ॥ तब श्रीगुसांईजी तो घोडाऊपर अस्वार होयके गोपालपुर पधारे ॥ तब वह ब्राह्मणहुं पीछे पीछे धीरे धीरे गोपालपुर पोहोंच्यो ॥ और जायके श्रीगुसांईजीके दर्शन कन्ये और वीनती करी रस्तामें आपने मोकुं नेत्र दिये हे में वोही ब्राह्मणहुं मोकुं शरण लेवो ॥ तब श्रीगुसांईजीनें दूसरे दिन वा ब्राह्मणहुं नाम निवेदन करायो ॥ और श्रीनाथजीके दर्शन कराये ॥ और श्रीगुसांईजीनें कृपा करके ग्रंथ पढाये जहां सूधी वाकी देह रही तहां सूधी वे उहांही रहे ॥ तब थोडे दिनमें वाकी देह छूटी ॥ तब श्रीगुसांईजीनें आज्ञा करीजो धर्मदास बहुत आछो वैष्णव हतो ॥ वार्ता सं० ॥ वैष्णव ॥ १३० ॥ ॥ श्रीगुसांईजीको सेवक एक वैष्णव हतो जाले खोटे कर्म करके श्रीगुसांईजीकी परीक्षालीनी तिनकी वार्ता ॥ सो एक दिन चार वैष्णव मिलके भगवद्वार्ता करते हते ॥ और श्रीगुसांईजीको प्रताप वर्णन करते हते ॥ तब एक अन्यमार्गी बोल्यो मेरो उद्धार करें तब खरी बात है ॥ तब वैष्णवननें कही तेरो उद्धार करेंगे यामें संदेह नहीं है ॥ तब वैष्णवनकी बात सुनके और श्रीगुसांईजीके पास जायके सेवक भयो ॥ फेर जायके स्मशानमें बैठो और उहांही रसोई करके खावे ऐसो भ्रष्ट भयो ॥ फेर आयके विन वैष्णवनसों कहे में ऐंसे कर्म करुं हुं ॥ अब श्रीगुसांईजी मेरो उद्धार करेंगे तो खबर परेगी ॥ ये सब समाचार विन वैष्णवननें श्रीगुसांईजीसों वीनती करी

तब श्रीगुसांईजी कछु बोल्ये नहीं ॥ फेर एक राजा हतो तीर्थ करतो करतो श्रीगोकुल आयो ॥ तब वा राजाने श्रीगुसांईजीसों वीनती करी जो महाराज मोकुं गलित-कोट भयोहै मैने औपध बहोत कीयेहें सो मिटयो नहींहैं ॥ और फेर तीर्थ करवेके लीये निकस्योहुं तोहुं रोग मिटयो नहींहै ॥ अब आप कछु उपाय बतावे तो मिटगो ॥ तब श्रीगुसांईजीने आज्ञा करी जो हमारो सेवक अमुकगाममें स्मशानमें बैठोहै वाकी जूठन खावोतो मिटजायगो ॥ तब वे राजा श्रीगुसांईजीकी बातपर विश्वास राखके वा गाम में जायके और उहां स्मशानमें गयो और वासुं जूठन भागी तब वाने नाही कही ॥ जब वे खायवे बैठो और थोडो खायवो रह्यो तब राजाने औरसुं वाकी पातलमेंसुं उठायके जूठन खाई ॥ तब तत्काल वा राजाको कोट मिटगयो ॥ और देह निर्मल भई ॥ फिर वाने राजासुं पूंछी जो याको कारण कहाहै तब वा राजाने श्रीठाकुरजीकी सब बात वाके आगे कही ॥ फिर वाके मनमें बहोत पश्चात्ताप भयो ॥ जो में ऐसो भ्रष्ट हुं तोहुं श्रीठाकुरजी मोकुं याद करेहैं ॥ और मेरेमें इतनी सामर्थ्य धरदीनीहै फेर वो वैष्णव श्रीगुसांईजीके पास जायके अपराध क्षमा कराये ॥ और रोयवे ल्ययो तब श्रीगुसांईजीने शास्त्र प्रमाणे प्रायश्चित्त करायके फिर वाकेउपर कृपा करके वाकुं सेवा पधराय दीनी ॥ तब वो भगवत्सेवा करन ल्ययो ॥ भगवत्सेवाके प्रतापते वाको चित्त निर्मल होयगयो और श्रीठाकुरजीके चरणारविंदमें चित्त ल्ययो वह परीक्षा करवे

आयो तोहुं श्रीगुसाईजीनें वाकुं छोडयो नहीं ॥ ऐसे परम
दयाल हते ॥ वार्ता संपूर्ण ॥ वैष्णव ॥ १३१ ॥ ❀ ॥ ॥
॥ श्रीगुसाईजीके सेवक एक राजा पूरव देशमें
रहेतो तिनकी वार्ता ॥ सो वे राजा अन्य मार्गोहतो ॥
और वाके देशमें वैष्णव रहेते विनकी निंदा करतो ॥ ऐसे
कहेतो जो वैष्णव मार्ग आछो नहींहै ॥ पेहेले दूसरे वैष्ण-
वकुं प्रसाद लेवावेहैं और पीछे आप खावेहैं जासुं ये स-
बको जूठन खावेहैं ॥ तब ऐसे कहेके फिर लोगनसुं कहे
वैष्णवतो उच्छिष्टभोगीहैं ऐसे कहेके निंदा बहुत करतो
तब तो वैष्णवनकी निंदा श्रीठाकुरजी सही नहीं शके ॥
तब वा राजाकुं कोठ भयो जैसे जैसे राजा निंदा
करे तैसे तैसे कोठ बढ़तो जाय ॥ तब आखा
शरीरमें कोठ बढ़गयो ॥ तब राजा बहुत दुःखी भयो बहुत
औषध कन्ये और कर्म विपाक देखके बहुत प्रायश्चित्त
कन्ये परंतु कोठ तो बढ़तो जाय ॥ तब वा राजाकुं वैष्णव
ननें कही जो तुम तीर्थयात्रा करो ॥ तब राजा तीर्थयात्रा
करवे निकस्यो और जा तीर्थमें जाय जैसी विधी और
जैसे दान लिखे होवे वैसे करे ॥ ऐसे करतेकरते श्रीगो-
कुल आयो श्रीगुसाईजीके दर्शन किये और कोठ संबंधी
वीनती करी तब श्रीगुसाईजी तो अंतरयामीहैं सो जान-
गये ॥ जो यानें वैष्णवनकी निंदा करीहैं यातें कोठ भ-
योहै तब श्रीगुसाईजीनें आज्ञा करी स्मशानमें हमारो
सेवक बैठोहैं विनकी जूठन खावोगे तो तुमारो कोठ मि-
टैगो ॥ तब वा राजानें वैसेही कियो ॥ सो जूठन लेतेही

कौट मिटगयो ॥ जैसे सूर्यउदयते अंधकार मिट जाय ॥
 जैसे असृत पीयेते मृत्युको भय मिटजाय ॥ जैसे ज्ञान
 भये ते संसार मिटजाय ॥ जैसे भक्तीके उदयते त्रिविध-
 ताप मिटजाय ॥ ऐसे जूठनलेतमात्रसुं कौट मिटगयो ॥
 सो वा राजाकी देह निर्मल भई ॥ तब श्रीगोकुल आयके
 श्रीगुसांईजीके सेवक भये ॥ और वीनती करी महाराज
 मैने वैष्णवकी निंदा बहुत करीहै ॥ तब श्रीगुसांईजीनें
 आज्ञा करी जो वैष्णवको द्वेष बहुत बुरो है ॥ श्रीठाकुर-
 रजी और श्रीमहाप्रभुजी वैष्णवकी अपराधक्षमा नहीं
 करें ॥ वैष्णवको अपराध वैष्णवसुं क्षमा होवै है जासुं हमनें
 वैष्णवके पास तुमारो अपराध क्षमा करायो है ॥ सो श्री-
 ठाकुरजीनें गीताजीमें कह्यो है ॥ श्लोक ॥ अपिचेत्सुदुरा-
 चारो भजते मामनन्यभाक् ॥ साधुरेव समंतव्यः सम्यग्व्यव-
 हितो हि सः ॥ अर्थ ॥ याप्रकारसुं गीताजीमें कह्यो है ॥ जो
 दुराचारी होवै और अनन्य होयके मोकुं भजतो होवै
 वाकुं साधु समजणो ॥ वाने भलो निश्चय कन्यो है ॥
 जासुं वैष्णवकी निंदा करनी नहीं ॥ यह सुनके वा रा-
 जाने अपने अपराध क्षमा करायो ॥ और श्रीठाकुरजी
 पधरायके सेवा करन लग्यो ॥ दिन दिन वा राजाकुं स-
 त्संग लगतो गयो ॥ तैसे भगवद्भाव बढ़तो गयो ॥ तब
 वा राजाके उपर श्रीठाकुरजी प्रसन्न भये ॥ सो श्रीगुसां-
 ईजीकी कृपाते अनुभव भयो सो वे राजा ऐसो कृपापात्र
 हतो ॥ वार्ता संपूर्ण ॥ वैष्णव ॥ १३२ ॥ * ॥ ॥ ॥
 श्रीगुसांईजीके सेवक शेटको बेटा और दासी

तिनकी वार्ता—सो वह शैठ श्रीगुसाईंजीको सेवक हतो ॥ सो वह शैठकी देह छूटी तब अपने घर दासी हती सो बेटा और ठाकुरजीकी सेवा वा दासीकुं सोंपगयो हतो ॥ सो वो शैठको बेटा दासीकुं माजी कहतो ॥ सो एक समय वा गाममेसुं वैष्णव श्रीनाथजीद्वार जायवेल्लो ॥ तब वह शैठके बेटानें कही में माजी यात्रा जाबुंहुं ॥ तब वा दासीनें कही तुम अबी श्रीनाथजीके दर्शनकुं मति जावो श्रीनाथजीकी इच्छा नहीं है ॥ तब वो शैठको बेटा मान्यो नहीं और वा संगमें चल्यो गयो ॥ रस्तामें एक राजाको गाम आयो वा राजाके गाममें सरकारके मनुष्यनके संग वा साहुकारके बेटाकी लड़ाई भई ॥ तब वा गामके राजानें आखो संग कैद कन्यो ॥ दोदिन पाछे सब संगकुं छोड दियो ॥ और एक शैठके बेटाकुं कैद राख्यो ॥ और वे संगतो श्रीजीद्वार गयो ॥ श्रीनाथजीके दर्शन करे और यात्रा करके फेर देशकुं आये ॥ तब रस्तामें वो गाम आयो ॥ तब वह शैठको बेटा कैद हतो सो वे संगवालाननें वा राजाकुं कहेके छुडायो ॥ फेर वाके गाम आयो तब वा दासीकुं कही जो माजी मोकुं श्रीनाथजीके दर्शन न भये उलटो दुःख पायो ॥ तुमारी कृपा होवेगी तब श्रीनाथजी दर्शन देवेंगे ॥ फेर वा दासीकुं दया आई तब वा शैठके बेटाकुं कही जो तुम वैष्णवनकी टहेल करो तब तुमकुं श्रीनाथजी दर्शन देवेंगे ॥ तब शैठको बेटा वैष्णवनकी टहेल करनलाग्यो ॥ सो जो वैष्णव आवे तिनकुं न्हावावे और महाप्रसाद लिवावे और पंखा करे जलपान

और पांवदावे ॥ आखीदिन आपके अंगसुं देहेल करे ॥ एकदिन तादृशीभगवदीय अद्भुतदासजी आये ॥ तब विनकी देहेल बद्धत करी ॥ तब वा अद्भुतदासनैं कही कछु मागो ॥ तब वा शैठके वेदानैं कही मोकुं श्रीनाथजीके दर्शन होवैं और ब्रजयात्रा होवैं ॥ फेर अद्भुतदासनैं कही होवेंगे ॥ श्रीगुसांईजीकी कानतैं श्रीनाथजीदर्शन देवेंगे ॥ तब वह शैठको वेटा दासीकुं संग लेके श्रीनाथजीके दर्शनकुं गयो और जायके दर्शन करे ॥ और श्रीगुसांईजीके दर्शन करे ॥ फेर वा दासीनैं श्रीगुसांईजीकुं वीनती करी जो महाराज याके करममें दर्शन नहीं हते और वैष्णवनकी कृपासुं भये हें ॥ तब श्रीगुसांईजीनैं आज्ञा करी श्रीनाथजी वैष्णवनके वशमेंहें ॥ वे चाहितो ब्रह्मांड फेरडारे ॥ जब वैष्णव प्रसन्न होवें तब कर्मरेख खोटी खरी सब मिटजाय ॥ ऐसे श्रीगुसांईजीके वचन सुनके वह दासी बद्धत प्रसन्न भई ॥ तब वे शैठको वेटा यात्रा करके अपने घर आयो ॥ और सेवाकरन लगयो ॥ वह दासी और शैठको वेटा ऐसे कृपापात्र हते ॥ वार्ता संपूर्ण ॥ वैष्णव ॥ १३३ ॥ ❀ ॥ ॥

श्रीगुसांईजीके सेवक रूपा पोरियाकी वार्ता ॥
सो वह रूपा पोरिया श्रीनाथजीकी सिंघपौर पर बैठते हते ॥ और रातकुं धौल गावतेहते ॥ एक दिन गोविंदस्वामीनैं कही जो तुम धौल मत गाओ ॥ तुमारी राग आछो नहीं है ॥ तब विननैं न गायो तब श्रीनाथजीकुं आखीरात नींदन आई ॥ सवारि जब श्रीगुसांईजीनैं श्रीनाथजीकुं जगाये तब श्रीनाथजीके नेत्र लाल देखे ॥ फेर श्रीनाथ-

जीसों श्रीगुसांईजीनें पूंछी जो आपकुं उजागरा क्युं है ॥ तब श्रीनाथजीनें कही जो रूपा नित्य धौल गावे हैं ॥ जब हमकुं नींद आवे हैं सो रात्रकुं गायो नहीं ॥ जासुं नींद नहीं आई तब रूपाकुं श्रीगुसांईजीनें कही जो तेनें धौल क्युं नहीं गायो ॥ तब रूपापौरियानें हाथ जोडके कही जो गोविंदस्वामीनें नाहीं करी है ॥ तब गोविंदस्वामीसों श्रीगुसांईजीनें कही तुमनें रूपाकुं गायवे कि नहीं क्युं करी ॥ श्रीनाथजीकुं नींद नहीं आई ॥ तब गोविंदस्वामीनें कही जो मोकुं ये खबर नहीं हती ॥ जो खांड और गुड एक भाव है तब श्रीगुसांईजीनें कहीकर्म तें कृपा न्यारी है ॥ तब गोविंदस्वामी चुप कर रहे ॥ तब रूपापौरिया नित्य धौल गाते तब श्रीनाथजीकुं नींद आवती ॥ प्रसंग ॥ १ ॥ एक दिन रातकुं श्रीनाथजीकुं सुख लगी तब श्रीनाथजीनें रूपापौरियाकुं लात मारके जगायो और आज्ञा करी जो मोकुं सुख लगी है ॥ तब रूपापौरियानें श्रीगुसांईजीकुं जगायके बिनती करी तब श्रीगुसांईजी न्हायके सामग्री लेके भीतर पधारे ॥ और श्रीनाथजीकुं अरोगाये ॥ फेर रूपापौरियापर श्रीगुसांईजी बहुत प्रसन्न भये ऐसे अनेक प्रकारकी लीला रूपापौरियासुं श्रीनाथजी करते और केतनेक लोग ऐसे लिखेहैं जो रूपापौरिया श्रान भये ॥ सो ये बात झूठी है कारण जो जानके अन्नप्रसादी रूपापौरिया खाय नहीं और अजानको इतनी दंड होय नहीं जासुं ये बात सर्वथा झूठी है वे रूपापौरिया श्रीगुसांईजीके ऐसे कृपा-

पात्र होते ॥ वार्ता संपूर्ण ॥ वैष्णव ॥ १३४ ॥ ❀ ॥ . ॥
 श्रीगुसाईजीको सेवक एक चूड़डो तिनकीवा ०
 सो वह चूड़डो गोवर्धनमें रहैतो हतो ॥ सो श्रीनाथजी
 नित्य विलछूड़ड पर खेलवे पधारते और वेचूड़डो
 नित्य घास खादवे जातो ॥ तव श्रीनाथजीनें वाकुं
 दर्शन दिये नित्य श्रीनाथजीवासुं वातें करते ॥ एक
 दिन वह चूड़डो गोपालपुर सूधीश्रीनाथजीके संग वातें
 करत आयो तव श्रीगुसाईजीनें देख्यो ॥ तव श्रीगुसाई-
 जीनें बोलायके वाकुं पूछी श्रीनाथजीनें तोसुं कहा वात
 करी ॥ तव वानें कही महाराज वनकी वात करते हते
 नित्य मोकुं आपकी कृपातें वनमें दर्शन देवे हैं और जा
 दिन मोकुं दर्शन न होवे वा दिन में अन्न जल नहीं लेऊ-
 ँ ॥ तव दूसरे दिन सवारकुं आयके दर्शन दे जाएं और
 कोई दिन रातकुं दर्शन दे जाएं ॥ ये सुनके श्रीगुसाईजीनें
 मनुष्यनकुं कही जो राजभोगकी माला बोले तव याकुं
 सबसुं पेहेले दर्शन कराय देवो ॥ ये करके बहार जाय तव
 औरनकुं करावो सो वे मनुष्य ऐसे करनलये ॥ फेर एक
 दिन वह चूड़डो श्रीगुसाईजीकी आज्ञा प्रमाणें आय न
 शक्यो ॥ राजभोग होयचुके और ताला मंगल भयो तव
 आयो ॥ ताला लग्यो देखतेही वाको चित्त उदास होय-
 गयो और तव ज्वर जटगयो ॥ फेर मंदिरके पीछे जायके
 पडरह्यो और बहुत विरहताप भयो ॥ फेर वाको दुःख
 श्रीनाथजी सही न सके ॥ फिर श्रीनाथजीनें छडी लेके
 भीतकुं खोदके मोखो करदियो और मोखामेसुं वाकुं

बुलावे लगे तब वह उठके ठाढो भयो ॥ और श्रीनाथजीके दर्शन किये ॥ और श्रीनाथजीनें बाहुं दीय लड्डवा दिये ॥ तब वह उहांसुं लड्डवा लेके गिरिराजसुं नीचे आयके एक लड्डवा खाय लियो और एक लड्डवा बांध राख्यो तब गाममें ऐसी बात होय गई ॥ कोईने दिनकुं श्रीनाथजीके मंदिरके पाछे मोखो कियो है ॥ ये सुनके श्रीगुसांईजी उदास भये और सब भीतरियाने सामानकी तपास करवाई तब भीतरियानें कही कछु सामान गयो नहीं ॥ तब वा चूड्डानें श्रीगुसांईजीसों जायके बिनती करी ॥ ये मोखो तो श्रीनाथजीनें कियो है ॥ मोहुं दर्शन देवेके लीयें सब बात श्रीगुसांईजीसो बिनती करी और लड्डवा देखायो ॥ तब श्रीगुसांईजीनें मनुष्यनकुं कही ॥ जब ये दर्शन करवे आवे तब सबसुं पेहेले सब समयमें दर्शन करायदेन ॥ और याहुं नित्य पातर धरनी ॥ तब श्रीगुसांईजीके मनुष्य वेसही करते वह चूड्डो श्रीनाथजीको ऐसो कृपापात्र हतो जाहुं श्रीनाथजी बिना सब संसार फीको लगतो ॥ वार्ता संपूर्ण ॥ वैष्णव ॥ १३५ ॥ ❀ ॥ ॥ ॥ ॥ ॥

श्रीगुसांईजीके सेवक वैष्णव कुनबीकी वार्ता ॥ सो वह कुनबी वैष्णव गुजरातिके संग श्रीगोकुल आयो ॥ उहां जायके श्रीगुसांईजीको सेवक भयो ॥ और श्रीगुसांईजीकुं बिनती करी मोहुं गायनकी सेवामें राखो ॥ सो वह वनमें गाय चरावतो और गायनकुं चादरसों पहोंचतो और गायनके नीचे नित्य सूकी जगा राखतो ॥ और तनमनसुं गायनकी सेवा करतो वाकी ऐसी सेवा

देखके श्रीगोवर्धननाथजी वहीत प्रसन्न भये ॥ और वा पटेलकुं खीडकमें दर्शन देवे ल्यो ॥ और खेलवे ल्यो और उहां छोक मंडली करते तव वा पटेलकुं गोपवालनके संग बैठायके खवावते ॥ तव वह पटेल महाप्रसादकी पातल लेवे जातो नहीं ॥ नित्य एकवार श्रीगुसांईजीके दर्शनहुं जातो तव श्रीगुसांईजीनें एक वार पूंछो ॥ जो पटेल तुन प्रसाद कहां लेवोहो ॥ तव वा पटेलनें हाथ जोडके कही जो श्रीगोवर्धननाथजी वनमें छोरानके संग नित्य भोजन करन पधारेहें और भोक्कुं खवावेहें ॥ तव पातल काहेकुं लेवे आहुं ॥ ये सुनके श्रीगुसांईजी बहुत प्रसन्न भये ॥ फेर एक दिन वैष्णव मंडलीमें एक वैष्णवनें पद गायो ॥ नाचत रासमें गोपाल ॥ तव वा पटेलनें कहीं नाचत घासमें गोपाल ॥ तव वे वैष्णव पटेलकुं पकडके श्रीगुसांईजीके पास लगये ॥ तव श्रीगुसांईजीके आगे वैष्णवनें वीनती करी ॥ जो महाराज ये पटेल ऐसे कहेहें ॥ तव श्रीगुसांईजीनें आज्ञा करी ॥ जो याने घासमें नाचत देखे तव कही और तुमनें रासमें नाचत देखे तव कही सो दोनोकी बात सार्चीहै ॥ श्रीगोवर्धननाथजीकी इच्छा होवे जहां जाकुं दर्शन देवे दोनोकी बात सार्चीहै ॥ ये सुनके वे वैष्णव बहुत प्रसन्न भये ॥ सो वे पटेल श्रीनाथजीके सखा भावसां रहते ॥ श्रीगुसांईजीकी कृपातें ऐसो अनुभव भयो हतो ॥ वार्ता संपूर्ण ॥ वैष्णव ॥ १३६ ॥ ❀ ॥ श्रीगुसांईजीके सेवक द्वारकादासजीकी वार्ता सो वे सीलगाममें रहेते हते ॥ सो हथियार बांधते हते और

(२५४) दोस्रौबावन वैष्णवकी वार्ता.

श्रीगोवर्धननाथजीके दर्शनकुं आवते ॥ विनकी देहकी दशा भूलजाती ॥ और दूसरे मनुष्य मंदिरके बाहार उठायके लावते ॥ तब श्रीगुसांईजी पधारके द्वारकादासकुं हेला पाडते ॥ तब देहकी श्रुद्धि आवती जब दर्शनकुं आवते ॥ जब सदैव ऐसी दशा होती ॥ सो वे नित्य श्रीनाथजीके स्वरूपरसमें छके रहते ॥ वह द्वारकादास श्रीगुसांईजीके ऐसे कृपापात्र हते ॥ वार्ता संपूर्ण ॥ वैष्णव ॥ १३७ ॥

॥ श्रीगुसांईजीके सेवक पठानके बेटाकी वार्ता ॥ सो वे पठानके बेटानें श्रीगुसांईजीके पास नाम सुन्यो ॥ और जातको व्यवहार छोडके वैष्णवकी चाल चलन लग्यो ॥ तब वाके माबाप और सब सगा पृथ्वीपतीके आगे पुकारवे गये ॥ तब पृथ्वीपतीनें कही जो तू कंठी तोडडार ॥ जब वानें कही जासुं मेरो दिल लग्योहै वाकुं कंठी बहुत प्रियहै ॥ और वे यहि वानासुं रीझतहै ॥ तब पृथ्वीपतीनें कही तलवार लावो ॥ याको माथो काटडारें ॥ तब वो पठानको बेटा बोल्यो ॥ दूसरी तलवार काहेकुं मंगावोहो ॥ ये मेरे पास है सो लेउ ॥ ये मुनके पादशाह विचार करन लग्यो ॥ विचार करके कही देखो याकी कैसे धर्ममें निष्ठा है ॥ याके ऊपर मैं बहुत खुश हूं ॥ याकुं कोई कछु मति कहो ॥ और ये बडो साचो मनुष्य है ॥ फेर पादशाहनें वाकुं नोकर राख्यो ॥ सो वह पठानको बेटा श्रीगुसांईजीको ऐसो टेकको कृपापात्र हतो ॥ वानें कंठी न तोडी माथो कटावनो कबूल क्यो ॥ वार्ता सं० ॥ वैष्णव ॥ १३८ ॥ श्रीगुसांईजीके सेवक एक रजपूत और रजपू-

बिष्णु (१३९) एक रजपूत और रजपूतकी बेटी. (२५५)

तकी बेटीकी वार्ता ॥ सो एक समय वे रजपूत अपनी बेटीकुं विनके सासरतें बुलायके घर लेजाते हते और चाचाहरिवंशजी गुजराततें श्रीजीद्वार आवते हते ॥ रस्तामें विनको संग भयो ॥ तब चाचाहरिवंशजीनें विचार कियो ये दोनो बापबेटी जीवतो देवीहैं ॥ सो विचार करके विनके संग आये और सांझकुं विनके घर उतरे ॥ और भगवद्वाता करी और सबके मन भिजाय दिये और वा रजपूतके घरके मनुष्यनकुं सबकुं नाम सुनाये ॥ और सबकुं अपरसकी रीति सिखाई ॥ और रजपूतकी बेटीकी वार्ता सुनके श्रीगोवर्धननाथजीमें मन लग गयो ॥ और विरहताप भयो ॥ और श्रीगोवर्धननाथजी वा रातकुं वाके पास पधरि ॥ और सब सुखदिये फेर श्रीनाथजीनें कृपा करी ॥ तब वा रजपूतकी बेटीकुं श्रीनाथजी संग लेके पधारे ॥ और वा रजपूतकी दिव्यदृष्टी भई ॥ चाचाजीकी कृपातें सो वे बेटी श्रीनाथजीके संग लीलामें गई ॥ वा रजपूतनें जाती देखी ॥ तब वे रजपूत आयके चाचाजीके पावन पन्यो ॥ जो वा बेटीकुं श्रीनाथजी ले गये और हमकुं क्युं नहीं लगये ॥ सो याको कारण कहौ ॥ तब चाचाजीनें कही जो तुमकुंइं लेजायंगे परंतु हाल तुमसुं कारज करावनो है और वे रजपूत सुनके प्रसन्न भयो ॥ और चाचाजीके संग आयो और आयके श्रीगुसाईंजीके तथा श्रीनाथजीके दर्शन किये ॥ और नाम निवेदन कन्यो और श्रीठाकुरजी पधरायके अपने देशमें आये ॥ और घरमें भगवत्सेवा करन लगये ॥ और श्रीगोवर्धन-

नाथजी नित्य वा रजपूतकुं दर्शन देते और वा रजपू-
तकी बेटी सहित कोई कोई दिन दर्शन देते ॥ वे रजपूत-
तके संगसों आखी गाम वैष्णव भयो ॥ सो वे रजपूत
श्रीगुसाईंजीके ऐसे कृपापात्र हते ॥ वार्ता संपूर्ण ॥
वैष्णव ॥ १३९ ॥ ❀ ॥ ॥ ॥ ॥

॥ श्रीगुसाईंजीके सेवक विरक्त वैष्णव तिल०
सो वे विरक्त वैष्णव गुजरातसुं श्रीजीदार गये और श्री-
गुसाईंजीके सेवक भये और श्रीनाथजीकुं तथा श्रीगु-
साईंजीकुं और भगवदीयनको एक स्वरूप जानते हते ॥
और ब्रजमें फिन्चो करते एक दिन रस्तामें जाते हते ॥
एक ढोकरीके बेटाकुं सर्पने काटयो सो मरगयो ॥ सो
ढोकरी बद्धत रुदन करती हती ॥ वाकुं देखके और वा
विरक्तकुं दया आई ॥ तब भगवन्नाम सुनायके वाके वे-
टाकुं जीवतो कन्चो ॥ ये बात देखके सब लोक विनके
पाछें लगे ॥ हमकुं ये मंत्र शिखावो तब वानें अष्टाक्षरमंत्र
कह्यो ॥ विन लोगननें कही ये मंत्र तो हमकुं आवेहें ॥
तब वा वैष्णवनें कही विश्वास राखनो तोड्ड विन लोग-
नकुं विश्वास न आयो ॥ तब वह वैष्णव चलयी गयो सो
वे विरक्त वैष्णवकुं भगवन्नामपर ऐसो विश्वास हतो ॥
यासुं अधिक कोई मंत्र मानतो न हतो और जो कारज
करते तो ये नामके प्रतापतें करते सो ऐसे कृपापात्र हते ॥
वार्ता संपूर्ण ॥ वैष्णव ॥ १४० ॥ ❀ ॥ ॥ ॥ ॥

श्रीगुसाईंजीके सेवक विरक्त वैष्णवकी वार्ता ॥

श्रीगुसाईंजी द्वारका पधारे और रस्तामें वह वैष्णव श्री-

श्रीगुसाईजीके संग चलयो और द्वारका होयके श्रीगुसाईजीके संग श्रीगोकुल गयो ॥ और जन्मपर्यंत श्रीगोकुलमें रह्यो ॥ तव श्रीनाथजीकी सेवा शुद्ध चित्तहोयके करतो ॥ और जहां शूलजातो तव विनकुं श्रीनवनीतप्रियाजी सिखावते ॥ जो ऐसे यह वस्तु यारीतीसुं होयहै ॥ वे विरक्त वैष्णव श्रीगुसाईजीके ऐसे कृपापात्र हते ॥ जिनके संग श्रीनवनीतप्रियाजी बालभावसुं खेलते ॥ वार्ता संपूर्ण ॥ वैष्णव ॥ १४१ ॥ ❀ ॥ ॥ ॥ ॥

॥ श्रीगुसाईजीके सेवक एक क्षत्राणीकी वार्ता ॥

सो वह क्षत्राणी श्रीगुसाईजीके पास नाम सुनवेकुं बैठी ॥ परंतु वाकुं अष्टाक्षरमंत्र आयो नहीं ॥ तव श्रीगुसाईजीने आज्ञा करी जो तोकुं मेरो नाम आवेहै ॥ तव वा क्षत्राणीने कही हा प्रभु आवेहै तव श्रीगुसाईजीने आज्ञा करी ये नाम लियो कर तव वह क्षत्राणी श्रीगुसाईजीको नाम लियो करती ॥ दिवस रात वा नामके प्रतापते श्रीनाथजीने वा क्षत्राणीकुं दर्शन दिये और वाके घर आयके माखन मागते ॥ और दूध अरोगते सो वे क्षत्राणी ऐसी श्रीगुसाईजीकी कृपापात्र हती ॥ वार्ता सं० ॥ वैष्णव ॥ १४२ ॥

॥ श्रीगु०से० आनंददास साचोरा ब्राह्मणकी ॥

सो वे आमंददास गुजरातमें रहेते हते और श्रीगुसाईजीके कृपापात्र हते और आनंददास ब्रजयात्रा करन गये ॥ वा देशमें एक वैष्णव हतो बहुत द्रव्य पात्र हतो और वा शेठकुं श्रीठाकुरजीने कही जो आनंददास साचोराके हाथकी सामग्री मोकुं बहुत भावह ॥ जासुं तुम आनंददा-

सकुं बुलावो ॥ तब वे शैठ आनंददासकुं बुलायलाये और ऐसी कही जो जन्मपर्यंत तुम हमारे घर रहो ॥ प्रसु तुमारे ऊपर रीझें ॥ जासुं इनकुं प्रसन्न करौ और वे आनंददास आली रीतीसुं न्हायके सामग्री करन लगे और अनेक प्रकारके मनोरथ करते सो वा गाममें एक ढगुजाट रहतो हतो ॥ वाकुं सब लोग ढगु पांढे कहते ॥ वह आखो दिन अपरसमें रहतो हतो ॥ सो एक दिन वा शैठके इहां प्रसाद लेवे गयो ॥ तब आनंददासकुं देखके खूब चिल्लायो ॥ कही जो में अजानेके हाथको नहीं लेऊं ॥ रिसाय गयो तब कोई कछु बोल्यो नहीं ॥ परंतु आनंददासको चित्त उदास भयो फेर रातकुं वा ढगुजाटकुं श्रीठाकुरजीनें स्वप्नमें कही जो तूं याके हाथको प्रसाद नहीं लेवेंगो तो वहिमुख होवेंगो ॥ तब सवारे प्रसाद लेवेके समय वे ढगुजाट आयके आनंददाससों बिनती करी जो मेरे अपराध क्षमा करौ ॥ में तुमारे हाथको प्रसाद लेवेकुं आयोहूं ॥ तब आनंददासनें बिनकुं प्रसन्नतासों प्रसादकी पातर धरी ॥ और कछु मनमें दोष लाये नहीं वे आनंददास साचोरा ऐसे कृपापात्र हते जिनकुं श्रीठाकुरजी सब सामग्री शिखाय जाते ॥ वार्ता संपूर्ण ॥ वैष्णव ॥ १४३ ॥ * ॥ ॥ ॥

॥ श्रीगुसाईंजीके सेवक एक नाऊ वैष्णवकी वार्ता ॥ सो वे नाऊ द्वारकाके रस्तामें रहते हते ॥ उहां श्रीगुसाईंजी पधारे और श्रीगुसाईंजीके नख उतारे जहां सूधी नख उता-या करे तहांसूधी तो मनुष्य देखे ॥ और जब नख उतार चुक्यो और राछवांधे तब साक्षात् पूर्ण-

पुरुषोत्तमके दर्शन भये और श्रीगुसांईजीकुं वीनती करी महाराज मोकुं शरण लें ॥ तव श्रीगुसांईजीने नामनिवेदन करायो ॥ और वे नाऊ परम भगवदीय भयो और सब राळ कुवामें डार दिये ॥ और ऐसो विचार कन्यो के व्यवहार करके निर्वाह करुंगो ॥ ऐसे विचारके वे नाऊ भगवत्सेवा करन लग्यो ॥ और व्योपार करन लग्यो तव श्रीठाकुरजी धीरेधीरे प्रसन्न भये ॥ वे नाऊ श्रीगुसांईजीके ऐसे कृपापात्र हते ॥ जिनकुं थोडे दिननमें भगवल्लीलाको अनुभव भयो ॥ वार्ता संपूर्ण ॥ वैष्णव ॥ १४४ ॥ ❀ ॥

॥ श्रीगुसांईजीके सेवक भीमजी दुबे साचोरा ब्राह्मणकी वार्ता ॥ सो वे भीमजी दुबेको गाम गुजरातके रस्तापर हतो ॥ और श्रीगुसांईजी गुजरात पधारे तव वा गाममें मुकाम कन्यो हतो ॥ और भीमजी दुबे तलावपर न्हावे आयो हतो ॥ लहां भीमजी दुबेकुं श्रीगुसांईजीके दर्शन भये ॥ तव साक्षात् पूर्णपुरुषोत्तमके दर्शन भये ॥ तव भीमजी दुबे श्रीगुसांईजीको सेवक भयो ॥ और ग्रंथ और मारगकी रीती सीखवेके लीये भीमजी दुबे श्रीगुसांईजीके संग गये और सब रीती सीखे ॥ और ग्रंथ सीखे और श्रीठाकुरजी पधरायके फिर आयके अपने घरमें रहे ॥ और जब नागजीभाई श्रीगोकुल आवते जावते दो चार दिन भीमजीके पास रहते और भगवद्वार्ता करते और भगवद्रसमें छके रहते ॥ और एक समय नागजी भाई भीमजीभाईके घर गये ॥ तव भीमजीभाई घरमें हते नहीं ॥ तव नागजीभाई आपनो नाम कहेके श्रीगोकुल चलेगये ॥

जब भीमजीभाई आये और खबर सुनी जो नागजीभाई पाछे गये ॥ तब भीमजीभाईकुं बड़ी उदासी भई ॥ और महाप्रसाद लिये नहीं ॥ तब रातकुं रस्तामें नागजीभाई सूते तब श्रीगोवर्धननाथजी पधारके आज्ञा करी जो तुम भीमजीभाईकुं मिलेविना आयेहो और भीमजीभाई सूखेहैं जो तुम भीमजीभाईके मिलेविना आवोगे तो हम तुमकुं दर्शन नहीं देवेंगे ॥ तब नागजीभाई सूते उठके पाछे गये ॥ और भीमजीभाईकुं जायके मिले ॥ और चार पांच दिन रहे ॥ तब भीमजीदुबेकी प्रसन्नता राखके नागजीभाई श्रीगुसाईंजीके दर्शनकुं गये ॥ और श्रीनाथजीनें पेहेलेतें श्रीगुसाईंजीकुं कही ॥ जो नागजीभाईनें भीमजीकुं दोदिन सूखे राखेहैं ॥ तब नागजीभाई श्रीगुसाईंजीके पास गये ॥ और दर्शन किये तब श्रीगुसाईंजीनें आज्ञा करी जो वैष्णवको और श्रीठाकुरजीको एकस्वरूप जाननो ॥ वैष्णव कछु ओछी वस्तु नहींहैं ॥ जिनके लियें पूर्णगुरुषोत्तमकुं अपेक्षा भईहै ॥ और पृथ्वीपर जन्मलेनो पढ्योहैं ॥ ऐसे वैष्णवनकुं श्रम देनो न चाहिये ॥ ये सुनके नागजीभाईनें अपराध क्षमा करायो ॥ सो वै भीमजीदुबे श्रीगुसाईंजीके ऐसे कृपापात्र भगवदीय हते ॥ जिनकी आर्ति श्रीनाथजी न सहिशके ॥ वार्ता संपूर्ण ॥ वैष्णव ॥ १४५ ॥ * ॥ ॥ ॥ ॥ ॥

॥ श्रीगुसाईंजीके सेवक राजनगरमें रहते तिनकी वार्ता ॥ सो वै वैष्णवको ऐसो नेम हतो ॥ एक दो चार वैष्णवनको प्रसाद लेवायके लेतो ॥ और जा दिन

वैष्णव कोई नहीं आवतो तब स्त्री पुरुष प्रसाद न लेते ॥
 ऐसो विनको आग्रह हतो सो कोई दिन वे शैठ परदेश
 गये ॥ और स्त्रीकुं कही गये जो तूं नित्य वैष्णवनकुं प्रसाद
 लेवाइयो और जितने वैष्णव प्रसाद लेजाय ईतने पैसा
 गागरमें डारदीजो ॥ तब वा स्त्रीनें ऐंसेही करी ॥ फेर जब
 शैठ परदेशतें आयो तब आयके पैसा गिनें तो पैसामेंसुं
 पांच रत्न निकसे ॥ तब स्त्रीसुं पूछी तब स्त्रीने कही मैनें
 तो पैसा डारे हैं कछु रत्न डारे नहीं ॥ तब विन दिननमें
 श्रीगुसाईंजी राजनगरमें विराजते हते ॥ तब वे वैष्णव
 पांच रत्न लैके श्रीगुसाईंजीके पास गये ॥ तब श्रीगुसाईं-
 जीसों वीनती करी जो महाराज याको कारण कहा हो-
 यगो ॥ तब श्रीगुसाईंजीनें आज्ञा करी जो ये पांच भगवदीय
 तादृशी आये होयेंगे ॥ जासुं ये पांच रत्न होय गयेहें ॥
 जासुं वैष्णवनकुं अवश्य करके जैसे बने तैसे आदर क-
 रनो ॥ वे वैष्णव श्रीगुसाईंजी को ऐंसी कृपापात्र हतो ॥
 जिनकुं रत्नद्वारा वैष्णवके स्वरूपको ज्ञान भयो ॥ सो श्री-
 ठाकुरजीनें करवायो ॥ वार्ता संपूर्ण ॥ वैष्णव ॥ १४६ ॥ ❀

॥ श्रीगुसाईंजीको सेवक चूहडोबहारवालाकी
 वार्ता ॥ सो वह चूहडो नित्य गोकुलकी गल्ली झाडतो
 और मनमें ऐंसे जानतो श्रीगुसाईंजी ठाकुरानी घाटपर
 पधारेहें ॥ इनके चरणारविंदमें कूरो कचरो न लगे तो
 आछी बातहै ॥ और वैष्णव जुठनकी पातर डारते सो
 वह लेतो ॥ वैष्णवनकी जुठन जो खाई तब वाकुं दिव्य-
 दृष्टी भयी ॥ सब मारगकी रीती वाकुं समज पढगई ॥

और वेदशास्त्रको ज्ञान होय गयो ॥ जैसे नाभाजीकुं भयो हतो ॥ सो विननें भक्तमाल करीहैं ऐसे या चूहडाकुं ज्ञान भयो ॥ एक दिन श्रीगोकुलमें कासीके पंडित आये ॥ सो विननें रसोई करी तब खायके वा चूहडाकुं जूठन देवे लगे तब वा चूहडाने कही में तो कोईको जूठन नहीं लेऊं ॥ तब वे दूसरी रोटी देवे लगे ॥ तब कही ये तो अनप्रसादीहैं ॥ श्रीठाकुरजीकुं भोग नहीं धरीहैं ॥ सो मैं नहीं लेउंगो ॥ तब विननें कही भोग धरीहैं ॥ तब वा चूहडाने कही ये रोटी श्रीठाकुरजी अरोगे नहींहैं ॥ तुमारी ये रसोई सब जूठनकीहैं ॥ चूला फूंकके रसोई करीहैं ॥ तब वेदनके तथा शास्त्रनके वचन वा चूहडाने कहे ॥ जब वे पंडित मुनके चकित होयगये ॥ और कहन लगे जिनके चूहडा ऐसे पंडितहैं ॥ वे कैसे होवेंगे इनसुं आपणे वाद करणो खोटो है ॥ ऐसे विचारके पंडित पाछे गये ॥ ये बात कोई वैष्णवनें श्रीगुसाईंजीसों कही जो पंडित या चूहडाकी बातें मुनके पाछे गये हैं ॥ तब श्रीगुसाईंजीनें आज्ञा करी जो या चूहडाने शुद्ध भावसों वैष्णवनकी जूठन लीनी है ॥ सो याकुं सब ज्ञान होय गयो यामें कहा आश्चर्य है ॥ वैष्णवनकी जूठन लीयेसुं तो हृदय शुद्ध होवे हैं ॥ और ज्ञानदृष्टी होवेहैं वे अन्यमार्गी पंडित कहा जाने ॥ ऐसे कहेके श्रीगुसाईंजी चुप होय रहे ॥ सो वे चूहडो ऐसो कृपापात्र हतो ॥ जो वैष्णवनकी जूठन खायके ऐसो भाग्यशाली भयो ॥ वार्ता संपूर्ण ॥ वैष्णव ॥ १४७ ॥ ❀ ॥ ॥ ॥ ॥ ॥

॥ श्रीगुसांईजीके सेवक एक वैष्णवकी वार्ता ॥
 सो वे वैष्णव पूरवदेशमें रहेतो हतो ॥ सो श्रीगुसांईजी
 पूरवकुं पधारे हते तव सेवक भयो और फेर वाके मनमें
 ऐसी आई जो श्रीगुसांईजीके दर्शन कर आऊं तो ठीक
 सो वे वैष्णव गोपालपुर आयो ॥ और आयके श्रीगुसां-
 ईजीके दर्शन करे ॥ साक्षात् नंदकुमारके दर्शन भये ॥
 और श्रीगिरिराज पर जायके श्रीनाथजीके दर्शन क्यो ॥
 और उहां देखे तो श्रीगुसांईजी तथा श्रीनाथजी एक
 स्वरूप दीखे है ॥ कोई समय तो श्रीनाथजीमें श्रीगुसां-
 ईजी दीख पड़े और कोई समय तो श्रीगुसांईजीमें श्रीना-
 थजी दीख पड़े ॥ तव वा वैष्णवनें निश्चय क्यो ॥ जो ये
 दोनो एकहीहै ॥ जो इनकुं न्यारे न्यारे समझे सो मनुष्यकी
 गणतीमें नहीं है ॥ सो वे वैष्णव ऐसो विचार करन लग्यो ॥
 ये दोनो सेव्य और सेवक एक हैं ॥ सेवार्था दौय दीखे है
 वास्तवते एकही है ॥ सो गोपालदासजीनें गायेहे ॥ “रूप
 वेठ एक ते भिन्न थई विस्तरे विविधलीलाकरे भजन-
 सारे” ॥ जो ऐसे श्रीगुसांईजीको रूप धरके सेवा करके
 न बतावते तो सेवाकी खबर कैसे पड़े ॥ वस्तुतः एकही
 है सो वे वैष्णव श्रीगुसांईजीको ऐसो कृपा पात्र हतो ॥
 दोनो स्वरूपनकुं एक जानके मग्न रहेतो ॥ वार्ता संपूर्ण ॥
 वैष्णव ॥ १४८ ॥ ❀ ॥ ॥ ॥ ॥ ॥
 श्रीगुसांईजीके सेवक एक श्रावककी बेटीकी ०
 सो श्रीगुसांईजी आगरे पधारे हते ॥ और रूपचंदनदाके
 घर बिराजते हते ॥ और दशपदरें लुगाई रस्तामें जा-

ती हती ॥ वाई समय एक मनुष्यनें तकसीर करीहती ॥ वाकुं पृथ्वीपतीके डुकुमसुं फांसी चढावते हते ॥ वा दसपंदरे लुगाईमें एक श्रावककी बेटी हती ॥ सो मनुष्य-कुं फांसी देते देखके परगई ॥ और मृच्छा आई या बा-तकी खबर श्रीगुसांईजीकुं पडी ॥ तब श्रीगुसांईजीनें वि-चार क्यो जो याको कैसो दयाको स्वभावहै दैवी जी-वविना औरकुं ऐसी दया होय नहीं ॥ ये विचार करके श्रीगुसांईजीनें वाकुं अचेत जानके एक ब्रजवासीकुं कही ॥ याके ऊपर जल छांटो ॥ तब वा ब्रजवासीनें जल छां-टयो ॥ दोघडी पाछें वाकी मृच्छा खुली ॥ तब वा श्रावक-की बेटीनें वा ब्रजवासीसों पूछी जो तूं कोणहै ॥ तब वानें कही श्रीगुसांईजीको मनुष्य हूं ॥ तब वे श्रावककी बेटी श्रीगुसांईजीके दर्शनकुं आई ॥ और ब्रजवासीनें सब बात वाकुं मृच्छा आई सो कही ॥ तब श्रीगुसांईजीनें आज्ञा करी ये शुद्धभाववाली है ॥ याके ऊपर जितनो रंग चढावो इतनो चढे ॥ तब वे श्रावककी बेटी बोली ॥ आप जें-सो कारीगर रंग चढावेवालो और कोन मिलेगो ॥ ये छुनके श्रीगुसांईजी बहुत प्रसन्न भये और वाकुं नाम सु-नाये और निवेदन कराये ॥ फेर घरमें आयके सब धोवे लीपवे लगी ॥ तब वाके धनीनें पूछी ये तूं कहा करेहै ॥ तब वाने कही मैं श्रीगुसांईजीकी सेवक भई हूं ॥ तब वा-के पतीनें कही मैहूं श्रीगुसांईजीको सेवक होय आउंहुं तब वाको धनी सेवक भयो ॥ सो दोनो स्त्रीपुरुष श्रीठा-कुरजीकी सेवा पधरायके करन लगे ॥ और नित्य श्री-

गुसाईंजीके दर्शन करवेकुं आवते ॥ फेर श्रीगुसाईंजी श्री-
गोकुल पधारे तव वा श्रावककी बेटीनें वीनती करी जो
सोकुं आपके दर्शनविना रह्यो नहीं जायगो ॥ तव श्रीगु-
साईंजीनें आज्ञा करी ॥ जो तुं नित्य यमुनाजल भरवेकुं
आईयो ॥ और जव तू यमुनाजीमें नहावेगी ॥ हम
तोकुं दर्शन देवेंगे ॥ तव वा श्रावककी बेटी ऐसैं
करन लगी ॥ फेर कोई दिन ब्रजवासी श्रीगोकुलतें
आगेर आये ॥ सो वाके घर उतरे सो वे ब्रजवासी-
को जप करवेको समय भयो ॥ तव कही जो मैं श्री-
गुसाईंजीकी बैठकमें गौमुखी भूलगयोई सो श्रीगोकुल
पाळे जाउंगो जव प्रसाद लेउंगो ॥ तव वा श्रावककी बे-
टीयें कही बैठो बैठो मैं श्रीगुसाईंजीके दर्शन जाउंगी तव
तुमारी गौमुखी लेती आउंगी ॥ इतनो कहेके जलभरवेकुं
गई सो यमुनाजीमें न्हाई और श्रीगुसाईंजीके दर्शन कन्ये
और गौमुखी लेचली ॥ तव वा ब्रजवासीकुं दीनी तव वे ब्रज-
वासी और विचारमें पडगयो ॥ ये श्रीगोकुल जायके कैं-
से लाई होएगी तव उठके पावन पन्यो तव वानें कही ये
सब श्रीगुसाईंजीको प्रताप है श्रीगुसाईंजी जव अलौकिक
देहको दान करें तव सब कारज सिद्ध होंवें ॥ ये सुनके वे
ब्रजवासी छुपकर रह्यो सो वे श्रावककी बेटी ऐसी कृपा-
पात्र भई जिनकुं अलौकिक पदार्थ सर्वत्र सर्वमें व्यापक
दीखते हते ॥ वार्ता संपूर्ण ॥ वैष्णव ॥ १४९ ॥ ❀ ॥ ॥
॥ श्रीगुसाईंजीके सेवक दोय भाई पटेल सो अ-
लियागिरी चंदन लाये तिनकी वार्ता ॥ वे पटेल गुजरा-

तमुं ब्रजमें गये और श्रीगुसांईजीके सेवक भये ॥ सो उहाँ श्रीगोवर्धननाथजीकी सेवामें रहे ॥ सो श्रीगोवर्धननाथजीकी सेवा तन मन धन सों करके एकदिन श्रीगुसांईजीनें मल्लियागरचंदन लेवेकुं दोभाईनकुं पठाये सोवे दोनो भाई मल्लियागर पर्वत उपर जायके चंदनको झाड काटवे ल्यो तब एक भाईकुं तो सर्पनें फूंक मारी सो दूसरे भाईनें श्रीगोवर्धननाथजीको नाम लेके जल छांटयो तब वाको विष उतर गयो तब श्रीगुसांईजीकुं जायके मल्लियागर चंदन दियो तब श्रीगुसांईजीनें आज्ञा करी तुम कछु मागो तब विननें वीनती करी जो हम हाथनसुं श्रीनाथजीकुं चंदन धरावें तब श्रीगुसांईजीनें आज्ञा करी भलें धरावो ॥ फेर एक भाईनें चंदन धरायो और दूसरो भाई पंखा करन लग्यो फेर दूसरे दिन दूसरे भाईनें चंदन लगायोने दूसरो भाई पंखा करन लग्यो सो वे दोनो भाई श्रीगुसांईजीके ऐसे कृपापात्र हते ॥ जिनसुं श्रीनाथजी बोलते चालते और वनमें संग लेजाते सो वे श्रीगुसांईजीकी कृपाते ऐसे दोनो भाई भगवदीय भये ॥ वार्ता संपूर्ण ॥ वैष्णव ॥ १५० ॥ ❀ ॥ ॥ ॥ ॥

श्रीगुसांईजीके सेवक किशोरीबाई हती तिन० सो वे किशोरीबाई एक वैष्णवकी बेटी हती और बालकपणामें श्रीगुसांईजीकी सेवक भई हती पाछें शीतला निकसी और शीतलाके रोगसुं किशोरीबाईके हाथपांव लुले भये और मावापतो मरगये हते ॥ और एक किशोरीबाईकी बेहेन एकवार आयके खवाय जाती और किशोरी-

वाई बालकपणेंसुं यमुना अष्टकको पाठ सीखी हती सो अष्टप्रहर यमुना अष्टकको पाठ क्यो करती ॥ सो एक दिन किशोरीवाईकी वेहेनकुं रिस चढी सो किशोरीवा-ईकुं खवायवे न आई ॥ तव श्रीयमुनाजी पधारके किशोरीवाईकुं रसोई करके प्रसाद लेवाय गये ॥ वाई दिन आधो रोग मिट गयो फेर दूसरे दिन यमुनाजीनें ऐसी कृपा करि तव सघलो रोग मिटगयो ॥ तीसरेदिन किशोरीवाई आप रसोई करन लगी और महा प्रसाद लियो ॥ चौथे दिन किशोरिवाई रसोई करन लगी वाईसमय किशोरीवा-ईकी वेनके मनमें ऐसी आई जो चारदिन भये किशोरीवा-ईनें कछु खायो नहींहि ॥ तव वे वेहेन खवर काढवे आई तव किशोरीवाईकी वेहेन देखे तो किशोरीवाई रसोई करेंहे ॥ तव वे वेहेन देखके चकित होयगई ॥ और मनमें विचार कियो ये लुली कैसे मिटगई होयगी ॥ फेर किशोरीवाईकी वेहेननें लोगनकुं कही तव सब गामके लोग देखवे आये सो विस्मय भये तव किशोरीवाईके लीयें वा गाममें श्रीगुसाईंजी पधारे तव किशोरीवाई चलके दर्शन करवेकुं आई और श्रीगुसाईंजीकुं वीनती करी जो महाराज मौकुं सेवा पधराय देउ ॥ तव श्रीगुसाईंजीनें आज्ञा करी जो तुमारे ऊपर श्रीयमुनाजीकी कृपा भईहे सो यमुनाजीकी रेती एक थेलीमें तुमकुं पधराय देउ विनकी सेवा सब साजसु करौ तव किशोरीवाई प्रसन्न भई और श्रीगुसाईंजीनें रमणरेतीकी थेली दीनी ॥ सो वे पधरायके सिंघासन उपर मार्गकी रीतीसुं सेवा करन लगी ॥ सो

किशोरीबाईके ऊपर ऐसी कृपा भई ॥ कोईदिन तो श्री-
नाथजी वा गादीके ऊपर दर्शन देवे और कोईदिन श्री-
नवनीतप्रीयाजी और कोई दिन श्रीमथुरानाथजी कोई-
दिन श्रीविठलेशजी कोईदिन श्रीद्वारकानाथजी कोईदिन
श्रीगोकुलनाथजी कोईदिन श्रीगोकुलचंद्रमाजी कोईदिन
श्रीबालकृष्णजी कोईदिन श्रीमदनमोहनजी यारीतीसुं
किशोरीबाईकुं सब स्वरूपनके दर्शन लीलासहित होवन
ल्यो ॥ सो वे किशोरी बाई श्रीगुसांईजीकी ऐसी कृपापात्र
भई ॥ वार्ता संपूर्ण ॥ वैष्णव ॥ १५१ ॥ ❀ ॥ ॥ ॥
॥ श्रीगुसांईजीके सेवक दोउभाई पटेल ति० ॥
सो वे श्रीगुसांईजीके सेवक दोउ पटेल हते ॥ सो एक
गाममें रहते हते ॥ सो वा गाममें एक देवीको मंदिर
हतो सो जूनो होयगयो हतो ॥ तब वा गामको राजा
देवीको भक्त हतो सो राजानें ऐसो विचार क्यो जो दे-
वीको नयो मंदिर बने तो ठीक ॥ तब गामके मनुष्यनके
ऊपर कर डान्यो यथाशक्ति सबके पास लेनो ॥ वे दोनो
भाई पटेलनके उपर दो रुपैया डारे तब वे दोनो भाई-
नने विचार कियो जो अपनो द्रव्य तो श्रीठाकुरजीको है ॥
सो कैसे दियो जाय तब वा राजा कैसे छोडे सो उपाय
करनो फेर दोनो भाईनने ऐसो विचार कियो या देवीकुं
कूवामें डारदेनी ॥ तब रातकुं आयके वा देवीकुं कूवामें
पटक आये और घरमें आयके सुते ॥ तब वो देवी रा-
जाकी छातीपर जायके चढी जो कूवामें पडीहूं सो तुं
मोकुं काढ और वे वैष्णव पटेल दोयभाई तेरे गाममें र-

हैं विनकुं दो रुपैया दंड क्योहैं सो छोड देउ ॥ तब राजा चौकठठयो वाईसमय वे दोनो पटेलनकुं बुलायके दंड माफ क्यो और देवीकुं कृवामेंसुं कढाई सो दोनो पटेलनको श्रीठाकुरजी उपर एंसी विश्वास हतो ॥ सो देवीकुं तुच्छ गणी और देवी विनकुं कछु परामव न करसकी ॥ सो वे दोनो पटेल एंसे कृपापात्र हते ॥ वार्ता संपूर्ण ॥ वैष्णव ॥ १५२ ॥ ❀ ॥ ॥ ॥

॥ श्रीगुसाईंजीके सेवक एक वैष्णवकी वार्ता ॥ वाके शरीरमें कोढ़ भयो हतो तब वे वैष्णव जायके ब्रजमें रह्यो ॥ और श्रीगुसाईंजीके दर्शन तथा श्रीनाथजीके दर्शन नित्य करतो और श्रीगुसाईंजीसुं वीनती करतो महाराज मेरो कोढ़ मिटजाय ऐसी कृपा करौ तब श्रीगुसाईंजी आज्ञा करते जो श्रीठाकुरजी करेंहैं सो विचारकरके करेंहैं फेर वा वैष्णवसुं श्रीनाथजी बोलन लगे तब वा वैष्णवनें श्रीनाथजीसुं कही मेरो कोढ़ मिटे सो उपाय बतावो तब श्रीनाथजीनें कही हम कछु वैद्य नहींहैं ऐसे केहेके वाकी परीक्षा करते तब वो वैष्णव कहेतो जो प्राणजायेगतो कबुल परंतु अन्याश्रय न करुंगो ॥ ऐसे कहेके बैठ रहेतो ॥ एक दिन वाकुं श्रीनाथजीनें कही जो तुं अमकागाममें अमका वैष्णवके घर जायके दर्शन करिआव ॥ वो वैष्णव कहेगो तब तेरो कोढ़ जायगो ॥ तब वो वैष्णव वा गाममें वा वैष्णवके घर गयो और उहां जायके दर्शन करे ॥ देखेतो वा वैष्णवनें वैश्या राखीहै ॥ परंतु वाकुं अभाव न आयो तब

वा वैष्णवनें पूछी जो तुम कैसे आये तब विननें कही श्री
नाथजीनें ऐसी आज्ञा करी है ॥ तब वा वैष्णवकुं पश्चा-
त्ताप भयो तब वाने कही जो मैं ऐसो पतित हुं तोहुं मोकुं
श्रीनाथजी नहीं मूलेहे ॥ मैंने काहेकु ऐसे कन्यो हे ॥ तब
वाकुं बहुत विरहताप भयो सो वा तापसुं वाकी देह छूट-
गई और वा वैष्णवको कोढ़ मिटगयो और नूतन अंग
होय गयो ॥ सो ये दोनो कारज श्रीनाथजीनें एक समय
कन्ये एक वैष्णवकुं लीलमे लियो ॥ और एकको कोढ़
मिटायके सेवाकी योग्यता दीनी ॥ सो वे कोठी वैष्णव
श्रीगुसाईजीको ऐसो कृपापात्र हतो ॥ वार्ता संपूर्ण ॥
वैष्णव ॥ १५३ ॥ * ॥ ॥ ॥ ॥
॥ श्रीगुसाईजीके सेवक मेहाधीमरकी वार्ता ॥
सो वे मेहा रावलके पास गोपालपुरमें यमुनाजी किना-
रापर रहेतो हतो ॥ सो श्रीगुसाईजी गुजरातते श्रीगोकुल
पधारे सो गोपालपुरके घाट उतरे ॥ और गोपालपुर
डेरा किये वाई दिन श्रीगोकुल पधारवेको मुहूर्त नही हतो ॥
सो वे मेहाधीमर भाल्ली पकडवेके लीये यमुनाजीके कि-
नारापर बैठो हतो ॥ तब मेहाधीमरकुं एक वैष्णवनें कही
जो तोहुं एक रुपैया देउ श्रीगुसाईजी इहां विराजे तहां-
सुधी जाल मति डारियो ॥ तब मेहाधीमर रुपैया लेके घर
गयो और मेहाधीमरनें वैष्णवकुं ऐसी कही मोकुं खाय-
वेको दिवाईयो श्रीगुसाईजी भोजन करचुके और सब वै-
ष्णवनकुं पातर धराइ ॥ और वा वैष्णवनें ब्रजवासिसों
कही या गाममें मेहाधीमर रहेहे याकु बुलाय लाव ॥ तब

मेहाधीनर आयो और श्रीगुसाईंजीके दर्शन किये ॥ सो साक्षात् पूर्णपुरुषोत्तमके दर्शन भये और वीनती करी जो महाराज मोकुं शरण लेउ ॥ तव श्रीगुसाईंजीनें कृपाकरके नाम सुनायो और मेहाके घरके सवनकुं नाम सुनायो ॥ तव वा मेहाकुं श्रीगुसाईंजीके स्वरूपको ज्ञान भयो ॥ तव मेहाधीनरनें ये पद गायो ॥ सो पद ॥ राग भैरवा ॥ श्रीविठ्ठलप्रभुमहाउदार ॥ महापतितशरणागतलीनें निर्भयपददीनोनिर्धार ॥ १ ॥ वेदपुराणसारजोकहिये सोपुरुषोत्तमहायदियो ॥ मेहाप्रभुगिरिधरप्रगटे पुष्टिमारगरसप्रकटकियो ॥ २ ॥ सो ये पद सुनके श्रीगुसाईंजी वहुत प्रसन्न भये और वैष्णव कहैनलगे जो मेहा सवारे जाल डारके बैठो हतो ॥ और दर्शनमात्रसुं याकी निर्मल बुद्धी कैसी भईहे और प्रभुकी कृपाको पार नहीं ॥ फिर श्रीगुसाईंजीनें मेहाकुं ब्रुठन धरी सो वे मेहानें लीनी ॥ तव भगवल्लीलाकी अनुभव भयो फेर श्रीगोकुलमें श्रीगुसाईंजीके संग आये ॥ श्रीठाकुरजी पधरायके सेवा करन लगे ॥ फेर अन्नकूटपर श्रीनाथजीके दर्शनकुं आये तव मेहानें अन्नकूटके पद गाये ॥ सो पद ॥ राग सारंग ॥ हमारोंदेवगोवर्धनपर्वत । गोधनजहांसुखारो ॥ सुरपतिकों बलिभागन दीजे कीजेमतोहमारो ॥ १ ॥ पावकपवन चंदजलसुरज पर्वतआज्ञालीने ॥ ताईश्वरकोकह्योकीजीये ॥ कहाइंद्रकेदीने ॥ २ ॥ जाकेआसपाससवत्रजकुलसुखीरहेप्रभुपारे ॥ जोरिसकटअछतोल्लेभलोमतोकोटारे ॥ ३ ॥ बडेबडेवैठविचारमतोकरिपर्वतकोबलिदीजे ॥ नंदलालकोकुंवरला

ढिलोकान्हकहेसोकीजे ॥ ४ ॥ माखनदूधदह्योपृतपायस
 सबलेलेब्रजवासी ॥ यज्ञस्वरूपधरेबलिमुक्तपर्वतरौलनि
 वासी ॥ ५ ॥ मिथ्योभागसुरपति जियजान्योमेघदि
 येमुकुराई ॥ मेहाप्रभुगिरधरकरराख्योनंदसुवनसुखदान
 सुखदाईदाराग सारंग। मुनियेतातहमारोमतोश्रीगोवर्धन
 पूजाकीजे ॥ जौतुभयज्ञरच्योसुरपतिकोसोबलीइहालेदीजे
 ॥ १ ॥ कंदमूलफलफूलनकीनिधिजोभागोसोपावो ॥ यह-
 गिरिवासहमारोनिशिदिननिर्भय गायचरावो ॥२ ॥दूधद-
 हीकेमाठभरायेव्यंजनअमृतअपार ॥ मधुमेवापकवान
 मिठाईभरिभरिराखेथार ॥ ३ ॥ बडेबडेबैठिविचारमतो
 करिकान्हकहेसोइकीजे ॥ विविधभांतिकोअन्नकूटकरिप-
 र्वतकोबलिदीजे ॥ ४ ॥ यहनगनानारूपधरतहैब्रजजनको
 रखवारो ॥ देवनमेंयहबडोदेवताभोहूकोअतिप्यारो॥५॥
 नंदनंदनऔररूपआपधरिआपनभोजनकीनो ॥ मेहाप्रभु
 गिरिधरनलाढिलोभागभागसबलीनो ॥ ६ ॥ ये पद गाय
 चुक्यो तब मेहाकुं सुर्छा आई ॥ तब मेहाकुं श्रीगुसाई-
 जीनें कृपादृष्टि करके ठाडोकियो ॥ और आज्ञा करी जो
 श्रीनाथजीकी आज्ञा ऐसी है कछुक दिन भूतलपर रहो ये
 सुनके उठ बैठे और दंडवत करी और कही जो ॥ नि-
 जेच्छातःकरिप्यति ॥ ऐसे कहैके ठाकुरजीकी सेवामें त-
 तपर भयो ॥ फेर मेहा गोपालपुरमें आयके सेवा करन
 लग्यो फेर मेहाकी स्त्रीके गर्भ भयो और प्रसवको समय
 भयो ॥ मेहा गाममें नहीं हतो ॥ तब मेहाकुं बेटा भयो॥
 तब मेहाकी स्त्रीकुं बडो पश्चात्ताप भयो ॥ ये दृष्ट बेटा

क्युं भयो मेरी भगवत्सेवा छूटी ॥ ऐसे विचारके रुदन
 करवेलगी तब श्रीठाकुरजीनें आज्ञा करी जोरो मति ॥
 नाहायके मेरी सेवा कर तब वे स्त्रीनें रीतीप्रमाणें नाहायके
 भगवत्सेवा करी ॥ फेर जब मेहा आयो तब मेहानें कही
 तेने ऐसी अवस्थामें सेवा क्युं करी ॥ तब वा स्त्रीनें कही
 मोकुं श्रीठाकुरजीनें आज्ञा करीहै ॥ तब मेहा सुनके व-
 हत प्रसन्न भयो ॥ और मेहानें बहुत नवे पद करके भग-
 वल्लीला अनेक प्रकारसुं गाईहै ॥ सो वे मेहा श्रीगुसाईजी-
 के ऐसे भगवदीय कृपापात्र हते ॥ वा० स० ॥ वै० ॥ १५४ ॥
 ॥ श्रीगुसाईजीके सेवक एक वैष्णव मोहनदास
 हते तिनकी वार्ता ॥ सो वे मोहनदास गोपालपुरमें रहते
 हते ॥ तब गोविंदकुंडपें नित्य नाहावे जाते ॥ गोपालपु-
 रसुं चढके और गोविंदकुंडकी आडी उतरते ॥ एकदिन
 उतरवेके रस्तापर गोवर पन्यो हतो ॥ तब वे वैष्णव दू-
 सरी आडी उतन्यो सो श्रीगुसाईजीनें उतरतो देख्यो तब
 श्रीगुसाईजीनें माथो हलायो ॥ फेर वे मोहनदासनें श्री-
 गुसाईजीकुं दंडवत करके पूछन लग्यो जो आपनें मोकुं
 देखके माथो क्युं हलायो ॥ तब श्रीगुसाईजी बोले जो तुम
 श्रीगिरिराजपर कारण विना पांवधरोहो ॥ और पावनसुं
 खुंदोहो सो गिरिराजको माहात्म्य कछु जानो नहींहो ॥
 तब दूसरे वैष्णवननें पूछी जो श्रीगिरिराजजीको माहात्म्य
 आप कृपाकरके कहो ॥ तब श्रीगुसाईजीनें पद्मपुराणकी
 कथा कही ॥ जो एक दिन श्रीठाकुरजी तथा नारदजी-
 वनमें ठाडे हते ॥ तब श्रीठाकुरजीनें कही नारदजी जल

लावो ॥ तब नारदजी जल लेवेकुं गये उहां जायतो एक सरोवर हतो ॥ और दीय ऋषी तपस्या करते हते और तलावके पास मनुष्यनके हाडनको पर्वत हतो ॥ और नारदजी देखके विस्मय होय गये सो नारदजी जल लीये विना पाछें आये ॥ तब श्रीठाकुरजीनें पूछी जो जल क्युं लाये नहीं तब नारदजीनें समाचार कहे और कारण पूछे तब श्रीठाकुरजीनें कही जो दो ऋषी तपश्चर्या करेहैं ॥ गोवर्धन पर्वतके दर्शनके लीये फेर देह छोडेहैं ॥ फेर जन्मेहैं फेर तपश्चर्या करेहैं ॥ इनके इतने जन्म भयेहैं ॥ जिनके शरीर छूट छूटके हाडनको पर्वत होय गयोहैं ॥ तो हुं गोवर्धन पर्वतके दर्शन नहीं भये हैं ॥ ये सुनके नारदजी बहुत विस्मय भये ॥ सो श्रीगुसांईजी आज्ञा करेहैं जो आपनकुं गोवर्धन पर्वत श्रीमहाप्रभुकी कानतें दर्शन देवेहैं और ऐसेरूप श्रीगोवर्धनपर्वत साक्षात् लीलामध्यपाती सो ऐसे गोवर्धनपर पांव कैसे धन्ये जाय ॥ कछु भगवत्सेवाको कार्य होवे तो ऊपर चढनो नहीं तो सर्वथा पांव धरनो नहीं ॥ ये सुनके वा मोहनदासकुं बहुत पश्चात्ताप भयो ॥ और श्रीगुसांईजीसों अपनो अपराधक्षमा कराये ॥ फेर श्रीनाथजीकी सेवा दर्शन विना कोईदिन गिरिराजपर पांव धरते नहीं हते ॥ सो ऐसे श्रीगुसांईजीके कृपापात्र हते ॥ वार्ता संपूर्ण ॥ वैष्णव ॥ १५५ ॥ ❀ ॥ ॥ श्रीगुसांईजीके सेवकचतुर्भुजदासब्राह्मणकी ० सो वे चतुर्भुजदास पंडित बहुत हते और विद्याको अभ्यास विशेष हतो और अकबर पादशाहसों मिलाप वि-

शेष हतो अक्रूर पादशाह जो कछु पृच्छते सो जवाव तु-
 रत देत एकदिन पादशाहनें चतुर्भुजदासकी सराहना
 करी तब वीरवलनें कही ये तो मेरी चाकरी करतो हतो ॥
 तब पादशाहनें पृच्छी तब चतुर्भुजदासनें कही जो आपके
 मिलके लीये कौनकौनकी चाकरी न करी चहीये ये सु-
 नके पादशाह बहुत प्रसन्न भयो ॥ और चतुर्भुजदासकुं
 महिनाके हजार रुपैया कर दिये और जो कोई पंडित
 आवतो तिनके संग चतुर्भुजदास वाद करते और सब पं-
 डितनकुं जीत लेते ॥ फेर एक समय चतुर्भुजदास मथु-
 राजीसें आये और विश्रान्तघाटपर न्हाये और उहां कहेन
 लगे ॥ जो 'विद्या भागवतावधि' ॥ येसुनके एक वैष्णव
 बोल्यो चातुरी विद्वलेशावधि ॥ तब चतुर्भुजदासनें कही
 जो मोकुं विद्वलनाथजीको मिलाप करायदे ॥ तब वो वै-
 ष्णव चतुर्भुजदासकुं श्रीगुसाईंजीके पास लंगयो तब श्री-
 गुसाईंजीके दर्शन किये ॥ सो साक्षात् पूर्णपुरुषोत्तम को-
 टिकंदर्पलावण्य ऐसें स्वरूपके दर्शन भये तब चतुर्भुज-
 दास श्रीगुसाईंजीके सेवक भये और श्रीगोवर्धननाथजीके
 दर्शन किये ॥ और श्रीगोवर्धननाथजीके कवित बनाये ॥
 और आखा जन्मपर्यंत श्रीजीद्वार छोडके कहुं गये नहीं
 ॥ एकदिन पृथ्वीपतीकुं खबर पडी जो चतुर्भुजदास गो-
 पालपुरमें है ॥ तब मनुष्य बुलायवेकुं पठाये तब चतुर्भु-
 जदासनें पृथ्वीपतीकुं पत्र लिख्यो वा पत्रमें लिख्यो ॥
 जाको मन नंदनंदनसुं लाग्यो नीको ॥ सुखसंपतकी कहां
 लग वरनो सब जग लागत फीको ॥ ये पत्र लेके वा मनु-

प्यनें पृथ्वीपतीकुं दियो तव पृथ्वीपतीनें विचार कियो
जिनकुं जगत फीको लग्यो तो तिनकुं अपने कैसे मीठे
लगेंगे ॥ सो वे चतुर्भुजदास श्रीगुरुसाईजीके ऐसे कृपापात्र
भये ॥ वार्ता संपूर्ण ॥ वैष्णव ॥ १५६ ॥ ❀ ॥ ॥
श्रीगुरुसाईजीके सेवक विरक्तवैष्णवकी वार्ता
सो वह ब्राह्मण वैष्णव एक गामडामें रहेतो हतो ॥ सो
चुकटी मागके निर्वाह करतो ॥ और श्रीठाकुरजीकी सेवा
भली भांतीसों करतो ॥ और श्रीठाकुरजी सानुभाव ज-
तावत हते ॥ सो वे वैष्णवनके घरनतें चुकटी मागतो तव
एक वैष्णवके घर चुकटी लेवे गयो सो वाके वेटाकी देह
छूटी हती ॥ तव वे वैष्णव वाईसमय गयो तव वा वैष्ण-
वनें विचार कियो जो याको आवरदा बहुत हतो ॥ क्युं
याकी देह छूटी ॥ ऐसो विचार कियो याको अकालमृ-
त्युभयो है ॥ तव वा वैष्णवनें चरणासृत वाके मुखमें दियो
॥ और चरणासृतको श्लोक पढयो ॥ अकालमृत्युहरणं
सर्वव्याधि विनाशनम् ॥ विष्णुपादोदकं तीर्थं जठरे धार-
याम्यहम् ॥ १ ॥ ये अक्षर बोल्यो तव श्रीठाकुरजी वा वै-
ष्णवकी वाणी सत्य करवेके लीयें वा वैष्णवके वेटामें प्राण
संज्ञा धरी ॥ तव वा वैष्णवको वेटा जीवती भयो ॥ जा-
समय वा ब्राह्मण वैष्णवनें वाकुं जीवतो क्यो वाई समय
वा ब्राह्मण वैष्णवमें भगवदावेश भयो हतो ॥ फेर जब ब-
हार आयो तव लोगननें वा ब्राह्मण वैष्णवसों पूछी ये
कैसे जीयोहै तव वानें कही चरणासृत और अष्टाक्षरम-
ंत्रसुं जीवतो भयोहै ॥ लोगननें ये बात झूठी मानी सो

ब्राह्मण वैष्णव ऐसो कृपापात्र हतो ॥ जाको चरणासुत
ऊपर दृढ विश्वास हतो ॥ वार्ता संपूर्ण ॥ वैष्णव ॥ १५७ ॥
श्रीगुसाईजीके सेवक गुलाबदास क्षत्रीकी वा-
र्ता ॥ सो वे गुलाबदास परम कृपालु जो श्रीगुसाईजी ति-
नके शरण गये ॥ फेर थोड़ेदिन पाछे म्लेच्छके देशमें जा-
यके रहे और अष्ट होय गये और भक्षामक्ष करन लगे ॥
और गुलाबखान नाम धरायो ॥ फेर ये बात श्रीगुसाई-
जीने सुनी तव श्रीगुसाईजीने एक वैष्णव पठायो विनकुं
बुलायवके लीये तव वा वैष्णवने जायके कही गुलाबदास
तुमकुं श्रीगुसाईजी बुलावेंहें ॥ तव गुलाबदास वेश्याके
पास बैठे हते मुनके कही जो मैं ऐसो अष्टहं तोहं श्रीगु-
साईजी संभारेहें ॥ ऐसे तीनवार वैष्णवसुं पूछी जो श्रीगुसा-
ईजी मोकुं संभारेहें ॥ तव विरहताप भयो तव गुलाबदा-
सके प्राण छूटगये ॥ वे वैष्णव देखके चकित भये फेर उ-
हांसुं चलयो और मनमें विचार कियो ये संदेह श्रीगुसा-
ईजीसों पूछेगो तव श्रीगुसाईजीके पास आयके देखे तो
गुलाबदास श्रीगुसाईजीकुं पंखा करत देख्यो ॥ तव वा
वैष्णवको संदेह दूर भयो ॥ सो वे गुलाबदास श्रीगुसाई-
जीके ऐसे कृपापात्र हते जिनके कर्म विरहतापसुं जरगये
और शुद्ध होयके भगवल्लीलामें चलेगये ॥ वार्ता संपूर्ण ॥
वैष्णव ॥ १५८ ॥ ❁ ॥ ॥ ॥ ॥ ॥
श्रीगुसाईजीके सेवक धोंधी कलावत तिनकी
वार्ता ॥ सो वह धोंधी बडीजातवालो हतो और गान
विद्या में कुशल हतो और श्रीगुसाईजीको सेवक भयो ॥

तब श्रीगुसाईजीने कृपा करके वा धोंधीकुं श्रीनवनीतप्रियाजीके कीर्तनकी सेवामें राखे सो वे धोंधी श्रीनवनीतप्रियाजीके संनिधान कीर्तन करते हते ॥ एकदिन कीर्तन सुनके श्रीनवनीतप्रियाजीने ताल दियो तब श्रीगिरिधरजी ठाढे हते सो एकहजार रुपैयाके सोनाके कडा पहरे हते ॥ सो उतारके धोंधीकुं दीये तब श्रीगुसाईजीने येवात मुनी और श्रीगिरिधरजीकुं कह्यो जो श्रीनवनीतप्रियाजीने ताल दियो जो तेने इकेलो कडो क्युं दियो सब गहेनो क्युं नहि दियो इतनी तुमारो लीभीपणो अधिकी है ॥ तब श्रीगिरिधरजी बोले जो मैं आपसुं डरप्यो जासुं नही दियो तब श्रीगुसाईजी सुनके बहोत प्रसन्न भये ॥ तब वा धोंधीकुं आज्ञा करी जो नित्य तेरे मन लगायके कीर्तन करने तब वे धोंधी नवे पद करके गायवे लग्यो ॥ वे धोंधी श्रीगुसाईजीके ऐसे कृपापात्र हते ॥ वार्ता संपूर्ण ॥ वैष्णव ॥ १५९ ॥ * ॥ ॥ ॥ ॥ ॥

॥ श्रीगुसाईजीके सेवक एक बनियाकी वार्ता ॥ सो वे बनिया गोपालपुरमें रहेते हते और जे कोई श्रीनाथजीके दर्शन करके आवें वासुं शृंगार प्रुंछलेते ॥ सो पाछें जो आवे विनके आगे शृंगार कहे ॥ सब लोग जाने जो ये बडो वैष्णव है वैष्णव जानके विनके पाससुं सोदा लेवे ॥ ऐसे करके लोगनके पास ठगके बहुत रुपैया एकठे करे ऐसे करते करते साठवरसके भये और साठ हजार रुपैया एकठे करे एकदिन सूरदासजी भगवदिच्छातें वा बनियाके पास कछु लेवेकुं आये तब वा बनि-

या सूरदासजीके आगें श्रीनाथजीके शृंगारकी बडाई करन लयो तब सूरदासजीनें मनमें जान्यो ये पाखंडी है तब सूरदासजीनें कही श्रीनाथजीके दर्शनकुं चल तब वानें कही सांझकुं आउंगो फिरसांझकुंसूरदासजी आये तब कही काल आउंगो ऐसे करते दोचारदिन काटे एकदिन सूरदासजीनें ये पद गायो ॥ आज काम काल काम परसुं काम करना ॥ पहेले दिन बहुत काम काममें पचमरना ॥ १ ॥ जागृत काम सोवत काम विमुखभयो चरणा ॥ छांड कामसुमरश्यामसूरपकरशरणा ॥ २ ॥ ये पद सूरदासजीनें वा बनियाकुं सुनायके खेंचके लेयाये फेर जायके श्रीगुसाईजीके दर्शन कराये तब सूरदासजीनें श्रीगुसाईजीसों बिनती करी जो याकुं शरण ले तब श्रीगुसाईजीनें कृपा करके नाम निवेदन करवायो फिर भेट करवेको समय भयो तब वा बनियानें एक रुपैया भेट कयो तब सूरदासजीनें वा बनियाकुं उपदेश करवेके लीये एकपद गायो ॥ सो कीर्तन ॥ ॥ सूरसाठी प्रारंभः ॥ ॥ राग सारंग ॥ कृष्णसुमरतनपावनकीजे ॥ जोलोजगस्वपनासोजीजे ॥ १ ॥ अवधिउसासगिनतसबतेरे ॥ सोवीतत भईआवतनेरे ॥ २ ॥ जोयेस्वपनेंन्याईविचारे ॥ कबहुंनजन्मविषयलगाहारे ॥ ३ ॥ गहींविवेकबीजजोबोवें ॥ कबहुंनजठरअग्निमेंसोवें ॥ ४ ॥ वारवारतोकुंसमझावे ॥ जोछिनजायसोबहोरिनआवे ॥ ५ ॥ ठगनीविषयठगोरीलाई ॥ घटिकाघटतजोछिनछिनजाई ॥ ६ ॥ गनतहिंगनतअवधिनियरानी ॥ छांडचल्योनिधिभईविरानी ॥ ७ ॥ होत

कहाअवकेपल्लतानें ॥ तरुवरपत्रनमिलेंपुराने ॥ ८ ॥ पवन
उडेसोबद्वरिनआवें ॥ कर्ताऔरअनेकवनावें ॥ ९ ॥ जल
थलपशुपंछीसूकरक्रिमि ॥ मानसतनुपायोसबजगभ्रमि ॥
॥ १० ॥ कवहूंनीकेनाथनगायो ॥ एकमदनदशदिशहिं
भ्रमायो ॥ ११ ॥ सोतनुतुंखोंवैरतिविगतनि ॥ काचगहें
छोडीचिंतामनि ॥ १२ ॥ मनहींमनमायाअवगाहत ॥
नायकभयोतिहूंपुरचाहत ॥ १३ ॥ स्वर्गरसातलभूरजधा
नी ॥ तोउनेतुंभयोअभिमानी ॥ १४ ॥ ऐसेहिकरतअव
धिसबवीती ॥ गयोनज्ञानरह्योमदरीती ॥ १५ ॥ कवहूंस
जनमिलिकरतवडाई ॥ कवहूँललनाललितलडाई ॥ १६ ॥
कवहूँहयहाथीरथआसन ॥ कवहूँपलकासुखदसुवासन ॥
॥ १७ ॥ कवहूँचमरछत्रसिरदोरे ॥ कवहूँसुभटपशुनचढि
दोरे ॥ १८ ॥ कवहूँतोरनछत्रवनावे ॥ कवहूँमदगजयूथल
डावे ॥ १९ ॥ नौबतद्वारबजतहींठाडी ॥ त्योत्योतृष्णाश
तगुणबाढी ॥ २० ॥ दिव्यवसनफलफूलसुवासी ॥ नवयौ
वनअबलासुखरासी ॥ २१ ॥ द्वारकपाटसहस्रएकलागें ॥
सुभटपेहेरुवाचहूँदिशजागें ॥ २२ ॥ रमणीरमतनरजनी
जानी ॥ मायामदपीयोअभिमानी ॥ २३ ॥ सुतवितवनि
ताहितलगायो ॥ तवचेत्योजवकालचितायो ॥ २४ ॥ झूठो
नाटकसंगनसाथी ॥ नौबतद्वारनहयरथहाथी ॥ २५ ॥
धूपछिनकर्मभयोभिखारी ॥ क्योंकृतशूलसहैअवभारी ॥
॥ २६ ॥ भयोअनाथसनाथनबांध्यो ॥ त्रिजगशूलशरसन्सु
खसांध्यो ॥ २७ ॥ मनुषदेहधरि कर्मकमायो ॥ तेतिरछेदुखदा
रुणआयो ॥ २८ ॥ जेहितनकाजजीववधकीनें ॥ रसनारस

आमिपरसलीनें ॥ २९ ॥ सोतनछूटतप्रेतकरिढान्यो ॥ प्रेत
 प्रेतकहिनगरनिकान्यो ॥ ३० ॥ हिंसाकरपालनकरिजाकी
 ॥ विष्टाक्रिमीभस्मभइताकी ॥ ३१ ॥ रोगभोगअरुविषय
 भयानक ॥ हरिपदविमुखविषयरसपानक ॥ ३२ ॥ जागजा
 गइहांकोतेरो ॥ मायास्वप्नकहतसवमेरो ॥ ३३ ॥ कृष्णविना
 तोहिकोनछुडावे ॥ कोकरुणामयविरदकहावे ॥ ३४ ॥ अन्य
 देवकोनहींभरोसो ॥ वातनखटरसलाखपरोसो ॥ ३५ ॥
 जेजनकहोवृपतिकिन्याई ॥ मृगतृष्णाकरिकोनअघाई ॥
 ॥ ३६ ॥ ऐंसेअन्यदेवसुखदायक ॥ हरिविनकोनछुडावन
 लायक ॥ ३७ ॥ धर्मराजमुनिकृतीतिहारी ॥ तंविषयनर
 तसुरतविसारी ॥ ३८ ॥ गर्भअग्निरक्षाजिनकीनी ॥ संकट
 भेटिअभयतादीनी ॥ ३९ ॥ हस्तचरणलोचननासासुख ॥
 रुधिरबूंदतैलह्योअधिकसुख ॥ ४० ॥ सोसुखतैस्वपनेंनहिं
 जान्यो ॥ प्राणनाथनिकटनपहिचान्यो ॥ ४१ ॥ कितयह
 झूलसहैअपराधी ॥ ममसिखतैएकोनहिसाधी ॥ ४२ ॥
 कोटिकवारमानसतनुपायो ॥ हरिपथछोडअपथकूधायो
 ॥ ४३ ॥ समयगयेअसमयपछतैये ॥ मानसजन्मबद्धरि
 कितपैये ॥ ४४ ॥ पारसपायजलधिमेंबोरें ॥ पुनपुनसुनत
 कपालहिंफोरें ॥ ४५ ॥ चिंतामणिकौडीलेदीनी ॥ सुनिप
 रमितकरुणाअतिकीनी ॥ ४६ ॥ जज्ञतसामेंपीठदेभागे ॥
 पुनपुरुपारथकहेनहिलगे ॥ ४७ ॥ पायकल्पतरुमूलछिदा
 वे ॥ सोतरुपुनकैसेतुंपावे ॥ ४८ ॥ मधुभाजनपूरणविधि
 दीनो ॥ सोतैछांडहलाहलपीनो ॥ ४९ ॥ कामधेनुतजअ
 जाविसाई ॥ हरिवलछांडविषयअवगाही ॥ ५० ॥ यहनर

देहस्यामविनखोई ॥ कदिकौतुकलोंवाधिबिगोई ॥ ५१ ॥
 काहेनकर्मकियोतैऐसो ॥ ध्रुवशुकसनकसनंदनजैसो ॥
 ॥ ५२ ॥ सुरनरनागअसुरमुनिदेवक ॥ हरिपदभजतसवे
 वैसेवक ॥ ५३ ॥ परदक्षिणादेसीसनमावे ॥ मनसिजतो
 हिनपरसनपावे ॥ ५४ ॥ जाकेभजतएतोसुखलहिये ॥ सु
 नशठसोकैसेविसरैये ॥ ५५ ॥ अगनितपतितनामनिस्ता
 रे॥जन्ममरणसंतापनिवारे ॥ ५६ ॥ निर्भय होय भक्तिनि
 धिपाई ॥ कबहुंकालव्यालनहिंखाई ॥ ५७ ॥ सबसुखजी
 वनकृष्णनामपद ॥ भवजलव्याधिउपायपरमगद ॥ ५८ ॥
 श्रीभागवतपरमहितकारी ॥ द्वाररटतहरिसुरभिखारी ॥
 ॥ ५९ ॥ परमपतितकूंशरणहिलीजे ॥ पदरजदानअभय
 तादीजे ॥ ६० ॥ ॥ ॥ इति सुरसाठी संपूर्ण ॥
 ऐसे एक तुक कही जब वा बनियानें हजार रुपैया भेट
 कये ऐसे सुरदासजीनें साठतुकको पद गायो ॥ जैसे
 जैसे एक एक तुक सुनतो गयो और एक एक हजार रु-
 पैया भेट करतो गयो ॥ साठतुक सूधी साठ हजार रुपैया
 भेट करे ॥ सुरदासजीके वचन वा बनियाके हृदयमें कैसे
 उतरे जैसे सुरजउदय होवे और अंधकार मिटजाय तैसे
 सुरदासजीके वचननें वाके हृदयको अंधारी सब मिट-
 गयो और प्रफुल्लितमन होय गयो ॥ और मनमें ऐसो वि-
 चार कियो जो आज मेरो जन्म सफल भयो॥सोवे बनिया
 दुकानपें आयके साठ हजार रुपैया काढके श्रीगुसाईंजीके
 उहां पठाय दीने फिर दुकानपर बैठो और कोईके आगे
 फेर शृंगारकी बात करतो नहीं और नित्य श्रीनाथजीके

और श्रीगुसांईजीके दर्शन करके प्रसाद लेतो ॥ पाछे थो-
डेदिन भये तब श्रीनाथजी वा बनियासुं बोलन लगे और
आयके दूध दही लेजाय और दूसरो रूप घरके दाना लेके
वा बनियाकी दुकानपें सौदा ले जाय ॥ और दाना पटक
जाय बिन दानानके हीरा मोती होयजाय तब वे बनिया
हीरा मोती सब वीनके श्रीगुसांईजीके आगें धर आवे ॥
घरमें कछु राखे नहीं ऐंसे मनमें समझे जो द्रव्य घरमें
राखुंगो तो प्रभुनमेसों चित्त निकस जायगो ॥ जासुं नि-
र्वाह जितनो राखतो सो वे बनिया श्रीगुसांईजीको ऐंसो
कृपापात्र हतो ॥ वार्ता संपूर्ण ॥ वैष्णव ॥ १६० ॥ ❀ ॥

॥ श्रीगुसांईजीके सेवक एक राजारानीकी ० ॥
सो वे राजा और बिनकी स्त्री दोऊ वैष्णव भये और
भगवत्सेवा करन लगे ॥ फिर वा राजाकी एक बेटी भई
और बड़ी भई ॥ सो राजाके मनमें ऐंसी हती जो कोई
राजासों विवाह कन्थो चाहिये ॥ और रानीके मनमें ऐंसी
आई जो मैं अन्य मार्गीकुं बेटी नहीं देउंगी ॥ तब वैष्णव
दुहवेके लीयें बहुत प्रयत्न करे ॥ सो एक राजा वैष्णव मि-
ल्यो फिर वाकुं बेटी दीनी ॥ तब राजा विवाह करन आ-
यो ॥ सो विवाह करके अपने देशमें लेगयो ॥ फिर रानी-
नके पास वाकुं बैठाय दीनी और वह राजातो भगव-
त्सेवा करे ॥ और कोई स्त्रीकुं सेवाको काम न सोंपे ॥ और
वह जो राजाकी बेटी नवी पणीं हती वाके पतीके पास
सेवा करवेकुं जाय परंतु वो सेवा न करवे देवे ॥ तब वा
राजानें कही जो तेरी सेवा करनकी इच्छा होवे तो अ-

मका शेठके घर जायके जलकी गागर भरलायदे ॥ और वा गागरके पैसा लायके मोड़ुं दे ॥ तब तोड़ुं सेवा करन देउंगी ॥ फिर वाने जायके वा शेठके घर गागर भर लाई ॥ तब वा शेठनें वा गागरके जलसुं झारी भरी तब वा राजाकी स्त्रीनें कही जो या गागर भरवेके पैसा मोड़ुं देवो ॥ तब वा शेठनें कही जो या जलकी झारी श्रीठाकुरजी अरोगेहें सो याकी न्योछावरतो सर्वस्व है ॥ जासुं जितनो मेरे घरमें द्रव्य है सो लेजाओ ॥ फिर वा राजाकी रानीकुं ज्ञान भयो जो मेरे घर श्रीठाकुरजी बिराजेंहें सो एक जलकी गागरकी इतनी कीमत है तो आखो दिन सेवा करे इनकी कहा कीमत होयगी ॥ फिर घर जायके पतीके पावन परी जो अब मैंनें तुमारी कृपातें भगवत्सेवाको स्वरूप जान्यो है ॥ जासुं अब तो सेवाविना अन्न जल न लेउंगी ॥ तब वह राजा प्रसन्न होयके वा रानीकुं सेवा करवे दीनी ॥ तब दोनो स्त्रीपुरुष सेवा करन लगे ॥ सो वे राजारानी ऐसे कृपापात्र हते ॥ जिननें अन्य मार्गीकुं बेटी न दीनी ॥ और बेटी ऐसी कृपापात्र भई वाने शेठके घर जायके एकदिनमें भगवत्सेवाको स्वरूप जान्यो ॥ सो वे राजारानी और जमाई और बेटी वे चारोजने श्रीगुसाईंजीके ऐसे कृपापात्र भयो ॥ वा० सं० ॥ वै० १६१ ॥ श्रीगुसाईंजीके सेवक एक वैष्णव शकुन देखके चलतो तिनकी वार्ता ॥ सो वे वैष्णव गुजरातमेंसो जायके श्रीगोकुलमें श्रीगुसाईंजीकी सेवक भयो ॥ वह वैष्णव जो कछु काम करतो सो शकुन देखके करतो ॥

एक दिन शकुनकी वात निकसी तब श्रीगुसाईजीनें आज्ञा करी जो दर्शनके आगे शकुनको कहा काम है ॥ और श्रीगुसाईजीनें बाई समय सूरदासजीको कीर्तन कह्यो सो पदा॥मिल हैं गोपालसोईदिननीको ॥ जोतिषनिगमपुराण बढेठगजानोफांसीजीको ॥ १ ॥ जेबुझेंतोउत्तरदेहुंविनबूझेंमतफीको ॥ कमलमीनदादुरसुंतरसतसवधनपरतअमीको॥२॥भद्राभलीभरणीभवहरणीचलतमेघअरुछीको॥ अपनेठोरसवेग्रहनीकेहरणभयोक्यूसीको ॥ ३ ॥ सुनसूढमधुकरब्रजआयोलेअपयशकोटीको ॥ सूरजहांलोंनेमधर्मव्रतसोप्रेमीकौडीको ॥ ४ ॥ ये पद श्रीगुसाईजीनें श्रीमुखसों आज्ञा करी तब वा वैष्णवकुं निश्चय भयो ॥ जो आज पीछे सर्वथा शकुन नहीं देखुंगो ॥ सो वा वैष्णवको श्रीगुसाईजीके वचनपर ऐसे विश्वास हतो ॥ वार्तासंपूर्ण ॥ वैष्णव ॥ १६२ ॥ * ॥ ॥ ॥ ॥

॥ श्रीगुसाईजीके सेवक एक बाईकी वार्ता ॥ सो वह बाई गोलवाडमें रहेती हती ॥ तब श्रीगुसाईजी द्वारका पधारे तब गोलवाडमें वा गाममें सुकाम कय्यो ॥ तब वह बाई जल भरवेकुं जाती हती ॥ सो श्रीगुसाईजीके दर्शन किये ॥ तो साक्षात् पूर्णपुरुषोत्तमके दर्शन भये ॥ तब वह बाई श्रीगुसाईजीके शरण आई और श्रीठाकुरजी पधरायके सेवा करन लगी ॥ फिर वा बाईको बेटा हतो ॥ सो वाट मारतो जो कोई रस्तामें वेपारी मिले विनकुं मारके धन लूट लावतो ॥ तब वा बाईनें अपने बेटासुं कही जो तूं कोई दिन वैष्णवकुं मति मारियो ॥ तब

(२८६) दोसौबावन वैष्णवकी वार्ता.

वाके बेटानें कही जो मैं कैसे पेहेचानू ये वैष्णव है ॥ तब वा बाईनें कही जो तूं जाकुं लुटें जब विनकुं इहां पकड लाव मैं पेहेचालुंगी तब वाको बेटा वैसही करतो पकड लावतो ॥ तब वा बाईकुं दिखावतो सो एक दिन ११ वेपारीनकुं पकड लायो तब विनमें एक वैष्णव हतो ॥ सो वाकी मानें देखके कही जो याकुं छोड दे ॥ तब वा वैष्णवनें कही ये १० मनुष्य मेरे भाई हैं सो मैं इनके पाछे प्राण देउंगो तब वा बाईनें वा वैष्णवको आग्रह देखके सबकुं छुडाय दिये और वा वैष्णवसुं कही तुम रसोई करी और महाप्रसाद लेउ तब वा वैष्णवनें रसोई करी ॥ और १० जनेनकुं महाप्रसाद लेवायो फिर वा बाईकुं और वाके बेटानकुं लिवायो और वे बाईके बेटानके संग १५० अस्वार चोरी करवेकुं फिरते हते ॥ सबकुं प्रसाद लिवायो तो हुं महाप्रसाद खटयो नहीं तब वा बाईके बेटानें पूछी जो तुमनें रसोई तो ११ मनुष्यनकी करी हती परंतु सबकुं महाप्रसाद पूरो कैसे भयो ॥ और अगीयार मनुष्य खावे इतनो बधी पन्यो है ॥ याको कारण कहा ॥ तब वा वैष्णवनें कही जो हकको खावे है और अपनी मेहनतको द्रव्य कमायके खावे है विनको कोई दिन घटे नहीं है ॥ तब वो पटेल बोल्यो हमकुं ऐसो सिखावो तो बडुत आछो तब वा वैष्णवनें कही तुम चोरी करनो छोड देवो ॥ और खेती करके खावो तो तुमकुं ऐसे होवेगो तब वा बाईके बेटा पटेलनें चोरी करनो छोड दियो और सब गामकुं चोरी करनो छुडाय दियो और खेती करन लगे सो वह बाई श्रीगुसां-

ईजीकी ऐसी कृपा पात्र हती ॥ जिनके संगते आखी
 गाम श्रीगुसाईजीकु पधरायके वैष्णव भयो ॥ वार्ता
 संपूर्ण ॥ वैष्णव ॥ १६३ ॥ ❀ ॥ ॥ ॥ ॥
 ॥ श्रीगुसाईजीके सेवक कुमनदासजीके वेटा
 कृष्णदास तिनकी वार्ता ॥ सो वे कृष्णदास श्रीनाथजीकी
 गायनकी सेवा करते और एकदिन कुमनदासजीकु
 श्रीगुसाईजीने पूछी तुमारे कितने वेटाहै ॥ तव विनने
 कही हमारे दोढ वेटाहै ॥ तव आपने आज्ञा करी दोढ
 कैसे होवे आवे वेटाकी समजण पाडौ ॥ तव कुमनदास-
 जीने कही पुष्टिमार्गमें भगवत्सेवा और भगवद्गुणगान
 ये दोनो मुख्यहै तव दो काम करे सो वेटा आखी और
 एक करे सो आधो ॥ सो चतुर्भुजदास दो काम करेहै
 सेवा और गुणगान ॥ और कृष्णदास एक सेवा करेहै
 जासुं आधो वेटाहै ये सुनके श्रीगुसाईजी मुसकाये और
 आज्ञा करी वैष्णवकुं ऐसेही चाहिये ॥ सो वे कृष्णदास
 दिवसरात गायनकी सेवा करते और गाय बचावेके लीये
 कृष्णदासने आपणे प्राण दिये और सिंघकी झपाटसहे
 गये और जब कृष्णदासके प्राण छूटे वाही समय श्रीना-
 थजी खिरकमें गोपीनाथदास ग्वालके पास गाय दोहते
 हते ॥ और कृष्णदास बछरा पकड रहे हते सो गोपीना-
 थदास देखते हते सो ये बात कुमनदासजीकी वार्तामें
 लिखीहै ॥ याते इहां लिख्येनहीहै सो कृष्णदासजी ऐसे
 कृपापात्र भये ॥ वार्ता संपूर्ण ॥ वैष्णव ॥ १६४ ॥ ❀ ॥

॥ श्रीगुसांईजीके सेवक गोकुलभट्ट और गो-
विंदभट्ट कृष्णभट्टजीके बेटा तिनकी वार्ता ॥ सो वे दोनों
भाई बालपणसुं श्रीगुसांईजीके सेवक भये और श्रीगुसां-
ईजीके पास पढे हते ॥ सो पुष्टिमार्गके श्रीसुबोधनीजी
आदिक ग्रंथनमें बडे प्रवीण हते ॥ और शास्त्रार्थमें बडे
कुशल हते ॥ जब वे बडे भये तब एक भाई उज्जैनमें रहेते
और एक भाई श्रीजीद्वारमें रहेते ॥ सो वर्षके वर्षमें श्री-
नाथजीकी सेवा और घरके श्रीठाकुरजीकी सेवा करते ॥
जा वर्षमें गोविंदभट्ट श्रीजीद्वार जाते तब गोकुलभट्ट उ-
ज्जैन आवते और गोकुलभट्ट श्रीजीद्वार जाते तब गोविं-
दभट्ट उज्जैन आवते और श्रीगुसांईजीकी कृपातें जिनको
चित्त श्रीनाथजीविना क्षण एक रही न शकतो ॥ और
श्रीगोवर्धननाथजी और घरके श्रीठाकुरजी दोनों स्वरू-
पनमें जिनकी एकसारखी प्रीति हती ॥ यातें घरके श्री-
ठाकुरजी और श्रीनाथजी विनके उपर बहुत प्रसन्न रहेते
और शृंगार घरते और मूल जाते तो श्रीनाथजी विनकुं
शिखावते वे दोनों भाई श्रीगुसांईजीके ऐसे कृपा पात्र
हते ॥ वार्ता संपूर्ण ॥ वैष्णव ॥ १६५ ॥ ❀ ॥ ॥

॥ श्रीगुसांईजीके सेवक यादवेंद्रदास आगरेमें
रहेते तिनकी वार्ता ॥ सो वे यादवेंद्रदास श्रीगुसांईजीके
सल्लिधान रहते सो वे यादवेंद्रदास श्रीसुबोधनीजीकी सब
पंगती कंठाग्र राखते और दिवसरात भगवल्लीलाको अ-
वगाहन करते ॥ और भगवद्रसके प्रतापसुं सखी भाव
विनको होय गयो ॥ सब लीलानको दर्शनको अधिकार

भयो ॥ एक दिन श्रीगुसांईजीके दर्शन श्रीगोवर्धननाथ-
जीके संग युगल स्वरूपके भये ॥ जैसे गोपालदासजीने
गायो है आख्यानमें ॥ रूप वेउएक ते भिन्न थई विस्तरे
विविध लीलाकरे भजन सारे ॥ विविधवचनावली नयन-
सेनेमली सांगना सूचवे निश विहारे ॥ १ ॥ विविध मु-
क्तावली पाठसूत्रे करी गलसरी शोभतां कर सिंगारे ॥
विविधकुसुमावली ग्रथित हाथे करी एकएकने कंठ आ-
रापे हारे ॥ २ ॥ विविध मेवा भोग मधुर मिष्टान्न रस द-
समस्यां अर्पते बहुप्रकारे ॥ विविध वीडा सुगंध कर्पूरने
एलची लौंगपूगी पानखेरसारे ॥ ३ ॥ ऐसे दर्शन यादवे-
द्रदासजीकुं भये ॥ ऐसी कृपा यादवेन्द्रदास पर श्री-
गुसांईजीने कीनी और जैसे दर्शन करते तैसे पद नूतन
करके गावते ॥ सो वे यादवेन्द्रदास क्षत्री श्रीगुसांईजीके
ऐसे परम कृपापात्र हते ॥ वार्ता संपूर्ण ॥ वैष्णव ॥ १६६ ॥
॥ श्रीगुसांईजीके सेवक मथुरामल और हरजी-
मल दोउ भाईनकी वार्ता ॥ सो जब पुरुषोत्तमदास चो-
पडाक्षत्री वृद्ध भये और श्रीलाडलेशजीकी सेवा न बन-
वेलगी तब श्रीलाडलेशजीने श्रीगुसांईजीसां आज्ञा करी
जो अब मेरी सेवा मथुरामल और हरजीमलकुं करवेकी
आज्ञा देवे तो बहुत आछी है ॥ पुरुषोत्तमदास वृद्ध भये
है ॥ तब श्रीगुसांईजीने विनके माथे श्रीलाडलेशजी पध-
राय दिये ॥ सो वे दोनो भाई श्रीलाडलेशजीकी सेवा व-
हुत प्रीतीसुं करन लगे ॥ और श्रीलाडलेशजी विन दोनो
भाईनसुं बालककी सीन्याई झगडा करकरके अनेक प्र-

कारके पदार्थ सागते ॥ और वे दोनो भाई श्रीलाडलेश-
जीकुं प्रसन्न राखते जैसे बालक उदास न होवे वैसे करते ॥
छेलो जन्म जिनकुं होवे तिनकी ऐसी वृत्ती होवे सो वे
दोनो भाई श्रीगुसांईजीके ऐसे कृपापात्र हते ॥ जिननें
मनक्रम बचन करके श्रीलाडलेशजीकुं प्रसन्न किये ॥
वार्ता संपूर्ण ॥ वैष्णव ॥ १६७ ॥ * ॥ ॥ ॥
श्रीगुसांईजीके सेवक एक बलाईकी वार्ता ॥
एकसमय श्रीगुसांईजी गुजराततें ब्रजकुं पधारते हते ॥
रस्तामें आवते एक ठेकाणे रस्ता झूलगये सो उहां एक
बलाई मिल्यो ॥ सो वा बलाईसुं वैष्णवनें रस्ता पृच्छ्यो
तब वा बलाईनें कही या रस्तामें तो चोर छूटे हैं ॥ जासुं
तुम चलो मैं दूसरो रस्ता लेजाउं तब विन वैष्णवनकुं
संगलेके दूसरो रस्ता चलयो ॥ सो आछो रस्तो ले आयो
और फेर वा बलाईकुं कही जो तेरो गाम कहाहै ॥ तब
बलाईनें कही तुम जावो वही रस्तामें मेरो गाम आवेगो
तब श्रीगुसांईजीके अनुष्यननें कही जो हमारे संग चलें
तो खावेको देवें और खरचीइ देवेंगे तब वो संग चलयो
रस्तामें डेरा भये रसोई भई श्रीठाकुरजी अरोगें और
श्रीगुसांईजीनें भोजन किये पाछें सब वैष्णवननें प्रसाद
लिये और सब वैष्णवननें वा बलाईकुं जूठन दीनी सो
जूठन लेत मात्रही वा बलाईको अंतःकरण निर्मल भयो
और श्रीगुसांईजीके दर्शन साक्षात् पूर्णपुरुषोत्तमके भये
और श्रीगुसांईजीकुं बीनती करी जो मोकुं आप शरण
ल्यो तब श्रीगुसांईजीनें कृपा करके नाम सुनायो ॥ तब

वो नित्य श्रीगुसांईजीके संग चले और नित्य वैष्णवनकी जूठन लेवे और दिन दिन वाको भाव बढ़तो जाय ऐसे करते करते वाको गाम आयो वा गाममें श्रीगुसांईजीने डेरा किये और वाकी स्त्रीकुं लायके वैष्णव कराई और जूठन खवाई जूठन लेतमात्रही वा स्त्रीके मनको मैल छुटगयो और दिव्यदृष्टी होयगई ॥ फिर दर्शन करके अपने घर चली वाकुं घरके रस्तामें विरहताप भयो ॥ मूर्छा खायके परी तब वो वलाई उठाय लायो और श्रीगुसांईजीके दर्शन कराये तब वाकुं चेत भयो सो वे स्त्रीपुरुष श्रीगुसांईजीके संग चले और श्रीगोकुल आये ॥ और दूर दूरसुं चले आवे कोई मनुष्यनकुं छीवें नहीं फेर श्रीयगुनाजीके घाटपें श्रीगुसांईजी पधारे और वे स्त्रीपुरुष उहां बैठरहे नावपर कोई बैठावे तौहु बैठे नहीं जो सब छीजाय जासुं वे पार न उतरे दूसरे दिन विनकुं श्रीगुसांईजीके दर्शन न भये तब विनकुं ज्वर चढ आयो और मूर्छा खायके पररहे ॥ या बातकी खबर श्रीगुसांईजीकुं परी तब श्रीगुसांईजीने मनुष्य पठायके वे दोनो मूर्छा खायके पररहे विन दोउनकुं उठायके पार उतराये और मूर्छा तौ खुली नहीं तब श्रीगुसांईजी पधारके दोउनकुं चरणस्पर्श कराये तब विनकी मूर्छा खुली तब विनने श्रीगुसांईजीकुं वीनती करी जो आपके दर्शन विना हमारे प्राणनहीं रहेंगे तब श्रीगुसांईजीने पादुकाजीकी सेवा विनके माथे पधराय दीनी तब आज्ञा करी तुम इनकी सेवा करो जब तुमारो मनोरथ होवेगो तब मैं इनमेंसुं

रूप धरके तुमकुं दर्शन देउंगो फेर आज्ञा करी फल फूल मेवा दूधकी सामग्री इनकुं भोग धरियो और एकांतमें जायके सेवा करी तब वे बलाई एक निर्जनवन हतो जहां पर्वतकी गुफा हती उहां जायके रहे और पाटुकाजी पधरायके सेवा करन लगे फेर फल फूल लायके नित्य भोग धरे और सांजसवारे नित्य श्रीगुसाईंजी विनकुं दर्शन देते ॥ कोई समय तो पुस्तक वांचते दर्शन देते कोई समय जप करते दर्शन देते कोई समय संध्या वंदन करते दर्शन देते जैसे विनके मनोरथ होते तैसे दर्शन देते ॥ फेर वा स्त्रीनें कही मेरे मनका वेचके पूणी और चरखा लाय देवो तब वे बलाईले आयो सो वे लुगाई चरखा कांते और सूत वेचके पूणी लावे ऐसे करत करत रुपैया पांचसात ऐकठे भये तब एक गाय ले आये और सामग्री करे और गायके कानमें अष्टाक्षरमंत्र कहिदियो ॥ सो वे गाय निर्भय होयके वनमें चरे और वे गाय एक गौबळद बिना दूसरेनकुं सिंह जेसी दीसे और निर्भय होयके वनमें चरे ॥ कोई मनुष्य और पशु वाके पास न आवे और सदा काम धेतुकी सिन्याई दूध देवे ऐसे वे दोनो स्त्रीपुरुष वा कंदरामें सेवा करते ॥ फेर एक दिन चार ब्राह्मण भूलके वा निर्जन वनमें आये तब विन ब्राह्मणको बडो सत्कार कियो और पूंछी वहुं आयेहो ॥ तब विननें कही जो हमारे गामके राजाने सब ब्राह्मण कैद करेहै और कहेहैं जो तुम लाखनरुपैया दानधर्मके मेरे पिताके पाससूं खायगयेहो अब मेरे पिताके

हाथकी पत्र लावो जब मैं साचो माडुंगो नहींतो सब द्रव्य पाछें लेउंगो या दुःखसुं हम भाग आयेंहें तव वा स्त्रीनें कही तुमारे राजाको पितातो नरकमें पन्योहैं मैं इहासुं वैठी वैठी देखुं तुम कहीतो तुमकुं मिलायदेउं ॥ तव ब्राह्मण हाथ जोडके बोले ॥ जैसे बने तैसे मिलायद्यो तो वहुत आछो तव वा बलाईकी स्त्रीनें कही तुम आंखे मीच ल्यो तव वे चार ब्राह्मण आंख मीचके बैठे तव वा स्त्रीनें भगवत्कृपाके बलतें विनकुं यमलोकमें पहाँचाय दिये ॥ फेर वे चारों ब्राह्मण यमराजासुं कहेके वा राजाके पिताकुं मिले और सब समाचार कहेके वासुं पत्र लिखाय लियो ॥ सो वा पत्रमें लिख्यो जो जादिनतें ब्राह्मण कैद पढेंहें वा दिनतें मैं नरकमें पन्योहैं और तेरे द्रव्यचहिये तो अमका कोठामें अखूट खजानोहैं वामेसुं तेरे हाथनसुं जितनो काटे इतनो द्रव्य मिलेगो ॥ दूसरो मनुष्य काटेगो तो नहीं मिलेगो एंसो पत्र लिखायके वे चार ब्राह्मण आंखे मीचके बैठे ॥ तव वा बलाईकी स्त्रीको ध्यान कियो तो झट आंखे खोलेतो वे पर्वतकी गुफामें जाय पहाँचे और बलाईकी स्त्रीसों कही हमकुं जीवत दान तुमनें दियो ॥ तव वा बलाईनें कही ये सब प्रताप श्रीगुसांईजी श्रीविठ्ठलनाथजीको है ॥ हमतो जातके बलाईहैं हमारी छायासुं तुम छीजावोहो परंतु ये सब श्रीविठ्ठलनाथजीको प्रतापहैं प्रकटनंद कुमार श्रीगोकुलमें विराजे हैं तव वे ब्राह्मण श्रीगोकुल गये और श्रीगुसांईजीके सेवक भये ॥ पाछें वा राजाके पास पत्र लेके गये ॥ वे बलाई

ऐसो श्रीगुसांईजीको कृपापात्र हतो ॥ वार्ता संपूर्ण ॥
वैष्णव ॥ १६८ ॥ * ॥ ॥ ॥ ॥ ॥
॥ श्रीगुसांईजीकेसेवक एक राजाकी वार्ता ॥
सो वा राजानें सब ब्राह्मण बंदीखाने डारे और राजानें
कही जो मेरे पिताकेपास तुमने दान पुण्यके नामसो ला-
खन रुपैया खायेहैं जासो मेरे पिताको पत्र लाव ॥ तब
चार ब्राह्मण भाग गये सो पत्र ले आये ये वांतें बलाईकी
वार्तामें लिखीहै ॥ फेर वा राजाके वेदानें पत्र वांचके अ-
खूट खजाना वा राजाके वेदानें खोल्यो सो राजाके वे-
टाकुं विश्वास आयो ॥ और जितनो द्रव्य चाहिये इतनो
काढ्यो और सब ब्राह्मणनकुं छोडदिये ॥ फेर चार ब्राह्म-
णनसुं राजानें पूछी ये पत्र कैसे लाये ॥ तब वे चार ब्रा-
ह्मण बोले श्रीविठ्ठलनाथजी श्रीगुसांईजी श्रीगोकुलमें नि-
राजे हैं ॥ विनकी कृपातें लाये और विनकी कृपातें सब
कारज सिद्ध भयो ॥ तब वे राजा ब्राह्मणनके संग आ-
यके श्रीगोकुलमें श्रीगुसांईजीको सेवक भयो ॥ और श्री-
नाथजीके दर्शन किये और ब्रजयात्रा करी ॥ और भग-
वत्सेवा पधरायके अपने देशमें आयो ॥ और भलीभां-
तिसों सेवा करन लग्यो ॥ और वैष्णवनको संग करन
लग्यो ॥ और वैष्णवनके संगतें और भगवत्सेवाके प्रता-
पतें और श्रीगुसांईजीकी कृपातें वा राजाकी बुद्धी निर्मल
भई और दिव्यदृष्टी भई ॥ और वाको पिता नरकतें नि-
कसके वैकुंठ गयो और दिव्यदृष्टीसुं देख्यो ॥ तब वे राजा
भगवत्सेवा छोडके और कल्ल काममें चित्त न लगावतो

॥ दिवस रात भगवल्लीलाको चितवन करतो सो वे राजा
श्रीगुसांईजीको ऐसो कृपापात्र भयो ॥ वार्ता संपूर्ण ॥
वैष्णव ॥ १६९ ॥ ❀ ॥ ॥ ॥ ॥ ॥

॥ श्रीगुसांईजीके सेवक सगुणदास ति० ॥

सो सगुणदास रूपसनातनके सेवक हते और ब्रजमें फि-
रते हते ॥ और श्रीगोकुल गये और श्रीगुसांईजी ठुकरानी
घाटपर विराजते हते ॥ तब सगुणदासजीने दर्शन किये
सो साक्षात् पूर्णरूपोत्तमके दर्शन भये ॥ तब श्रीगुसांईजी
बोले सगुणदास आगे आवो ॥ तब सगुणदासने अपने मन-
नमें विचार्यो मोकुं कोईदिन आपने देख्यो नहीं ॥ और
जानगयेहें जासुं ये साक्षात् नंदकुमारहै इनकी शरण जाउं
तो ठीक ॥ तब सगुणदासने वीनती करी महाराज मोकुं
शरण लेउ ॥ तब श्रीगुसांईजीने आज्ञा करी न्हाय आवो ॥
तब सगुणदास न्हाय आये तब श्रीगुसांईजीने कृपाकरके
नाम निवेदन कराये तब सगुणदासजीकुं भगवल्लीलाकी
स्मृति भई ॥ सो श्रीमहाप्रभुजीके तथा श्रीगुसांईजीके
तथा श्रीठाकुरजीके सहस्रावधी नये नये पद करके गाये
सो पद ॥ इहां लिखे नहींहैं ॥ सो सगुणदासजीकुं श्रीठा-
कुरजी जैसी लीलाको अनुभव करावते तैसे पद गावते
॥ वार्ता संपूर्ण ॥ वैष्णव ॥ १७० ॥ ❀ ॥ ॥ ॥ ॥

॥ श्रीगुसांईजीके सेवक मन्नालाल और गोव-
र्धनदास दोउ भाईनकी वार्ता-सो वे दोनो भाई श्रीगु-
सांईजीके सेवक भये और श्रीगुसांईजीने कृपाकरके विनके
माथे सेवा पधराय दीनी ॥ तब वे दोनो भाई ब्रजमें रहेके

सेवा करन लगे सो श्रीगुसाईंजीके इहां दर्शन करके फेर सेवा करके अपने घर आवते ॥ फेर बहुत दिन ब्रजमें रहेके सब रीती शीखे फेर अपने देशकुं आये ॥ सो आयके अपने घरमें सेवा करन लगे फेर इतनेमें खेलके दिन आये तब राजभोग धरके और राजभोग सरायके फेर श्रीठाकुरजीकुं खेलावन लगे तब श्रीठाकुरजीनें कही जो तुम हमकुं पेहेले खिलायके पाछें राजभोग धरो तो बहोत आछोहै ॥ तब विननें कही याको कारण कहा तब श्रीठाकुरजीनें आज्ञा करी जो जब खेल होवेंहैं तब सखा और ब्रजभक्त भेरे संग खेलन आवेंहैं जब खेल चुकें और राजभोग तुर्त आवे तो ब्रजभक्त जो खेलवे आवेंहैं सो और सखा आये होवे सो भेरे संग भोजन करे तब मोकुं बहोत आनंद होवें और विनकुं देखके मोकुं भोजन बहोत भावे हैं तब वे सुनके दोनो भाईननें ऐसी कही जो हम श्रीगुसाईंजीकुं पूछेंगे वे आज्ञा करेंगे तैसे हम करेंगे ॥ काहेतें जो नवरत्नग्रंथमें श्रीमहाप्रभुननें कह्योहै सो वाक्य ॥ सेवाकृतिगुरोराज्ञा ॥ सेवाकी कृती गुरुकी आज्ञा प्रमाणें करणी ॥ तब मन्नालाल श्रीगोकुल जायके श्रीगुसाईंजीसों बीनती करी तब श्रीगुसाईंजीनें आज्ञा करी जो पुष्टिमार्गमें दोनो क्रमहैं सो श्रीठाकुरजीकुं रुचे ऐंसेही करो तब फेर श्रीगुसाईंजीकी आज्ञा लेके मन्नालाल तुर्त आयके राजभोग धरेसुं पेहेले खिलावन लगे ॥ सो वे मन्नालाल तथा गोवर्धनदास श्रीगुसाईंजीके ऐंसे कृपापात्र हते ॥ जिनकुं श्रीगुसाईंजीकी वाणीपर अति विश्वास हतो और श्रीठाकुरजीकुं तो

बालक समझते हते ॥ ऐसे विनके निर्मल भाव हते ॥ वार्ता
संपूर्ण ॥ वैष्णव ॥ १७१ ॥ ❀ ॥ ॥ ॥ ॥

॥ श्रीगुसाईजीके सेवक भगवानदास भीत-
रियाकी वार्ता ॥ सो वे साचोरा ब्राह्मणहते ॥ सो वे भग-
वानदास गुजराततें आयके श्रीगोकुलमें श्रीगुसाईजीके
सेवक भये ॥ और श्रीगुसाईजीने कृपा करके श्रीनाथजीकी
सेवामें राखे ॥ तव भगवानदासजी श्रीनाथजीकी सेवा
नीकी भांतिसों करन लगे ॥ शुद्ध अंतःकरणसुं राजा जि-
तनो डर राखते और बालक जैसी वात्सल्यता राखते और
सर्वसुं अधिक स्नेह राखते ॥ सो श्रीनाथजी विनके उपर
बहोत प्रसन्न रहते ॥ एकदिन भगवानदासके देखते श्रीगु-
साईजीकेसंग श्रीनाथजी वातें करते हतेतव श्रीगुसाईजीने
पूछी जो श्रीनाथजीने कहा कही ॥ तुम समझे तव भग-
वानदास हाथ जोडके बोले जो मैं तुच्छजीव कहा स-
मझूं जासुं आपकी कृपा विना कैसे समझौ जाय ॥ तव
ये सुनके श्रीगुसाईजी बहोत प्रसन्न भये ॥ तव श्रीनाथजी
भगवानदासजीसों बोलन लगे और सब बात जतावन
लगे सो वे भगवानदास श्रीगुसाईजीके ऐसे कृपापात्र हते
॥ वार्ता संपूर्ण ॥ वैष्णव ॥ १७२ ॥ ❀ ॥ ॥ ॥

श्रीगुसाईजीके सेवक एक श्रेष्ठ और विरक्तकी ०
सो वे दोनो श्रीगुसाईजीकेसंग ब्रजयात्रा चले और सं-
गमें वैष्णव बहोत हते ॥ सो वे विरक्त वैष्णव चुकटी मा-
गके निर्वाह करते ॥ सो एकदिन विरक्त वैष्णवने रसोई
करी हती ॥ सो वा रसोईकी मेंडपर कुत्ता निकस गयो ॥

तब वानें श्रीगुसांईजीसों पूंछी ॥ तब श्रीगुसांईजीनें आज्ञा करी तेरी रसोई नहीं छीगई ॥ फेर दूसरे दिन वा शेठकी रसोईकी मेंडपरसुं कुत्ता निकस गयो ॥ तब वा शेठनें श्रीगुसांईजीसों पूंछी ॥ तब श्रीगुसांईजीनें आज्ञा करी तेरी रसोई छीगई ॥ तब शेठनें दूसरी सामग्री मंगायके रसोई कराई ॥ फेर दूसरे दिन समयपायके वा शेठनें श्रीगुसांईजीसों वीनती करी जो हे महाराजाधिराज या विरक्त वैष्णवकी रसोई छिवाय न गई और मेरी छिवाय गई ॥ याको कारण कहा ॥ कुत्ता तो दोनोनकी मेंडपर सरखो निकस्यो हतो ॥ तब श्रीगुसांईजीनें आज्ञा करी जो याके पास द्रव्य नहीं है ॥ पचीस घरसुं मागलावे जब निर्वाह करे ॥ और तुमारे पास द्रव्यहै चाहे जासमय जितनी रसोई कराय सको इतनी रसोई होय इतनो तारतम्यहै ॥ जासुं याकी नहीं छिवाई और तुमारी छिवाई ॥ तब वा शेठके मनमें जो द्रव्यको अभिमान हतो सो मिटगयो और ये निश्चय कन्यो ॥ जो द्रव्य भगवदर्पण न होवे तो वा द्रव्यसुं अनर्थ उत्पन्न होवे और वा विरक्तके मनमें चिंता हती जो मेरे पास द्रव्य नहीं है सो चिंता मिटगई ॥ जो बहोत द्रव्य होतो तो मेरी कैसी बुद्धी होती तब मनमें बहोत प्रसन्न भयो और सो विरक्त और शेठ श्रीगुसांईजीके ऐसे कृपापात्र हते ॥ जिनकुं तत्काल ज्ञान प्राप्त भयो ॥ वार्ता संपूर्ण ॥ वैष्णव ॥ १७३ ॥ ❀ ॥

॥ श्रीगुसांईजीके सेवक मा वेटीकी वार्ता ॥

सो वे मावेटी राजनगरमें रहेती हती ॥ एकसमय श्री-

शुसाईजी राजनगर पधारे हते ॥ और वे मावेटी श्रीगुसाईजीकी सेवक भई ॥ तव श्रीगुसाईजीने आज्ञा करी तुम सेवा करो ॥ विननें कही हमारे पास द्रव्य नहीं है ॥ तव श्रीगुसाईजीने आज्ञा करी जो तुम घरमें करते होवो ऐंसेही करो परंतु मार्गकी रीतीसुं भोग धरो ॥ तव विननें वीनती करी जो बंटा भरवेके लीयें और उत्थापन भोग धरवेके लीयें हमारे पास द्रव्य नहीं है ॥ तव श्रीगुसाईजीने आज्ञा करी वाजरी मिजायके सब काम चलावनों ॥ तव श्रीगुसाईजीने विनके माथे सेवा पधराय दीनी ॥ तव वे भली भांतीसुं सेवा करन लगी ॥ एकदिन श्रीगुसाईजी गाममें पधारे ॥ तव रस्तामें घंटानाद भयो ॥ तव आपनें पूंछी कोनको घरहै ॥ तव वैष्णवननें कही मावेटी इहां रहेहें ॥ साठ वरसकी वेटी है ॥ और पंचोतर वरसकी मा है सो वे इहां सेवा करेंहें ॥ कछु विनको आचार विचार वरावर नहीं है ॥ ऐंसे वैष्णवननें श्रीगुसाईजीसुं कही ॥ तव श्रीगुसाईजीने कही पहेलेतो विनको घर देखें ॥ तव श्रीगुसाईजी कृपाकरके विन मावेटीके घर पधारे ॥ तव श्रीगुसाईजीकुं पधारे देखके वहुत प्रसन्न भई ॥ तव आपनें पूंछी कहा समयहै तव बाईनें कही उत्थापन भोग सरवेकी तैयारीहै एसी वीनती वा डोकरीनें करी ॥ तव श्रीगुसाईजी भीतर पधारे देखे तो श्रीठाकुरजी वाजरीके दाणा आरोमेंहें ॥ तव श्रीठाकुरजीनें आज्ञा करी जो आप ये प्रसाद लेवो ॥ तव श्रीगुसाईजी भोग सरायके बहार लेआये ॥ तव वे डोकरीकुं कहेके आप अरोगन-

लगे ॥ तब बिनको स्नेहसुं हृदय भर आयो और मनमें
समझी श्रीगुसाईंजी कैसे दयालहे ॥ तब दूसरे वैष्णव वा
डोकरीसुं व्यवहार नहीं करते हते ॥ सो सबनें बाजरीके
दाणा लिये और नित्य बडे बडे वैष्णव भगवदीय वा डो-
करीके घर प्रसादी बाजरीके दाणा नित्य लेवे आवते ॥
जा दिन श्रीगुसाईंजी उहां अरोगे वा दिनतें सब वैष्णव
वा डोकरीको बहुत मुलाजो राखते ॥ सो वे यावेटी श्री-
गुसाईंजीकी ऐसी कृपापात्र हती ॥ वार्ता संपूर्ण ॥ वै-
ष्णव ॥ १७४ ॥ ❀ ॥ ॥ ॥ ॥ ॥

॥ श्रीगुसाईंजीके सेवक गोपालदासकी वार्ता ॥

सो वे गोपालदास वडनगरा नागर हते ॥ सो वडनग-
रमें रहेते हते जब श्रीगुसाईंजी वडनगर पधारे तब
सेवक भये और श्रीठाकुरजीकी सेवा पधरायके सेवा
करन लगे ॥ फेर गुजरातमेंसुं संग गयो तब गोपा-
लदास वा संगके संग श्रीगोकुल गये और नवनीतप्रि-
याजीके दर्शन किये ॥ वा संगमें पांचसो मनुष्य
हते ॥ सबनें राजभोगके दर्शन किये जब हो चुके तब
दर्शन करके और सबनें श्रीगुसाईंजीके दर्शन किये
और श्रीगुसाईंजीनें भोजन करके गोपालदासजीकुं जू-
ठनकी पातर धरी ॥ तब गोपालदासनें बाहिर आयके
संगवाले पांचसो वैष्णवनकुं कही ॥ सब महाप्रसाद
लेउ तब वैष्णव लेवे बैठे तब श्रीगुसाईंजीकी जूठनमेंसुं
गोपालदासजीनें पांचसो वैष्णवनकुं पातर धरी और
पांचसेनें प्रसाद लियो तो हुं जूठन घटी नहीं ॥ फेर

गोपालदास आप लेवे बैठे तव जूठन घटे नहीं ॥ और गोपालदास उठे नहीं तव श्रीगुसाईंजीनें गोपालदासजी सुं पूछी जो कैसे हे ॥ तव गोपालदासनें वीनती करी जहांसूधी ये जूठन रहेगी तहांसूधी कैसे उठ्यो जाय ॥ तव श्रीगुसाईंजी न्हावे पधारे ॥ तव तुर्त वह जूठन घट गई तव गोपालदासजी उठे तव श्रीगुसाईंजीनें कही ॥ श्रीनाथजी तुमारे मनोरथ पूर्ण करेहें तव गोपालदासनें कही आखी विश्वकुं पूर्ण तुमी आप करेहें सो मेरी कामना आप क्युं पूर्ण नहीं करे आपकी कृपासों मेरे सब काम पूर्ण है ॥ सो वे गोपालदासजी श्रीगुसाईंजीके ऐसे कृपापात्र हते ॥ वार्ता संपूर्ण ॥ वैष्णव ॥ १७५ ॥ ❀ ॥ श्रीगुसाईंजीकेसेवक रणछोडदास वैष्णवकी ० सो वे रणछोडदास गुजरातमें रहते हते ॥ द्रव्यपात्र बद्ध हते ॥ और श्रीठाकुरजी और वैष्णवकी सेवा भली भांतीसों करते हते ॥ और वैष्णवके ऊपर विश्वास बद्धत हतो ॥ फेर एक ठग वैष्णव बनके विनके घरमें उतय्यो ॥ और विननें बडो आदर सत्कार कय्यो ॥ फेर वा ठगनें रणछोडदासको वेटा एकांतमें मार डाय्यो ॥ और गहेनो उतार लियो ॥ और गांठडी बांधके चलय्यो ॥ रस्तामें वाकुं रणछोडदास मिले ॥ तव वा वैष्णवसों कही प्रसाद लिये विना जायवे नहीं देउंगो ॥ वाकी गांठडी उठाय लीनी और हाथ पकडके लेचले ॥ फेर घरमें आयके वा वैष्णवकुं न्हायके बैठायो ॥ और गांठडी भीतर घरदीनी ॥ ये वैष्णव मिलेविना नजाय ॥

(३०२) दोसौबावन वैष्णवकी वार्ता.

यासुं गांठही भीतर धरी ॥ फेर वाकी स्त्री बोली छोरो
सवारको गयोहै सो आयो नहीहै ॥ वाकुं हूँढलाव ॥
फेर घरके पाछे एक बगीचो हतो सो बगीचा रणछोड
दासको हतो ॥ सो बगीचामें छोराकुं हूँढवे गयो ॥ सो
छोरातो मिल्यो नहीं ॥ एक माटीको ढगलो देख्यो ॥
मनमें आई ये माटीको ढगलो इहासुं काढडारुं तो
ठीक ॥ तब माटीके ढगलेमें हाथ डान्यो तो वो छोरो
मन्यो पन्यो हतो ॥ देखके वाके कानमें अष्टाक्षर मंत्र
कह्यो और कही उठउठ घरमें वैष्णव आयेहे विनकुं
जय श्रीकृष्ण कर ॥ तब वह छोरा उठके ठाडो भयो ॥
फेर छोराकुं घरमें लायके न्हावायो और श्रीठाकुरजीके द-
र्शन करवाये ॥ तब वे ठग रणछोडदासके पांवनपन्यो और
कही जो मैंने ये दृष्टकर्म कन्यो है सो तुम क्षमा करो ॥
और मोकुं वैष्णव करो ॥ तब वा रणछोडदासनें खर्ची
देके श्रीगोकुल पठायो ॥ और श्रीगुसांईजीके ऊपर पत्र
लिखदियो ॥ सो वे रणछोडदास श्रीगुसांईजीके ऐसे कृ-
पापात्र हते ॥ जिननें बेटा जीवती कन्यो ॥ वार्ता संपूर्ण ॥
वैष्णव ॥ १७६ ॥ * ॥ ॥ ॥ ॥ ॥
श्रीगुसांईजीके सेवक दोउ ठग जिननें नाराय-
णदासकी स्त्रीकुं फांसी दीनी तिनकी वार्ता ॥ सो फांसीकी
बात सगरी नारायणदासकी वार्तामें लिखीहै ॥ और जब
नारायणदासकी स्त्री जीवती भई तब वे ठग नारायणदा-
सजीके पांवन पन्ये ॥ तब कही हमकुं वैष्णव करो ॥ तब
नारायणदासनें श्रीगुसांईजीके ऊपर पत्र लिख दीनो ॥

वैष्णव (१७८) राजाको बेटा बन्नीस लक्ष्मणो. (३०३)

सो वे पत्रलेके ठग श्रीगोकुलआये ॥ तव श्रीगुसाईजीने
विनको मन फिन्यो देखके तव झरण लिये ॥ और कृ-
पाकरके विनकुं पावन किये और भगवत्सेवा पधराय
दीनी ॥ तव वे ठग वडे वैष्णव भये और अत्यंत कृपा-
पात्र भये और जन्मपर्यंत नारायणदासजीको सत्संग न
छोडयो ॥ वार्ता संपूर्ण ॥ वैष्णव ॥ १७७ ॥ ❀ ॥ ॥
श्रीगु० सेवक एक राजाको बेटा बन्नीस लक्ष्मणो
तिनकी वार्ता ॥ जब वे राजा वृद्ध भयो तव वाको अंत-
काल आयो ॥ तव वा राजानें अपने बेटाकुं बुलायके
कही वा गाममें श्यामदास वैष्णव रहे हे याको सत्संग
करियो ॥ वाकेऊपर विश्वास राखेगो तो तेरो भलो होवे-
गो ॥ ऐसे कहेके वो राजा भगवच्चरणारविंदकुं पहाँच्यो
तव राजाके बेटाने वा वैष्णवकुं बुलायो और सब बात
कही ॥ फेर एकदिन वा राजाके बेटाको हाथ कट गयो ॥
तव वा श्यामदासने कही प्रभु जो करे सो भली करे ॥
और फेर एकदिन वा राजाके बेटाकी स्त्री मरगई सब
लोक कहे बुरो भयो ॥ तव श्यामदासने कही प्रभु करे सो
भली करे ॥ ये सुनके वा राजाकुं गुस्सो चढयो ॥ फेर थो-
डेदिन पीछे वा राजाको बेटा मरगयो ॥ तव सब लोगनने
कही बुरो भयो ॥ तव श्यामदासने कही प्रभु करे सो
भली करे ॥ तव वे राजाकुं बडो गुस्सो चढयो ॥ तव वे
राजा मनमें ये समझयो ये मेरे बुरेमें खुब राजीहि ॥ तव
वा राजानें विचार कियो याको छानो छानो मार डार-
रनो ॥ तव वा राजाके बेटाने नीचनकुं बुलायके कही

जो ये श्यामदास सवारै तीनबजे जलभरवे जाय है तुम याको मारडारो ॥ परंतु कोई औरकुं खबर न पड़ेये मुनके वे नीचलोग रस्तामें बैठरहे ॥ सवारै श्यामदास आवेगो तो मारेंगे ये विचार कर लीयो तब भगवदिछातें श्यामदासके मनमें ऐसी आई जो आज दूसरे कुवापर जलभरन जाऊंतो ठीक ॥ तब श्यामदास सवारै उठके जल भरने चल्यो ॥ सो रस्तामें ठोकर लगी तब वा श्यामदासको पांव टूट गयो ॥ तब वाकुं उठायके घरमें लाये घरमें आयके परे ॥ फेर वा राजाकुं खबर परी जो जलभरेवेकुं नहीं गयो ॥ और पाव टूट गयोहे ॥ एक दोदिन पीछे वे राजा श्यामदासके घर आयो और आयके कही तुमारा पांव टूट्यो सो बुरो भयो ॥ तब श्यामदासनें कही प्रभुजो करेंहैं सो भली करेंहैं तब वा राजानें जानी ॥ याके बोलवेको स्वभाव ऐसो है ॥ आपने बुरेमें ये राजी नहींहै ॥ सब बात भली मानेहै ॥ तब नित्य श्यामदासके घर आवे और श्यामदासको सत्संग करे फेर एक और बडो राजा हतो ॥ सो सब राजानके पास खंडणी लेतो हतो ॥ सो वा बडे राजानें वा राजाकुं बुलायो तब वा राजानें श्यामदाससुं पूंछी तब श्यामदासनें कही जावो ॥ प्रभु करे सो भली करें ॥ तब वे राजा बडे राजाके पास गयो ॥ तब वा राजानें पंडितनकुं एकट्टे करके याके लक्षण तपासे ॥ सो शास्त्रमें बचीस लक्षण कहेहे और तो सब मिले ॥ एक तीन लक्षण मिले एक तो याकी स्त्री मरगई हती ॥ और बेटा मरगयो हतो और आंगरी कटी हती ये तीन न मिले ॥ तब वा

वैष्णव (१७८) राजाको बेटा बत्तीस लक्षणो. (३०५)

राजानें बाकुं कही तुमारे घर पाछा तुमारे राजपर जावो ॥ तव राजाके बेटानें पंडितनसुं पूछी जो मोकुं बढे राजानें काहेकुं बुलायो हतो ॥ तव पंडितननें कही या राजानें पांच करोड रुपैय्या खरचके एक तलाव खोदायो है ॥ सो वा तलावमें जल नहीं निकस्यो ॥ तव पंडितनसुं वा राजानें पूछी हती जो कैसे निकसे तव पंडितननें कही ॥ जो बत्तीस लक्षणो मनुष्य या तलावमें बघ करौ तो पाणी आवे ॥ तव बत्तीस लक्षणो कोई मिल्यो नहीं ॥ तव तुमकुं बत्तीस लक्षणो जानके बुलायो है ॥ जो ये मिलवेको आवेगो याकुं अजानमें तलाव दिखावे जाएंगे ॥ तव याकुं मार डारेंगे तव तलावमें पाणी आवेगो ॥ तव तुमारे लक्षण बत्तीसमें तीन घट गये हैं जासुं मरायवेकी नाही ठैरी है ॥ और तुमकुं घर जावेकी रजा मिली है ॥ ये वात सुनके वे राजा प्रसन्न भयो और विचार कियो जो श्यामदास वैष्णवनें कही हती जो श्रीठाकुरजी करेंसो भली करें ॥ जो मेरो बेटा और स्त्री और आंगरी खंडित भई न होती तो आज मेरो जीव जातो ॥ ऐसे कहेके वे राजा उहांसुं चल्यो ॥ और गामके बहार आयके वा खाली तलावकुं देखवे गयो ॥ सब मनुष्यनकुं नीचे ठाढे किये और एकलो वा तलावकी पालपर चढगयो ॥ और अष्टाक्षर कहेके वा तलावपर दृष्टी करी ॥ तव सब तलाव भरगयो तव सब लोक देखके विस्मय होय गये ॥ और पंडितनकी बुद्धीहुं विचारमें परी ॥ और कछु समजन नहीं परी ॥ कारण जो भगवन्नामको प्रताप तथा

वैष्णवधर्मको प्रताप वे पंडित जानते नहीं हते ॥ तब वा गामको राजा ये बात सुनके तुर्त उहां आयो और देखके बहुत प्रसन्न भयो ॥ तब वा राजाकुं अधिक देश दियो ॥ और राजी करके अपने देशमें पठायो ॥ फेर वह राजा अपने गाममें आयो ॥ और आयके श्यामदासके पावन पच्यो और अपराध क्षमा कराये और फेर वा श्यामदासके सत्संगतें श्रीठाकुरजी पधरायके सेवा करन लग्यो ॥ सो वा राजाके बेटापर श्रीगुसाईंजीने ऐसी कृपा करी हती ॥ वार्ता संपूर्ण ॥ वैष्णव ॥ १७८ ॥ * ॥ श्रीगुसाईंजीके सेवक पुरुषोत्तमदास काशीमें रहते तिनकी वार्ता ॥ एक समय श्रीगुसाईंजी काशी पधारे हते ॥ पुरुषोत्तमदास तथा विनकी स्त्री श्रीगुसाईंजीके सेवक भये ॥ फेर श्रीगुसाईंजी श्रीजगन्नाथरायजी पधारे तब पुरुषोत्तमदास श्रीगुसाईंजीके संग आये ॥ फेर पुरुषोत्तमदासनें सखडी महाप्रसाद अरोगवायो ॥ जगन्नाथक्षेत्रमें अबसूधी बल्लभकुलके बालक पुरुषोत्तमक्षेत्रमें सब वैष्णवके हाथको श्रीजगन्नाथरायजीको महाप्रसादसखडीको अरोगे हैं ॥ सो पुरुषोत्तमदासकी कृपासुं अबसूधि रीती चलेहैं ॥ फेर श्रीगुसाईंजी काशी होयके श्रीगोकुल पधारे और सब खटला लेके पुरुषोत्तमदास श्रीगुसाईंजीके संग आये और श्रीगोकुलमें रहे ॥ और श्रीगुसाईंजीके मुखसुं कथा सुनते ॥ एकदिन पुरुषोत्तमदासनें श्रीगुसाईंजीसो पूछ्यो जो मरियादामार्गमें और पुष्टिमार्गमें भेद कहा ॥ तब श्रीगुसाईंजीने आज्ञा करी मरियादा मार्गमें साधन और क्रिया

और कर्मवल और कर्मके फलकी इच्छा और साधनकी मुख्यता जाको नाम मरियादामार्ग है ॥ और पुष्टिमार्गमें स्नेहपूर्वक कृष्णसेवा मुख्यहै और भगवदीयको सत्संग और केवल भगवदनुग्रहको वल और केवल निःसाधनपणो और भगवद्धर्म मुख्य ॥ तब लौकिक वैदिक लोगनके दिखायवेके लीये करेहैं मुख्यता भगवद्धर्मनकोहै सो पुष्टिमार्ग कहिये ॥ ये मुनके पुरुषोत्तमदास वहोत प्रसन्न भये और सिद्धांत रहस्य इत्यादि ग्रंथ अभिप्राय सहित श्रीगुसाईजीके पास सीखे ॥ और श्रीठाकुरजी पधरायके भगवत्सेवा करन लगे ॥ और जो भगवद्रससंघंधी बातें अष्टप्रहर श्रीगुसाईजीसुं सुन्योकरते एकदिवस पुरुषोत्तमदासनें पूछी जो श्रीठाकुरजी पीतांबर काहेकुं धरतहैं और श्रीस्वामिनीजी नीलवस्त्र काहेकुं धरतहैं ॥ तब श्रीगुसाईजीनें आज्ञा करी जो श्रीस्वामिनीजीको गौरवर्ण है कंचन जैसो ॥ ताविना श्रीठाकुरजीसों रह्यो नहीं जायहै ॥ श्लोक ॥ रूपंतवैतदतिमुंदरनी लभेघप्रोद्यत्तडिन्मदहरं ब्रजभृषणांगि ॥ एतत्समानमिति पीतवरंदुकूलमुराबुरस्यपि विभर्तिसदासनाथः ॥ १ ॥ यातें पीताम्बर धरेहैं और श्रीठाकुरजीको श्यामवर्ण है ॥ शृंगाररसरूपहैं जामें अगाध रस भन्योहै ॥ या स्वरूपविना श्रीस्वामिनीजी रही न सके ॥ जासुं यातें श्रीस्वामिनीजी नीलाम्बर धरें हैं ये मुनके पुरुषोत्तमदास या रसमें भग्न होयगये ऐसी कितनी बात पुरुषोत्तमदासकी लिखें ॥ कोई दिन श्रीगुसाईजीके चरणारविंद छोडके

कहं जाते नहीं ॥ सो वे पुरुषोत्तमदास ऐसे कृपापात्र हते
॥ वार्ता संपूर्ण ॥ वैष्णव ॥ १७९ ॥ ❀ ॥ ॥ ॥
॥ श्रीगुसांईजीके सेवक वेणीदासकी वार्ता ॥
सो वे वेणीदास पूर्वके संगमें श्रीगोकुल आये और श्री-
गुसांईजीके दर्शन किये ॥ सो साक्षात्कोटिकंदर्पलावण्य
पूर्ण पुरुषोत्तम ऐसे स्वरूपके दर्शन भये ॥ तब वेणीदा-
सनं ऐसो विचार कियो इनके शरण जईये तो बहोत
आछो ॥ तब श्रीगुसांईजीके सेवक भये ॥ और श्रीनव-
नीतप्रियार्जीके दर्शन किये ॥ तब भगत्स्वरूपको ज्ञान
भयो ॥ तब श्रीनाथजीके दर्शन किये ॥ तब वेणीदासकुं
देहालुसंधान रह्यो नहीं ॥ दो घडी पाछे स्मृती आई तब
वेणीदासकुं श्रीगुसांईजीनें आज्ञा करी जो श्रीनाथजीके
दर्शन किये तब वेणीदासनं वीनती करी ॥ जो आपकी
कृपातें श्रीनाथजीनें दर्शन दिये ॥ जीवकि कछु समर्थ्य
नहींहै ॥ श्रीनाथजी आपके वशमें है ॥ आपकी इच्छा
होवे जिनकुं श्रीनाथजी दर्शन देवें ॥ फेर वेणीदासनं
वीनती करके श्रीठाकुरजीकी सेवा पधराई ॥ और भग-
वत्सेवा करन लगे ॥ सो बहोत दिन पर्यंत श्रीगुसांईजीके
पास रहे ॥ और पुष्टिमार्गकी रीती शीखे ॥ फिर वेणी-
दास आज्ञा मागके अपनं देशकुं चले ॥ सो रस्तामें ए-
कदिन बरसाद बहोत पड्यो और गाममें जग्या दूढ़-
वेंकुं गये सो एक बडी जग्या हती उहां वेणीदासजी
उतरे और श्रीठाकुरजीकी सेवा करी और भंहाप्रसाद
लिये फेर रातकुं वेणीदासजी भगवद्वाता कर चुके ॥ तब

देखे तो एक बड़ो प्रेत ठाडो है ॥ तब वाकुं पृथ्वी तुं कोण है ॥ तब वानें कही जो मैं प्रेतहूँ ॥ इहां जो कोई आयके उतरे है सो पाछे जाय नहीं ॥ सो मैं बहोत बखतको ठाडो हूँ ॥ परंतु तेरे उपर मेरो दाव चले नहीं है ॥ तब वेणीदासजीकुं दया आई सो वाके उपर जल छांटयो ॥ तब वा प्रेतकी प्रेतयोनी छूटी और दिव्य देह होय गई ॥ और वेणीदासजीकुं हाथ जोडके प्रेतनें कही ॥ जो तुं धन्य है मेरी प्रेतयोनी छुडायके मेरो कल्याण कियो अब मैं तेरी कृपातें वैकुंठकुं जाउंगो और मेरी प्रेतयोनी छुडायवेकुं कोई समर्थ नहीं हतो ॥ ऐसे कहके और वेणीदासजीकुं दंडवत करके वो प्रेत वैकुंठ गयो ॥ तब वेणीदास अपने देशमें जायके श्रीठाकुरजीकी सेवा भलीभातिसों करन लगे ॥ सो वे वेणीदास श्रीगुसाईंजीके ऐसे कृपापात्र भये ॥ वार्ता संपूर्ण ॥ वैष्णव ॥ १८० ॥

श्रीगुसाईंजीके सेवक हंसहंसनीकी वार्ता ॥
 एकदिन श्रीगुसाईंजी बद्रिकाश्रम पधारे हते ॥ उहां निर्जन बन हतो और मानससरोवर हतो और हंस बद्धत हते ॥ वाईदिन कोई जीव शरण न आयोहतो ॥ यातें श्रीगुसाईंजीनें भोजन न किये ॥ तब चाचाहरिवंशजी पांचदश हंस पकडलाये ॥ और श्रीगुसाईंजीनें विनकुं नाम सुनाये और छोडदिये और महाप्रसाद धराये ॥ तब तें विन हंसननें महाप्रसाद लिये ॥ जब आगले जन्मकी स्मृती भई ॥ और भगवल्लीलाकी स्फूर्तीभई ॥ फेर श्रीगुसाईंजी उहांतें पधारे जब वा तलावपर कोई वैष्णव आ-

वतो वाके पास हंस आयके बैठते ॥ और दूसरेके पास नहीं आवते ॥ और कोई देशमें एक राजाहतो वाकुं कोढ़ भयो सो बहोत भयो ॥ कोई उपायसुं मिटे नहीं ॥ तब कोई वैद्यनें कही जो हंसनको रुधिर चोपडे सों मिटे-गो ॥ तब राजानें पारधीलोगनकुं बुलायके कही जो हंसलावेगो वाकुं लाखरूपैय्या इनाम देउंगो ॥ तब पारधी वा देशमें हंस पकडवेके लीयें गये परंतु हंसतो हाथमें आवें नहीं ॥ बहोत प्रयत्न किये और बहोत दिन उहां रहे ॥ एकदिन एक वैष्णव उहां आयो वाकुं देखके हंस वाकेपास आये ॥ सो ये बात पारधीनें देखी तब दूसरे-दिन पारधी वैष्णववनके उहां गयो ॥ तब वे हंस वैष्णव जानके वाकेपास आये तब वानें पकडलिये तब वा राजाकुं लाय दिये और लाखरूपैय्या इनामके लेगयो ॥ तब श्रीठाकुरजीनें विचारी जो मेरे भक्तको दुःख में कैसे सहुं तब श्रीठाकुरजी वैद्य वनके बजारमें आये जे कोई रोगको औषध पूछे तब श्रीठाकुरजी वाकुं औषध देवे तब तत्काल वाको रोग मिटजाय ॥ ऐसैं दोचार घडीमें सैंकडे मनुष्यनके रोग मिटगये ॥ तब वा वैद्यको यश बहो-त फैल्यो फेर वा वैद्यकुं राजाकेपास लेगये ॥ तब वैद्यनें कही मैं अबी थोडो औषध देउंगो ॥ थोडो कोढ़ मिटेतो आखी शरीर पर पीछे लगाउंगो ॥ फेर औषध दिये थोडा शरीरपर लगायो तब थोडो शरीर निर्मल भयो ॥ तब राजा उठके पावन पन्थो ॥ और कही जो सब कोढ़ मिटाओ तो जो मागो सो देउंगो ॥ तब श्रीठाकुरजीनें

कही हंसनकुं छोडदेउ ॥ तव वा राजानें छोड दिये ॥ तव श्रीठाकुरजीनें औषध लगायके सब कोड मिटायो ॥ फेर वा राजानें कही तुम मनुष्य नहींहो देवहो के ईश्वरहो ॥ सो मैं जानत नहींहुं ॥ और कृपा करके जनावो तो ठीक ॥ तव श्रीठाकुरजीनें कही तुम श्रीगोकुलमें जायके वैष्णव होवो तव मोकुं पहचानोगे ॥ तव वह राजा श्रीठाकुरजीके वचन सुनके श्रीगोकुल जायके श्रीगुसांईजीके सेवक भये ॥ और वैष्णवको सत्संग करके श्रीगुसांईजीकी कृपाते भगवत्सेवा करन लगे ॥ तव धीरे धीरे श्रीठाकुरजीनें अपना स्वरूप वा राजाकुं जनायो ॥ सो वे हंसहंसनी श्रीगुसांईजीके ऐसे कृपापात्र भगवदीय हते ॥ जिनकुं श्रीठाकुरजी वैद्य बनके छुडाये ॥ वार्ता संपूर्ण ॥ वैष्णव ॥ १८१ ॥ ❀ ॥ ॥ ॥ ॥ ॥

॥ श्रीगुसांईजीके सेवक पारधीकी वार्ता ॥

सो वह पारधी राजाके पास लाख रुपैया लगयो ॥ और श्रीठाकुरजीनें वैद्य बनके विन हंसनकुं छुडाये ॥ तव वा पारधीनें विचार कियो जो वैष्णवधर्म सबते श्रेष्ठ है ॥ मैने वैष्णवको वेष पहेंयो तो हंस पकडाये ॥ और हंसनकुं श्रीठाकुरजीनें छुटाय दिये ॥ ये विचारकरके वह पारधी वैष्णव होयवेके लीयें श्रीगोकुलमें जायके श्रीगुसांईजीके शरण गयो ॥ तव श्रीगुसांईजीनें आज्ञा करी तूं कैसे निर्वाह करेगो ॥ तव वानें हाथ जोडके वीनती करी जो महाराज मैने वैष्णवको झूठा वेष पहेंयो हतो तो मोकुं लाख रुपैया मिले अव वैष्णवको साचो वेष पहेंगो तो श्रीठा-

कुरजी कहा नहीं देंगे ॥ ये सुनके श्रीगुसांईजी बहोत प्र-
 सन्न भये ॥ और वा पारधीकुं शरण लियो और श्रीगोवर्द्ध-
 ननाथजीके दर्शन कराये ॥ और वाके माथे भगवत्सेवा
 पधराई ॥ और कृपा करी तब वह पारधी मार्गकी रीती-
 प्रमाणे सेवा करन लग्यो ॥ तब थोडे दिन पीछे श्रीठाकुर-
 रजी वा पारधीकुं अनुभव जतावन लगे ॥ और तब बहुत
 दिन वा पारधीनें सेवा करी ॥ और द्रव्य जितनो हतो
 सब श्रीगुसांईजीकुं भेटकर दियो ॥ वे पारधी श्रीगुसांई-
 जीको ऐसो कृपापात्र हतो ॥ वार्ता संपूर्ण ॥ वैष्णव ॥ १८२ ॥
 श्रीगुसांईजीके सेवक एक वैष्णव जानें भैर-
 वकुं तुच्छ गण्यो तिनकी वार्ता ॥ सो वे वैष्णव आगरेसुं
 सामग्रीके दोय गाढाभरके गोपालपूर लावतो हतो ॥ र-
 स्तामें भैरवको मंदिर आयो ॥ वाके पास गाढा ठाढे
 रहे ॥ सो गाढावालाननें कही जो इहां दो नारियल च-
 ढावो जब गाढा चलेंगो सब लोग चढावेहें ॥ तब वा वै-
 ष्णवने भैरवके मंदिरमें जायके कही तेनें गाढा क्युं अ-
 टकाये हें गाढाचलनेदे ॥ नहीं तो गाढानके बैलके ठे-
 काणे तोकुं जोडुंगो ॥ तब भैरव उठके हाथ जोडके ठाढो
 भयो और कही जो मेरी सामर्थ्य तुमारे गाढा अटका-
 यवेकी नहींहै परंतु तुमारे दर्शनकी अभिलाष मोकुं हती
 और श्रीनाथजीके प्रसादकी अभिलाष है ॥ जासुं इहां
 गाढा ठाढे राखेहै नहींतो श्रीनाथजीके गाढा तीनलो-
 कमें अटकायवेको समर्थ कोई नहींहै ॥ तब वा वैष्णवनें
 श्रीनाथजीको प्रसाद गांठडीमेसुं काढके भैरवकुं दियो ॥

तब भैरवनें प्रसाद लियो फेर भैरव गाढाकी धुरीमें बैठके एक घंटामें गोपालपुर गाढा पहाँचाय दिये ॥ तब वे गाढाके मनुष्यननें ऐसो जाण्यो विननें नारियल दिये होएंगे ॥ ये बात श्रीगुसाईंजीनें सुनी तब श्रीगुसाईंनें आज्ञा करी जो भैरवकुं नारियल दियो होयतो ये सब सामग्री छीगई ॥ तब वा वैष्णवनें श्रीगुसाईंजीके आगे आयके यथार्थ वीनती करी ॥ जो महाराज भैरवनें महाप्रसाद माग्यो और मैनें दियो नारियल दिये नहींहि ॥ और गाढामें जोडके भैरवकुं लायोहुं सो अबी वह भैरव बहार ठाडोहै ॥ श्रीनाथजीके मंगलाके दर्शन करके जायगो ॥ ये सुनके श्रीगुसाईंजी बहोत प्रसन्न भये और सामग्री भंडारमें धरवेकी आज्ञा दीनी ॥-सो वे वैष्णव श्रीगुसाईंजीको ऐसो कृपापात्र हतो ॥ जिननें भैरवकुं तुच्छ जाण्यो ॥ वार्ता संपूर्ण ॥ वैष्णव ॥ १८३ ॥ ❀ ॥ ॥ ॥

श्रीगुसाईंजीके सेवक एक वैष्णव सूरतमें रहेतो तिनकी वार्ता ॥ सो वे वैष्णव प्रतिवर्ष ब्रजयात्रा करवेकुं आवते ॥ और श्रीनाथजीके दर्शन करके और ब्रजयात्रा करके फेर जाते ॥ और ब्रजकी हांडी राखते सो नित्य बेक्विवे राखते रसोई करके धोयके और कामलमें बांधके वृक्षसुं लटकावते ॥ एकदिन श्रीगुसाईंजीसों वैष्णवननें कही जो ये वैष्णव अनाचार मिलावेहै ॥ तब वा वैष्णवकुं श्रीगुसाईंजीनें पूछी जोये सब कहा कहे है ॥ तब वा वैष्णवनें श्रीगुसाईंजीसों वीनती करी हे महाराज ये सगरे वाहर दृष्टि है ॥ ब्रजके स्वरूपको नहीं जानें हैं

तो हुं आपकी कृपातें इनकुं ब्रजको स्वरूप दिखाउंहुं ॥
इतनी कहेके वा वैष्णवनें सबनकुं ब्रजको स्वरूप दि-
खायो ॥ तब सब वैष्णव देखेंतो सब ब्रज सुवर्णमय
दीखवे लग्यो ॥ तब सब वैष्णवनकुं श्रीगुसांईजी कहने
लगे ॥ याने ब्रजकी रजको स्वरूप जान्यो है ॥ जासुं
याकुं कछु दोष नहीं है ॥ ये सामर्थवान हैं ॥ याकुं कछु
बाधा नहीं है तुम ऐसे मत करो ॥ ये सुनके सब वैष्णव
वाकुं धन्य धन्य कहेनलगे ॥ सो वे वैष्णव श्रीगुसांई-
जीको ऐसो कृपापात्र हतो ॥ जिननें ब्रज सुवर्णमय दि-
खाय दीनी ॥ ब्रजकी रजकी हांडी सुवर्णमय जानके
काढते न हते ॥ ऐसे परम भगवदीय हते ॥ वार्ता संपूर्ण
वैष्णव ॥ १८४ ॥ ❀ ॥ ॥ ॥ ॥

श्रीगुसांईजीके सेवक एक राजाकी वार्ता ॥
सो वे राजा श्रीगुसांईजीके सेवक हते ॥ सो वे राजा श्री-
ठाकुरजीकी सेवा भलीभांतिसुं करते ॥ तब वैष्णव बहोत
आवते ॥ तब वैष्णवनसुं राजा पूछतो जो गृहस्थको धर्म
आछोके विरक्तको धर्म आछो ॥ तब वे राजा सबकुं
पूछतो परंतु राजाको संदेह नहींजातो ॥ जैसे बने तैसें
वैष्णव उत्तर देजाते हते ॥ परंतु फेर पूछते ॥ एकदिन
अद्भुतदास भगवदिच्छातें वा राजाके घर आये तब वा
राजानें अद्भुतदासजीसुं पूछी ॥ तब अद्भुतदासनें कही
जो दोचार दिनमें इहां रडंगो और तुमकुं कडंगो ॥ परंतु
तुम घोडापर बैठके या गामसुं दूर पांच सातकोश एक
वैष्णवहैं विनकुं मिल आवो ॥ तब वे राजा घोडापर

बैठके वा वैष्णवकुं मिलवे चलयो ॥ रस्तामें जाते पवन चलयो ॥ सो घोडा कहुंको कहुं चलयो गयो ॥ रात परी तब वह राजा उहां एक वृक्षके नीचे बनमें रह्यो ॥ तब वा वृक्षके ऊपर होलाहोली दो पक्षी रहेते हते सो वचानके लीयें फल लाये हते और वा वृक्षपर फल बहोत हते ॥ फेर वा राजाकुं आयो देखके वा होलानें कही जो आपने घर पावनो आयो है सो याकुं ये फल देउंगो ॥ और दोनो स्त्री पुरुषननें विचार करके फल दे दिये और वृक्षके ऊपर जायके सर्व फल पाढडान्ये ॥ तब वा राजानें फल खाये ॥ और होलाहोली मृखे रहे और सवारो भयो तब राजा घोडापर बैठके चलयो ॥ सो एक नगर आयो वामें गयो उहां जायके देखे तो सब राजा येकठे भयेहैं और वा गामके राजाकी बेटीको स्वयंवर हतो सो तेलकी कढाई चढाई हती ॥ वामेंसुं मुदरी जो काढे वाकुं कन्या देनी ॥ ऐसे वा राजानें नेम लियो हतो ॥ सो ताते तेल ठंडो करके अथवा कोई दूसरे उपायसुं उघाडो हात डारके मुदरी काढी चहीये ॥ नीचे आंच बलती हती ॥ सो तेल ठंडो होय नहीं शकतो ॥ जासुं सब राजा अटकरहे हते ॥ विनमें वो राजाहुं बैठ रह्यो ॥ इतनेमें अद्भुतदासजी आये और वा तेलकी कढाईमें हाथडारके मुदरी काढलीनी ॥ तब सब लोग देखके चकित होयगये ॥ और वा गामके राजानें कही तुम मेरी कन्या परणो ॥ तब वा अद्भुतदासनें कहीजो ये राजा अमके गामको है याकुं तेरी बेटी परणायदेवो ॥ फेर अद्भुतदास

चले गये ॥ तब वो राजा विवाह करके अपने घर आयो फेर अद्भुतदास मिल्ये तब अद्भुतदासनें वा राजासुं पूछी तुम घोडेपर बैठके गये हते सो कहा कहा देखे ॥ तब वा राजानें सब बात कही ॥ तब अद्भुतदासजी बोले जो वो होली होलामें गृहस्थके धर्म हते ॥ गृहस्थको ऐसेही चहिये ॥ जो घरमें आवे विनकुं सुखे न राखे ॥ आप सुख्यो रहे और विरक्तके धर्म ऐसे हैं जानें तेलमेंसुं सुदरी काढी हती ऐसे चहिये और तुमको राजाकी कन्या परणाय दीनी ॥ आप दुःखपायके औरकुं सुखी करे सो ये दोनो धर्म तुमकुं दिखाय दिये ॥ तब वे राजा मुनके बहोत प्रसन्न भयो और भली भांतिसुं श्रीगुसांईजीकी सेवा करन लग्यो ॥ और श्रीठाकुरजीकी सेवा करन लग्यो ॥ वे राजा श्रीगुसांईजीके ऐसे कृपापात्र हते जाकुं तत्काल विश्वास आय गयो ॥ वार्ता संपूर्ण ॥ वैष्णव ॥ १८५ ॥

॥ श्रीगुसांईजीके सेवक जीवनदास ब्राह्मणकी वार्ता ॥ सो लाहौरमें रहते हते सो वे जीवनदास हरिद्वारमें श्रीगुसांईजीके सेवक भये हते ॥ तब श्रीठाकुरजीकी सेवा पधरायके लाहौरमें रहते और भगवत्सेवा करते और कहुं बाहार जाते आवतेनहीं ॥ सो वाकी निदा ज्ञातीके लोग वृथा करते ॥ ऐसे बहुत वर्ष पीछे वा जीवनदासकी देह छूटी ॥ फेर लोगननें वाकुं अग्नि संस्कार क्यो ॥ सो एक वृक्षके नीचे क्यो ॥ और वा वृक्षके ऊपर दो प्रेत रहते हते ॥ सो एक प्रेत तो वाईसमय कहुं गयो हतो ॥ और एक प्रेत वा वृक्षपर बैठो हतो ॥

सो वा प्रेतकुं जीवनदासकी चिताको धूवां लय्यो ॥ तव प्रेतयोनिस्तुं छूटके और दिव्य देह पायके वो प्रेत स्वर्गमें गयो ॥ और दूसरो प्रेत आयो और वानें ये बात जानी तव वो रोवन लय्यो और हाय हाय करके पुकारन लय्यो ॥ तव वा रस्ता ऊपर एक पंडित ब्राह्मण जातो हतो ॥ तव वा पंडितने वा प्रेतकुं रोवतो देख्यो तव वा पंडितनें पूछी जो तूं कोन है ॥ और क्युं रोवे है तव वा प्रेतनें कही जो ब्राह्मण तूं मेरी बात सुन ॥ मैं प्रेतहूं और एक प्रेतकी उद्धार भयो है ॥ सो बात कही ॥ और मेरो उद्धार नहीं भयो यातें दुःखपावुंहुं ॥ तव वा ब्राह्मणनें कही ये बात साची कैसे मानी जाय ॥ तव वा प्रेतनें कही जो तूं या चितामें दोचार लकडी डारदे सो वा चितामेस्तुं धूवां मोकुं लगोगो तो मेरो उद्धार हो जायगो ॥ तव वा ब्राह्मणने वैसेही क्यो ॥ तव वो प्रेत जयजय करतो दिव्यदेह धरके वा जीवनदासकी स्तुती करतो स्वर्गमें गयो ॥ तव वा ब्राह्मणनें देख्यो वा ब्राह्मणकुं बढो विस्मय भयो ॥ तव गाममें आयके वा ब्राह्मणनें खबर काढी जो आज कोण मय्यो हतो जब वाकुं खबर परी जीवनदासकी देह छूटी है ॥ तव वा ब्राह्मणनें खबर काढी कोनसे धर्ममें हतो ॥ तव वैष्णव हतो ऐसी खबर परी ॥ तव वह ब्राह्मण अपने कुटुंबसहित श्रीगोकुलमें जायके वैष्णव भयो ॥ सो वे जीवनदास श्रीगुसाईजीके ऐसे कृपापात्र हते ॥ जिनकी चिताके धूवां लागेतें प्रेतनकी दिव्य देह भई ॥ वार्तासंपूर्ण वै० ॥ १८६ ॥ ❀

॥ श्रीगुसांईजीके सेवक एक लाहोरको पंडित
 तिनकी ॥ सोवे ब्राह्मण जीवनदासके चरित्र देखके श्री-
 गोकुल आये ॥ और कुटुंबसहित श्रीगुसांईजीके सेवक भ-
 ये ॥ और नवनीतप्रियाजीके दर्शन किये ॥ और श्रीनाथ-
 जीके दर्शन किये ॥ और श्रीगुसांईजीके सुखारविंदतें पु-
 ष्टिमार्गको सिद्धांत समझयो ॥ और श्रीठाकुरजीकी सेवा
 पधरायके और ब्रजयात्रा करके फेर अपने देशमें गये और
 मलीभांतिमुं मार्गकी रीतीप्रमाणें सेवा करन लये ॥ एक
 दिन एक मनुष्य हत्यारो भिक्षा मागवे आयो ॥ सो
 वह ब्राह्मण हतो ॥ तब वानें पुकाऱ्यो राधाकृष्ण रा-
 धाकृष्ण तब वे वा ब्राह्मण वैष्णवने वाहुं बुलायके भो-
 जन करायो ॥ तब वा पंडितको ज्ञातीके लोग और दूसरे
 पंडित सब एकठे होयके वा वैष्णव पंडितहुं कही तुमनें
 हत्यारेको स्पर्श क्युंकर्यो ॥ तब वा पंडितनें कही यानें
 कृष्णनाम लियो है ॥ याकीहत्या रही नहीं ॥ तब दिन
 पंडितनें कही जो हम ये बात नहीं मानें तब वा वैष्णव
 पंडितनें कही तुम शास्त्र पढे हो ॥ परंतु तुमरो हीयेको
 अंधारो गयो नहींहै सो वाहुं दूर करो तब साच म्हा-
 नोंगे ॥ तब पंडितनें कही जो हरिद्वारमें श्रवणनाथ म-
 हादेवजी हैं सो वाको नंदीश्वर याके हातको खावेतो
 साचो मानेंगे ॥ तब वे वैष्णव पंडित और सब दूसरे पं-
 डित मिलके हरिद्वार आये ॥ और नंदीश्वरके आगे वा
 हत्यारेनें प्रसादको थाल धरघो और वैष्णव पंडित बोलयो
 जो याकी हत्या कृष्णनाम लियेमुं गई होवे तो याके

हाथको भोजन करो तब वह नंदीश्वर महादेवजीको वाहनसो महाप्रसाद स्वायवे लगगयो ॥ तब वह सब पंडित वा वैष्णव पंडितके पावन परे ॥ सो वे ब्राह्मण श्रीगुसांईजीको ऐसो कृपापात्र हतो ॥ जिनके कहेतें नंदीश्वरनें तुर्त भोजन किये ॥ और जिनके दर्शनसुं हत्यारेकी हत्या गई सो वे पंडित वैष्णव ऐंसे श्रीगुसांईजीके कृपापात्र भये ॥ वार्ता संपूर्ण ॥ वैष्णव ॥ १८७ ॥ ❀ ॥ ॥

श्रीगुसांईजीके सेवक विरक्तवैष्णवकी वार्ता ॥
 सो वे विरक्त वैष्णव चुकटी मागके निर्वाह करतो ॥ और नित्य श्रीगिरिराजकी परिक्रमा करतो ॥ फेर वाके पास दोय वैष्णव दूसरे आयके रहे ॥ सो वे विरक्त वैष्णव चुकटी मागके रसोई करके और दोनोनकी पातर धरते ॥ एकदिन वा विरक्त वैष्णवकुं श्रम बहोत भयो और थाक गयो तब वाको श्रम श्रीनाथजी सहन न कर सके ॥ तब विन दोनो वैष्णवनकुं श्रीनाथजीनें आयके कही जो तुम दोनो रसोई करो और ये विरक्त वैष्णव चुकटी माग लावेगो ॥ तब वे दोनो रसोई करन लागे ॥ और तीनोजने हिलमिलके महाप्रसाद लेते ॥ सो विरक्तवैष्णव श्रीगुसांईजीके ऐंसे कृपापात्र हते ॥ जिनको श्रम श्रीनाथजी सही न सके ॥ वार्ता संपूर्ण ॥ वैष्णव ॥ १८८ ॥ ❀ ॥ ॥ ॥

श्रीगुसांईजीके सेवक भीमसेनराजाकी वार्ता ।
 सो वे भीमसेनराजाकुं और भीमसेनकी स्त्रीकुं पूर्व जन्मको ज्ञान हतो और भीमसेनराजाकुं श्रीठाकुरजीनें स्वप्नमें कही जो तुम तीर्थयात्रा जावो ॥ और तुमकुं जो

पूर्वजन्मकी बात कहे विनके शरण जइयो ॥ ये सुनके
 भीमसेनराजा बडो प्रसन्न भयो ॥ तब भीमसेनराजा ती-
 र्थकरनेकुं चलयो ॥ तब जा तीर्थमें जाय उहां कोई पं-
 ढित अथवा महापुरुष होवेतो वाकुं तुर्त जायके मिलते ॥
 परंतु पूर्वजन्मकी बात कोई कहेतो नहीं ॥ फेर बहुत तीर्थ
 करके राजा भीमसेन श्रीगोकुल आये और आयके
 श्रीगुसाईंजीके दर्शन किये ॥ सो साक्षात् पूर्णपुरुषोत्तमके
 दर्शन भये ॥ तब भीमसेननें दंडवत करी तब श्रीगुसां-
 ईजीनें आज्ञा करी जो भीमसेनजी तुम प्रसन्न हो ॥ और
 तुमकुं पूर्वजन्मकी बात पूछनीहै सो हम कहेंगे ॥ तब भी-
 मसेनराजानें श्रीगुसाईंजीकुं हाथ जोडके वीनती करी ॥
 जो महाराज बात कहेवेकी कछु जरूर नहींहै ॥ आपह-
 मकुं शरण लेवें ॥ तब श्रीगुसाईंजीनें श्रीनवनीतप्रियाजीके
 सान्निधान दोनो स्त्रीपुरुषकुं नाम निवेदन कराये ॥
 तब राजा भीमसेन श्रीगुसाईंजीकी बैठकमें गये ॥ और
 एकांतमें श्रीगुसाईंजीनें भीमसेनके पूर्वजन्मकी बात कही ॥
 जो आगले जन्ममें तुम कुणबी हते और खेती करते हते ॥
 और एक बनियाकी स्त्रीको और तुमारो स्नेह हतो ॥ तब वे
 स्त्री तुमारेपास खेतमें आवती हती ॥ सो वा खेतमें खोदतें
 एक भोंयरो निकस्यो ॥ वा भोंयराकुं वा स्त्रीनें और तु-
 मनें झाडके सफा क्यो ॥ वामेसुं एक ठाकुरजीको स्व-
 रूप निकस्यो और वा स्वरूपकी सेवा तुम दोनोमिलके
 करन लगे ॥ फेर एकदिन अकस्मात् भोंयरो पडगयो ॥
 जब तुम दोननकी देह छूटी ॥ तब तुमकुं यमदूत लेवेकुं
 आये फेर विष्णुदूतननें आयके तुमकुं छुड़ाये ॥ तब य-

मदूतननें कही जो यानें व्यभिचार कियो है याकुं यम-
लोकमें ले जाएंगे ॥ तव विष्णुदूतननें कही जो यानें भ-
गवदमंदिर मार्जन कियो है ॥ तव यमदूत तुमकुं छोड-
गये ॥ तव तुमनें राजवंशमें जन्म लियो और यास्त्रीनेंहु
राजवंशमें जन्म लियो और फेर स्वकीयत्व भावसुं तु-
मकुं प्राप्त भई ॥ अब तुम भगवत्सेवा करौ ॥ फेर जन्म
नहीं लेने पढेंगे ॥ ये सुनके राजा भीमसेन बहोत प्रसन्न
भयो ॥ और आगले जन्मकी सब बात मिलगई ॥ तव
राजा भीमसेन श्रीठाकुरजीकी सेवा पधरायके और श्री-
नाथजीके दर्शन करके और पुष्टिमार्गकी रीती शीखके
फेर अपने देशमें आये ॥ और श्रीठाकुरजीकी सेवा भ-
लीभांतिसुं करन लग्ये ॥ सो वे भीमसेन श्रीगुसांईजीके
ऐसे कृपापात्र हते ॥ वार्ता संपूर्ण ॥ वैष्णव ॥ १८९ ॥

श्रीगुसांईजीके सेवक उत्तमदासकी वार्ता ॥
सो उत्तमदास गुजरातमें रहेते हते ॥ और उत्तमदासके
पास द्रव्य नहीं हतो ॥ भगवदिच्छातें विनके पास थोडो
द्रव्य भयो ॥ तव उत्तमदासनें हजार रुपैयाको परका-
लो लियो और श्रीगोकुल जायके श्रीगुसांईजीकुं वीनती
करके श्रीनाथजीकुं जरीको परकालो अंगिकार करा-
यो ॥ और श्रीनाथजीके दर्शन करके ॥ फेर गुजरातमें
आये और परकालो लियो जाको करज रह्यो सो चुका-
यो ॥ तव घरमें उत्तमदासकुं श्रीठाकुरजीनें कही जो
मोकुं परकालाकी खोट नहीं हती तूं कसुं इतनो श्रम क-
रके लेगयो ॥ तव उत्तमदासनें वीनती करी जो महाप्रसु

आपकुं सर्व सामर्थ्य है ॥ और सर्वत्र सर्व वस्तु तैयार हैं ॥
 जो कछु आप चाहें सो सब ठेकाने होय शके ॥ परंतु
 दासको धर्म सेवा विना और नहींहैं ॥ जासु हमारो अं-
 गिकार कौनसी रीतिहुं होंवें ॥ तब ये सुनके श्रीठाकुर-
 रजी बहोत प्रसन्न भये ॥ और परकाला सहित श्रीठाकुर-
 रजीनें उत्तमदासकुं घरमें दर्शन दिये ॥ सो वे उत्तमदास
 ऐसैं कृपापात्र हते ॥ वार्ता संपूर्ण ॥ वैष्णव १९० ॥ ❀ ॥
 श्रीगुरु ० सेवक जनभगवानदास गौर रजपूत-
 की वार्ता ॥ सो वे जनभगवान ब्रजमें फिय्यो करते और
 श्रीगुसाईंजीकी कथा सुनते और अहर्निश भगवल्लीलाकी
 विचार करते और श्रीगुसाईंजीके सेवक विना दूस-
 रेसुं भाषण नहीं करते ॥ और कोईदिन श्रीजीद्वार कोई-
 दिन श्रीगोकुल फिय्यो करते ॥ और नये पद बनायके
 गावते ॥ एकसमय जन्मअष्टमी उपर श्रीनाथजीके दर्श-
 न करवेकू गये ॥ तब एक पद बनायके गायो ॥ सो पद ॥
 ॥ राग सारंग ॥ ग्वालवधार्ईमागनआये ॥ गोपीगोरससक-
 ललीयेसंगसबहि आयसिरनाये ॥ १ ॥ अबयेगर्वगिनत
 नहिकाहुकरियंतमनकेभाये ॥ जहां नंदबैठेनांदीमुखजहां-
 गहनकोधाये ॥ २ ॥ बरनवरनपायेपटब्रजजनउरआनं-
 दनसमाये ॥ जनभगवानजशोदारानीजगकीजीवनजाये
 ॥ ३ ॥ सो यह वधार्ई जनभगवानदासनें गाई ॥ सो श्री-
 गुसाईंजी ये पद सुनके बहोत प्रसन्न भये ॥ सो ऐस अ-
 नेक पद जनभगवानदासनें गाये ॥ सो वे जनभगवान-
 दास श्रीगुसाईंजीके ऐसैं कृपापात्र हते ॥ वाता संपूर्ण ॥

॥ वैष्णव ॥ १९१ ॥ ॐ ॥ ॥ ॥ ॥ ॥
 श्रीगुसाईजीके सेवक एक राजाकी वार्ता ॥
 जिनके गाममें साचोराकुं मार डाल्यो सो जीवतो भयो ॥
 सो वे साचोरा दोनो भाईनकुं लेके वह राजा श्रीगोकुल
 गयो ॥ और जायके श्रीगुसाईजीके दर्शन किये ॥ सो
 साक्षात् पूर्णपुरुषोत्तमके दर्शन भये वा राजानें हाथजो-
 डके वीनती करी जो कृपाकरके मोकुं शरणलीजिये ॥ तव
 श्रीगुसाईजीनें आज्ञा करी जो तुम थोडे दिन श्रीगोकु-
 लमें रहो पाछे तुमकुं विचार करके शरण लेंवेंगे ॥ फेर
 श्रीगुसाईजीनें श्रीनाथजीकुं पूछी जो या राजानें साचोरा
 भक्तकुं मरायो सो याकुं शरण लियो चाहियेके नहीं ॥
 तव श्रीनाथजीनें आज्ञा करी जो भक्तको अपराध भक्त
 क्षमा करे ॥ सो या साचोराको अपराध साचोरानें क्षमा
 क्यो ॥ तव याकुं शरण लेंवेंमें चिंता नहीं ॥ अब याको
 अपराध रह्यो नहीं ॥ फेर श्रीगुसाईजी श्रीगोकुलपधारे
 और वा राजाकुं शरण लिये ॥ फेर वे राजानें श्रीगुसाई-
 जीकुं वीनती करके और सेवा पधराई और श्रीगुसाई-
 जीसुं वीनती करी जो आप कृपा करके मेरे गाममें पधारे
 और सब गामकुं वैष्णव करें ॥ और ये साचोरा दोनो
 भाई कोईदिन मोकुं त्याग न करें ये कृपा करो ॥ तव
 श्रीगुसाईजीनेंवा राजासुं कही ये दोनो भाई तुमकुं त्याग
 नही करेंगे परंतु तुम इनको त्याग मत करियो ॥ ये सु-
 नके वे राजा बहोत प्रसन्न भयो ॥ और श्रीठाकुरजी पध-
 रायके और साचोरा दोड भाईनकुं संग लेके अपने देश-

में आयो ॥ और आयके भगवत्सेवा करन लगे ॥ जैसे वे दोनो भाई कहे तैसे राजा करतो ॥ तब वा राजासुं श्रीनाथजी सानुभाव जतावन लगे ॥ सो वे राजा श्रीगुसाईजीके ऐसे कृपापात्र हते ॥ वार्ता संपूर्ण ॥ वैष्णव ॥ १९२ ॥ श्रीगुसाईजीके सेवस रेडाउदंबर ब्राह्मण ति० सो वे रेडा कपडवनमें रहते हते ॥ और अवधूतदशामें रहते हते ॥ सो श्रीगुसाईजी गुजरात पधारे ॥ तब रेडानें नाम निवेदन किये ॥ फेर श्रीठाकुरजी पधरायके रेडा सेवा करन लग्यो ॥ फेर थोडेदिन पीछे रेडा श्रीगोकुल जायके श्रीगुसाईजीकी खवासी करन लग्यो ॥ एक ब्राह्मणी ढोकरी रहती हती ॥ वाके घर रेडानें श्रीठाकुरजी पधराये और उहां प्रसाद लेते हते ॥ एकदिन रमणरेतीमें श्रीठाकुरजीनें रेडाकुं दर्शन दिये तब देखकरेडा देहानुसंधान सूलगयो ॥ और श्रीठाकुरजी प्रसादीमाला रेडाकुं पेहेराय गये ॥ सो रेडा तो उहां आखीरात पडेरहे ॥ दूसरे दिन खबर परी जो रेडा रमणरेतीमें पन्योहै ॥ तब श्रीगुसाईजी रमणरेतीमें पधारे और रेडाकुं चरणस्पर्श कराये तब रेडाकुं देहानुसंधान भयो ॥ तब श्रीगुसाईजीनें आज्ञा करी अवी लीलामें प्रवेश करवेकी ढीलहै ॥ तब रेडा पाछें श्रीगोकुल आयो ॥ एकदिन रेडा श्रीगुसाईजीकुं पंखा करते हते ॥ तब श्रीगुसाईजी जागे और रेडाकुं आज्ञा करी तुम देशमें जायके विवाह करौ ॥ तब रेडानें कही मेरे पास द्रव्य नहींहि ॥ कौन कन्या देवेगो ॥ तब श्रीगुसाईजीनें आज्ञा करी श्रीठाकुरजीनें सब सिद्ध कर राख्योहै ॥

वाईसमय रेडा आज्ञा लैके चल्यो सो देशमें आयो ॥
 कपडवनपास एक संजाई गाम है ॥ वां गाममें रेडा सु-
 काम कियो ॥ सो वा संजाईमें एक उदंबर ब्राह्मण रहेतो
 हतो ॥ द्रव्यपात्र हतो वाकी एक वारैवर्षकी बेटी हती ॥
 सो वा बेटीकुं सर्पनें काटी हती सो वे मरवे लगी ॥ तव
 वा ब्राह्मणनें गामके बाहेर खबर काढी कोई आछी कर
 जीवायदेवे तो आछो ॥ तव रेडानें वा ब्राह्मणकुं कही
 मेरे पास एक उपाय है तव वा ब्राह्मणनें कही सो उपाय
 करो ॥ तव रेडानें चरणासृत दियो और कही तुम याके
 मोढामें डारो तो बचजायगी सो वाके मोढामें तो कछ्छ
 जातो नहीं हतो वाके होठनपर चोपडयो ॥ तव वा छो-
 करीको विष उतरगयो ॥ तव वा छोकरीकी मानें बाधा
 लीनी हती जो ये छोकरी जीवगी तो कोई निष्कंचनकुं
 देउंगी ॥ तव वा ब्राह्मणनें छोकरी जीवती देखके रेडाकुं
 पूछी तुम कोण जातहो ॥ तव रेडानें आपणी जात बता-
 ई ॥ तव वह कन्या रेडाकुं दीनी सो रेडा परण्यो और
 श्रीठाकुरजीकी सेवा करन लग्यो ॥ वा रेडाकुं भगवत्से-
 वा करते देखके सब लोग बहुत राजी होवें ॥ तव रेडाको
 एक पुत्र भयो ॥ फेर कोई दिन वा देशमें श्रीगोकुलना-
 थजी पधारे ॥ तव रेडानें आपनी जातकुं और यजमान
 नीमावनीयनकुं श्रीगोकुल नाथजी के सेवक कराये सो
 अब सुधी श्रीगोकुलनाथजीके सेवक होवें हैं ॥ फेर वह रे-
 डाको बेटा बढो भयो ॥ तव रेडा श्रीठाकुरजी पधरायके
 श्रीगोकुल जाय रहै और श्रीगुसाईंजीकी सेवा करन लगें

(३२६) दोसौबावन वैष्णवकी वार्ता.

॥ फेर वा रेडाकुं रास लीलाके दर्शन होंवें ॥ कोई दिन बाललीलाके दर्शन होंवें ॥ ऐसे अनेक प्रकारके दर्शन श्रीठकुरजी रमणरेतीमें रेडाकुं देते हते सो रेडा श्रीगुसांईजीके ऐसे कृपापात्र हते ॥ वार्तासंपूर्ण ॥ वैष्णव ॥ १९३ ॥

॥ श्रीगुसांईजीके सेवक पर्वतसेन हते तिनकी वार्ता ॥ सो वे पर्वतदासके मनमें ऐसो हतो जो श्रीगुसांईजी श्रीनाथजीके साक्षात् स्वरूप हैं ॥ परंतु ऐसे दर्शन होवे तो बहुत आछो ॥ एक दिन वैठकमें श्रीगुसांईजी बीराजते हते और पर्वत सेनकु आज्ञा करी जो चंदन लगावो तब वा पर्वतसेननें श्रीगुसांईजीकुं चंदन समर्प्यो तब श्रीगुसांईजीके रोमरोममें पर्वतसेनकुं श्रीनाथजीके दर्शन भये ॥ तब पर्वतसेननें विचार क्यो ओकुं स्वप्नहैं केकहाहै ॥ तब श्रीगुसांईजीनें आज्ञा करी जो पर्वतसेनजी तुमकुं कहा संदेहहै ॥ तब पर्वतसेननें कही जो आपकी कृपाते सब संदेह मिटथौ ॥ तब वा पर्वतसेनके मनके संदेह दूर भये ॥ और लीलाको अनुभव भयो ॥ और नवे पद करके गायवे लगे ॥ सो ऐसे करके नवे पद गाये ॥ सो वे पर्वतसेन श्रीगुसांईजीके ऐसे कृपापात्र हते ॥ वार्ता संपूर्ण ॥ वैष्णव ॥ १९४ ॥ * ॥ ॥ ॥

श्रीगुसांईजीके सेवक सासु बहु तिनकी वार्ता ॥ सासुको नाम जमनाबाई और बड्डको नाम रेवाबाई हतो सो बड्ड भोरी बहुत हती ॥ एक समय जमनाबाईको वेटा गाम जायवे लग्यो ॥ और मासुं कही जो दोचार दिनमें श्रीगुसांईजी पधारंगे ॥ याकुं नाम निवेदन कर-

वाईयो ॥ ऐसे कहेके वाको बेटा परदेश गयो ॥ तब श्रीगुसाईंजी पधारे ॥ तब वे जमनावाई वड्डकु लेके श्रीगुसाईंजीके दर्शनकुं गई और श्रीगुसाईंजीकुं वीनती करी ॥ याकुं नाम सुनावो ॥ और वड्डसुं कही जो श्रीगुसाईंजी कहें सो कहियो ॥ तब श्रीगुसाईंजीन आज्ञा करी वड्ड बैठ तोकुं नाम सुनावें ॥ तब वड्ड बोली वड्ड बैठ तोकुं नाम सुनावें ॥ ये सुनके श्रीगुसाईंजी हंसे और जान्यो जो ये वड्डत भोरी है ॥ तब श्रीगुसाईंजी उठके वाके पास आयके तीनों वेर अष्टाक्षरमंत्र कह्यो ॥ और वड्डनें अष्टाक्षरमंत्र कह्यो वड्डकुं अत्यंत भोरी जानके वाईसमय श्रीगुसाईंजीने आज्ञा करी याकुं न्हावाय लावो ॥ तब न्हावाय लाये तब श्रीगुसाईंजीने श्रीठाकुरजीकुं शृंगार करके निवेदन कराये ॥ और वाकी सासुकुं कही अब श्रीठाकुरजीकी सेवा याके पास कराईयो ॥ तब सासुनें कही ये तो वड्डत वावरी है ॥ कहा सेवामें समझेगी ॥ तब श्रीगुसाईंजीने आज्ञा करी जो श्रीठाकुरजी आप सिखाय लेवेंगे फेर दूसरे दिन वा जमनावाईकुं अटकाव आयो ॥ तब वड्डकुं कही तुम सेवा करियो ॥ और मैं नदीपर जाउंहुं सो वड्ड सेवामें न्हाई और मंदिरमें गई ॥ सो कछु सेवामें समझे नहीं ॥ तब श्रीठाकुरजीकुं जगाये ॥ तब श्रीठाकुरजी कृपाकरके सब रीत सेवाकी सिखावन ल्यो ॥ सो झारी उठावनी और माझनी रसोई करनी भोगधरनो शृंगारकरनो और प्रसादी अणप्रसादी अणप्रसादीको विचार श्रीठाकुरजीने वा वड्डकुं सब सिखायो ॥

(३२८) दोसौवावन वैष्णवकी वार्ता.

तब वा बहूनें श्रीठाकुरजीसुं कही जो कसरपडेगी तो मेरी सासु खीजेगी ॥ तब में रिसायके पीहर जाउंगी ॥ तब श्रीठाकुरजीनें कही जो नहीं खीजेगी ॥ ऐसे चार दिनपर्यंत वा बहूनें सेवा करी ॥ फेर पांचमेंदिन सासु सेवामें न्हाई तब वा जमनाबाईकुं शृंगार करते नींदको झोको आयो ॥ तब श्रीठाकुरजीनें स्वप्नमें कही जो मीकुं शृंगार बहूके हाथको बहुत आछो लगेहे ॥ तब वा जमनाबाईनें बहूकुं बुलायके शृंगार करवे बैठाई ॥ और आप रसोईकी सेवा करनलगी ॥ तब वा बहूसो श्रीठाकुरजी हास्यविनोद करते और सब बातें जतावते ॥ सो वे सासु बहू श्रीगुसाईंजीकी ऐसी कृपापात्र हती ॥ वार्ता संपूर्ण ॥ वैष्णव ॥ १९५ ॥ ❀ ॥ ॥ ॥ ॥

श्रीगुसाईंजीके सेवक मानकुंवरबाईकी वार्ता ॥ सो वह शेठकी बेटी दशवरषकी विधवा भई ॥ तब थोडे-दिन पाछे श्रीगुसाईंजी गुजरात पधारे ॥ तब वा शेठकी बेटीकुं ब्रह्मसंबंध करायो ॥ और श्रीमदनमोहनजीकी सेवा पधरायदीनी ॥ सो वह शेठकी बेटी मानकुंवरबाई श्रीमदनमोहनजीकी सेवा करन लगी सो वा मानकुंवरनें श्रीमदनमोहनजीकी जन्मसूची सेवा करी ॥ और जन्मसूची श्रीमदनमोहनजी विना कोई स्वरूपके दर्शन किये नहीं ॥ और घरसों बाहेर सेवा छोडके गई नहीं ॥ और श्रीमदनमोहनजी जैसे सबके ठाकुरजी होंवेंगे ऐसे मनमें निश्चय करराख्यो हतो ॥ जब वे मानकुंवरबाई साठवर्षकी भई तब वाको पिता भगवच्चरणारविदमें प-

होंच गयो ॥ तव मनुष्य राखके सेवा करती ॥ फेर एक-दिन एक विरक्त वैष्णव वा गाममें आयो ॥ शीतकालके दिन हते ॥ सो वा मानकुंवरके घरमें उतऱ्यो ॥ तव वा मानकुंवरकुं श्रीठाकुरजीकी झांपी देके तलावपर न्हावे गयो ॥ तव मानकुंवरवाईनें श्रीठाकुरजी जगाये ॥ सो श्रीठाकुरजी वालकृष्णजी हते ॥ और वानें श्रीमदनमोहनजी विना और श्रीठाकुरजी देखे नहीं हते ॥ तव मानकुंवरवाई ऐसी समझी जो श्रीठाकुरजी ठंडकेलीयें ऐसे सकुचाय गयेहें ठंड बहुत पडेहें वा वैष्णवनें कछु यत्न राख्यो नहीं ॥ ऐसे विचार करके वाके नेत्रनमेंसुं जल आयगयो ॥ और बहुत मनमें तापभयो ॥ तव अंगीठी लेके और तेलमें अनेक प्रकारके गरम औषध डारके और तेलकुं जरायके तातो करके श्रीठाकुरजीके हाथ-पाव मीढवे लगी और मनमें समझी जो श्रीठाकुरजीकुं वहोत श्रम भयोहैं! आप कृपाकरके अपराध क्षमा करो ॥ ऐसी वाकी प्रार्थना और शुद्धभाव देखके श्रीठाकुरजी मदनमोहनजीको स्वरूप होयगये ॥ तव वा डोकरीनें राजभोग घऱ्यो फेर वा वैष्णवनें आयके दर्शन किये ॥ परंतु श्रीठाकुरजीनें गदल ओढे हते ॥ कछु वाकुं समजण नहीं परी ॥ ऐसे करते दशपंधरदिन वो रह्यो ॥ तव वा मानकुंवरवाईनें कही शीतकालके दिन इहां रहो ॥ श्रीठाकुरजीकुं ठंड वहोत लगेहे फेर थोडे दिन वो रह्यो फेर जब फागणमहिना आयो तव चलवेकी तैयारी करी ॥ श्रीठाकुरजी पंधरावेके समय वा मानकुंवरसुं वा वि-

(३३०) दोसौबावन वैष्णवकी वार्ता.

रक्तवैष्णवनें झगडो कियो ॥ कही तुमनें मेरे श्रीठाकुरजी पलटायलीये है ॥ जो मेरे श्रीठाकुरजी न देवेंगी तो तेरे साथे प्राण छोडुंगो ॥ जब बाईनें कही मैं तो तेरे श्रीठाकुरजी पलटाये नहींहैं तब बहुत झगडा भयो ॥ फेर दोनोजना श्रीगोकुल गये और श्रीगुसाईंजीकुं वीनती करी ॥ तब श्रीगुसाईंजीनें दोनोनकी बात सुनके तब झांपी श्रीगुसाईंजी लेके खोलके श्रीठाकुरजी देखे ॥ और श्रीठाकुरजीनें श्रीगुसाईंजीसों कही जो मैं ढोकरीके भावसुं मदनमोहन भयोहुं ॥ यानें कोईदिन और स्वरूपके दर्शन कीये नहींहैं ॥ जासुं वाको भाव शुद्धहै ॥ तब श्रीगुसाईंजीनें झगडो चुकाय दियो ॥ वा वैष्णवकुं आज्ञा करी येही श्रीठाकुरजीहै ॥ तब वा ढोकरीनें कही जो ऐसे श्रीठाकुरजीकुं ठंड मारे हैं ॥ ऐसेनकुं श्रीठाकुरजी पधराय देने नहीं चाहिये ॥ ये सुनके श्रीगुसाईंजी हंसै और विचार कियो जो ढोकरीको कैसे शुद्ध भावहै ॥ तब वो विरक्त वैष्णव ढोकरीके पावन पन्यो और कही जन्मसुधी तुमारे द्वार पन्यो रहंगो ॥ और तुमारी टेहेल करंगो ॥ तब श्रीयमुनाजी पान करके श्रीनाथजीके दर्शन करके फेर अपने देशमें आयके वह ढोकरी सेवा करन लगी ॥ सो वह भानकुंवरबाई श्रीगुसाईंजीकी ऐसी कृपापात्र हती ॥ वार्ता संपूर्ण ॥ वैष्णव ॥ १९६ ॥ * ॥ ॥ ॥

॥ श्रीगुसाईंजीके सेवक माधवदास बहनगरमें रहेते तिनकी वार्ता ॥ वे माधवदास बडे पंडित हते ॥ और अन्यमार्गीय हते ॥ और वैष्णवनकुं टीलवा कहेते ॥

एक समय श्रीगुसांईजी बहनगर पधारे ॥ तब पंडितनकी सभा करी ॥ सब पंडितनमें बडे माधवदास हते ॥ सो वे माधवदास सब पंडितनकुं लेके सभामें आये ॥ तब साकार निराकारको वाद भयो ॥ तब श्रीगुसांईजीनें साकार ब्रह्मको प्रतिपादन कियो ॥ और सभामें बहोत विवाद भयो ॥ माधवदासके मनमें जो हतो पुष्टिमार्ग वेदनिर्मुलकहै ॥ सो संदेह निकस गयो ॥ तब माधवदासजी वाही समय श्रीगुसांईजीके सेवक भये ॥ तब ओर पंडित कहे नल्लो जो सबमें मुख्यतो तुमहते ॥ अब काहेकुं वैष्णव भयेहो ॥ तब माधवदासजीनें कहीजो दुराग्रही होवे सो न समझे ॥ परंतु सारवेत्ता होवे तो तुर्त समझे ॥ यासुं सोकुं सर्वोपर पुष्टिमार्ग वेदमें मालम पच्योहै ॥ जासुं मैंनें दुराग्रह छोड दियोहै ॥ तब पंडित सुनके अपने रघर गये ॥ और वे माधवदासजी श्रीठाकुरजी पधरायके सेवा करन लगे ॥ और वैष्णवनको संग करन लगे ॥ वे माधवदासके ऊपर श्रीठाकुरजी वेग प्रसन्न भये ॥ सो माधवदास श्रीगुसांईजीके ऐसे कृपापात्र भये ॥ जिननें दुराग्रह छोडके सुंदर मार्ग पच्यो ॥ वार्ता संपूर्ण ॥ वैष्णव ॥ १९७ ॥

॥ श्रीगुसांईजीके सेवक एक कुनवी पटेलकी वार्ता ॥ सो गुजरातमेंसुं एकसाथ श्रीगोकुल जातो हतो ॥ वाके संग कुनवी वैष्णव चलयो ॥ मेहनत मजुरी करके रस्तामें वैष्णवनके इहां प्रसाद लेतो ॥ जब गोपालपुर आठ कोस रह्यो तब सब वैष्णवननें गांठडीमेंसुं भेट काढराखी ॥ तब वा पटेलकुं चिंता भई जो मैं कहा भेट करूं ॥

तब घासमें शंखावलीकी लता हती सो वानें देखी ॥ तब फूल लेके माला गूंथी ॥ और भीजे वस्त्रमें लपेटी ॥ और लेके सबहुं आगे चल्यो ॥ मनमें विचार कियो ये माला कुमलाय न जाय तो बहोत आछो ॥ शृंगारको समों श्रीनाथजीको भयो ॥ तब श्रीनाथजीनें श्रीगुसाईंजीहुं कही एक पटेल माला लेके आवे है ॥ सो वाके अंतःकरणमें ताप बहोत है ॥ वे माला आवेगी तब मैं राजभोग अरोगुंगो ॥ तब श्रीगुसाईंजीनें आपकी अस्वारीको घोडा एक अस्वार बैठायके पठायो सो घोडा एक घंटामें १२ कोस जातो हतो ॥ सो वे अस्वार जायके वा पटेलहुं लायो ॥ और माला श्रीनाथजीनें अंगिकार करी और वा पटेलनें राजभोगके दर्शन किये ॥ श्रीनाथजीकी ये लीला देखके सूरदासजीनें कीर्तन गायो ॥ सो पद ॥ श्याम गरीबनहींके गाहक ॥ दीनानाथहमारेठाकुरसाचीप्रीतनिवाहक ॥ १ ॥ कहाविदुरकीजातपातकुल प्रेमप्रीतकेलायक ॥ कहासुदामाकेधनद्वतो ॥ साचीप्रीतकेचाहक ॥ २ ॥ कहापांडवघरकीठकुराईअर्जुनरथकेवाहक ॥ सूरदाससठतातेहरिभज आरतदुःखकेदाहक ॥ ३ ॥ ये पद सूरदासजीनें गायो ॥ ये सुनके श्रीनाथजी और श्रीगुसाईंजी बहोत प्रसन्न भये ॥ और वा पटेलनें श्रीनाथजीहुं माला पेहेरी देखके अपनी हियो सिरायो और मननें जानी जो श्रीनाथजीनें मेरी करी माला अंगिकार करीहै ॥ सो वे पटेल श्रीगुसाईंजीको ऐसो कृपापात्र हतो ॥ जिनकी आरति श्रीनाथजी सही न सके ॥ वार्ता संपूर्ण

॥ वैष्णव ॥ १९८ ॥ ॐ ॥ ॥ ॥ ॥

श्रीगुसांईजीके सेवक लाडवाई तथा धारवाई-
की वार्ता ॥ सो वे लाडवाई और धारवाई दोनो वेहेन
हती ॥ मानिकपुर चित्रकूट पास दशकोस है सो उहां
लाडवाई और धारवाई श्रीगुसांईजीकी सेवक भई ॥ तव
वे लाडवाई और धारवाई श्रीठाकुरजी पधरायके सेवा
करन लगी ॥ तव लाडवाई जो कोई वैष्णव आवे तिनकी
टेहेल भलीभांतिसों करन लगी ॥ और ऐसैं करत करत
लाडवाई और धारवाई वृद्ध भई सो सब द्रव्य नव लक्ष
रुपैया एकट्टे करके श्रीगोकुल गई ॥ और श्रीगुसांईजीसुं
वीनती करी जो ये द्रव्य अंगिकार करो ॥ तव श्रीगुसां-
ईजीनें जान्यो ये द्रव्य आसुरी है और दुःख दायक है ॥
सो अंगिकार नकियो फेर दश पंदर वर्ष पीछे श्रीगोकुल-
नाथजी भूतलपर विराजत हते ॥ फेर लाडवाईनें श्रीगो-
कुलनाथजीकुं द्रव्य आसुरी जाणके अंगिकार न कियो ॥
तव श्रीगोकुलनाथजीके अधिकारीनें श्रीगोकुलनाथजीके
पूछे विना एक छातमें बिछायके ऊपर कांकर डरायके
चूनो लगाय दियो सो वा छातमें द्रव्य रह्यो आयो ॥ फेर
साठ वर्ष पीछे औरंगजेब बादशहकी जुलमीके समयमें
म्लेच्छलोक लुंटेवेकुं आये तव श्रीगोकुलमेसुं सब लोग
भागगये ॥ और मंदिर सब खाली होय गये कोई मनुष्य
गाममें रह्यो नहीं ॥ तव विन म्लेच्छननें वे छात खोदी ॥
सो नवलक्ष रुपैय्यानको द्रव्य निकस्यो ॥ तव गाममें
जितनें मंदिर हते सब मंदिरनकी छात खुदायहारी ॥ सो

आसुरी द्रव्यके संगतें सब गोकुलको छांत खुदाई सो वे
 लाडवाई धारवाई श्रीगुसांईजीके सेवक ऐसे हते ॥ जिन-
 की बुद्धि आसुरी द्रव्य आसुरी द्रव्यके प्रभावते फिरी नहीं
 और भगवद्धर्म छोडे नहीं और जितने द्रव्यमें अनर्थ हैं
 सो विनकुं बाधा न कर सके ॥ भगत्सेवा करती रही ॥
 भगवच्चरणारविदमें जिनके चित्त है विनकुं कोई बाधा
 नहीं कर सके ॥ वार्ता संपूर्ण ॥ वैष्णव ॥ १९९ ॥ ❀

श्रीगुसांईजीकेसेवक दोय वैष्णव जिनने ईंट-
 पर अक्षर किये तिनकी वार्ता ॥ सो एक वैष्णव एक गाममें
 रहतो हतो ॥ और दूसरो दूसरे गाममें रहतो हतो ॥ एकको
 नाम बल्लभदास हतो और दूसरेको नाम बलदेवदास हतो
 सोवे दोनो रस्तामें एक बावडीऊपर एक दूसरेकुं आपसमें
 मिले भगवद्वार्ता करन लगे ॥ सो बलदेवदासनें पूछयो श्री-
 ठाकुरजी मोरपांखको सुकुट धरे हैं वाको कारण कहा ॥
 और जनावरकी पांख क्युं नहीं धरेहैं ॥ अनेक प्रकारके
 पांखीनकी बहुत सुंदर पांख हैं ॥ तब ये सुनके बल्लभदास
 बोले जो श्रीठाकुरजीको स्वरूप आनंदरूप है ॥ विषई
 जीवनकुं दुर्लभ है ॥ और विषय रहित जिनके स्नेह है ॥
 तिनके वशहैं जैसे मोर विषय रहितहै सो दृष्टिद्वारा रस-
 दान करेहैं ॥ सो श्रीठाकुरजी अपने दासकुं ऐसी सूचना
 करेहैं जैसे मोर विषय रहितहै ॥ और दृष्टिद्वारा रसदान
 करेहैं सोकोनसी रीतसों ॥ जब मोर नृत्य करेहैं तब अ-
 पनें शरीरकुं देखेहैं ॥ सब शरीरकुं देखके बडो प्रसन्न
 होवेहै ॥ जब आपनें पांव देखेहै तब कारेकारे दीसेहै तब

मोर श्यामतारूपी अपनो दोष देखके रुदन करेहैं ॥ मे-
रेमें इतनो दोष न होतो तो आछो ॥ तब मोरके नेत्रन-
मेंसुं जल पड़ेहे ॥ तब मोरकी स्त्री मुखमें लेहे तब वाकुं
आनंद होवेहैं ॥ और कामनिवृत्त होवेहैं दृष्टिद्वारा वाके
सब मनोरथ पूर्ण होय जायहे ॥ और गर्भस्थिती होवेहैं ॥
ऐसे जो वे मोर श्रीठाकुरजीकुं बहुत प्रिय है और जैसे
मोर दृष्टिद्वारा कामनिवृत्त करेहैं ऐसे श्रीठाकुरजी सब
जीवनको दृष्टिद्वारा कामनिवृत्त करेहैं निर्विषयी जो
जीवहै सो हमकुं बहुत प्रियहैं ॥ मोर पंख श्रीमस्तकपर
धरेहैं ॥ तब बलदेवदासनं पृथ्वी ॥ काछनी काहेकुं धरेहैं ॥
तब बलभदासनं कही जो काछनीको घेर होवे सो घेर
बहुत एकट्टोकरे सो घेर होवे सो ऐसे अनेक भक्तनकुं एकट्टे
करके एककालावच्छिन्न सबके मनोरथ पूर्ण दृष्टिद्वारा करे
जैसे मोर एकस्त्रीको मनोरथ पूर्ण करे ऐसेही सब ब्रजभ-
क्तनके मनोरथ पूर्ण होवेहैं ॥ ये सूचना करवेके लीये श्रीठा-
कुरजी मुकुट काछनीको शृंगार धरेहैं ॥ ये सुनके बलदेवदा-
स बहुत प्रसन्न भये तब एक ईटपर लिखगये ॥ हम दौघडी
जीवे फेर वो ईट उहां भीतमें लगी हती सो एकराजा फिरतो
आयो सो वाने ईटपर ऐसे अक्षर देखे तब राजाकुं संदेह
भयो ॥ तब राजाने विचार कियो जो लिखवेवालो ऐसे
लिखेहैं ॥ हम दौघडी जीवे ॥ सो ये जन्म्यो कब होवे-
गो और पढ्यो कब होवेगो और इहां वावडीपर आयो
कब होवेगो ॥ और लिख्यो कब होवेगो ॥ दौघडीमें या-
ने इतने काम कैसे करे होयंगे ॥ सो राजाकुं बहुत संदे-

ह भयों ॥ सो राजा वे ईंट अपने घर लगये ॥ जो आवे ताकुं ऐसे पूछे ॥ जो ये लिखवेवालो मनुष्य दोघडी जीवतो रह्यो ॥ दोघडीमें यानें इतनें कारज कैसे करे होएंगे ॥ राजाकुं बढो संदेह भयो तब राजा ये बातमें लगरह्यो ॥ जो आवे जाकुं पूछे इतनेमें भगवदिच्छातें एक वैष्णव आयो ॥ वाकु राजानें पूछी तब वा वैष्णवनें कही जो दो वैष्णव रस्तामें मिले होएंगे ॥ और आपसमें भगवद्वार्ता करी होयगी ॥ तब विन वैष्णवनें चलवेके समय लिख्यो होयगो ॥ तब राजाको संदेह मिटघो सो वे राजाहुं वैष्णवके संगतें वैष्णव भयो सो वे दोनों वैष्णव श्रीगुसांईजीके ऐसे कृपापात्र हते ॥ तिनके अक्षरनसुं राजा वैष्णव भयो ॥ वार्ता संपूर्ण ॥ वै० ॥ २०० ॥ ❀

श्रीगुसांईजीके सेवक एक राजाकी वार्ता ॥

सो वे राजाके गाममें दो ब्राह्मण रहेते हते ॥ एक ब्राह्मण वैष्णव हतो और एक शैव हतो ॥ वे दोनों पंडित हते और शैव ब्राह्मण राजाके पास बहुत आवते जावते हते ॥ राजानें विनकुं कही हमारे पुत्र होयसो उपाय करौ ॥ सो वानें बहुत उपाय किये परंतु वीसवर्षसुधी पुत्र नहीं भयो ॥ फेर एकदिन वा राजानें वैष्णवब्राह्मणसुं कही जो भेर बेटा होवे तो ठीक ॥ तब वा वैष्णव पंडितनें कही बेटा एकके चार होजायमें परंतु वैष्णव होवेगेतो तब वा राजानें कही मेंहुं वैष्णव होजाउंगो ॥ फेर एक वर्षके भीतर वा राजाकी चार राणीनके चार बेटा भये ॥ तब राजानें वा वैष्णव ब्राह्मणसुं कही हमकुं वैष्णव करौ ॥ तब

वा ब्राह्मणनें कही वैष्णवतो श्रीगुसांईजी करेहें ॥ जव श्रीगोकुलमें चलो तव वे राजा और दोनो पंडित श्रीगोकुल गये ॥ जायके श्रीगुसांईजीके दर्शन किये ॥ तो साक्षात् पूर्णपुरुषोत्तमके भये ॥ तव वह राजा श्रीगुसांईजीको सेवक भयो ॥ और शैव पंडितहुं श्रीगुसांईजीको सेवक भयो ॥ और श्रीगोकुलमें रहेके पुष्टिमार्गकी रीती शीख्यो और श्रीठाकुरजी पधरायके सेवा करन लग्यो ॥ और जैसी बेटानमें आसकी हती वैसी श्रीठाकुरजीमें आसकी भई ॥ और सकामबुद्धी हती सो सब मिटके निष्कामबुद्धी होयगई ॥ अंतःकरणसुं सब कामना त्याग दीनी और भगवत्सेवा पधरायके अपने देशमें आयो ॥ और घरमें भगवत्सेवा करनलग्यो ॥ थोडेदिन पीछे श्रीगुसांईजीकुं अपने देशमें पधराये ॥ और सब कुंटुबकुं वैष्णव किये और गामके लोगनकुं वैष्णव कराये सो वह राजा ब्राह्मणके संगतें ऐसो वैष्णव भयो ॥ वा० सं०॥ वै० २०१

श्रीगुसांईजीके सेवक मदनगोपालदास कायस्थ हते तिनकी वार्ता ॥ सो वे मदनगोपालदास महावनमें रहेतें हते और नित्य सवारे आयके श्रीगुसांईजीके दर्शन करते ॥ और फेर जायके घरमें श्रीठाकुरजीकी सेवा करते ॥ और श्रीठाकुरजी मदनगोपालदाससों हसते बोलते वार्ते करते जो चाहिये सो मागलेते ॥ और एकदिन मदनगोपालदासके बेटाकुं बहोत ज्वर आयो ॥ तव मदनगोपालदासकी स्त्रीनें छानो छानो एकयोगीके पाससुं दोगा करायके और बेटाकुं बांध्यो ॥ तव मदन-

गोपालदासके श्रीठाकुरजीनें श्रीगुसाईंजीसों कही जो मदनगोपालदासकुं अन्याश्रय भयोहै ॥ अब मैं यासुं बोलूंगो नहीं तब श्रीगुसाईंजीनें श्रीठाकुरजीसुं वीनती करी जो याकुं थोडिदिन दंड देणो ॥ परंतु एकाएक त्याग क्यो नहीं चाहिये ॥ तब श्रीठाकुरजी चुप कररहे ॥ फेर मदनगोपालदासनें उत्थापन किये ॥ देखेतो श्रीठाकुरजी उदास विराजेहैं ॥ तब मदनगोपालदासनें भोगधरो ॥ तब श्रीठाकुरजीनें लातसुं थाल फेंकदियो तब मदनगोपालदास रोवेलगे और प्रणती करवे लगे तोडूं श्रीठाकुरजी माने नहीं ॥ तब मदनगोपालदास श्रीगुसाईंजीके पास आये और नेत्रनमेंसुं जल चलवे लगगयो ॥ और गदगद कंठ होयगये और धूजवे लगे ॥ और श्रीगुसाईंजीसुं वीनती करी तब श्रीगुसाईंजीनें आज्ञा करी तेरी स्त्रीनें अन्याश्रय क्यो है जासुं श्रीठाकुरजी अप्रसन्नहै ॥ ये बात सुनके मदनगोपालदास घरमें आये और स्त्रीकुं वाई क्षणमें जुदे घरमें राखी ॥ और श्रीठाकुरजीकी सब टेहेल हाथसुं करन लगे ॥ तब श्रीगुसाईंजीके श्रीमुखतें वचनासुत सुने जो अन्याश्रय वहाँत बाधकहै विवेक धैर्य आश्रयग्रंथमें लिख्योहै ॥ श्लोक ॥ अन्यस्यमजनंतत्रसु-
 तोगमनमेवच ॥ प्रार्थनाकार्यमात्रेपिततोऽन्यत्रविवर्जये-
 त् ॥ याको अर्थ ॥ अन्य देवको भजन अन्यदेवके स्था-
 नपर स्वतः गमन उद्देश करके जानो ॥ और कार्यमात्रमें
 अन्यदेवकी प्रार्थना करणी ॥ ये तीनोबातें वजित हैं ॥
 अन्यसंबंधकीहुं गंध नहीं चाहिये ॥ सो वाक्य ॥ अन्यसं-

बंध गंधोपिकंदरामेववाध्यते ॥ यारीतीसुग्रंथनमें अनेक वचनहै ॥ सो ये सुनके मदनगोपालदासनें दूसरो विवाह कन्यो ॥ वा स्त्रीकुं त्याग दियो तब श्रीठाकुरजी प्रसन्न होयके बोलन लगे ॥ सो वे मदनगोपालदास श्रीगुसांईजीके ऐसे कृपापात्र हते जिननें अन्याश्रय के लीये स्त्रीको त्याग किये ॥ वार्ता संपूर्ण ॥ वैष्णव ॥ २०२ ॥ ❀ ॥ ॥

॥ श्रीगुसांईजीके सेवक क्षत्रीवैष्णव गुजरातके वासी तिनकी वार्ता ॥ सो वे क्षत्री वैष्णव चाचाजीके संग गुजरात जाते हते ॥ सो वे क्षत्री वैष्णव जब भगवद्दार्ता करते तब भगवद्रसमें मग्न होय जाते ॥ और विनकी रहस्य वार्ता श्रीगोवर्धननाथजी सुनते ॥ सो वे क्षत्री वैष्णव रस्ता भूलगये और चाचाजीसुं न्यारे पढगये ॥ सो एक गाममें गये सो वा गाममें एक वैष्णव रहतो हतो सो वे क्षत्री वैष्णवकुं अपने घरमें लेगयो और उहां भगवद्दार्ता करन बैठे ॥ सो वे रसावेश होयगये कछु देहानुसंधान रह्यो नहीं ॥ और श्रीगोवर्धननाथजी ठाढे ठाढे विनकी वार्ता सुन्यो करते ॥ तब चाचाविनकुं दूढ़वे गये सो जायके चाचाजी विनकुं मिले तब भगवद्रसमें लक रहे हते ॥ और आखी रात बीतगई हती और श्रीगोवर्धननाथजीकुं उजागरा भयो तोडूं बाकुं कछु देहानुसंधान न रह्यो ॥ भगवद्दार्ता मुखसुं कन्ये जाते ॥ चाचाजी विनके पास जायके ठाढे रहे तोडूं खबर नही रही ॥ तब चाचाजीनें विनकुं हाथ पकडके उठाये तब देहानुसंधान भयो ॥ तब चाचाजीनें कही तुमको

भगवद्रसमें मग्न होय रहेहो और श्रीगोवर्धननाथजी आ-
खी रात ठाढे रहेहैं ॥ श्रीप्रभूनको श्रम होवेहैं ॥ जासुं
संभारके करो ये कहेके चाचाजी विनकुं लेगये सो वे क्ष-
त्री वैष्णव ऐसे कृपापात्र हते जिनके मुखकी वाणी सुन-
वेकुं श्रीगोवर्धननाथजी आप पधारते ॥ जासुं विनके
भाग्यकी कहा बढाई करणी॥वार्ता संपूर्ण॥वैष्णव२०३॥
श्रीगुसांईजीके सेवक कृष्णदासस्वामी मथु-
रामें रहेते तिनकी वार्ता ॥ सो वे कृष्णदासस्वामी श्री-
गोकुल आये तब श्रीगुसांईजीके दर्शन किये सो साक्षात्
पूर्णपुरुषोत्तमके भये ॥ तब कृष्णदास स्वामी श्रीगुसांई-
जीके सेवक भये ॥ तब एक महिना श्रीगोकुलमें रहे सब
मार्गकी रीती शीखे और श्रीगोकुलचंद्रमाजीको स्वरूप
पधरायके मथुराजीमें आयके भगवत्सेवा करन लगे ॥
फेर एकदिन श्रीगुसांईजी मथुरा पधारे तब कृष्णदासस्वा-
मीके घरमें उतरे तब कृष्णदासस्वामीने श्रीगुसांईजीसुं
पूछी जो श्रीगोलचंद्रमाजीको दक्षिणचरणारविंद टेढो क्युं
है ॥ तब श्रीगुसांईजीने आज्ञा करी जो श्रीठाकुरजीके
बामचरणारविंदमें पुष्टिरस है ॥ और दक्षिणचरणारविं-
दमें मर्यादा है ॥ तब श्रीठाकुरजी मर्यादाकुं उल्लंघके
और पुष्टिकुं आश्रय करे हैं ॥ और बामचरणारविंदसुं
पुष्टिरसकुं स्थापन कियोहै ॥ तब कृष्णदासस्वामीने पूछी
जो कटी और ग्रीवा काहेकुं नमेहे ॥ तब श्रीगुसांईजीने
आज्ञा करी जो रस भन्योपात्र खालीपात्रमें रस ढारेतो
भन्योपात्र नमे तब कृष्णदासस्वामीने पूछी जो दक्षिण-

परावृत्त दृष्टि क्युं है ॥ तव श्रीगुसाईजीनें आज्ञा करी जो सन्मुख दृष्टी होवे तो स्थावर जंगम जीवनकुं मोह करे ॥ और नीचे दृष्टि होवे तो पातालके जीवनकुं मोह करे ॥ और वामपरावृत्त दृष्टी होवेतो देवांगनाकुं मोह करे ॥ और उंची दृष्टी होवे तो स्वर्गवासीनकुं मोह करे ॥ और दक्षिण परावृत्त दृष्टी होवे तो स्त्री पुरुषनकुं मोह करे ॥ ये सुनके कृष्णदासस्वामी बहुत प्रसन्न भये ॥ और श्रीगोकुलचंद्रमाजीकी सेवा भलीभांतीसुं करन लगे और जो वैष्णव मथुराजीमें आवे जिनकुं आदर सत्कार बहुत करते ॥ और भगवद्रसमें लके रहते ॥ संसारकी कछु अपेक्षा राखते नहीं ॥ एकदिन चाचा हरिवंशजी कृष्णस्वामीकुं मिले ॥ तब कृष्णस्वामीनें पूछी जो मुरलीके सप्तरंघनको स्वरूप कहो ॥ तब चाचाहरिवंशजीनें कही जो छे धर्म ऐश्वर्य वीर्य यश श्री ज्ञान और वैराग्य और सातमें धर्मी सात प्रकारको भगवत्स्वरूप पुरुषाकार मुधा वेणुतें प्रकट होवेहें ॥ याहीतें सप्तरंघे ॥ श्रीठाकुरजीको स्वरूप श्रीमहाप्रभुजी और वेणुस्थानापन्न श्रीगुसाईजी और सप्तरंघरूपी सात बालकनको प्राकट्य जाणनों पद्मनाभदासजीनें गायो है ॥ सो पद ॥ मधुरत्रजदेशवस मधुरकीनो ॥ मधुरवल्लभनाममधुरगोकुलगाममधुरविठ्ठलभजनदानदीनो ॥ १ ॥ मधुरगिरिघरनआदिसप्ततनुवेणुनादसप्तरंघनमधुररूपलीनो ॥ १ मधुरफलफलितअतिललितपद्मनाभप्रभुमधुरगावतसरसरंगमीनो ॥ २ ॥ यारीतीसुं वेणुको स्वरूप चाचाजीनें कह्यो

(३४२) दोसौवावन वैष्णवकी वार्ता.

सो छुनके कृष्णस्वामी बहोत प्रसन्न भये ॥ और श्रीगो-
कुलचंद्रमाजीमें बहुत आसक्तिवान भये ॥ दिनदिन प्रीती
जिनकी बढवे लगी ॥ सो कृष्णस्वामी श्रीगुसांईजीके ऐसे
कृपापात्र हते ॥ वार्ता संपूर्ण ॥ वैष्णव ॥ २०४ ॥ ❀ ॥
श्रीगुसांईजीके सेवक वैष्णव ईश्वरदासकी
वार्ता ॥ सो भगवन्नाम खूब लेते अष्टप्रहर भगवत्सेवा
करते ॥ सो एक दिन रस्तामें जाते अजानमें सर्पके साथे
पाव आयो ॥ सो सर्प मरगयो तब सर्पकी सर्पिणीने वा
वैष्णवके पाछे लगी याके प्राण लेउगी तब छोडूंगी ॥ सो
वे वैष्णव अष्टप्रहर भगवन्नाम लेतो ॥ तब ज्यांसूधी वे
वैष्णवजीव्यो कोई दिन भगवन्नाम छोडयो नहीं सो वे
सर्पिणी जन्मसूधी वाके पीछे फिऱ्या करी परंतु कोईदिन
भगवन्नाम बिना वाकुं देख्यो नहीं ॥ सो वे वैष्णव ऐसो
कृपापात्र हतो ॥ जाने जन्मपर्यंत भगवन्नाम छोडयो नहीं
जन्मसूधी सर्पिणीके दावमें आयो नहीं ॥ सो वे सर्पिणी
सृत्तुपाय गई परंतु वा वैष्णवकुं स्पर्श न कऱ्यो ॥ श्रीगु-
सांईजीकी कृपाते सो वे वैष्णव ऐसो कृपापात्र हतो ॥ वा-
र्ता संपूर्ण ॥ वैष्णव ॥ २०५ ॥ ❀ ॥ ॥ ॥
श्रीगुसांईजीके सेवक स्यामदास आजना कु-
नबीकी वार्ता ॥ सो वे स्यामदास गुजरातमें रहते ॥ तब
श्रीगुसांईजी द्वारका पधारे ॥ तब स्यामदास श्रीगुसांई-
जीके सेवक भये ॥ फेर स्यामदास बहुत दिन रहेके श्री-
गोकुलगये ॥ और श्रीनवनीतप्रीयाजीके दर्शन किये ॥ फेर
स्यामदास श्रीगुसांईजीके संग गोपालपूर गये ॥ तब स्या-

मदासजीको मन उहां बहुत लग्यो ॥ तब श्रीगुसाईंजीकुं वीनती करी जो मैं जन्मपर्यंत इहां रहूंगो ॥ सो कछु सेवा मोकुं बतावैं ॥ तब श्रीगुसाईंजीनें स्यामदासकुं श्रीनाथजीके फूलघरकी सेवा सोंपी ॥ तब स्यामदासनें श्रीगुसाईंजीकुं वीनती करी जो महाराज फूलनको स्वरूप कृपाकरके मोकुं समझावैं तो बहुत आछो ॥ तब श्रीगुसाईंजीनें आज्ञाकरी ब्रजभक्त जो गोपी जन तिनके चित्त हैं सो पुष्प होयके श्रीठाकुरजीके श्रीअंगकुं स्पर्श करेहैं ये मुनके स्यामदास बहुत प्रसन्न भये ॥ और फूलनकुं ब्रजभक्तनको चित्त जानके पाव न लगावते और धोएविना हाथ न लगावते और कुमलाय न जाय ऐसे प्रयत्नराखते ॥ फेर एकदिन स्यामदासनें श्रीगुसाईंजीसुं वीनती करी जो महाराज फूलनको ऐसो स्वरूप विनकुं सुईमें कैसे परीएजाय ॥ तब श्रीगुसाईंजीनें आज्ञाकरी जो सुई है सो सूचीहै ॥ ब्रजभक्तनके चित्तमें भगवत्संबंधकी सूचना करेहैं ॥ वा सूचनासुं ब्रजभक्तनके चित्त बहुत प्रसन्न होवैहैं ॥ ऐसैं जाणेहैं जो अब भगवत्संबंध हमकुं सूचन भयोहैं ॥ अब तूर्त अंगिकार करेंगे ॥ ये मुनके स्यामदासको सब संदेह गयो ॥ एक दिन स्यामदासजी देखे तो ब्रजभक्तनके यूथनके यूथ फूलघरमें देखे ॥ तब स्यामदासनें पूछीजी मैं तुमकुं पहेचाणुं नहीहुं ॥ तब ब्रजभक्तननें आज्ञा करी जे पुष्पनकी माला तू अंगिकार करावैहैं सो हमारो स्वरूपहै हम तेरेपर प्रसन्न होयके तोकुं दर्शन देवैहैं ॥ सो तू कछु मांग ॥ तब स्यामदासनें हाथ

जोडके वीनती करी जो मेरां चित्त कोईदिन ये सेवा छो-
डके और कहूं न जाय ॥ तब ब्रजभक्तननें अस्तु कही ॥
ऐसेहि होयगो ॥ फेर स्यामदासनें ये बात श्रीगुसांईजीकुं
वीनती करी ये सुनके श्रीगुसांईजीनें आज्ञा करी जो जि-
नको छेछो जन्म होवेंहें विनसुं श्रीठाकुरजी कछु अंतराय
नहीं राखेंहें ॥ और ऐसे जीवनके लीयें ये मार्ग प्रगट भ-
योहे ॥ ये सुनके स्यामदास बद्धत प्रसन्न भये ॥ सो वे
स्यामदास श्रीगुसांईजीके ऐसे कृपापात्र हते ॥ वार्ता संप-
पूर्ण ॥ वैष्णव ॥ २०६ ॥ ❀ ॥ ॥ ॥ ॥
श्रीगुसांईजीके सेवक वेणीदास छीपाकी वार्ता
सो वे वेणीदासजी गुजरातमें रहते हते ॥ जब श्रीगुसां-
ईजी गुजरात पधारे तब वेणीदासनें श्रीगुसांईजीके दर्शन
किये सो साक्षात् पूर्णपुरुषोत्तमके दर्शन भये तब वेणी-
दास श्रीगुसांईजीके सेवक भये ॥ और श्रीगुसांईजीकुं वी-
नती करके श्रीठाकुरजी पधराये ॥ तब वेणीदास सेवा
करन लगे ॥ थोडेदिन पाछें वेणीदासनें एक हजार रुपै-
याको परकाला लियो ॥ सो वेणीदास वांसकी लकड़ीमें
भरके श्रीगुसांईजीके पास श्रीगोकुलमें लेआये ॥ और
श्रीनवनीतप्रियाजीके दर्शन किये ॥ फेर वेणीदास श्रीगु-
सांईजी संग श्रीजीद्वार आये ॥ और परकाला श्रीनाथ-
जीकुं धराये ॥ तब वेणीदास छीपानें दर्शन किये और
तन्मय होयगये देहालुसंधान भूलगये ॥ तब उहां मंदिरमें
मूर्छा खायके पडरहे ॥ तब श्रीगुसांईजीनें वेणीदासकुं च-
रणस्पर्श कराये ॥ और चरणोदक दिये ॥ तब वेणीदास

चेत भये ॥ तब श्रीगुसाईंजीकुं वीनती करी जो महाराज
 ऐसे आनंदसुं बहार क्युं काढ लिये ॥ तब श्रीगुसाईंजीनें
 आज्ञा करी अबी तो तुमकुं कारज बहुत करनेहें ॥ फेर
 वेणीदास ब्रजयात्रा करके श्रीगुसाईंजीसों विदा होयके
 आये और श्रीगुसाईंजीकुं वीनती करी मेरे घरमें श्रीठा-
 कुरजी विराजेहें सो श्रीनाथजीके स्वरूपसों दर्शन देवें
 ऐसी कृपाकरो ॥ तब श्रीगुसाईंजीनें आज्ञा करी श्रीठाकु-
 रजी पुष्टिमार्गीयजो जीव है विनके सब मनोरथ पूर्ण क-
 रेहें ॥ सो तुमारे मनोरथ पूर्ण करंगे ॥ तब वेणीदास वि-
 दाहोयके गुजरातमें आये ॥ और घरमें श्रीठाकुरजीकी
 सेवा करन लगे ॥ तब वेणीदासके श्रीठाकुरजी वेणीदा-
 सके मनोरथप्रमाणे दर्शन देवे लगे ॥ जैसे मनोरथ क-
 रते तैसे दर्शन देते ॥ सो वेणीदास श्रीगुसाईंजीके ऐसे
 कृपापात्र हते ॥ वार्ता संपूर्ण ॥ वेष्णव ॥ २०७ ॥ ❀ ॥ ॥
श्रीगुसाईंजीके सेवक साचोरा ब्राह्मणकीवा०
 सो वे पुरुषोत्तमदास गुजरातमें रहेते ॥ फेर एक समय
 श्रीगोकुलगये ॥ तब श्रीगुसाईंजीके सेवक भये ॥ और
 श्रीगुसाईंजीकी कृपातें ग्रंथनको ज्ञान भयो ॥ फेर पुरुषो-
 त्तमदास ब्रजयात्रा करवेकुं गये ॥ और कदमखंडीमें रसो-
 ई करी ॥ सो दालवाटी करी तब भोगधरे श्रीनाथजी पधार-
 के अरोगे और पुरुषोत्तमदाससुं आज्ञा करी जो तुमकुं
 दालवाटी करते बहुत सुंदर आवेहें ॥ हमारी रसोईमें तुम
 नाहाओ ॥ तब पुरुषोत्तमदासनें वीनती करी जो महा-
 राज ये बात तो श्रीगुसाईंजीके हाथ है ॥ तब श्रीनाथ-

जीनें श्रीगुसांईजीकुं आज्ञा करी पुरुषोत्तमदास रसोईब-
 द्धत सुंदर कर जाने हैं ॥ तब श्रीगुसांईजी पुरुषोत्तमदासकुं
 श्रीनाथजीके भीतरियापनेकी सब सेवा सोंपी ॥ जब पु-
 रुषोत्तमदासजी रसोई करते तब श्रीनाथजी पुरुषोत्तम-
 दासकुं शिखावते ऐसे रोटी ऐसे वाटी करी सो वे पुरु-
 षोत्तमदास जन्मपर्यंत श्रीनाथजीकी सेवा छोडके कहुं
 गये नहीं ॥ और द्रव्यको संग्रह न कियो ॥ वे पुरुषोत्तमदास
 श्रीगुसांईजीके ऐसे कृपापात्र हते ॥ महाप्रसादकी पातर
 लायके वैष्णवनकुं प्रसाद लेवावते ॥ जिनकी श्रीगुसांईजी
 श्रीमुखसुं सराहना करते ॥ वार्तासंपूर्ण ॥ वैष्णव ॥ २०८ ॥
 श्रीगुसांईजीके सेवक लक्ष्मीदासजोशीकी ० ॥
 सो वे लक्ष्मीदास जोसी गुजरातमें रहेंते हते ॥ उहां श्री-
 गुसांईजी पधारे तब लक्ष्मीदासनें श्रीगुसांईजीके दर्शन
 किये सो साक्षात् पूर्णपुरुषोत्तमके दर्शन भये ॥ सो ल-
 क्ष्मीदासनें वीनती करी मोकुं शरण लेउ ॥ तब श्रीगुसां-
 ईजीनें कृपा करके नामनिवेदन करायो ॥ फेर एकदिन
 लक्ष्मीदासनें श्रीगुसांईजीसुं पूछी जो गुरुको सूतक लगे
 के न लगे ॥ तब श्रीगुसांईजीनें आज्ञा करी जो गुरुशि-
 ष्यको आपसमें सामान्यसूतक हे ॥ सो गुरु तो एक और
 शिष्यतो अनेक जो ऐसे सूतक पाळेतोगुरु जन्मसूधी भग-
 वत्सेवा न कर सके ॥ जासुं ऐसे सूतकको विचार करनो ॥
 शास्त्रके वचन तो अनेक रीतीके हैं परंतु विचारके मानने
 चाहिये ॥ जैसे छाल कोईको नहीं छीजाय हे ऐसे वचन
 निकसंगे परंतु क्षत्री तथा वैश्य तथा शूद्र और असच्छूद्र

इनके वासनकी और इनके जलकी छाछ आपणे कैसे लई जायगी और शास्त्रमें ऐसेहुं कह्यो है जितनी वस्तु ताकहीमें तुलाय जाय सो सब शुद्ध है परंतु ये वचन सत्य मान के अग्राह्यपदार्थ इन वचननके बलते ग्रहण नहीं होंवें ॥ ऐसे सूतकके वचनहुं अनेक प्रकारके ऋषीनके मतकेहैं सो विचारेविना कैसे लिये जाय ॥ ये मुनके लक्ष्मीदास बोले जो महाराज संन्यास ग्रहण करनो के नहीं ॥ तव श्रीगुसाईजीने आज्ञा करी जो श्रीमहाप्रभूजीने विरहदशामें त्याग कह्यो हैं जहांसूधी भगवद्विरह उत्पन्न न होवे वैसे संन्यास लेवे तो कलियुगमें पश्चात्ताप होंवै जासूं अत्यंत विरह उत्पन्न भये विना ग्रहस्तपणो त्याग नहीं करनो ॥ तव लक्ष्मीदासने वीनती करी ॥ जो मेरो चित्त कहुं लगे नहीं है ॥ तव श्रीगुसाईजीने आज्ञा करी भगवत्सेवा करो ॥ तव लक्ष्मीदास श्रीगुसाईजीके संग श्रीगोकुल गये और श्रीनवनीतप्रियाजीके दर्शन किये ॥ और श्रीनाथजीके दर्शन किये ॥ तव भगवत्सेवामें मन बहुत लग्यो ॥ फेर श्रीगुसाईजीसों मार्गकी रीती सीखके ओर भगवत्सेवा पधरायके गुजरातमें आये ॥ घर आयके श्रीठाकुरजीकी सेवा करन लगे ॥ और वैष्णवनकी सत्संग करन लगे ॥ सो वा लक्ष्मीदासजोसीने या रीतीसुं कालव्यतीत कियो ॥ वार्तासंपूर्ण ॥ वै० ॥ २०९ ॥ श्रीगुसाईजीके सेवक महीधरजी और फूलबाई तिनकी वार्ता ॥ सो वे महीधरजी क्षत्री अलीयाणा गाममें रहेते और फूलबाई विनकी बेहेन हती ॥ और नरहर

जोसीके यजमान हतें ॥ और नरहरजोसीके सत्संगतें वैष्णव भये हते ॥ सो एक दिन अलीयाणामें आग लागी हती ॥ सो नरहरजोसीनें खेराळु गाममें बैठवैठे बुझाई हती सो ये बात जगन्नाथजोसीकी वार्तामें लिखीहै ॥ फेर महीधर जब सरकारके कामदार भये और श्रीगुसांईजीकुं पधरायलाये ॥ और श्रीगुसांईजी विनके घर बद्धत दिन बिराजे ॥ जब श्रीगुसांईजी भाईलाकोठारीके इहां पधारते ॥ तब महीधरजीके उहां पधारते ॥ सो महीधरजीको चित्त श्रीगुसांईजी विना कहुं लगतो नहीं ॥ अबसुधी श्रीगुसांईजीकी बैठक अलियाणामें प्रसिद्ध है ॥ जिनके घरमें अबसुधी श्रीगुसांईजी दर्शन देवेंहैं ॥ और महीधरजीकुं श्रीगुसांईजीके दर्शन जा दिन न होते ॥ वाई दिन विनके पेटमें पीडा होजाती ॥ जाछु महीधरजीकुं श्रीगुसांईजी एकांतमें प्रकट होयके नित्य दर्शन देते ॥ वे महीधरजी ऐसे कृपापात्र हते ॥ वार्ता संपूर्ण ॥ वैष्णव ॥ २१० ॥ * ॥ ॥ ॥ ॥ ॥

श्रीगुसांईजीके सेवक एक वैष्णव भूधरदास ० सो वे वैष्णव वाराडीमें रहेते हते ॥ श्रीगुसांईजी द्वारका पधारे तब भूधरदास श्रीगुसांईजीके सेवक भये ॥ और श्रीगुसांईजीके संग द्वारका गये ॥ और श्रीरणछोडजीके दर्शन किये ॥ कितनेक दिन रहके श्रीगुसांईजी पीछे पधारे भूधरदासहुं संग चले ॥ रस्तामें एक मुकाम भयो ॥ उहां भूधरदासके मनमें ऐसी आई श्रीगुसांईजी कछु माहात्म्य दिखावे तो ठीक ॥ इतनेमें एक बादल चढयो और सब

घटाछाय गई ॥ रसोई आधी भई हती ॥ तव श्रीगुसांई-
 जीनें आज्ञा करी जो तुम इहां मत वरसियो ॥ हमारो
 डेरो छोडके वरसो तव मेह वरसन लग्यो श्रीगुसांईजीके
 डेरासुं सो सो हाथ दूरसों ऐसो वरस्यो सो वारे वारे म-
 हिनाके जल तलावनमें भर गये और नदी सब पूर आ-
 य गई ॥ और श्रीगुसांईजीके डेरापें एक बूंद न परी ॥
 और चारो आढी सब ठिकाणें जल फैल गये ॥ सो मा-
 हात्म्य सृधरदासनें देख्यो ॥ तव वा दिनसुं ऐसो नेम
 लियो जन्मपर्यंत श्रीगुसांईजीकी टेहेल करुंगो ॥ फेर श्री-
 गुसांईजी श्रीगोकुल पधारे ॥ सो सृधरदासकुं श्रीनाथ-
 जीकी सेवामें राखे सो थोडे दिन पीछे श्रीनाथजी सृध-
 रदाससुं बोलन लगे ॥ सो वे सृधरदास श्रीगुसांईजीके
 ऐसे कृपापात्र हते ॥ वार्ता संपूर्ण ॥ वैष्णव ॥ २११ ॥ ❀
 श्रीगुसांईजीके सेवक मगनभाई खंभातमें रह-
 ते तिनकी वार्ता ॥ सो वे मगनभाई बनिया वैष्णव हते ॥
 एक समय श्रीगुसांईजी खंभात पधारे हते ॥ तव माधव-
 दास दलालके घर उतरे ॥ और उहां बहुत वैष्णव आ-
 वते सो वैष्णवनकी भीड देखके मगनभाईनें माधवदा-
 ससुं पूछी जो श्रीगुसांईजीके सेवक भये सो कहा अधि-
 की है ॥ तव माधवदासजीनें कही ॥ इनके सेवक भये तें
 नयो जन्म होतहैं और याही देहसुं जन्म पलट जाय हें
 और श्रीठाकुरजीकी कृपा होवे है ॥ और या जीवकुं श्री-
 ठाकुरजी अपनो जाने है ये बात सुनके वे मगनभाई
 श्रीगुसांईजीके सेवक भये मगनभाईके पास द्रव्य बहुत

हतो ॥ नित्य श्रीगुसाईजीकेपास दर्शनकुं जाते ॥ सो वे मगन भाईनें लाख रुपैया श्रीगुसाईजीकुं भेट कर दियो ॥ तब थोडे दिन पीछे वा मगनभाईके मनमें ऐसी आई जो नयो जन्म ब्रह्मसंबंध करेतें होवेहें ॥ याकी परीक्षा करूं तो ठीक ॥ तब मगनभाई विचार करन लग्यो ॥ जो अमका ब्राह्मण भेरे पास पांच हजार रुपैया धरके तीरथ करन गयो है मैंनें वाके गये पीछे ब्रह्मसंबंध कियो है अबके आवेगो वाके रुपैया न कबूल करुंगो तब परीक्षा होय जायगी ॥ ऐसे मगनभाईनें विचार कियो तब वे ब्राह्मण आयो जब वानें मगनभाईसुं रुपैया मागे तब मगनभाईनें कही तुम झूठो बोलोहो ॥ मैंनें या जन्ममें तो तेरे पास लिये नहीं है ॥ तब वे ब्राह्मण राजमें पुकार्यो तब राजानें मगन भाईसों कही या ब्राह्मणके रुपैया देउ तब मगनभाईनें कही जो मैंनें या जन्ममें रुपैया लिये नहीं है ॥ तब राजानें पांचशेरी लोहकी मंगायके अग्नीमें ताती कराई और मगनभाईके हाथमें धराई ॥ तब मगनभाईनें श्रीगुसाईजीको ध्यान करके कही जो मैंनें या जन्ममें रुपैया लिये होंवे तो भेरे हाथ जर जावो ॥ तब मगनभाईके हाथ जर नहीं तब राजानें कही पटक देउ ॥ तब ब्राह्मणनें कही ये बरोबर ताती नहीं भई ॥ सो वा मगनभाईनें पटकी तब ब्राह्मणनें उठाई तब वा ब्राह्मणके दोनो हात जरगये ॥ तब राजानें हुकमकन्यो या ब्राह्मणकुं कैदमें लेजावो ॥ याको घर लूटलेउ ये ब्राह्मण बहोत झूठो है तब मगनभाईनें राजासुं कही ॥ या ब्राह्मणको कछु दोष

नहीं है ॥ ये साचो है याको घर मत लूटो मैंने परीक्षा करवेके लीये ये काम क्यो है ॥ तब राजाने कही काहेकी परीक्षा करी है ॥ तब मगनभाईने सब बात कही ॥ तब मुनके वा राजाकी सभा सब चकित होयगई ॥ और श्रीगुसाईंजीकुं पधरायके वे राजा और ब्राह्मण और दूसरे सभासद सब श्रीगुसाईंजीके सेवक भये ॥ और सब मगवत्सेवा करन लगे और वे मगनभाईद्वे श्रीठाकुरजी पधरायके मार्गकी रीती प्रमाणे सेवा करन लगे ॥ सो मगनभाईकुं श्रीगुसाईंजीके उपर ऐसी विश्वास हतो ॥ वार्ता संपूर्ण ॥ वैष्णव ॥ २१२ ॥ ❀ ॥ ॥ ॥

श्रीगुसाईंजीके सेवक एक ब्राह्मण जिनने मगनभाईके पास पांचहजार रुपैया घये तिनकी वार्ता ॥ सो वा ब्राह्मणको नाम गोवर्धनभट्ट हतो जब राजाकी कचेरीमें वाके हाथ जरगये और राजाने वा ब्राह्मणके उपर दंडको हुकम कीनो और वा मगनभाईने छुडायो तादिनते वा गोवर्धनभट्टने ऐसी प्रतिज्ञा लीनी जो मैं श्रीगुसाईंजीके शरण जाऊंगो जब अन्न लेऊंगो तहांसुंधी फलहार करुंगो ॥ ऐसी आग्रह वा गोवर्धनभट्टको देखके वा मगनभाईने और वा गामके राजाने श्रीगुसाईंजीके उपर पत्र लिखदियो तब वे गोवर्धनभट्ट पत्र लेके श्रीगोकुल आये ॥ और श्रीगुसाईंजीके दर्शन किये और मगनभाईकी सब बात श्रीगुसाईंजीसों कही ॥ ये मुनके श्रीगुसाईंजीने आज्ञा करी पुष्टिमार्गमें विश्वास फलीभूत होवेहे पुष्टिमार्गमें भगवान स्थित है जीवकी लौकिक-

गति नहीं करेंहें ॥ जीवकुं विश्वास चाहिये जिनके सब
कार्यसिद्ध होवेंहें ॥ श्रीमहाप्रभुजीने आज्ञा करीहै सो
॥ श्लोक ॥ भगवानपिपुष्टिस्थानकरिष्यतिलौकिकिचग-
तिम् ॥ और विवेकधैर्यआश्रयग्रंथमें श्रीमहाप्रभुजीने आ-
ज्ञा करीहै सो ॥ श्लोक ॥ अविश्वासिनकर्तव्यः सर्वथा
बाधकस्तुसः ॥ ब्रह्मास्त्रचातकौभाव्यौ प्राप्तसेवेतिनिर्मम
॥ १ ॥ जासुं सर्वथा पुष्टिमार्गमें विश्वास राख्यो चाहिये ॥
ये सुनके गोवर्धनभट्ट बहुत प्रसन्न भये ॥ और श्रीगुसां-
ईजीके सेवक भये ॥ और श्रीनवनीतप्रियाजीके दर्शन
किये ॥ और श्रीगोवर्धननाथजीके दर्शन किये और
ब्रजयात्रा किये बहुत दिन ब्रजमें रहे ॥ फेर श्रीगुसांईजी
गुजरात पधारे तब संग आये ॥ श्रीगुसांईजीकु खंभात-
पधरायलाये और राजाकुं सेवक करायो ॥ फेर एकदिन
गोवर्धनभट्टने श्रीगुसांईजीसां वीनती करी जो महाराज
मेरेपास पंचायतन पूजाहै सो आपकेपास लायोहूँ ॥ तब
श्रीगुसांईजीने आज्ञा करी जो विष्णुको आयतन नहींहै
साक्षात् भूतलपर बिराजेहे ॥ और चारदेवताको आय-
तनहै सो आयतनकी पूजाको काल नहींहै ॥ श्लोक ॥
कलौदशसहस्राणि विष्णुस्तिष्ठतिमेदिनी ॥ तदर्धजान्हवी
तोयंतदर्थसर्वदेवताः ॥ १ ॥ यातें देवता सब पृथ्वीकुं
त्याग करगयेहे ॥ बिनको नित्य पूजनको काल नहींहै
नैमित्त्य पूजनको काल है याही तें आवाहन विसर्जनहै
और विष्णु भूतलपर स्थितहै इनको साक्षात् पूजनको
कालहै जासुं भगवत्सेवा करो ॥ तब गोवर्धनभट्ट ये सुनके

बहुत प्रसन्न भये ॥ और श्रीगुसांईजीके पासतें श्रीठाकुरजी पधरायके भगवत्सेवा करन लगे ॥ और घरके सब मनुष्यनकुं नाम निवेदन करायो ॥ और मार्गकी रीती-प्रमाणें भगवत्सेवा करन लगे ॥ और थोड़ेदिन पीछे श्रीठाकुरजी अनुभव जतावन लगे ॥ सो वे गोवर्धनभट्टश्रीगुसांईजीके ऐसे कृपापात्र हते ॥ वार्ता संपूर्ण ॥ वै० ॥ २१३ ॥ श्रीगुसांईजीके सेवक मोरारी आचार्य स्वभा-तमें रहेते तिनकी वार्ता ॥ सो वे मोरारी आचार्य काशी यात्राकुं गामके पटेलके संग गये ॥ सो रस्तामें श्रीगोकुल गये ॥ सो मोरारी आचार्य छशास्त्र पढे हते ॥ सो श्रीगोकुलमें श्रीगुसांईजीके दर्शन किये ॥ तब मोरारी आचार्यने श्रीगुसांईजीसुं पूछयो ॥ जो जगत् सत्य है के असत्य है ॥ तब श्रीगुसांईजीने कही जो जगत् सत्यहै और संसार जो अहंता ममता सो असत्य है तब मोरारी आचार्यने कही जो जगत् सत्य होवे तो एकचलेजायहें ॥ फेर दूसरे उत्पन्न होवेहें आगले पदार्थ दीखे नहींहै ॥ तब श्रीगुसांईजीने आज्ञा करी जो प्रभुमें अनंतशक्तीहै सो आविर्भाव तिरोभाव शक्तीहै ॥ जासुं प्रगट होवे सो दीखे ॥ और तिरोहित होवे सो न दीखे ॥ परंतु जगत् जो असत्य होवे तो ब्राह्मणके जिमायवेको पुण्य क्युं होवे ॥ और सत्कर्म करके सद्गति क्युं होवे ॥ और पापकरके नरकमें क्युं जाय ॥ जगत् झूठी होवे तो कृती झूठी चहिये ॥ झूठे पदार्थनको फलहूं झूठो चहिये ऐसे श्रीगुसांईजीके वचन सुनके मोरारी आचार्य श्रीगुसांईजीके सेवक भये ॥ और

माला तिलक धरके अपने संगमें भये ॥ मोरारी आचार्यके संग एक पटेल हतो सो खंभातमें रहतो हतो और द्रव्यपात्र हतो और शैव हतो ॥ वाकु देखके गुस्सो आयो ॥ और मोरारी आचार्यसुं कही तुमनें ये कहा काम कन्यो है तब मोरारी आचार्यनें कही मैनें ठीक काम कन्यो है तब मोरारी आचार्य वा पटेलको संग छोडके श्रीगोकुल रहेगये ॥ और श्रीगुसाँईजीके पास पुष्टिमार्गके ग्रंथ देखे सो विद्वन्मंडन और सुबोधिनीजी इत्यादिक ग्रंथ देखके बहुत प्रसन्न भये ॥ सो मोरारीआचार्य काशीमें जायके कितनें पंडितनसुं विवाद करके जीते ॥ फेर मोरारी आचार्य श्रीनाथजीके दर्शन करके और श्रीगुसाँईजीके पास विदा होयके और श्रीठाकुरजीकी सेवा पधरायके खंभातमें आये आखोदिन भगवत्सेवा करते ॥ और कोईसुं कछु बोलते नहीं ॥ फेर वा गामके पटेलनें मोरारी आचार्यकी आजीविका बंद करदीनी और लोगनकुं पटेल कहेन लगै ॥ जो एकवार मोरारीआचार्य मेरे पास आवे तो ये कहे जैसे करुंगो ॥ सो एक बनि-यानें मोरारीआचार्यसुं कही जो तुम एकवार पटेलके घर जावो ॥ सो बहुत आग्रह करके पटेलके घर ले गयो तब पटेल ऊपर बैठो हतो ॥ सो मोरारी आचार्यके आवेकी खबर पडी ॥ तब पटेलनें कही जो मोरारीआचार्य तिलकसुद्रा धोयके आवे तो यासुं बात करुंगो ॥ तब मोरारी आचार्यनें ये बात सुनी ॥ सुनके सो संकल्प कियो या पटेलकी दीनी जितनी वस्तु और जितनी धरती और

घर सो सब कछु मेरे प्रसुलायक नहीं है ॥ ऐसैं कहैके मोरारी आचार्य अपनैं घर आये ॥ और श्रीठाकुरजी घरके वहार पधरायके ब्राह्मणनकुं दे दियो ॥ और एक झांपी करके गामसुं वहार जाय रहे ॥ सो वे मोरारी आचार्य ऐसैं टेकके वैष्णव हते ॥ जिननैं अन्यमार्गीयकी कछु वस्तु घरमें राखी नहीं ॥ गामपर्यंत त्याग कर दीनो सो मोरारी आचार्य श्रीगुसांईजीके ऐसैं कृपापात्र हते ॥ वार्ता संपूर्ण ॥ वैष्णव ॥ २१४ ॥ ❀ ॥ ॥ ॥ ॥

श्रीगुसांईजीके सेवक माट बनके एक रजपूतकी वार्ता ॥ सो वे रजपूत माट बनतैं श्रीगोवर्धन आयो ॥ तब मानसी गंगामें न्हायो ॥ तब मानसी गंगातैं चंदसरोवर गयो ॥ चंदसरोवरपर कुंमनदासजीनैं एक मालीके पाससुं आव लिये हते ॥ सो आव पेहेले पेहेले आये हते ॥ सो दस रुपैयामें ठरायके लिये हते ॥ तब कुंडपर धोयके और उहां श्रीनाथजीकुं भोग धरे और श्रीनाथजी उनकी गोदमें बैठके आव अरोगे ॥ फेर टोकरामें धरके मालीके पाससों आव उठवाये और कही चलो दस रुपैया देवें ॥ विचार कियो घरमें तो दस रुपैया नहीं है परंतु भेंस और पाढी बेंचके देउंगो ॥ अभी कोईके पास उधार लेके याकुं देउंगो ॥ ऐसो विचार करके वा मालीकुं संग ले चले ॥ तब रस्तामें रजपूत मिल्यो सो वानैं पूछी आवको कहा लैवंगो तब कुंमनदासजीनैं कही दस रुपैयामें हमनैं ठराये है तुमारे चाहिये तो लेवो ॥ तब वा रजपूतनैं दस रुपैया देके लीनैं ॥ कुंमनदासजीको मनोरथ पूर्ण

भयो ॥ तब वा रजपूतनें आंब खाये सो आंब खातमात्रही वाके सब दोष निवृत्त भये और शुद्धचित्त होयगयो तब कुंमनदासजीसुं पूंछवो या संसारमें भगवत्प्राप्ती कैसें होवे ॥ तब कुंमनदासजीनें कही जो श्रीगुसांईजीके शरण जावो तो भगवत्प्राप्ती होवेगी ॥ तब वे रजपूत गोपालपुरमें जायके श्रीगुसांईजीको सेवक भयो ॥ और श्रीगोवर्धननाथजीके दर्शन किये ॥ तब वा रजपूतके मनमें ऐसी आई जो श्रीनाथजीकुं छोडके कहुं जानो नहीं ॥ तब श्रीगुसांईजीसुं वीनती करी ॥ जो कृपाकरके सोकुं सेवा बतावें तब श्रीगुसांईजीनें आज्ञा करी जो तुम हथियार बांधके और घोडापै अस्वार होयके श्रीनाथजीकी गायनके संग जावो ॥ और गायनमें सिंघ और लियारी आवेहें गायनकुं मार डारेहें विनकी रक्षा करो ॥ और अनसखडी महाप्रसाद संग लेजावो ॥ तब वा रजपूतनें वैसें ही कियो ॥ सो नित्य गायनके संग जाते ॥ फेर थोडे दिन पीछे गायनके संगवाकुं श्रीनाथजी दर्शन देवे ल्यो ॥ कोई समय तो श्रीनाथजी वासुं बोले और कोई समय श्रीनाथजी वा रजपूतके घोडापर अस्वार होवे ॥ सो ऐसे श्रीनाथजी विनके संग अनेक प्रकारकी क्रीडा करन ल्ये ॥ एकदिन वा रजपूतको बेटा बुलावे आयो तब वा रजपूतनें कही ॥ जो तू ऐसें जान जो मेरो बाप मरगयो है मैं ऐसें जाणुंगो मेरो बेटा जन्म्यो नहीं है ऐसें कहेके वा बेटाकुं पाछो पठायो ॥ परंतु श्रीनाथजीके चरणारविंद छोडके कहुंगये नहीं सो कुंमनदासजी-

की कृपातें वे रजपूत श्रीगुसाईंजीको दृढ सेवक भयो ॥
 वार्ता संपूर्ण ॥ वैष्णव ॥ २१५ ॥ ॐ ॥ ॥ ॥
 श्रीगुसाईंजीके सेवक एक वैष्णव गुजरातमें
 रहते तिनकी वार्ता ॥ सो एकसमय श्रीगुसाईंजी गुजरात
 पधारे ॥ सो वे वैष्णव सेवक भये हते और श्रीठाकुरजी-
 की सेवा पधरायके पुष्टिमागींय परिणालिका प्रमाणसेवा
 करन लगे ॥ और वा वैष्णवके उहां वैष्णव आवते जा-
 वते हते ॥ और एकसमय शीतकालके दिन हते ॥ सो
 वाके घर वैष्णव बहुत आये सो विछोना और ओढवेकुं
 सब दिये और आप आखीरात लंगोट मारके बैठे रहे ॥
 ठंडके मान्ये नींद नहीं आई ॥ और भगवन्नाम लिया
 करे तब श्रीठाकुरजी मंदिरसुं बहार पधारके वाकुं कहीं
 जो तूं क्युं ठंडमें बैठोहैं ॥ तोकुं ठंड लगेहैं जासुं हमकुं नींद
 नहीं आवेहैं ॥ हमकुं कांपेहैं सो श्रीगुसाईंजीनें व्रतच-
 र्यामें कह्यो ॥ हैसो श्लोक ॥ सखिनिर्भरानुरागात्प्राप्तोर्यन्नि-
 खिलगोपिकैकात्म्यं ॥ तदयंतच्छीतोत्थयासकंपपुलकःस्व-
 यंचासीत् ॥ १ ॥ तब वा वैष्णवनें हाथ जोडके कही जो
 ये आपके दास मेरे घर पधारेहैं इनकुं जो ठंडलगी होती
 तोहूं आपकुं नींद न आवती ॥ जासुं आपके जागवेको
 और श्रमको अपराध मेरेमाथे पढ्यो सो मैं मुकुंगो ॥ और
 वैष्णवकुं ठंड लगती तो आपके जागवेको अपराध या वै-
 ष्णवनकुं लगतो ॥ जासुं वैष्णवनके बदले मोकुं दुःखहोवेगो
 और अपराध मुकुंगो तो चिंता नहीं है ॥ ये सुनके श्री
 ठाकुरजी हंस और आज्ञा करी तेरे जैसे वैष्णवनके नाम

लीयेहुं लोगनके अपराध जायंगे तो तोकुं अपराध कैसे स्पर्श करेगो ॥ जाहुं में तरेपर प्रसन्नहुं कछु वर माग ॥ तब वा वैष्णवनें माग्यो जो मेरो स्नेह वैष्णवनके ऊपर दिनदिन अधिकी रहे जिनके प्रतापहुं आप मेरेसंग बोलै हैं ॥ तब श्रीठाकुरजीनें आज्ञा करी ऐसेही होयगो ॥ ये सुनके वे वैष्णव बहुत प्रसन्न भयो तब जलदी न्हायके उत्तम सामग्री करके श्रीठाकुरजीकुं भोग धरी ॥ और वैष्णवनकुं महाप्रसाद लिवायो वा दिनतें नित्य श्रीठाकुरजी वा वैष्णवसों बोलते ॥ और जो चाहिये सो मागते सो वे गुजराती वैष्णव श्रीगुसाईंजीके ऐसे कृपापात्र हते ॥ वार्ता संपूर्ण ॥ वैष्णव ॥ २१६ ॥ ❀ ॥ ॥ ॥

श्रीगुसाईंजीके सेवक निष्किंचन वैष्णवकी ०

सो वे निष्किंचन वैष्णव श्रीगुसाईंजीको सेवक गुजरातमें भयो ॥ तब वा वैष्णवनें ऐसो मनोरथ विचार्यो जो मेरे पास द्रव्य होवेतो ब्रजयात्रा जावुं ॥ श्रीनाथजीकुं और सात स्वरूपनकुं सामग्री अरोगावुं ॥ और सब कुंडनमें स्नान करुं ऐसे मनोरथ विचारके लोगनके आगे बात करे ॥ तब वा गाममें एक बुद्धीलाल शैठ हतो ॥ सो बुद्धीलालशैठके पास द्रव्य बहोत हतो ॥ सो ये बात बुद्धीलालशैठनें जाणी ॥ तब वा निष्किंचन वैष्णवकुं बुलाये और कष्टो ॥ जो तूं मनोरथ विचारैहै सो में तोकुं द्रव्य देऊं ॥ तूं मनोरथ कर परंतु पुण्य सब मेरो ॥ वा निष्किंचन वैष्णवनें हा कही ॥ और जितनो द्रव्य चाहिये इतनो दियो ॥ और द्रव्य लेके ब्रजमें जायके सब

मनोरथ किये ॥ और सब ब्रजयात्रा करी ॥ और एक वर्षपर्यंत गोपालपुरमें रह्यो और श्रीनाथजीकी सेवा दर्शन किये ॥ फेर वो निष्किंचन वैष्णव अपने देशमें आयो तब लोगननें कही यानें यात्रा करी तो कहा भयो पुण्यतो सब चुन्नीलाल शेठको है ॥ तब एक वैष्णव बोल्यो ॥ चुन्नीलाल शेठपासे बैठो हतो सुनतो हतो हमारे पुष्टिमार्गमें तो पुण्य चाहिये नहीं ॥ कछु फलकी अपेक्षा नहीं है ॥ फल सब शेठ भले लेजाय परंतु या वैष्णवनें या देहसुं टेहेल करी और नेत्रनसुं दर्शनको सुख लियो ॥ ये सुखतो चुन्नीलाल कैसे ले सकेगो ॥ ये बात सुनके वा चुन्नीलाल शेठके मनमें ऐसी आई जो मेंहूं वैष्णव होइतो वहीत आछो ॥ फेर वा निष्किंचन वैष्णवकुं बुलायके और वा वैष्णवके संग ब्रजयात्रा गयो ॥ और श्रीगोकुलमें जायके श्रीगुसांईजीके दर्शन किये ॥ सो साक्षात् पूर्णपुरुषोत्तमके दर्शन भये ॥ तब वा चुन्नीलालशेठनें वीनती करी महाराजमोकुं शरण ल्यो ॥ तब कृपाकरके श्रीगुसांईजीनें श्रीनवनीतप्रियाजीके संनिधान नामनिवेदन करायो ॥ फेर वा निष्किंचन वैष्णवनें श्रीगुसांईजीसुं वीनती करी ॥ जो महाराज जो कोई आछो काम करे और दूसरेको द्रव्य खर्चें याको पुण्य करवेवालेको के द्रव्यखर्चवेवालेको ॥ तब श्रीगुसांईजीनें आज्ञा करी ॥ जो पुष्टिमार्गमें सकामकर्म अनित्य धर्मनमें गणेहें ॥ और अनित्य धर्मकरे तो वेदविरुद्ध बाधक होवे ॥ जासुं पुष्टिमार्गमें निष्काम कर्म करे चाहिये और फलकी आशा मनमें राखनी नहीं जो राखे

तो धंदविरुद्ध बाधक होवे ॥ ये मुनके वे निष्किचन वैष्णव प्रसन्न भयो ॥ और चुन्नीलालशेठ बोल्यो जो महाराज मेरे रोमरोम कामनासुं भन्येहें आप कृपाकरेंगे तो निष्काम अंतःकरण होएंगे ॥ वाको उपाय आप कृपाकरके बतावे तो मेरो कारज सिद्ध होवे ॥ तब श्रीगुसांईजीने आज्ञा करी श्रीठाकुरजीकी सेवा करो तब चुन्नीलालने कही जो मैं सेवाकी रीतीमें समझूं नहींहुं आप कृपाकरें तो समझण पढे ॥ तब श्रीगुसांईजीने आज्ञा करी या वैष्णवके पास सब मार्गकी विधी सीखो ॥ तबवा चुन्नीलालने वीनती करी जो ये वैष्णव निष्किचन है ॥ याकुं आप आज्ञा करे जो जन्मसुधी मोकुं छोडके कइं नहीं जाय ॥ तो मैं सेवा पधरावुं और मेरे घरमें सब हुकुम याहीको राखुं ॥ तब श्रीगुसांईजीने वा निष्किचन वैष्णवकुं चुन्नीलालके पास राखदियो ॥ और श्रीठाकुरजी पधराय दिये ॥ और दोनो मिलके सेवा करन लगे ॥ तब श्रीगुसांईजीसुं विदा होवन लगे ॥ तब वा निष्किचन वैष्णवने कही जो मैं याके पास रहंगो परंतु वर्षमें एक वार ब्रजमें आवुंगो ॥ और श्रीनाथजीकी और श्रीनवनीतप्रियाजीकी झांकी करुंगो ॥ ये चुन्नीलालकुं आप आज्ञा करें मोकुं यामें प्रतिबंध न करें ॥ तब चुन्नीलालने कही सब द्रव्य और घर तुमारोहे मैं काहेकुं प्रतिबंध करुंगो ॥ तब वे दोनो विदा होयके गुजरातमें आये और हिलमिलके सेवा करन लगे ॥ और जन्मपर्यंत चुन्नीलाल शेठ वा निष्किचन वैष्णवकी आज्ञामें रह्यो ॥ सो वे निष्किचन

वैष्णव श्रीगुरुसाईजीके ऐसे हृषापान्न हते ॥ वार्ता संपूर्ण ॥
 वैष्णव ॥ २१७ ॥ ॐ ॥ ॥ ॥ ॥ ॥
 श्रीगुरुसाईजीके सेवक रसखान पठाण दिल्ली
 में रहते तिनकी वार्ता ॥ सो वा दिल्लीमें एक साहुकार र-
 हेतो हतो ॥ सो वा साहुकारकी बेटी बहुत सुंदर हतो ॥
 वा छोरासों रसखानको मन बहुत लग गयो ॥ वाहीके
 पाछें फिऱ्या करे और वाको झूठो खावे और आठ पहेर
 वाहीकी नोकरी करे ॥ पगार कछु लेवे नहीं दिनरात वा-
 हीमें आसक्त रहे ॥ दूसरे बडी जातके रसखानकी निंदा
 बहुत करते हते ॥ परंतु रसखान कोईकुं गणते नहीं हते ॥
 और अष्टपहेर वा साहुकारके बेटामें चित्त लग्यो रहतो ॥
 एकदिन चार वैष्णव मिलके भगवद्वार्ता करते हते ॥ करते
 करते ऐसी बात निकसी जो प्रभूमें चित्त ऐसो लगावनो
 ॥ जैसे रसखानको चित्त साहुकारके बेटामें लग्योहै ॥
 इतनेमें रसखान ये रस्ता निकस्यो बिननें ये बात सुनी
 ॥ तब रसखाननें कही जो तुम मेरी कहा बात करोहो ॥
 तब वैष्णवननें जो बात हती सो बात कही ॥ तब रसखान
 बोले प्रभूको स्वरूप दीखेतो चित्त लगाईये ॥ तब वा वै-
 ष्णवनें श्रीनाथजीको चित्र दिखायो ॥ सो देखतहि रस-
 खाननें वो चित्र लेलियो और मनमें ऐसो संकल्प कऱ्यो
 जो ऐसो स्वरूप देखनो जब अन्न खानो उहांसुं घोडा-
 पर बैठके एकरात्रमें हंदावन आयो ॥ और आखोदिन
 सब मंदिरनमें बेप बदलायके फिऱ्यो ॥ और सब मंदिरनमें
 दर्शन किये और वैसे दर्शन नहीं भये तब गोपालपुरमें

गयो ॥ और वेष बदलायके श्रीनाथजीके दर्शन करवेकुं गयो ॥ तब सिंघपोरियानें भगवदिच्छासुं वाके चिन्ह ब-
 हीजातवालेके पहिचाण्ये ॥ तब वाकुं धक्का धारके काढ
 दियो ॥ सो जायके गोविंदकुंडपर पडरह्यो ॥ तीनदिन
 सुधी पड रह्यो ॥ खावेपीवेकी कछु अपेक्षा राखी नहीं
 ॥ तब श्रीनाथजीनें जानी ये जीव दैवी है ॥ और शुद्धहै
 और सात्विक है मेरो भक्तहै याकुं दर्शन देउं तो ठीक ॥
 तब श्रीनाथजीनें दर्शन दिये ॥ तब वे उठके श्रीनाथजीकुं
 पकडवे दौन्यो ॥ सो श्रीनाथजी भाग गये फेर श्रीना-
 थजीनें श्रीगुसाईंजीसुं कही ये जीव दैवी है ॥ और
 म्लेच्छ योनिकुं पायो है ॥ जासुं याके उपर कृपा करो
 याकुं शरण लेउ ॥ जहांसुधी तुमारो संबंध जीवकुं नहीं
 होवे तहांसुधी में वा जीवकुं स्पर्श नहीं करुंहुं वासुं बोलु
 नहींहुं ॥ और वाके हाथको खावुहुं नहीं जासुं आप
 याको अंगिकार करो ॥ तब श्रीगुसाईंजी श्रीनाथजीके
 वचन सुनके गोविंदकुंडपें पधारे और वाकुं नाम सुना-
 ये ॥ और साक्षात् श्रीनाथजीके दर्शन श्रीगुसाईंजीके
 स्वरूपमें वाकुं भये ॥ तब श्रीगुसाईंजी विनकुं संग लेके
 पधारे और उत्थापनके दर्शन कराये ॥ महाप्रसाद लि-
 वायो ॥ तब रसखानजी श्रीनाथजीके स्वरूपमें आसक्त
 भये ॥ तब वे रसखाननें अनेक कीर्तन और कवित्त और
 दोहा बहोत प्रकारके बनाये ॥ जैसे जैसे लीलाके दर्शन
 विनकुं भये ॥ वैसेही वर्णन कियो ॥ सो वे रसखान श्रीगुसां-
 ईजीके ऐसे कृपापात्र हते ॥ जिनकी चित्रके दर्शन करत-

मात्रहीसंसारमेंहुं चित्त खेंचायके और श्रीनाथजीमें ल-
ग्यो इनके भाग्यकी कहा बडाई करनी ॥ वार्ता संपूर्ण ॥
॥ वेष्णव ॥ २१८ ॥ ॥ ॥ ॥ ॥ ॥
॥ श्रीगुसांईजीके सेवक एक रजपूतकी वार्ता ॥
एकसमय श्रीगुसांईजी गुजरात पधारे ॥ मारवाडमें एक
गाममें डेरा किये ॥ उहां एक रजपूत वा देशके राजाकी
तरफसुं हांसल उघरावतो हतो ॥ सो श्रीगुसांईजीके डेरा
देखके उहां आयो सो श्रीगुसांईजीके दर्शन किये ॥ सो
साक्षात् पूर्णपुरुषोत्तमके दर्शन भये ॥ तब साष्टांग दंड-
वत करी ॥ तब वे रजपूत श्रीगुसांईजीको सेवक भयो ॥
और वाको गाम उहांसुं दशकोश दूर हतो ॥ तब उहां
वीनती करके ॥ श्रीगुसांईजीकुं पधराये ॥ और घरके स-
ब सेवक कराये और वीनती करी जो महाराज मेरो मन
बहुत दुष्ट है सो आप कृपा करेतो मेरो मन पवित्र होवे ॥
और कछु पुष्टिमार्गमें ल्यो ॥ तब श्रीगुसांईजीनें वा रज-
पूतकुं श्रीठाकुरजी पधराय दिये और मार्गकी रीती शि-
खाई ॥ तब वे रजपूत सेवा करन लग्यो ॥ सो एकदिन
वा रजपूतनें बुवार हरी शेकके श्रीठाकुरजीकुं धरी ॥ तब
श्रीठाकुरजी प्रसन्न होयके अरोगे ॥ तब श्रीनाथजीनें
श्रीगुसांईजीकुं आज्ञाकरी जो तुमारे सेवक रजपूतनें बु-
वार धरीहै ॥ सो बहुत सुंदर है ॥ और मैं प्रसन्न होयके
अरोग्योहुं ॥ ये बात सुनके श्रीगुसांईजी वा रजपूतके
उपर बहुत प्रसन्न भये ॥ तब चाचाहरिवंशजीकुं बुलायके
श्रीगुसांईजीनें वा रजपूतके गाम पठाये ॥ और आज्ञा करी

जो देखी आवो॥तब चाचाजी कितनें एक दिनमें पहोंचे सो वा रजपूतनें चाचाजीकु श्रीगुसाईंजीके निजसेवक जानके बहुत आदर क्यो और गदगद कंठ होयगयो ॥ और कहेन लयो भरो बडो भाग्यहै के तुम जैसे भगव दीयननें भरो घर पवित्र कियो ऐसे कहेके चाचाजीकु उतरवेको ठेकाणो दियो ॥ तब चाचाजीनें कही जो श्रीठाकुरजीको कहा समयहै ॥ तब वा रजपूतनें कही हिस जैसे जीवनकु समय पूछवेकी अपेक्षा होवे हे ॥ और आप जैसे भगवदीयतो श्रीठाकुरजीको स्वरूपहै ॥ और हम जैसेनकु न्यारे न्यारे दीसतहें ॥ जासुं आप भीतर पधारो ॥ तब चाचाजी भीतर जायके टेरा खोल्यो ॥ और बाई समय राजभोग आये हते ॥ तब चाचाजी देखेतो श्रीठाकुरजी अरोगेहें ॥ चौकीहैं सो सिंघासनसुं बहुत दूर धरी हती ॥ और श्रीठाकुरजीकु नमनभके लेनो पढतो ॥ तब चाचाजीनें वा रजपूतकु कही चौकी सिंघासनके पास धरो ॥ तब वा रजपूतनें कपडा पहरे हते तब चौकी सरकाई ॥ तब श्रीठाकुरजी आछीरीतीसुं अरोगनलगे ॥ तब चाचाजी टेरा देके बाहेर आये ॥ तब चाचाजीनें रसोई करके भोग धरके महाप्रसाद लियो ॥ तब कितनेकदिन रहेके चाचाजी श्रीगोकुल आये ॥ और श्रीगुसाईंजीकु सब समाचार कहे ॥ और कही जो उहां महाप्रसाद मैंनें नहीं लियो तब श्रीगुसाईंजीनें पूछ्यो क्युं नहीं लियो ॥ तब चाचाजीनें कही अनाचार बहुत हतो ॥ तब श्रीगुसाईंजीनें आज्ञा करी जो स्नेहमें आचा-

रको काम नहीं है ॥ जिनके अंतरमें भगवत्सह छाय
 गयोहैं तिनको आचार विचार नहीं रहे ॥ ये सुनके चा-
 चाहरिवंशजी वहुत प्रसन्न भये ॥ और वीनती करी जो
 आपकी कृपातें ऐसे महत्पुरुषके दर्शन भये ॥ मैं विनको
 स्वरूप जान्यो नहीं ॥ सो वे रजपूत श्रीगुसाईंजीके ऐसे
 कृपापात्र हते ॥ वार्ता संपूर्ण ॥ वैष्णव ॥ २१९ ॥ ❀ ॥
॥श्रीगुसाईंजीके सेवक शैवके वेटाकी वार्ता ॥
 सो एक शत्रु श्रीमहाप्रभुजीको सेवक हतो और नवनी-
 तप्रियाजीके जलघरकी सेवा करतो हतो ॥ नवनीतप्रि-
 याजी वाकुं अनुभव करावते हते॥फेर कोईदिन अपराध
 पढयो तब वाकी देह छूटी ॥ वानें शैव ब्राह्मणके घर आ-
 यके जन्म लियो परंतु कछु बोले नहीं ॥ रोवे नहीं चुप
 करके पढयो रहे ॥ जब दूध प्यावें जब पीवे ऐसे करते १२
 महिना बीते ॥ जब वाकी वर्षगांठ आई और ज्ञाती भो-
 जन भयो तब ज्ञाती भोजनमें वो बोल्यो ॥श्रीवल्लभा-
 चार्यजी इतने अक्षर ॥ फेर दूसरे वर्षमें वर्षगांठको दिन
 आयो जब दो नाम लिये ॥ ज्ञातीसभामें वो बोल्यो श्रीव-
 ल्लभ श्रीविठ्ठल ॥ ऐसे तीसरे वर्षमें तीन नाम लिये॥चौथे
 वर्षमें चार नाम लिये ॥ पांचमें वर्षमें पांच नाम लिये ॥
 तब वाके पितानें पूंछी जो तूं नित्य क्युं नहीं बोलेहैं ॥तब
 वानें कही जो मोकुं श्रीगोकुल लेजावो तब बोळंगो ॥
 तब वाको पिता श्रीगोकुल ले गयो ॥ तब श्रीगोकुलमें
 जायके वा छोरानें वाके पितानुं कही जो तुम श्रीगुसां-
 ईंजीके सेवक होय जाओ मोकुं सेवक करावो॥तब वाको

पिता श्रीगुसांईजीको सेवक भयो ॥ और वा छोराकुं सेवक करायो तब श्रीनवनीतप्रियाजीके दर्शन करते वाके नेत्र भरआये ॥ तब श्रीनवनीतप्रियाजी वा छोराको हाथ पकडके आपकी लीलामें लगये ॥ तब वाको पिता विद्वान हतो ॥ कह्यो जो याको धन्य भाग्य है याके संगतें भोक्तुं श्रीगुसांईजीके दर्शन भये हैं ॥ और मैं वैष्णव भयोहुं सो वे शैवको बेटा श्रीगुसांईजीको ऐसो कृपापात्र हतो ॥ जाकुं पूर्व जन्मकी बात याद रही हती ॥ और देहसहित भगवल्लीलामें गयो ॥ वार्तासंपूर्ण ॥ वे ॥२२॥ श्रीगुसांईजीके सेवक तीनवैष्णवकी वार्ता ॥

एक साहुकारको बेटा वाको नाम मोहनदास हतो ॥ और वजीरकी बेटी वाको नाम गोपीबाई हतो ॥ और एक बनिया वाको नाम निहालचंद हतो ॥ सो वे तीनोजनें एक पाठशालामें पढते हते ॥ सो एकसमय श्रीगुसांईजी वा गाममें पधारे ॥ सो वे तीनोजनें श्रीगुसांईजीके सेवक भये ॥ और मोहनदासको और गोपीबाईको स्नेह विशेष भयो ॥ और तीनोजनें श्रीठाकुरजी पधरायके सेवा करनलगे ॥ और वे मोहनदास नित्य गोपीबाईके घर जाय और भगवद्वार्ता वांचते ॥ जादिन न जाय वा दिन गोपीबाई प्रसादन लेती ॥ एकदिन वा गामके राजाके मनुष्यननें वाकुं गोपीबाईके घर जातो दिख्यो ॥ तब राजाकुं खबर करी ॥ तब राजा वेष बदलायके फिरवे निकस्यो ॥ और दोचार दिन छिपके मोहनदासकी और गोपीबाईकी चेष्टा देखी राजाकुं इतनो तो निश्चय भयो ॥ विनके

स्नेहमें विकार नहीं है परंतु लोगनमें बहुत चर्चा होवेहे सो ये चर्चा बंध करी चाहिये ॥ तब वा राजानें मोहनदासकुं पक्यो ॥ और कही राज्यसे चलो जब मोहनदासकुं राज्यमें लगेये और कही रातकुं कैदमें रहो नहीं तो जामिन देवो ॥ तब मोहनदासनें मावापसों कही जामिन पडो तब मावापनें कही हम जामिन नहीं पडेंगे तब कोई जामिन भयो नहीं ॥ तब वह निहालचंद जामिन भयो ॥ तब वाकुं छोडयो ॥ फेर दूसरे दिन राज्यके आदमी वाकुं लगेये ॥ तब राजानें हुकुम क्यो याकुं गामवहार लेजाओ ॥ और उहां याकुं मारडारो ॥ परंतु मैं आडुंगो हुकुम देडंगो जब मारो ॥ फेर वाकुं गामवहार लगेये ॥ और उहां तमासा देखवेके लीये बहुत भीड भई ॥ तब वा गोपीवाई पुरुषको वेष पहरेके घोडापर बैठके आई ॥ जब राजा आयो तब वा गोपीवाईनें तलवार खेंचके राजाके मनुष्यनकुं भगायो ॥ मोहनदासकुं घोडापर चढाय लियो ॥ तब राजानें पहचानी ॥ तब मनुष्यनकुं हुकुम दियो ॥ दूर जावो याकुं कछु मति कही ॥ और प्रधानकुं कही ये तेरी बेटी है याकुं छुडाय लेजाय है ॥ मैंनें परीक्षालीनी है यामें कछु विकार नहीं है भगवन्नाम लेवे हैं ॥ जासुं इनकी आपसमें विवाह करे तो ठीक ॥ ये बात प्रधाननें कबूल करी ॥ घरमें जायके ऐसो ठराव क्यो या मोहनदासकुं विवाह देनी तब वा मोहनदासनें और गोपीनें प्रधानसुं कही जो हमारो बहेनभाईको संबंध है ॥ और हम एक दूसरेकुं भाईबेहेन बोले हैं ॥ जासुं

हमारी विवाह नहीं होवेगो ॥ ये मुनके प्रधान बहुतप्रसन्न भयो और कही जो अब विवाह तुमरो इनसुं नहीं करुंगो ॥ और तुम एक दूसरेके घर जावो आवो यामें प्रतिबंध नहीं करुंगो ॥ और कोई निंदा करेगो तो मैं जवाब देउंगो ॥ वे तीनोंजनें ऐसे टेकके वैष्णव हते ॥ जिननें शीघ्र देनो कबूल कियो ॥ परंतु स्नेह नहीं छोडयो ॥ वार्ता संपूर्ण ॥ वैष्णव ॥ २२१ ॥ * ॥ ॥ ॥ श्रीगुसांईजीके सेवक एक ब्रजवासी रावलमें रहते तिनकी वार्ता ॥ सो वे ब्रजवासी गाय चरावतो हतो ॥ सो एकदिन श्रीगोकुलमें जायके श्रीगुसांईजीकुं वीनती कीनी जो महाराज भोक्तुं शरण लेउ ॥ तब श्रीगुसांईजीनें कृपा करके नामनिवेदन करवायो ॥ तब वह ब्रजवासी गाय चरावन गयो ॥ सो एकदिन चिताहरणघाटसूधी गयो उहां जायके देखे तो अबीर गुलाल चोवाचंदन केशर बूको गौरो सृगमद जखकरदम घनसार जवाद शाख ऐसे अनेक सुगंधीनकी वर्षा होय रही हती ॥ सबमेंसुं थोडो थोडो लेके जूदी जूदी गांठ बांधके श्रीगोकुल श्रीगुसांईजीकुं दिखावे आयो ॥ तब श्रीगुसांईजीनें कृपाकरके सब देख्यो ॥ और वाकुं कही ये कहांसुं लायो ॥ जब वानें सब समाचार कहे ॥ तब श्रीगुसांईजी पधारै सो वानें जायके जगा देखाई ॥ तब श्रीगुसांईजीने निश्चय कियो जो श्रीठाकुरजी हारी खेलते इहांसुं आगें पधारै है ॥ तब श्रीगुसांईजी आगें जायके देखें तो श्रीठाकुरजी हारी खेलेंहैं ॥ और अनेक गूथ ब्रजभक्तनकेहैं ॥ तब श्रीगु-

साईजी दूर ठाढे रहे ॥ तव श्रीठाकुरजी हाथ पकडके भी-
तर लेगये ॥ और अपने संग खिलाये ॥ ब्रजवासी दूरसुं
देखत रह्यो फेर श्रीगुसाईंजी खेलके पधारे ॥ तव वा ब्रज-
वासीनें पूंछी जो महाराज ये कोन हते और ये हजारें
लुगाई कहांसुं आई हती ॥ मोकुं कछु समझण पडी नहीं ॥
तव श्रीगुसाईंजीनें कृपाकरके वा ब्रजवासीकुं दिव्य नेत्र
दिये ॥ तव श्रीठाकुरजीके दर्शन सब लीला सहित होवे
लगे ॥ ऐसे दोघडी पर्यंत वा ब्रजवासीकुं दर्शन भये ॥
फेर वा ब्रजवासीकुं संगलेके श्रीगुसाईंजी गोकुल पधारे
सो वे ब्रजवासी श्रीगुसाईंजीके ऐसे कृपापात्र हते जिनकुं
याही देहते लीलाको अनुभव भयो ॥ वार्ता संपूर्ण ॥ वै-
ष्णव ॥ २२२ ॥ ❀ ॥ ॥ ॥ ॥

श्रीगुसाईंजीके सेवक एक वैष्णव जम्हेरचंद
गुजरातमें रहेते तिनकी वार्ता-सो जम्हेरचंद श्रीगोकुल
गये ॥ और श्रीनवनीतप्रियाजीके दर्शन किये ॥ और सा-
तस्वरूपनके मनोरथ किये ॥ और श्रीनाथजीके वागा-
वखनको सामग्रीको मनोरथ कियो ॥ और बालक तथा
बहु बेटीनको मनोरथ कियो ॥ फेर श्रीगुसाईंजीसुं वीनती
कीनी जो भरे हजार वैष्णवनकुं भोजन करावनकीइच्छा
है ॥ तव श्रीगुसाईंजीनें आज्ञा करी एक मरियादीकुं क-
राय द्यो तो हजार आय गये ॥ तव जम्हेरचंदनें वीनती
कीनी ॥ जो हजार मरियादीकुं भोजन कराठंगो तव
श्रीगुसाईंजीनें आज्ञा करी एक स्नेही जाकुं भगवद और
भगवदीयमें स्नेह होवे ऐसे एककुं करायदे तो हजार म-

रियादी होजायंगे ॥ तब वानें कही हजार प्रेमीकुं लेवाउं तो कैसे ॥ तब आपनें कहां एक आसक्तीवानकुं करावे ॥ तो हजार प्रेमी आय जायंगे ॥ तब वानें कही हजार आसक्तीवानकुं लीवाउंतो कैसे तब आपनें आज्ञा करी एक व्यसनवानकुं करावे तो सब आयजायंगे तब वानें कही जो हजार व्यसनवानकुं भोजन करावुंतो कैसे तब श्रीगुसाईजीनें आज्ञा करी जो व्यसनवान हजार कहासुं मिलेंगे ॥ व्यसन अवस्थातो गजनघावनकुं सिद्ध भईहै ॥ और आसक्ती कुंमनदासजीकुं सिद्ध भईहै और कहासुं लावेंगो तब वा जव्हेरचंदने पृथी जो व्यसन अवस्थाको स्वरूप कहा है और आसक्तीवानको स्वरूप कहा ॥ तब श्रीगुसाईजीनें आज्ञा करी खेहीके देखेविना ज्वर चढ आवे ॥ व्याकुल मन होजाय गलानी होवे उद्वेग होवे उन्माद होवे शोचहोवे ॥ हर्ष होवे रुदन करे ॥ ऐसे अनेक प्रकार क्षणक्षणमें होयाकरें ॥ जिनकुं बुद्धिमान व्यभिचारीभाव कहेहैं ॥ सो विप्रयोगमें होवेंहैं ॥ याको नाम व्यसन अवस्था हैं और आसक्तीवानकुं ग्रहके कार्यमात्रमें अरुची होवेंहैं अष्टपहेर देखवेमें मन रहेहैं व्यसन अवस्थासुं ये उतरती अवस्थाहै जासुं पीछे व्यसन सिद्ध होवेंहैं श्रीमहाप्रभुजीनें आज्ञा करीहै भक्तिवर्धिनी ग्रंथमें ॥ ॥ सो श्लोक ॥ स्नेहाद्रागविनाशःस्यादासक्त्यास्याद्ग्रहारुचिः ॥ गृहस्थानां बाधकत्वमनात्मत्वं च भासते ॥ यदास्याद्द्वयसनं कृष्णे कृतार्थस्यात्तदैव हि ॥ १ ॥ यारीतसुं श्रीमहाप्रभुजीनें आज्ञा करीहै जासुं ऐसी अवस्थावालेतो

नहीं मिलेंगे परंतु हजारको नेम छोड़दे त्यागीनकुं लीवा
 वो तो तेरो कल्याण होवेगो ॥ और श्रीठाकुरजी प्रसन्न
 होंवेंगे ॥ ये सुनके जव्हेरचंदनें वैसेही कियो ॥ सो वे
 जव्हेरचंद श्रीगुसांईजीके ऐसे कृपापात्र हते ॥ वार्ता सं-
 पूर्ण ॥ वैष्णव ॥ २२३ ॥ ❀ ॥ ॥ ॥ ॥
 श्रीगुसांईजीके सेवक दामोदरदास और वि-
 नकी दोय स्त्रीनकी वार्ता ॥ सो वे दामोदरदास जे कोई
 वैष्णव घरमें आवते तिनकुं बडे आदरसुं प्रसाद लेवावते
 और चाहे जैसो वैष्णव आवतो विनके ऊपर अभावनहीं
 लावते ॥ ये बात एक ईश्वरदास वैष्णव हतो वानें सुनी ॥
 तब वे दामोदरदासकी परीक्षा करवेके लीयें वा गाममें
 आये ॥ और आयके वावडीपर सोय रहे ॥ तब दामो-
 दरदास नित्य वावडीपर आये गये वैष्णवकी खबर का-
 ढवेकुं जाते हते ॥ सो देखेंतो वैष्णव सूतोहै वाके गलामे
 कंठी देखके वाकुं जगाये ॥ तब वो ईश्वरदास गारी देन
 लग्यो ॥ तब वाको हाथ पकरके घरमें लाये ॥ और न्ह-
 वाये और महाप्रसाद लेवेकी वीनती कीनी ॥ तब ईश्व-
 रदासनें कही हम महाप्रसाद नहीं लेंवेंगे ॥ तब दामोद-
 रदासनें हाथ जोडके कही तुम क्युं नहीं ल्यो ॥ तब
 ईश्वरदासनें कही तुमारो घर और द्रव्य और स्त्री
 सब हमकुं देवें तो लेंवेंगे ॥ तब दामोदरदासनें कही
 तुमकुं दियो ॥ तोइ लेंवे न बैठो ॥ तब ईश्वरदासनें
 कही तुम घरमेसुं निकस जावो तब दामोदरदासजी
 श्रीठाकुरजी पधरायके निकसवेको विचार कियो जब

न्हायके श्रीठाकुरजीकी झांपी करन लगे तब श्रीठाकुरजी बोले जो वे वैष्णव प्रसाद नहीं लेवे तो इनकी मर्जी ॥ परंतु तूं मोकुं काहेकुं पधरावैहैं ॥ तब दामोदरदास बोले हे प्रभु हे दीनबंधु इतने दिन आप कोईदिन बोले नहींहो जब वैष्णव कुपित भयोहे तब आप बोलेहो जिनके कोपको फल इतनो भयो तो विनकी प्रसन्नताको फल तो अनिर्वचनीय होवेगो ॥ जासुं मैंतो इहांसुं जाउंगो और ये प्रसन्न होयके प्रसाद लेंवेंगे ॥ तब मेरो चित्त प्रसन्न होवेगो तब श्रीठाकुरजी प्रसन्न होयके बोले जो ये वैष्णव तेरेपर प्रसन्नहैं और हमहुं प्रसन्नहैं जासुं तुम कछु मागो ॥ तब दामोदरदासनें माग्यो जो मेरे ऊपर कोईदिन वैष्णव अप्रसन्न न होवें ॥ और मोकुं अभाव न आवे ये मागुहुं ॥ तब श्रीठाकुरजीनें आज्ञा करी जो ऐसेही होयगो तब दोनो वैष्णवननें मिलके महाप्रसाद लियो तब ईश्वरदासनें कही मैं तुमारी परीक्षा लेवेके लीयें आयोहुं ॥ सो मेरे अपराध क्षमा करो ॥ सो वे दामोदरदास ऐसे कृपापात्र हते ॥ जिनकुं कोईदिन वैष्णवके ऊपर अभाव नहीं आवतो ॥ विनसो श्रीठाकुरजी बोलते चालते बातें करते विनकी कहा बढाई करें ॥ वार्ता संपूर्ण ॥ वैष्णव ॥ २२४ ॥ ❀ ॥

श्रीगुसाईंजीके सेवक कबूतर कबूतरीकी वार्ता
एकसमय श्रीगुसाईंजी गुजरात पधारे हते ॥ तब महीनदी पूर आई हती ॥ उहां श्रीगुसाईंजीके डेरा भये ॥ जंगल हतो ॥ उहां सामग्री भई ॥ तब भोजनको समय भयो ॥ तब श्रीगुसाईंजीनें भोजन न करे ॥ तब चाचाहरिवंशजी

नें बीनती करी जो भोजन क्युं नहीं करे तब श्रीगुसाई-
जीनें आज्ञा करी आज कोईजीव शरण नहीं आयो है ॥
कमतीसो कमती दो जीव नित्य शरण आये चहीये ॥ ह-
मकुं श्रीठाकुरजीकी आज्ञाहै ॥ यातें भोजन नहीं करेंगे ॥
तब चाचाजी जायके एक वृक्षपेंसुं कबूतर कबूतरीकी जोड
लाये ॥ तब श्रीगुसाईजीनें कृपाकरके विनकुं नाम सुना-
यो ॥ तब वे उहां बैठ रहे और श्रीगुसाईजीनें भोजन
किये ॥ और विनकुं जूठन धरी विन कबूतर कबूतरीनकुं
ज्ञान भयो ॥ फेर वे कबूतर कबूतरनी उहांसुं उडके जहां
वैष्णव रहेते हते वा गाममें एक वृक्षके ऊपर घोसला बां-
धके दोनो रहे ॥ जहां भगवद्दार्ता होवे तहां सुनवे जाएं ॥
वैष्णवनकी गोदमें बैठते ॥ वैष्णवके पास फिन्थो करे ॥
और भगवद्दार्ता होयचुके तब उडके ठेकाणे जाते ॥ वा
गामको एक राजा हतो ॥ सो बाकुं कोड भयो तब उपाय
वहुत कन्ये ॥ कोड मिटे नहीं ॥ सो वा राजाकुं एक स-
र्पनें वरदान दियो हतो ॥ जो पशु पक्षी आपसमें बात क-
रेंगे सो तूं समझेगो सो राजा समझतो हतो ॥ तब एक
वैद्यनें कही जो कबूतरनकी रुधिर लावे तो में औषध दे-
उंगो तो मिट जायगो ॥ तब राजानें हुकुम कन्यो ॥
कबूतर पकडले आवो तब एक मनुष्य भगवन्मंडलीमें
कबूतर आवेहें ऐसे जाणतो हतो सो कंठी तिलक करके
वा कबूतर कबूतरीकुं पकड लायो ॥ और राजाकुं दिये ॥
तब राजानें पीजराम रखाये ॥ और आपनें पास पीजरो
रखायो ॥ तब कबूतरी बोली कबूतरसुं हमकुं क्युं पकड

राखेहे तब कबूतरनें कही जो राजाकुं कोठ भयोहे सो आपणेकुं मारके आपणी लोही लगावेगो तब कोठ मि-
टेगो ॥ ऐसे वैद्यनें राजासुं कहीहे ॥ तब कबूतरनी बोली
जो वैद्य बडो यूखेहे हमारी विठ लगावे तो कोठ तुर्त मि-
टजाय और लोही लगावें तो महिना दो महिनामें मि-
टेगो ॥ सो ये बात राजानें सुनी ॥ राजाकुं बोली
समझवेको वरदान हतो ॥ जासुं झट समझ गयो ॥ तब
राजानें अपने हाथनसुं विनकी विठ लगाई ॥ तब तुर्त
कोठ मिट गयो ॥ तब राजानें वाही घड़ी विनकुं छोड
दियो ॥ तब वे कबूतर कबूतरनी जायके भगवद्वार्ता सुने ॥
सो वे कबूतर कबूतरनी ऐसे कृपापात्र हते ॥ जिनके लीयें
श्रीठाकुरजीनें राजाकुं पेहेली वरदान दिवायो हतो जि-
नके भाग्यको पार नहीं ॥ वार्ता संपूर्ण ॥ वैष्णव ॥ २२६ ॥

श्रीगुसाईजीके सेवक विठलदासकी वार्ता ॥

सो वे विठलदास आगरेमें रहेते हते ॥ और जरीको वेपार
करते हते ॥ सो जरीके बहुत वस्त्र एकठे कन्ये ॥ बालक
और बड्ड बेटीनके लायक सो गांठ बांधके श्रीगोकुलमें
लेगये ॥ और श्रीगुसाईजीकुं वीनती कीनी ये अंगिकार
करें ॥ तब श्रीगुसाईजीनें वे सब वस्त्र यमुनाजीमें पधराय
दिये ॥ तब वे विठलदास बहुत उदास भयो तब श्रीगुसां-
ईजीनें विठलदासके मनकी जानी ॥ सो विठलदासकुं
आप संग लेके रमणरेती पधारे उहां दिव्य नेत्र दिये ॥
तब रासके दर्शन भये ॥ रासमें श्रीठाकुरजी और ब्रज-
भक्त और श्रीस्वामिनीजी वही जरीके वस्त्र पेहेरे हते ॥

सो विठ्ठलदास दर्शन करके बहुत प्रसन्न भये ॥ और मनमें जान्यो जो मेरो बड़ो भाग्य है ॥ और श्रीगुसाईंजीकी कृपा बिना ऐसे दर्शन कौन करावे ॥ दर्शन करके अपना जन्म सुफल मान्यो ॥ फेर श्रीगोकुल आयके श्रीनवनीतप्रियाजीके दर्शन कन्ये ॥ उहां जरीके वस्त्रनके दर्शन भये ॥ फेर श्रीनाथजीके दर्शन करे ॥ उहांहुं वाही जरीके दर्शन भये ॥ तब विठ्ठलदासनें मनमें विचार कियो ॥ जो जरी तो थोड़ी हती सब ठेकाणे वाही जरीके वस्त्रनके दर्शन होवे हैं ॥ जासुं श्रीगुसाईंजी और यमुनाजी और श्रीठाकुरजी तीनों स्वरूप एक है ॥ सो ऐसो अनुभव विठ्ठलदासजीकुं भयो ॥ सो श्रीगुसाईंजीके ऐसे कृपापात्र हते ॥ वार्ता संपूर्ण ॥ वैष्णव ॥ २२६ ॥ ❀ ॥ ॥

श्रीगुसाईंजीके सेवक रत्नावती राणीकी वार्ता

सो रत्नावती आमेरमें रहेती हती ॥ मानसिंगराजाके भाई माधोसिंघकी राणी हती ॥ सो वा रत्नावतीके पास खवासनी रहेती ॥ सो खवासनी श्रीगुसाईंजीकी सेवक हती ॥ अनन्य वैष्णव हती जब वा खवासनीकुं जंभाई आवती छीक आवती जो कछु विस्मय जैसे होतो ॥ तब वे खवासनी श्रीकृष्णसंबंधी भगवानके नाम लेती ॥ कबहुं नंदकिशोर कबहुं नंदकुमार कबहुं वृंदावनचंद कबहुं गोकुलचंद कबहुं यशोदानंद ऐसे नाम लेके खवासनीके नेत्रमें जल भरी आवते ॥ ऐसे क्षणक्षणमें होयाकरे तब खवासनीकुं रत्नावतीराणीनें देखी ॥ तब रत्नावतीराणी बोली जो तुम घडीघडी कहा नाम लेउ हो ॥ और

क्युं तुमारे नेत्र भर आवेंहं ॥ और शरीरकी शुद्धी मूल-
 जाओहो ॥ तब वा खवासनीनें कही ये मार्गतो ताप
 क्लेशको है ॥ तुम मुखीलोक यामें काहेकुं पढोहो ॥ तब
 वा राणीनें बद्धत आग्रह कियो ॥ तब वा खवासनीनें कही
 जो परमभगवदीय जो खेहीहै विनकी कृपा हीवे तब विरह
 उत्पन्न होवेहे ॥ तब ये शरीर ये दुःख सहिश्के विरह दुःख
 तब सह्यो जाय ॥ तब राणीनें कह्यो जो तुम भोक्तुं
 समझायो तो तुम कहो तैसे करूंगी ॥ तब वा खवास-
 नीनें पुष्टिमार्गकी रीती बताई ॥ तब वा राणीनें वा ख-
 वासनीसुं टेहेल छुडायके भगवन्नाम सुनायवेकरो ऐसो
 ठराव करदियो ॥ तब वो खवासनी आखो दिवस वा
 राणीकुं पुष्टिमार्गीय भगवत्स्वरूप और गुरुको स्वरूप
 और वैष्णवको स्वरूप समझायो करे ॥ फेर कोईदिन
 श्रीगुसाईंजी उहां पघारे ॥ तब रत्नावतीराणी सेवक
 भई ॥ तब रत्नावतीको बेटा प्रेमसिंघ हतो वाकुं सेवक
 करायो ॥ तब इंद्रनीलमणीको श्यामस्वरूप सिद्ध करा-
 यके पुष्टिकरायके सेवा करन लगी ॥ तब धीरेधीरे भाव-
 बढवे लग्यो ॥ अनेक प्रकारकी सामग्री और पकवान
 भोग धरे ॥ और श्रीठाकुरजीकुं लाढलडावे और शृंगार
 करते भगवत्स्वरूपमें निमग्न होयजाय अंग अंगमें माधु-
 र्यता भरायगई ॥ तब वा खवासनीसुं पूछो जो प्रगट स्व-
 रूप कैसे मिले तब वा खवासनीनें कही जो ये मेहेलके
 पास एक दूसरो मेहेल बनाओ और वामें वैष्णव आयके
 उतरे तब वैष्णवनकुं आप प्रसाद लेवावे ॥ तब श्रीठाकु-

रजी प्रगट होयके दर्शन दें ॥ तव भगवत्कृपा संपूर्ण होवे ॥ तव दूसरो मेहेल करायो और गाम बहार चौकी बैठाई और जो वैष्णव ब्रजजात्रा जाय बिनकुं लायके मेहेलमें उतारे और महाप्रसाद सब अनसखडीको वैष्णवनके लीयें पठाय देवे ॥ और वैष्णव लेवे तव राणी चिक डारके पडदामें बैठके वैष्णवनके दर्शन करती ॥ एकदिन वैष्णवकीमंडलीमें श्रीठाकुरजीके दर्शन वाकुं भये ॥ तव खवासनीसुं कहके राणी पडदा छोडके बहार निकसके मंडलीमें जाय बैठी ॥ और हाथ जोडके वैष्णवनकुं भगवत्स्मरण करे और वीनती करी जो मेरे मनमें बहुत दिनसुं अभिलाष लागरहीहै ॥ जो तुम प्रसन्न होयके आज्ञा द्यो तो मैं हाथनसुं वैष्णवनकुं प्रसाद धरुं ॥ तव वैष्णवननें हा कही ॥ तव सोनाको थार लेके सब वैष्णवनकुं परोसके और महाप्रसाद लिवायो ॥ और चंदन लगायो ॥ और वीडी खवाई ॥ तव भगवद्दार्ता करन लगी ॥ सो बहुत आनंद भयो तव गाममें खबर परी राणी पडदा छोडके बहार आईहै ॥ तव आखो गाम देखवे आयो ॥ और गाममें खूब धामधुम मची ॥ तव राजा कहुं दूसरे गाम गयो हतो ॥ तव राजाके दिवाननें पत्र लिखके मनुष्य पठायो ॥ तव वा मनुष्यनें राजाकुं जायके पत्र दियो ॥ सो पत्र वांचके राजाकुं क्रोध भयो ॥ वाई समय वा राणीको बेटा प्रेमसिंघ काका मानसिंघराजाकुं तिलक माला करके सलाम करवे आये ॥ तव राजा बोल्यो आवो मोडीके ॥ ये सुनके प्रेमसिंघ ठाडो रह्यो ॥ और

राजा क्रोध करके उठके भीतर गयो ॥ तब प्रेमसिंघनें
 लोगनसुं पुंछो जो काकानें मोकुं कहा कही है ॥ तब सब
 लोगननें वाकी माके सब समाचार कहे ॥ तब अपनें
 डेरामें आयके विचार कियो ॥ सभामेंकाकानें मोडीको
 कह्यो ॥ जासुं ये बातको स्वांग पूरो करना चहीये ॥ तब
 माजीकुं पत्र लिख्यो जो सभाके बीच मोकुं काकानें
 मोडीको कह्यो है ॥ जासुं अब तुम ये स्वांग पूरोकर
 दिखावो ॥ अब मैं मोडीको रहूं तो ठीक ॥ प्राणतो
 एकवार जायंगे ॥ सो पत्र मनुष्यनें प्रेमसिंघकी माता
 रत्नावती राणीकुं जायके दियो ॥ जो पढदासुंवाहर नि-
 कसी हती वाहीकुं दियो तब राणीपत्र वांचके बहुत प्रस-
 न्न भई ॥ और श्रीठाकुरजीकी और वैष्णवकी आज्ञा
 लेके माथो मुंडाय डान्यो ॥ घणी जीवतो हतो तो पण
 भगवद्दर्शनकुं मुख्य मानके संसारमें असत्ती छोडवेके
 लीये माथो मुंडाय डान्यो तब श्रीठाकुरजी वैष्णव उतरते
 हते ॥ वाही मेहेलमें पधराय लाई और कीर्तन करे ॥
 नाचे और गावे आनंद करन लगी ॥ और श्रीठाकुरजीकुं
 लाडलडावन लगी ॥ फेर पुत्रकुं पत्र लिख्यो ॥ तब मनु-
 ष्यननें जायके वाको पुत्र प्रेमसिंघ हतो वाकुं पत्र
 दियो ॥ तब प्रेमसिंघकी ऐसो नेम हतो ॥ जहांसूधी
 मोडीको नहोउं तहांसूधी अन्न नहीं खाउंगो फला-
 हार करुंगो ॥ जब वाकुं पत्र पहुँच्यो तब माथेपर
 चढायलियो ॥ और नोबत बैठाई ॥ और वधाई बांटवे
 लग्यो ॥ बडी खुशी करी ॥ तब राजा मानसिंघजीकुं ख-

वर भई ॥ तब मानसिंघजीकुं लोगननें कही ॥ जो तुमनें सभामें कही हती सो स्वांग प्रेमसिंघजीनें कर दिखायो है ॥ सोडीको वन गयो है ॥ ये सुनके राजा मानसिंघ बहुत उदास भयो और ऐसो विचार कियो ॥ जो भाईकी वहुंको मराय डारनो परंतु लोगनमें निंदा न होवे और पृथ्वीपतीकुं ऐसी खबर न परे ॥ जो मानसिंघ राजानें स्त्री मराई है ॥ ऐसो नाम बदनाम न होवे ऐसी रीतीसुं मराई डारनी ॥ ये विचार करके राजानें तैयारी करी ॥ ये खबर प्रेमसिंघजीकुं भई तब प्रेमसिंघ बोल्यो ॥ जो राजालोग धरतीके लीयें माथों कटावे हैं तो भक्तीपर माथो कटावे यामें कहा चिंता है ॥ तब राजा घर गयो और गामके बडे बडे आदमी मिलवेकुं आये ॥ तब राजानें विनसुं कही जैसे अपनी निंदा न होवे और कारज सिद्ध होवे वैसो उपाय करो जैसे वने तैसे वा रत्नावतीकुं मराय डारो ॥ परंतु अपनो नाम न होवे ॥ तब एक मनुष्यनें ऐसो विचार बतायो ॥ जो ऐसी बंदोबस्ती करो पींजरामें सिंघहै सो छोड देवो सब मनुष्यनकुं बहार काढ देवें और कमाडलगाय देवें ॥ भीतर जायके रत्नावतीकुं सिंघ मार डारेगो और फेर सिंघ पकड लेंगे ॥ तब वात दब जायंगी ॥ ऐसो विचार सबकों आछो लग्यो ॥ वैसे सिंघ छोड दिये रत्नावतीके पास सिंघ गयो ॥ तब वो खवासनी बैठी हती और राणी श्रीठाकुरजीकुं श्रृंगार करती हती ॥ तब वा खवासनीनें सिंघकुं देखके जयजयकरके ठाडी भई ॥ श्रीचसिंहजी पधारे है मेरे भा-

ग्यहै ऐसे कहनलगी ॥ और जायके सिंघपर हाथ फेरन लगी और तिलक कन्यो और फूलनकी माला पहरेर्राई और हाथ जोडके ठाडी रही ॥ तब वाकी भावनाकी सचाई देखके श्रीठाकुरजी वा सिंघमें प्रवेश करके वा खवासनीकुं चाटन लगे ॥ जैसे नृसिंहजीनें प्रल्हादजीकुं चाटयो हतो ॥ सो श्रीमहाप्रभुजीनें पुरुषोत्तम सहस्रनाममें लिख्योहै ॥ सो नामा ॥ अक्तांगलेहनीधौतक्रोधपुंजःप्रशांतधीः॥ फेर सिंघ पीछे फिरके मेहेलनसुं बहार कूद पडयो और बहिर्मुख लोग ठाडे हते ॥ राजाकी फोज सैकडनकुं मारडारे गाममें हाहाकार पडगयो ॥ और बहोत त्रास पडगयो बडो हाहाकार भयो ॥ तब राजा मानसिंघ बहोत डरप्यो और तुरत दौडके भाईकी बढुकें पावन पन्यो ॥ और साष्टांग दंडवत करके पडरह्यो ॥ कछु उठवेको भान रह्यो नहीं तब रत्नावती बोली ॥ उठो उठो श्रीठाकुरजीके दर्शन करो ॥ अब श्रीठाकुरजीनें सिंघरूप मिटायके दूसरे रूपसुं दर्शन देवेंहैं ॥ अब तो उठो तब राजानें उठके दर्शन कियो ॥ फेर राणीसुं कही जो तुम हमारी रक्षा करो ॥ हम तुमारी शरण आयेहैं ॥ ये सब राज्य और धन तुमारोहै ॥ तुमनें संसारको लोभ छोडके माथो मुंढायोहै जैसे तुमारी इच्छा होवे तैसे तुम बरतो ॥ तब मानसिंघराजा घरगयो और स्वजानचीकुं डुकुम कियो ॥ महिनेके महिने दशहजार रुयेया वा राणीकुं पहाँचायघो ॥ और अधकी रुपैया जितनें मागे इतनें मोकुं पूछके देणे ॥ एकदिनकी ढील करनी

नहीं ॥ तब वो खजानची महिनेके महिने दशहजार रुपैया पहाँचावतो ॥ सो सब रुपैया सामग्रीमें खर्च डारती सो वे रत्नावतीराणी श्रीगुसाईंजीकी टेककी कृपापात्र होती ॥ और मानसिघराजा वा रत्नावतीके श्रीठाकुरजीके दर्शन कन्ये विना जल नही लेती वे राणी और स्ववासनी श्रीगुसाईंजीकी ऐसी कृपापात्र होती ॥ वार्ता संपूर्ण ॥ वैष्णव ॥ २२७ ॥ ॐ ॥ ॥ ॥ ॥ ॥

श्रीगुसाईंजीके सेवक दक्षणको राजा तिन० सो वा राजाके एकसों आठ राणी होती ॥ परंतु कोई राणीकुं संतान न भई ॥ जासुं वा राजाको मन बहुत उदास रहैतो हतो ॥ तब वा दुःखसुं राजा यात्रा करवे गयो ॥ और श्रीजगन्नाथरायजीके दर्शनकुं गयो ॥ उहां श्रीगुसाईंजीके दर्शन भये ॥ सो साक्षात् पूर्णपुरुषोत्तमके दर्शन भये ॥ तब वो राजा श्रीगुसाईंजीको सेवक भयो ॥ तब श्रीगुसाईंजीसुं वीनती कीनी जो महाराज मेरे संतान नहीं है ॥ जासुं मेरो चित्त लौकिकमें बहुत लग्यो है ॥ तब श्रीगुसाईंजीने आज्ञा करी तुम भगवत्सेवा करो ॥ तब वह राजा श्रीठाकुरजी पधरायके भगवत्सेवा करन लग्यो ॥ अपने देशमें आयो ॥ फेर राजानें एक और राणी करी ॥ सो तेलीकी बेटी होती ॥ सो वा राणीने राजासुं कही जो मोकुं भगवत्सेवा करन द्यो ॥ तब राजानें कही तुम श्रीगोकुल जायके श्रीगुसाईंजीके सेवक होय आवो मनुष्यनकुं संग लेके श्रीगोकुल गई ॥ और जायके श्रीगुसाईंजीकी सेवक भई ॥ और श्रीनवनीत-

प्रियाजीके दर्शन किये ॥ और श्रीनाथजीके दर्शनकिये ॥
फेर अपने देशमें आई ॥ और राजासुं सब समाचार कहे
॥ तब वह राणी सेवामें न्हायवे लगी ॥ सो अनेक प्रकार
की सामग्री करे ॥ और अनेक प्रकारके वागा बखर करे ॥
और श्रीठाकुरजीकुं प्रसन्न करे ॥ ऐसी भाव देखके राजा
वा राणीके ऊपर बहुत प्रसन्न भयो ॥ और नित्य वा रा-
णीके पास राजा आवे ॥ भगवद्वार्ता कहे ॥ सेवाकी रीती
समझावे और समझे तब वा राजाके एक वेटा भयो सो
बहुत गुणवान भयो ॥ तब राजानें श्रीगोकुलमें वीनती
पत्र लिखके श्रीगुसांईजीकुं पधरायके वीनती करी ॥ जो
महाराज या वेटाकुं सेवक करो ॥ तब श्रीगुसांईजीनें
वाकुं नाम निवेदन करायो ॥ तब वा राजानें श्रीगुसां-
ईजीसुं वीनती कीनी ॥ जो निवेदनतो तादृशी भगवदी-
यके संग मिलके विचार्यो चाहिये ॥ सो कोइ इहां मिले
नहीं हैं ॥ जब मैं कोनको सत्संग करूं ॥ तब श्रीगुसांई-
जीनें आज्ञा करी जो इहां अद्भुतदास आवेंगे विनको स-
त्संग करो ॥ तब वे राजा अद्भुतदासको सत्संग करनलगे ॥
तब श्रीठाकुरजीन वा राजाकुं अनुभव जतायो ॥ राजा
की बुद्धि निष्काम भई सो वह राजा श्रीगुसांईजीको ऐसी
कृपापात्र भयो ॥ वार्ता संपूर्ण ॥ वैष्णव ॥ २२८ ॥ ❀ ॥
श्रीगुसांईजीके सेवक खुशालदासकी वार्ता ॥
वैष्णव खुशालदासनें बहुत द्रव्य कमायो और सब द्रव्य
श्रीगुसांईजीके पास लेगयो ॥ वाई समय श्रीगुसांईजीकुं
खबर कराई ॥ वाईसमय श्रीगुसांईजी श्रीनाथजीको श्रु-

गार करत हते ॥ तव मुनके लुप कर रहे ॥ और आप
सेवासुं पहुँचके राजभोग पीछे बहार पधारे ॥ तव वा
खुशालदासनं श्रीगुसाँईजीके दर्शन किये और तीनलाख
रुपैयाकी द्रव्यसामग्री सामान लायो हतो ॥ सो सब
श्रीगुसाँईजीके आगें धर्यो ॥ तव श्रीगुसाँईजीने आज्ञा
करी ये द्रव्य कामकी नहीं है ॥ तुम पीछे ले जावो ॥
इच्छा आवे सो करो ॥ तव वा खुशालदासनं पूछोजो
मेरो कहा अपराध है ॥ तव श्रीगुसाँईजीने आज्ञा करी
तेरो अपराध नहीं है ॥ येद्रव्य ऐसोही है ॥ हम श्रृंगार
करत हते ॥ वाई समय या द्रव्यकी खबर भई ॥ तव दो
चित्त हमारे होयगये ॥ याद्रव्यने आवतमात्रही सेवा-
मेसुं चित्त काढ डार्यो ॥ सो द्रव्य भंडारमें रहेगो तो
कहा नहीं करेगो ॥ यासुं ये द्रव्य हमारे नहीं चाहिये
तव वा खुशालदासनं मनमें ऐसो विचार कियो ॥ येद्रव्य
मेरे उपयोग आवेगौ तो मेरी बुद्धीको भ्रष्ट करेगो ॥ तव
खुशालदासनं वह द्रव्य उठायके सब लुटाय दियो सो वा
खुशालदासकुं श्रीगुसाँईजीके वचनपर ऐसीदृढता हती ॥
और संपूर्ण विश्वास हतो ॥ एक पैसाहुं राख्यो नहीं ॥
सो वे खुशालदास श्रीगुसाँईजीके ऐसे कृपापात्र हते ॥
वार्ता संपूर्ण ॥ वैष्णव ॥ २२९ ॥

श्रीगुसाँईजीके सेवक एक वैष्णव गोकुलदास
हतो जानें गुप्तभेद करी तिनकी वार्ता ॥ सो गोकुलदासके
पास द्रव्य बहुत हतो ॥ एकलाख रुपैयाकी हुंडी लिखायके
श्रीगोकुल गयो ॥ और वैष्णव संग बहुत हते ॥ सो सबनें

श्रीगुसांईजीके दर्शन किये ॥ सब वैष्णवनें भेट करी ॥
 और गोकुलदासनें कछु भेट नहीं करी ॥ और सब लोग
 निंदाकरन लगे ॥ गोकुलदास पैसावालो होयके कछु
 भेट नहीं करी ॥ खाली दंडवत करी ॥ तब गोकुलदासनें
 छाने छाने गादीके नीचे कागद धर दियो ॥ सो धरत
 खवासनें देख्यो सब वैष्णव गये ॥ तब खवासनें श्रीगु-
 सांईजीछुं वीनती कीनी ॥ जो एक वैष्णव छानो-
 छानो कागद धरगयोहै ॥ तब श्रीगुसांईजीनें वे कागद
 मंडारमें पठायदियो ॥ सो बहुत दिन सूधी वे संग श्री-
 गोकुल और श्रीजीहारमें रह्यो ॥ सो कोईदिन ये बात
 गोकुलदासनें प्रगट करी नहीं ॥ आपकी निंदा करायो
 कन्ये सो वे गोकुलदास श्रीगुसांईजीके ऐसे कृपापात्र
 हते ॥ वार्ता संपूर्ण ॥ वैष्णव ॥ २३० ॥ ❀ ॥ ॥

श्रीगुसांईजीके सेवक नरसिंहदासकी वार्ता ॥

सो वह नरसिंहदास रस्तामें जातो हतो ॥ औररस्तामें
 भील मिल्यो ॥ सो वा भीलको ऐसो नियम हतो ॥ मनु-
 प्यनकुं मारदारके गांठडी लेतो ॥ तब वा नरसिंहदासकुं
 भील मारवेकुं दौडयो ॥ तब नरसिंहदासको स्वरूप सिंह-
 जैसे दीखवे लग्यो ॥ तब वो भील डरप्यो तब नरसिंहदास
 बोले क्युं डरपे हैं आव मेरे पास ॥ तब वो भील बोल्यो
 तुम मनुष्य होके सिंहहो ॥ मोकुं खबर नहीं पडे है ॥
 तब वाने कही तेरे जैसेनकुं शिक्षा करनेके लिये मैं सिं-
 घडे अब तोकुं नहीं छोडुंगो ॥ ऐसे कहेके वा भीलकुं थ-
 पड मारके हथियार खास लिये ॥ तब भील बोल्यो मेरे

हथियार देड ॥ अब तुमकुं नहीं मारुंगो ॥ तव वो नर-
सिंहदासनैं कही जो तेरे घरमें पूछ जो मैंने जितनी
हत्या करी हैं सो पाप कौनके ऊपर है तव वो भील घ-
रमें पूछवे गयो ॥ तव घरके मनुष्यननैं कही हमारे माथे
हत्या नहीं है हमनैं ऐसी कही नहीं ॥ जो मनुष्य मा-
रके खवाव ॥ तव वा भीलनैं आयके नरसिंहदाससुं कही
जो मेरे घरके आदमी तो हत्यामेंसुं पाती नहीं राखे हैं ॥
तव नरसिंहदासनैं कही तू क्युं पापमें पडे हैं ॥ चल मेरे
संग तेरो कल्याण श्रीप्रभुजी करेंगे ॥ तव वो भील वा
नरसिंहदासके संग चल्यो ॥ सो जायके श्रीगुसाईंजीको
सेवक भयो और कृपापात्र भयो ॥ सो वे श्रीगुसाईंजीके
सेवक नरसिंहदास ऐसे कृपापात्र हते ॥ जिनके संगसुं
भील वैष्णव भयो ॥ वार्ता संपूर्ण ॥ वैष्णव ॥ २३१ ॥
श्रीगुसाईंजीके सेवक रूपमंजरीकी वार्ता ॥
सो वे रूपमंजरी पृथ्वीपतीकी दासी हती हिंदुराजाकी
बेटी हती ॥ पृथ्वीपतीकुं परणी हती ॥ पादशाहको स्पर्श
नहीं करती हती ॥ वो कहेती हती जो मेरो स्पर्श करोंगे
तो मेरे प्राण छोड देउंगी ॥ विनको रूपवहुत सुंदर हतो ॥
सो पृथ्वीपती वाको रूप देखके राजी रहेतो हतो ॥ सो
वे बाई रातकुं आकाशमें उडके नित्य नंददासके पास
आवती हती ॥ वाके पास एक गुटका हतो सो वा गुट-
कामें इतनी सामर्थ्य हती जे कोई मनुष्य मोटामें राखे
सो जहां कहे उहां पहीचायदेवे सो वा रूपमंजरीके पास
गुटका हतो ॥ सो नित्य गुटकाके बल्लें उडके नंददास-

जीके पास आवती हती ॥ ऐसे करते बहुत वर्ष बीते ॥ एक दिन पृथ्वीपतीके आगे कोई मनुष्यने पद गायो सो पद देखो देखो नागरनट ॥ निरततकालिदीकेतट ॥ यापदकी छेलीतुकमें आवेहे नंददास गावे तहां निपटनिकट ॥ सो ये पद पृथ्वीपतीने सुन्यो ॥ और कही जो ऐसे हते परमेश्वरके पास बैठके गाते तब वाईसमय कोईने कही जो जिनने यह पद बनायोहै वे तो अवहीं हाजर हैं ॥ गोपालपुरमें रहेहे ॥ श्रीगुसाईंजीके सेवकहै ॥ तब पृथ्वीपतीने विचार कियो जो आपणे ब्रजमे जानो और नंददासजीकुं मिलनो तब पृथ्वीपती सहकुंडुब ब्रजमें आये गोवर्धनमें डेरा किये और नंददासजीके पास वीरबलकुं पठाये और कही जो नंददासजीकुं पूछआवो ॥ अब हम तुमकुं मिलवे आवें के तुम हमकुं मिलवे आवोगे ॥ तब नंददामजीने कही हम परसूके दिन मानसीगंगास्नान करवेकुं आवेंगे सो उहां पादशाहकुं मिलेंगे ॥ तब नंददासजी दूसरे दिन विलछकुंडपें नाहायवे गये ॥ उहां रूपमंजरीको डेरा हतो ॥ और रूपमंजरीने राजभोग धर्यो हतो ॥ और श्रीगोवर्धननाथजी साक्षात् अरोगते हते ॥ तब नंददासजीने देख्यो तब वृक्षकी ओटके पास ठाढे रहे ॥ तब श्रीनाथजीने रूपमंजरीसुं कही ॥ जो नंददासजी वृक्षकी ओटमें ठाढे हैं विनकुं बुलावो तब नंददासजीकुं बुलाये तब नंददासजीने गोवर्धननाथजीके दर्शन किये तब श्रीगोवर्धननाथजीने आज्ञा दीनी ॥ जो तुमये महाप्रसाद लेउ तब नंददासजीने महाप्रसाद लियो ॥ और

रूपमंजरीसुं विदा होयके नंददासजी गोपालपुर गये ॥ फेर दूसरे दिन मानसीगंगा नाहायवेकुं गये उहां पृथ्वीपतीकुं मिले ॥ तब नंददासजीकुं एकांतमें लेजायके पूंछी जो तुमनें ये पद गायो सो कैसे ये बात सुनके नंददासजीनें विचार कियो जो अन्यमार्गीयसुं कैसे बात करी जाय सो नंददासजीनें उंचो देखके देह छोड दीनी ॥ पादशाहतो विस्मय होयगयो ॥ बहूत उदास भयो सो पृथ्वीपतीकी रीत हती ॥ जब उदास होय तब रूपमंजरीको सुख देखवेकुं आवे सो भीतर जायके रूपमंजरीके सन्मुख ठाडोरह्यो ॥ और रूपमंजरीसुं वात करी ॥ जो परम भगवदीय नंददासजीसुं मैंनें ऐसे पूंछ्यो तब नंददासजीनें कछु कही नहीं ॥ और विनकी देह छूट गई यातें मेरो चित्त बहूत उदास है ॥ ऐसे पृथ्वीपतीकी वाणी रूपमंजरीनें सुनी तब रूपमंजरीकुं विप्रयोग उत्पन्न भयो ॥ ऐसे विरहते रूपमंजरीनें देह छोड दीनी ॥ सो देखके पृथ्वीपती बहूत उदास होय गयो ॥ सो वे रूपमंजरी श्रीगुसांईजीकी ऐसी कृपापात्र हती ॥ जिनसों विप्रयोग घडीएक सह्यो न गयो ॥ वार्ता संपूर्ण ॥ वैष्णव ॥ २३२ ॥ ❀ ॥

श्रीगुसांईजीके सेवक कल्याणभट्ट खंभाळी-यामें रहते तिनकी वार्ता ॥ एकसमय श्रीगुसांईजी द्वारकाते खंभालियामें पधारि ॥ तब कल्याणभट्टजी श्रीगुसांईजीके सेवक भये ॥ और श्रीगुसांईजीके पास ग्रंथ पढे और ग्रंथ सब हृदयारूढ भये और संसारमेंसुं आसक्ती निकस गई ॥ तब कल्याणभट्टजीके चित्तमें ऐसी आई ॥

जो श्रीगोवर्धननाथजीके दर्शन करूं तो ठीक ॥ सो कल्याणभट्ट श्रीगुसांईजीके संग गये ॥ और श्रीगोकुलमें श्रीनवनीतप्रियाजीके दर्शन किये ॥ फेर श्रीगोवर्धननाथजीके दर्शन किये ॥ तब विचार कियो जन्मपर्यंत इहां रहेनो तब आन्योरमें रहेवेको घर कियो ॥ सो वे कल्याणभट्टजी श्रीगुसांईजीके ऐसे कृपापात्र हते ॥ प्रसंग ॥१॥ सो एकसमय श्रीगोवर्धननाथजीके दूध घरीयानें दौय कसेडी दूध कमती लियो ॥ जब रातकुं श्रीगोवर्धननाथजी उठे ॥ और सोनाको कटोरा लेके आन्योरमें गये ॥ सो दश पंदर वर्षको छोराको रूप धरके गये ॥ सो कल्याणभट्टजीकी बेटी देवका हती ॥ सो घरमें दूध बहुत हौतो हतो सो बेच देती हती तब श्रीगोवर्धननाथजीनें पूंछी तेरेपास दूध है ॥ तब वा देवकानें कही जौ है साढाचारपैसा शेरके लेउंगी तब श्रीनाथजीनें साढाचार पैसा कबूल करे ॥ और कटोरामें वे देवकासों दूध लियो ॥ और शेरभरके कटोरामें डान्यो तब श्रीनाथजी दूध पीवे लगे ॥ तब फीको लयो तब श्रीनाथजीनें पूंछी तेरे घर खांड है वानें हा कही ॥ तब वासुं चार आनाकी खांड लीनी ॥ और चारशेर दूध लियो ॥ और खांड डारके पान कियो तब वा देवकानें पैसा मागे ॥ तब श्रीनाथजीनें कही मेरो कटोरो घरमे घरराख ॥ काल्ह कटोरा लेजाउंगो और पैसा दे जाउंगो तब श्रीगोवर्धननाथजी पोढे फेर सवारे श्रीगुसांईजी शृंगार करत हते ॥ जब देखे तो कटोरा नहीहि ॥ तब सब भीतरीया डूढवे लगे ॥ तब श्रीगोवर्धन-

नाथजीनें श्रीगुसाईंजीसुं कही जो दूधघरीयानें दूध ओछो राख्यो हतो तव में देवकाके पास दूध और खांडवे-
 चाती लेके पी आयोहूँ ॥ और कटोरा गहने राख आयो
 हूँ तव ये वात श्रीगुसाईंजीनें कल्याणभट्टसुं कही ॥ तव
 कल्याणभट्ट सुनके बहुत प्रसन्न भये ॥ तव घरजायके
 देवकासुं पूंछी जो काल तेरे पास कोई कटोरा धरके दूध
 लेगयो है ॥ तव देवकानें कही एक छोरा लेगयो है ॥
 और कटोरा धरगयोहै तव कल्याणभट्टजीनें कही ये तो
 श्रीनाथजी हते ॥ तव कटोरा देखे तो सोनाको है ॥ तव
 कल्याणभट्टजी लेके श्रीगुसाईंजीकुं दियो ॥ तव श्रीगु-
 साईंजी देवकाकी सराहना करन लगे ॥ और कही जो
 याके भाग्यकी कहा बडाई करनी और दूध घरीयाकुं
 बुलायके उराहनो दियो ॥ और आज्ञा करी जो कोई-
 दिन दूध कमती राखेगो तो तेरी सेवा छुडाय देउंगो ॥
 और जब श्रीनाथजीकी इच्छा होवे तव देवकाके पास दूध
 दही लेके अरोगते ॥ सो कल्याणभट्टजी श्रीगुसाईंजीके
 ऐसे कृपापात्र हते ॥ प्रसंग ॥ २ ॥ एकदिन कल्याणभ-
 ट्टजीनें श्रीगुसाईंजीसों वीनती करी जो आपके निकट-
 वर्ती सेवक सेवा करेहैं ॥ कोई जल लावेहैं कोई जलधरे
 हैं ॥ कोई बुहारी करेहैं ॥ कोई तेल लगावेहैं ॥ कोई भंडार
 करेहैं ॥ कोई रसोई करेहैं ॥ सब ऐसे कहेहैं ॥ हमारो इत-
 नो अंगीकार करेंगे ॥ तव श्रीगुसाईंजीनें आज्ञा करी ये
 सबकी भूल है ॥ हमारो सब अंगीकार कियो हे ॥ हमारो
 कछु नहीं है ॥ ऐसे समझो चाहिये सो नहीं समझे हे ॥

और अंगीकार करेंगे ऐसी समझेहैं इनकुं विश्वास संपूर्ण नहीं है ॥ विश्वास होवे तो काहेकुं ऐसे कहे ॥ वस्तु साक्षात् प्रसूनै अंगीकार करी है यामें संदेह काहेकुं चाहिये ॥ ये सुनके कल्याणभट्टजी बहुत प्रसन्न भये ॥ प्रसंग ॥३॥ और एकसमय कल्याणभट्टनें श्रीगुसाईंजीसों वीनती कीनी ॥ जो महाराजाधिराज श्रीप्रसुजीके श्रीपुराणपुरुषोत्तमके उत्तम भगवदीय कृपापात्र होय ॥ सो तिनके लक्षण कैसे है ॥ सो आप कृपाकरके कहिये ॥ तब श्रीगुसाईंजीनें कल्याणभट्टसों कही जो उत्तम भगवदीय तिनके लक्षण तो यह है ॥ जो सबके ऊपर सदा कृपा राखे ॥ जो कोई भगवदीय वैष्णवके ऊपर क्रोध नहीं करनो ॥ और तिनको अपराध सहेनो ॥ दुर्वचन बोले तो अपनी कहालेवे ॥ ऐसे समझके विनकी अपराध नहीं माननो परंतु तिनके वचन सुनके मन डुलावे नहीं जो करे सो क्षमाही करे तिनको दौउहाथ जोडीके मधुरे वचनसुं बोले ॥ क्षमा राखे जो भगवदीय वैष्णवसों साचो बोले और श्रीप्रसुजीनमें चित्तदेके निर्मल बुद्धि राखे ॥ और सदा सर्वदा उपकारही करे और श्रीप्रसुजीके ऊपर तथा भगवदीय वैष्णवनके ऊपरतें मन बिगाडे नहीं और इंद्रिय जीत रहे ॥ और अपने मनकी विचार कोइके जानवेमें नहीं आवे श्रीप्रसुनकी सामग्री करे वामें चित चलायमान न करे आप महाप्रसाद लेवे और अपने अर्थ उद्यम नहीं करनो ॥ और महाप्रसाद न्यून लेनो ॥ और बहुत महाप्रसाद लेवे तो निद्रा आवे ॥ भगवद्भजन न

होवे ॥ ताते न्यून महाप्रसाद लेंतो ॥ और रोगादिक होय तव श्रीठाकुरजीकी सेवामें अंतराय होय और मनकुं जीतके वश करे तव श्रीप्रभुजीके भजनमें स्थिर होय रहें हैं ॥ मन वश होय ॥ सदासर्वदा प्रभुके कार्यमें रहे ॥ और इंद्रियनको जीते ॥ विषयमें लगावे नहीं ॥ और कहे जो हम तो श्रीप्रभुजीनके दास हैं ॥ शरण हैं सो ऐसे समझतो रहे ॥ और जहां बहिर्मुख लोग चर्चा करे तो मौनगहिरहे और श्रीप्रभुजीकी सेवामें सदा सावधान रहे ॥ और असावधान नहीं होनो ॥ जो श्रीप्रभुनकी भगवदीय वैष्णव-विना रहस्य वार्ता प्रगट नहीं करनी ॥ और धीरज क-बहुं नहीं छोडनो भूखतें प्यासतें निद्रातें शीततें उद्यमतें श्रोत्रतें लोभतें इतने दोषरूप है ॥ सो इनतें डरपते रहें इ-नके वश नहीं होय ॥ इनको जीतके रहेनो ॥ और अभि-मान नहीं करे और सब भगवदीय वैष्णवनको आदर करत रहें जो श्रीप्रभुजीको स्वरूप हैं और श्रीप्रभुजीकी लीलाहैं सो भगवदीय वैष्णवके हृदयमें रहे भगवत्स्वरूप हैं ऐसे वैष्णवको रूप है अनेक नामरूपतें श्रीप्रभुजी लीला करत हैं ऐसे विचार करत रहेनो जो मैं पहले कोन हतो ॥ और श्रीमहाप्रभुजीकी कृपातें कहा मोकों मिल्योहै अ-पने स्वरूपको विचार करत रहे जिनके ऐसे लक्षण होय तिनको उत्तम भगवदीय जाननो ॥ ऐसे श्रीगुसाईंजीके वचन सुनके कल्याणभट्ट बहुत प्रसन्न भये ॥ तव कहेजो वैष्णवको स्वरूप तो ऐसोहीहै ॥ सो वे कल्याणभट्ट श्री-गुसाईंजीके ऐसे कृपापात्र भगवदीय हते ॥ ताते इनकी

वार्ताको पार नहीं तातें इनकी वार्ता कहा कहिये ॥ वार्ता
 संपूर्ण ॥ वैष्णव ॥ २३३ ॥ ❀ ॥ ॥ ॥ ॥
 श्रीगुसाईजीके सेवक एक कायस्थ सूरतमें रहते
 तिनकी वार्ता ॥ सो वह कायस्थको नाम मोतीराम हतो
 और सूरतके सूबाके पास नोकर हतो ॥ और राजनग-
 रमें कोईकामके लीयें आयो हतो ॥ उहां श्रीगुसाईजीको
 सेवक भयो हतो ॥ फेर कोईदिन सूरतकेसूबाके संग आ-
 गये गयो हतो ॥ सो पृथ्वीपतीकुं मिल्यो फेर वा सूबानें
 आवती वखत गोवर्धनमें सुकाम कन्यो ॥ तब वह मो-
 तीराम गोपालपुरमें श्रीनाथजीके दर्शनकुं गयो ॥ वाई
 समय श्रीनाथजीके राजभोग होयचुके हते ॥ तब वा का-
 यस्थनें श्रीगुसाईजीके दर्शन किये और मनमें विचार
 कियो जो सूबाको तो जलदी कूचहै और श्रीनाथजीके द-
 र्शन नहीं होवेंगे ॥ तब भंडारीकुं मिल्यो और मिलके
 कही जो मैं साठहजार रुपैया सेवा करुंगो जो दोघडी
 उत्थापन वेग होवें तो ये बात भंडारीनें श्रीगुसाईजीसों
 वीनती करी तब श्रीगुसाईजीनें दोघडी अवार उत्थापन
 कराये ॥ सो मोतीराम दर्शनविना सूबाके संग कूचकर-
 गयो तब जायके कुवेरमें डेरा किये फेर दूसरे दिन वा
 मोतीरामको मोढो उतर गयो सो वा सूबाने देख्यो ॥
 तब वा सूबानें पूछी जो मोतीराम उदास क्युंहै ॥ जब मो-
 तीरामनें सब समाचार कहे ॥ तब सूबानें कही जो तूं द-
 र्शनके लीयें साठहजार रुपैया खर्चतो हतो सो मैं तेरेपर
 प्रसन्न हूं ॥ सो तुम जायके श्रीनाथजीके दर्शन करआवो

॥ तब वे मोतीरामनें सवारै राजभोगके दर्शन आयके कण्ठे ॥ श्रीनाथजीके दर्शन करके बहुत प्रसन्न भये ॥ और महाप्रसाद लियो अत्यंत भाग्यमाने और लाख-रुपैयाकी हीरा लेके श्रीनाथजीकुं चिबुक आभरण करायो ॥ सो वे मोतीराम वैष्णव श्रीगुसाईजीके ऐसे कृपापात्र हते ॥ जिनकी आरति श्रीनाथजी सहि न शके ॥ और धनसुं कारज सिद्ध नहीं होवे ये बात दिखाई ॥ केवल भगवत्कृपासुं सब कारज सिद्ध होवेंहे ये बात दिखाई ॥ सो मोतीराम श्रीगुसाईजीके ऐसे कृपापात्र हते ॥ वार्ता संपूर्ण ॥ वैष्णव ॥ २३४ ॥ ❀ ॥ ॥ ॥ श्रीगुसाईजीके सेवक जीवा पारेख तथा सहजपाल डोशी तथा दलाल माधवदास तिनकी वार्ता ॥ सो वे तीनों जने आपसमें मित्र हते और चाचाहरिवंशजीके पास नाम पाये हते और जब श्रीगुसाईजी राजनगर पधारे ॥ तब वे तीनों जने जायके खंभात पधराय लाये ॥ और कुटुंबसहित श्रीगुसाईजीके सेवक भये ॥ और श्रीठाकुरजी पधरायके सेवा करन लगे ॥ फेर एक-दिन माधवदास दलालनें और सहजपालडोशीनें वीनती करी जो महाराज हम बेपारमें झूठ बोलें हैं ॥ जो दोष लगेंहे के नहीं ॥ तब श्रीगुसाईजीनें आज्ञा करी "नानृता-त्पातकंपरं" इति ॥ झूठ समान पाप नहीं ॥ तब माधवदासनें वीनती करी जो मैं दलाली करूंहे आज पीछे झूठ नहीं बोलुंगो ॥ मेरे गाहकनकुं आछी रीतीसुं माल देवाउंगो ॥ तब सहजपाल डोशीनें कही मैं एक आना नफा

खाउं अधकी नहीं खाउंगो ॥ ऐसी इच्छा होवे तो ल्यो ॥ सो वे तीनोजने सत्यवादी हते ॥ और कोईदिन छूठ नहीं बोलते तब विनको सत्यपणो देखके श्रीठाकुरजी बहुत प्रसन्न भये ॥ और भगवद्गुणगान करते विनके गदगद कंठ होय जाते ॥ और किर्तनके अनेक प्रकारके अर्थ करते ॥ एकदिन माधवदास दलालनें जीवापारेखसुं पूछी जो अन्याश्रय कहा होवे हें तब जीवापारेखनें कही जो श्रीकृष्णविना अंशावतारके भजनपर्यंत अन्याश्रय होवे है ॥ और सर्वत्र व्यापक मानके जो दूसरे देवकी पूजा करे तोहुं बाधकहै कारण जो अनेक देवरूपी भगवान भये हें ॥ एक एक देवकी पूजा विधी प्रमाणें करे तोहुं पार नहीं आवे ॥ तेतीस कोटी देवता हैं सो इतने तो आवरदा मनुष्यकी नहीं है जो सब देवतानकी पूजा करिसके जासुं सर्व देवके सृळ जो पुरुषोत्तम विनकी सेवा करे तें सब देवकी सेवा होजाय ॥ और कोई वाकुं प्रतिबंधनहीं करसके ॥ जैसे एक वृक्षके अनेक पत्रहैं और फूलहैं और डारहैं विनकुं पोषण सृलसींचनतें होतहै ॥ ऐसे सब देवको पूजन श्रीपूर्णपुरुषोत्तमकी सेवातें होवे है ॥ ये सुनके माधवदास दलाल बहुत प्रसन्न भये ॥ फेर एकदिन चाचा हरिवंशजी खंभात आये ॥ तब वे सहेजपाल ढोशीनें पूछी जो श्रीठाकुरजीनें सात दिनपर्यंत गिरिराजजी कसुं धारण कियो ॥ वाको कारण कहो तब चाचाहरिवंशजी बोले ॥ जो नंदरायजीकुं सात प्रकारको अन्याश्रय हतो ॥ सो गिरिराज पूजनतें सात प्रकारको अन्याश्रय मिटयो ॥

सो एकतो मतुष्यमात्रपर देव ऋण होवेहे ॥ और दूसरो ऋषिऋण होवेहे ॥ और तीसरो पितृऋण होवेहे ॥ और चौथो देहके बलको अभिमान होवेहे ॥ और पांचमो सगानके बलको अभिमान होवेहे ॥ और छठो या लोगमें जो ये काम नहीं करूंगो तो मेरी निंदा होवेगी ॥ ये अहंकार होवेहे ॥ और सातमो ये तीनों ऋण भरे ऊपर रहेंगे तो मेरो परलोक बिगडेगो ऐसी रीतीसुं जीवमें सात प्रकारके अन्याश्रय रहेंहे ये छुडायवेके लीयें और मनमें निश्साधन होयके भगवदाश्रय दृढ करनो ये वात नंदरायजीकुं जतावेके लीयें श्रीठाकुरजीनें सात दिवससुधी श्रीगिरिराज धार्योहे ॥ ये वात पुष्टिप्रवाह मर्यादा ग्रंथकी टीकामें लिखी हे ॥ ये मुनके सहेजपाल डोशी बहुत प्रसन्न भये और फेर जो चाचाहरिवंशजीके संग दर्शन करवेकुं गये ॥ वे तीनो जने श्रीगुसाईंजीके ऐसे रूपपात्र हते ॥ वार्ता संपूर्ण ॥ वैष्णव ॥ २३५ ॥ ॐ ॥ ॥ ॥

श्रीगुसाईंजीके सेवक चांपाभाई अधिकारी ०

सो वे चांपाभाई गुजरातमें सेवक भये हते ॥ तब श्रीगुसाईंजीनें चांपाभाईकुं आपके पास राखे ॥ फेर नित्य कथा श्रवण करावते ॥ जब चांपाभाईकुं श्रीगुसाईंजीविषे संपूर्ण भाव उत्पन्न भयो और चांपाभाईकी ऐसी वृत्ती भई जो श्रीगुसाईंजीके ऊपर दोषबुद्धी न आवे ॥ तब श्रीगुसाईंजीनें चांपाभाईकी ऐसी दशा देखके अधिकार सौंप्यो तब चांपाभाई अधिकार करन लगे ॥ फेर श्रीगुसाईंजीनें वीचार कियो ॥ जो हमारे घरको जो अधिकार

करे तो बाकी बुद्धी फिरविना रहे नहीं ॥ परंतु चांपाभा-
ईकी बुद्धी जो फिरेगी तो याकी बुद्धीकुं आपण फेर ठेकाणे
लावेंगे ॥ ये विचारके आपने अधिकार सोंप्यो ॥ सो ए-
कसमय श्रीगुसाईंजी गुजरात पधारे ॥ रस्तामें वीरबल
मिले तब वीरबलने चांपाभाईसुं पूछी जो श्रीगुसाईंजी
शीतकालमें क्युं परदेश पधारेहें ॥ तब चांपाभाईने कही
जो करज बहुत है तब वीरबलने कही जितनो द्रव्य चाहिये
इतनो तैयार है ॥ श्रीगुसाईंजीकुं पाछे श्रीगोकुल पधराय
लेजावो ॥ तब चांपाभाईने श्रीगुसाईंजीसों वीनती करी
तब श्रीगुसाईंजीने ऐसो विचाऱ्यो जो चांपाभाईकी बुद्धी
फिरगई है हम द्रव्यकेलीयें परदेश पधारे हैं ऐसो समजो
है ॥ और हमारे पधारवेको कारण तो दैवी जीवके उद्धार
करवेको है ॥ तब श्रीगुसाईंजीने अर्धरात्रीकुं कूच कऱ्यो ॥
वीरबलकुं खबर न करी फेर दूसरे दिन चांपाभंडारीकुं
आपने आज्ञा करी जो तुमारी बुद्धी फिरगई है अब तुम
चरणोदक लेउ ॥ और श्रीसर्वोत्तमजीको पाठ करो तब
चांपाभंडारीने वीनती करी जो मैंने तो आपकी सेवाके
लीयें वीरबलकुं बात कीनी हती ॥ तब श्रीगुसाईंजीने
आज्ञा करी ॥ जो इतने प्रकारके द्रव्य श्रीठाकुरजी अं-
गिकार नहीं करें है ॥ एक तो राज्यको द्रव्य एक वेश्या-
को द्रव्य एक कृपणको द्रव्य और एक हिंसाको द्रव्य एक
ठगाईको द्रव्य एक चोरीको द्रव्य एक विश्वासघातको
द्रव्य एक कन्याविक्रयको द्रव्य ॥ इतने प्रकारको द्रव्य
श्रीठाकुरजी अंगिकार नहीं करेंहें ॥ जासुं तुम कोईकुं

द्रव्य संबंधी सेवाकी बात करोमती ॥ जिनको अंगिकार प्रभुकऱ्यो चाहेंगे विनको स्वतः सिद्ध होवेगो ॥ महा-
त्यागी होवे ॥ और भगवत्पदवीकुं प्राप्त भयो होवे तोहुं
दुष्ट अन्न खाय तें वाकी बुद्धी फिरे ॥ ये बात श्रीमहाप्रभु-
जीनें भक्तिवर्धिनी ग्रंथमें आज्ञा करीहै सो ॥ श्लोक ॥ लभ
तेसुदृढांभक्तिसर्वतोप्यधिकंपराम् ॥ त्यागेवाधकभूयस्त्वं
दुःसंसर्गात्तथाज्ञतः ॥ १ ॥ सो अन्न जो कह्योहै सो अन्न
तो कछु दुष्ट होवेही नहींहै ॥ परंतु वह अन्न जैसे द्रव्यसुं
खरीद भयो होवे ॥ वैंसी अन्नमें दुष्ट पदवी आय जायगी ॥
जासुं दुष्ट अन्नको और दुःसंसर्गको बहुत वचाव राखनो ॥
ये बात सुनके चांपाभाई बहुत प्रसन्न भये ॥ और ऐसो
नेम राख्यो ॥ जो कोईको द्रव्यसंबंधी सेवाकी बात कर-
णी नहीं ॥ सो वे चांपाभाई श्रीगुसाईंजीके ऐसे कृपापात्र
हते ॥ वार्ता संपूर्ण ॥ वैष्णव ॥ २३६ ॥ ॥ ॥ ॥
श्रीगुसाईंजीके सेवक तानसेनकी वार्ता ॥
सो तानसेन बडीजातवाले हते ॥ और गानविद्याको अ-
भ्यास बहुत सुंदर हतो ॥ सो दिल्लीमें पृथ्वीपतीके पास
रहते हते ॥ और सब गवय्यानमें तानसेनजी मुख्य हते ॥
और पृथ्वीपर जे कोई राजा और बडे आदमीहते ॥
विनके पास तानसेनजी गावे जाते हते ॥ सो लाखन
रुपैया इनाम लावते ॥ पृथ्वीपतीके कलावत जानके सब
ढरपते ॥ एकदिन तानसेन श्रीगुसाईंजीके पास गायवेकुं
आये ॥ सो गाये तब तानसेनकुं श्रीगुसाईंजीनें दशह-
जार रुपैया इनामके दिये ॥ और एक कौडीदीनी ॥ तब

तानसेननें पूंछ्यो जो दशहजार रुपैयातो ठीक परंतु कौडी कैसी है ॥ तब श्रीगुसाईंजीनें आज्ञा करी जो तुम पादशाहके कलावत हो जाके दशहजार रुपैया है और तुमारे गावेकी कीमत हमारे गवयनके आगे कौडी है ॥ तब तानसेननें कही जो ये बात में कैसेमातुं तब श्रीगुसाईंजीनें गोविंदस्वामीकुं आपके पास बुलाये ॥ और आज्ञा करी एक पद गावो ॥ तब गोविंदस्वामीनें एक सारंग रागमें गायो ॥ सो पद ॥ श्रीवल्लभनंदनरूपअनूपस्वरूपकह्योनहिजाई ॥ सो ये पद सुनके तानसेन चकित होयगये और गोविंदस्वामीको गान सुनके विचार कयो जो मेरोगान इनके आगे ऐसेहै जैसे मखमलके आगे टाटहै ऐसे है ॥ सो ये कौडीकी इनाम खरी ॥ तब गोविंदस्वामीसुं तानसेनने कही जो बावासाहेव मोकुं गान सिखावो ॥ तब गोविंदस्वामीनें कही हयतो अन्यमार्गीयसुं भाषणहुं नहीं करें ॥ तब तानसेन श्रीगुसाईंजीके सेवक भये ॥ और पचीसहजार रुपैया भेट करे ॥ और गोविंदस्वामीकेपास गायनविद्या सीखे ॥ और श्रीनाथजीके पास कीर्तन गायवे लगे ॥ जब तानसेन महिनामें एकवार पादशाहके पास जाते और बहूधा करके महावनमें रहते ॥ फेर राजा आसकरणकुं मिले सो बात आसकरणजीकी वार्तामें लिखीहै ॥ फेर एकदिन तानसेनजी श्रीनाथजीकेपास कीर्तन करत हते ॥ तब श्रीनाथजी सुनके मुसकाये ॥ तब वा दिनते तानसेननें पादशाहके इहांसुं जायवो आयवो छोडदियो ॥ और श्रीगुसाईंजीके पास रहे आये ॥ जि-

वैष्णव (२३८) एक ब्राह्मण और वाकी स्त्री. (३९९)

नसुं श्रीनाथजी बोलते हंसते श्रीगुसांईजीकी कानतें तान-
सेनकुं श्रीनाथजी सब अनुभव करावते ॥ सोवे तानसे-
नजी ऐसे कृपापात्र हते ॥ वार्ता संपूर्ण ॥ वैष्णव ॥२३७॥
श्रीगुसांईजीके सेवक एक ब्राह्मण और वा-
की स्त्री तिनकी वार्ता ॥ सो वे ब्राह्मण पूर्वमें रहेतो हतो ॥
सो श्रीगुसांईजी पूर्वदेशमें पधारे तब वे सेवक भये और
श्रीठाकुरजी पधरायके दोनों जने सेवा करन लग्ये ॥ तब
वे दोनोको भगवत्सेवामें मन बहुत लग्यो ॥ दिवसकुं
भगवत्सेवा करते और रात्रकुं भगवद्दार्ता करते ॥ सोसे-
वाके प्रतापतें विनदोनोनकुं विषयनकी वृत्ती भूलगई दि-
वसरात्र भगवत्स्वरूपको विचार कऱ्यो करते ॥ ऐसे करते
बहुत दिन बीते ॥ फेर ऐसी विचार कियो जो अब में
श्रीनाथजीके दर्शन जाउं तो ठीक ॥ सो उहांतें चले सो
थोडे दिननमें श्रीजीद्वार आय पहोंचे सो श्रीनाथजीको
संध्या आरतीको समय हतो ॥ तब भीड बहुत हतीऔर
वे स्त्री दुर्बल बहुत हती सो भीडमें वाकुं दर्शन न भये ॥
तब वाकुं बहुत विरह भयो ॥ और नेत्रनमेंसुं जल आवे
लग्यो वाकी ये दशा देखके श्रीनाथजी वाकुं हाथ पक-
डके निजमंदिरमें लग्ये ॥ तब देहसहित लीलामें प्रवेश
भई ॥ तब वो ब्राह्मण अपनीस्त्रीकुं ढूंढवे लग्यो ॥ बहुत
ढूंढी पण कहुं मिली नहीं ॥ तब वा ब्राह्मणनें श्रीगुसां-
ईजीसुं वीनती कीनी जो मेरी स्त्री दीखत नहींहिं में बहुत
ढूंढीहे ॥ तब श्रीगुसांईजीनें सुनके आज्ञा कीनी जो तेरी
स्त्री भगवल्लीलामें गईहै तब वानें वीनती कीनी जो भग-

वल्लीलामें तो लोग देह छोडके जायहैं ऐसे ग्रंथनमें लिखेहैं ॥ तब श्रीगुसाईजीनें आज्ञा करी प्रेममें कछु नेम नहींहै ॥ श्रीठाकुरजी प्रेमके वशहैं और प्रेम कछु निर्वल वस्तु नहींहै ॥ जहां लाज कान अभिमान सब छूट जायहैं ॥ ये बात मुनके वा ब्राह्मणनें वीनती कीनी जो मैं एकवार वाकुं देखुं तब अन्न जल लेउं ॥ तब श्रीगुसाईजी वा ब्राह्मणकुं संग लेके परासोली पघारे ॥ उहां रासको चोतरा हतो सो उहां श्रीगोवर्दननाथजी रास करत हते ॥ सो वा ब्राह्मणकुं श्रीगुसाईजीनें कृपा करके दिव्यदृष्टि दीनी तब रासके दर्शन भये ॥ और रासमें वाकी स्त्री दिखाई तब वह देखके मनमें बहुत प्रसन्न भयो ॥ और विचार कियो याके भाग्य ऐसे उदय भये ॥ और मेरे न भये ऐसे करके मनमें बहुत पश्चात्ताप करन लग्यो ॥ फेर देखे तो कछु नहीं हतो ॥ फेर श्रीगुसाईजीके पास आयके दंडवत करी और महाप्रसाद लियो तब वा ब्राह्मणकुं अत्यंत विरह भयो ॥ और सुखमें तें ज्वाळा निकसी तब वा ब्राह्मणकी देह छूट गई सो तत्काल भगवल्लीलामें प्राप्त भयो सो वे ब्राह्मण स्त्रीपुरुष श्रीगुसाईजीके ऐसे कृपापात्र हते ॥ जिनकुं भगवल्लीलामें जाते विलंब न लगी ॥ वार्ता संपूर्ण ॥ वैष्णव ॥ २३८ ॥ * ॥ ॥ ॥ ॥ श्रीगुसाईजीके सेवक ध्यानदास तथा जगन्नाथदासकी वार्ता ॥ सो वे ध्यानदास श्रीगुसाईजीके पास रहेते हते ॥ और जगन्नाथदास श्रीगुसाईजीके पास आयके रहे ॥ सो वे जगन्नाथदासके हाथमें पद्मकी चिन्ह हतो ॥

सो जा वस्तुमेंसुं एक काढते और एक बढजाती ॥ और दौय काढते सो दौय बढजाती ॥ परंतु घटती नहीं हति जगन्नाथदास भोरे बहुत हते विनकुं या बातकी खबर नहीं पढती ॥ एकदिन श्रीगुसाईंजीकी भेटके पैसा जगन्नाथदासकेपास हते ॥ तब बहुत भिखारी मागवेकुं आयें ॥ तब जगन्नाथदास काढ काढके सबकुं एक पैसा दो पैसा देते गये ॥ तब ध्यानदासनें श्रीगुसाईंजीसुं वीनती करी जो जगन्नाथदास सबकुं देवेहें सो कहांसुं काढेहें ॥ तब ध्यानदासकुं श्रीगुसाईंजीनें उत्तर दियो जो जे कोई सत्कर्म करवेकुं मन करेहें ॥ ताकी सहायता प्रभु आप करेहें ॥ और विनके लीयें सब पेहेलेसुं वनाय राखेहें ॥ विनकुं कछु कार्य करवे नहीं परेहें ॥ विनके कारज श्रीठाकुरजी स्वतःसिद्ध पहिलेसुं वनाय राखे हैं जासुं तुमकुं कोईको अभाव नहीं लयो चाहिये ॥ वैष्णवतो निर्दोष है और निर्दोष वस्तुमें जो दोषारोपण करेहें ॥ सो आप दूषित होवेहें ॥ जासुं तुम तो वैष्णव हो और दोषरहित हो काहेकुं कोईके उपर दोषारोपण करोहो ॥ ये मुनके ध्यानदास बहुत प्रसन्न भये ॥ और ऐसो नेम लियो आज पीछें भगवद्दधान छोडके कोईके दोष नहीं देखुंगो ॥ जन्मपर्यंत विननें कोईके दोष देखे नहीं ॥ भगवद्दधानहीं करत रहे ॥ सो वे ध्यानदास तथा जगन्नाथदास श्रीगुसाईंजीके ऐसे कृपापात्र हते ॥ जिनकुं तुर्त निर्दोष ज्ञान होयगयो ॥ सो वे ऐसे वैष्णव हते ॥ वार्ता सं० ॥ वै० ॥ २३९ ॥

श्रिगुसाईंजीके सेवक गोपालदासकी वार्ता ॥

सो वे गोपालदासकुं नामनिवेदन भयो ॥ तब गोपालदासनें श्रीगुसाईजीसों वीनती करी ॥ जो महाराज अब मेरेकुं कहा करणो ॥ तब श्रीगुसाईजीनें आज्ञा करी ॥ तुम गोपीनाथको सत्संग करो ॥ तब गोपालदास गोपीनाथके पास जायके रहे ॥ और विश्वास ऐसो राख्यो जो गोपीनाथविना विचार्यो कछु काम करे नहीं हे ॥ और गोपीनाथ कैसे हते साक्षात् पूर्णपुरुषोत्तम श्रीनाथजी जिनके पाछें फिय्योही करते ॥ सो कोईदिन गोपीनाथ कछु कार्यार्थ ब्रजमेसुं दिल्लीगये ॥ तब गोपालदासहुं संग गये ॥ रस्तामें जंगलमें रातपडी ॥ जहां कोई मनुष्य नहीं हतो सो एक वृक्षके नीचे डेरा कऱ्यो ॥ सो गोपालदासतो थाके हते सो सोयगये ॥ और गोपीनाथतो श्रीसर्वोत्तमजीकी जप करवेकों बैठगये ॥ जब रात सवापहेर गई तब एक सर्प आयो ॥ सो गोपालदासके गलामें काटवे लग्यो ॥ तब गोपीनाथनें लकडीसों उठायके सर्पकुं दूर कऱ्यो ॥ फेर सर्प आयो फेर गोपीनाथनें फेंक्यो ॥ ऐसे करके १०० सो वार फेंक्यो और १०० वार आयो ॥ तब वो सर्व बोल्यो जो तुमोकुं कहां सुधी फेंकेगो ॥ याको और मेरो रिणालुबंध ऐसोही लिख्यो है एक जन्ममें ये मेरे गलाको लोही पीवेहे और एक जन्ममें याके गलाकी लोही में पियुंहुं सो यामें तुम क्युं आडे आवोहो ॥ गोपीनाथ बोल्यो अब तो गोपालदासको छेलो जन्म है में याकु काटवे नहीं देउंगो ॥ तब सर्प बोल्यो याकी लोही पिये विना नहीं रहंगो ॥ तब गोपीनाथनें कही तूं बैठ

याके गलेकी लोही तोड़ुं प्यायदेउंगो तव सर्प बैठ रह्यो॥
 तव गोपीनाथने छुरी और कटोरि काढी नीचे कटोरी
 धरके और वाके गलामेंत लोही काढवे बैठयो तव गोपा-
 लदासकी नीद खुली तव बोले कौन है ॥ तव गोपीनाथ
 बोल्ये मैंहुं तव गोपालदासकुं सर्पकी खबर नहीं हती ॥
 तो हुं मनमें ऐसी आई जो गोपीनाथ करते होयंगे सो
 ठीकही करते होएंगे ॥ ऐसे समझके चुप कररहे ऐसी म-
 नमें न आई जो जंगलमें लायके मोड़ुं मारेहें ॥ और
 कछु जानतेही न हते और कछु पूछीहुं नहीं ॥ तव गोपी-
 नाथने वा सर्पकुं लोही प्यायके विदाक्यो ॥ और गो-
 पालदासकुं मलमपट्टी लगायके फेर गोपीनाथ सोयगये
 सवारे उठके दोनो चले फेर गोपीनाथनें सव वात गोपा-
 लदासकुं कही तव दोनोजणे श्रीगोकुल आये तव गोपी-
 नाथनें श्रीगुसाईंजीसों वीनती करी जो गोपालदासको
 मैंनें गला काटयो तोहुं कछु नहि बोले तव श्रीगुसाईंजीनें
 आज्ञा करी जो गोपालदासनें विश्वास राख्यो तो याको
 सव कार्य भयो और मृत्युसों वचे और वैष्णवके संगते
 जन्म जन्मके संकटसों छूटे ऐसो विश्वास चाहिये सो वे
 गोपालदास श्रीगुसाईंजीके ऐसे कृपापात्र हते ॥ जिनके
 विश्वासकी सराहना श्रीगुसाईंजी घडिघडि करते ॥ वार्ता
 संपूर्ण ॥ वैष्णव ॥ २४० ॥ * ॥ ॥ ॥ ॥
श्रीगुसाईंजीके सेवक पृथ्वीसिंघजी बीकाने-
रके राजा कल्याणसिंहजीके बेटाकी वार्ता ॥ सो वे पृथ्वी-
सिंघजी कविता बहुत करते और कवित्त सवेया छंद दोहा

चौपाई ऐसे अनेक प्रकारकी कविता रचि हती ॥ और रुक्मिणीविल और स्यामलता इत्यादिक भाषाके बद्धत ग्रंथ जिनने बनाये ॥ और दिवसरात्र श्रीठाकुरजीकीसेवा करते जिनको चित्त श्रीठाकुरजीके चरणारविंद छोडके और ठिकाणें लागतो नहीं हतो ॥ और विनको संसारके विषयमें चित्त लागतो नहीं हतो ॥ और वे ऐसे हते ॥ जब आपनी राणीकुं देखते तब पहेचानते न हते ॥ जो ये कौनहै ऐसो चित्त विनको श्रीठाकुरजीमें हतो ॥ और पृथ्वीसिंघजी परदेश गये तब मानसी सेवा करते ॥ एकदिन बीकानेर ऊपर शत्रु चढआये ॥ तब तीन दिन सूधी लडाई भई और दूसरे शत्रु दूसरी आडी आये ॥ तब श्रीठाकुरजीने तीन दिन सूधी लडाई करी और राजको काम चलायो और मंदिरमें दर्शन कोईको दिये नहीं ॥ और मंदिरके कमाड भीतरसु बंद होय गये ॥ कोईसों खुले नहीं ॥ चौथे दिन कमाड खुले जब पृथ्वीसिंघजी परदेशमें मानसि सेवा करते ॥ जब उहां खबर पढी जो तीन दिन सूधी श्रीठाकुरजीने दर्शन नहीं दिये ॥ सो पृथ्वीसिंघजीके मनमें ऐसे दर्शन भये ॥ तब ये बात बीकानेरमें लिख पठाई सो साची निकसी सो पृथ्वीसिंघजी ऐसे कृपापात्र हते ॥ प्रसंग ॥ १ ॥ फेर पृथ्वीसिंघजीने ऐसो नेम लियो जो ब्रजमें वास करनो ब्रजमें देह छोडनी या बातकी खबर पृथ्वीसिंघजीके शत्रुनकुं पढी सो विनने दिल्लीपतीकुं सिखायो ॥ याकुं कहुं दूर पठावें तो ठीक तब दिल्लीपतीने पृथ्वीसिंघजीकुं काबलकी मुहिमपर

पठायो सो उहां बहुत मुलुक जीते ॥ तव उहां पृथ्वीसिंघजीको काल आयो तव पृथ्वीसिंघजीनें कालतें कहीमें ब्रजमें देह छोड़ुंगो तव काल हट गयो ॥ तव पृथ्वीसिंघजी सांडनीपे बैठकर उहांसां चले ॥ सो दो दिनमें मथुरा आये और बीचमें नदी और पर्वत बहुत हते परंतु कोई ठिकाणे पृथ्वीसिंघजीकुं प्रतिबंध न भयो ॥ और काबुल ६०० कोस मथुराजीसां है सो दोय दिनमें आय गये ॥ ब्रजमें आयके श्रीनाथजीके दर्शन करके यमुना पान करके देह छोड दीनी ॥ सो वे पृथ्वीसिंघजी श्रीगुसांईजीके ऐसे कृपापात्र हते ॥ जिनकुं कालनें प्रतिबंध न कन्यो ॥ वार्ता संपूर्ण ॥ वैष्णव ॥ २४१ ॥ ❀ ॥ ॥

श्रीगुसांईजीके सेवक दुर्गावती राणी तिनकी वार्ता ॥ एकसमय श्रीगुसांईजी दक्षिण पवारे हते ॥ दक्षिणतें तैलंग ब्राह्मणजातिके या देशमें रहेवेके लीये लये सो रस्तामें घडा गाममें नर्मदा किनारे मुकाम कियो ॥ और उहां एक आदमी आंच लेवे गयो सो दक्षिणी हतो सब ठिकाणे इस्तु इस्तु पूछे सो वा देशमें कोई इस्तु समझतो नहीं हतो ॥ सो बहुत ठिकाणे फिरके पाछे आयो तव श्रीगुसांईजीसां कही जो इहां आंच नहीं मिले ॥ तव श्रीठाकुरजीकुं बहुत अवार होयगई हती ॥ जासुं श्रीगुसांईजीनें खीजके कहि या गाममें सब आंच बुझ जाड ॥ तव श्रीठाकुरजीनें श्रीगुसांईजीकी वाणी सत्य करवेके लिये वा गाममें सब ठिकाणे आंच बुझाय दीनी तव गाममें बहुत पुकार भई तव गामके लोगननें दुर्गावतीरा-

णीको राज हतो ॥ सो वारुं खबर दीनी ॥ तब आखा
गाम रसोई विना सूखन मरेहे गाममें हाहाकार होय
रह्योहे दक्षिणके ब्राह्मण आयेंहे विनने सब ठिकाणे आंच
बुझाय दीनीहे ये सुनके दुर्गावती राणी श्रीगुसाईंजीके
ढेरापर गई ॥ और जायके श्रीगुसाईंजीसों वीनती करी ॥
और महिना पेहेले एक सूरजग्रहण गयो हतो ॥ तब दुर्गा-
वती राणीनें एकसों आठ गामको संकल्प कन्यो हतो ॥
सो वे गाम श्रीगुसाईंजीकी भेट करे ॥ तब श्रीगुसाईंजीनें
आज्ञा करी हमतो कोईको दान नहीं लेवें हैं ॥ तब दुर्गा-
वती राणीनें कही अब मैं दान कन्या पीछे कैसे लेउं ॥
आपकी इच्छा आवे सो करो ॥ तब श्रीगुसाईंजीनें दुर्गा-
वतीके हाथनसुं विन तैलंग ब्राह्मणनकुं गाम बटवाय दीये
॥ सो अबसुधि वे गाम खावेंहे फेर श्रीगुसाईंजीकी ऐसि
सामर्थ देखके दुर्गावती राणी श्रीगुसाईंजीकी सेवक भई ॥
और श्रीगुसाईंजीसों वीनती करी जो सदैव आप मोकों
दर्शन देवो तब तलावकेपास पर्वत उपर श्रीगुसाईंजीके
ढेरा हते सो उहां बैठक कराई और उहां श्रीगुसाईंजीनें
ससाहपारायणकरी और उह दुर्गावती राणीकुं नित्य द-
र्शन होते फेर श्रीगुसाईंजी श्रीगोकुलपधारे और दुर्गाव-
तीराणी उहां नित्य श्रीगुसाईंजीके दर्शन करती ॥ साक्षात्
श्रीभद्गावतको पाठ करते ॥ ऐसे दर्शन होते सो वे दुर्गा
वती राणी श्रीगुसाईंजीकी ऐसि कृपापात्र हती ॥ वार्ता
संपूर्ण ॥ वैष्णव ॥ २४२ ॥ * ॥ ॥ ॥ ॥
श्रीगुसाईंजीके सेवक भगवानदास तिनकी

वार्ता ॥ सो वे भगवानदासजी सारस्वत ब्राह्मण रामरा-
यजी श्रीमहाप्रभुजीके सेवक हते ॥ सो बिनके यजमान
हते ॥ बिनके सत्संगतें भगवानदासजीकी बुद्धि निर्मल
भई हती ॥ एक दिन भगवानदासजी वृंदावनमेंसुं चले
सो रामरायके संग गोपालपूरमें जन्माष्टमीके दर्शन कर-
ने गये ॥ श्रीगुसांईजीके दर्शन किये ॥ सो साक्षात् पूर्ण
पुरुषोत्तमके दर्शन भये ॥ तब भगवानदासजीनें राम-
रायजीसुं कही मोकुं श्रीगुसांईजीके सेवक करावो तब
रामरायजीनें कही तुम गोविंददेवजीके सेवक भये हो ॥
तब भगवानदासजीनें कही इनमें और गोविंददेवजीमें
कल्ल भेद नही है गोविंददेवजीकी कृपातें तुम मिलेहो और
तुमारी कृपातें श्रीगुसांईजीके दर्शन भयेहैं ॥ जासुं मोकुं
अवीके अवी वीनती करके सेवक करावो ॥ तब रामरा-
यजीनें श्रीगुसांईजीसुं वीनती करके भगवानदासजीकुं
नामनिवेदन करायो ॥ तब भगवानदासजी श्रीगोवर्ध-
ननाथजीके दर्शन करे सो भगवानदासके हृदयमें भग-
वल्लीलाकी स्फूर्ती भई ॥ सो जन्माष्टमीके दिन सांझको
समय हतो ॥ वाईदिन भूखे हते ॥ जासुं सांझकुं नाम-
निवेदन भयो ॥ फेर वाईसमय श्रीनाथजीके सन्निधान
एक नयो पद करके गायो ॥ सो पद ॥ श्रवणसुतुसजनी-
वाजेमंदिलराआजनिसलागतपरमसुहाई ॥ अतिआवे-
शहोततनमनमें श्रीगोकुलवजतवघाई ॥ १ ॥ देदेकान-
सुनतअरुफूलतरावलकैरनरनारी ॥ नंदरानीढोटाजायो
हैहोतकुलाहलमारी ॥ अतिउंचेचढिटेरसुनावतपसरि-

उठेजेवाल ॥ गैयांवगदावोरेभैयांभयो नंदकेलाल ॥ ३ ॥
आनंदभरिअकुलायचलीसबसहजसुंदरीगोपी ॥ प्राहु-
र्भावजसोदासुतकोतामैतनमन ओपी ॥ ४ ॥ चंचलसा-
जशृंगारचंदसुखिचंचलकुंडलहारा ॥ हाथनकंचनथारवि-
राजतपदनूपुरझनकारा ॥ ५ ॥ वरखतचकुसुमन शोभि-
तगलिदरसचोंपजियभाई ॥ गावतगीतपुनीतकरतजगज-
सुमतिमंदिरआई ॥ ६ ॥ धन्यदिवसधन्यरात्रआजकीध-
न्यधन्ययहसबगोरी ॥ स्यामसुंदरचंदेलिरखतमानोअ-
खियांत्रिषितचकोरी ॥ ७ ॥ शोभायुतआईकीरतिअप-
ने गृहमानिवधाये ॥ जाचकजनधनघनजौवरखतभा-
नगोपतहांआये ॥ ८ ॥ आयजुरेसबगोपओपसोंभयो
जोमनकोभयो ॥ पंचासृतसीसनतेंद्वारतनाचतनंदन-
चायो ॥ ९ ॥ नाचतगवालवालरसभीनेहरददहींभररा-
जे ॥ इतनिसानउतभेरिदुंदुभीहरखिपरस्परवाजे ॥ १० ॥
खगसृगृहमदिशदिशभवननमेंदेखियतहेंसरसानें ॥ प्रान-
नकेआयेईद्रीजोर्यो ब्रजजनहुलसानें ॥ ११ ॥ ध्वजा-
वंदनमालालंकृतनंदभवनमेंसोहें ॥ व्योमविमाननभी-
रभाई लखअमरनकोमनमोहें ॥ १२ ॥ महाराजब्रज-
राजनदपेंजोमाग्योसोपायो ॥ जाकेऐंसोपूतभयोताको-
न्यायजगतजसछायो ॥ १३ ॥ जिनकोसुखस्मरतब्रह्मा-
दिकर्योहुलसेब्रजगेही ॥ कहिभगवानहितरामरायप्रभुप्र-
कटेप्राणसनेही ॥ १४ ॥ ये पद भगवानदासजीनें गायो
वामें छाप धरी कहेभगवानहितरामरायप्रभु प्रकटेप्रा-
णसनेही ॥ ये पद सुनके श्रीगुसाईजी बद्धत प्रसन्न भये ॥

और रामरायजीहुँ प्रसन्न भये ॥ और भगवानदासजीनें रामरायजीकी कृपा मुख्य मानी जिननें हजारन पद बनाये ॥ परंतु सबमें रामरायजीको नाम बतावते गये वे भगवानदासजी श्रीगुसाईंजीके ऐसे कृपापात्र हते ॥ प्रसंग ॥ १ ॥ फेर भगवानदासजी वृंदावनमें रहते हते सो गोपालपुरतें वृंदावन गये ॥ तब गोविंददेवजीके अधिकारीनें सुनी जो भगवानदास श्रीगुसाईंजीके सेवक भये हैं ॥ तब गोविंददेवजीके दर्शनकुं न आवे दिये ॥ दर्शन बंद किये तब गोविंददेवजीके शयनभोगमें दूधभात धर्यो तब गोविंददेवजीने आज्ञा करी जो भगवानदास श्रीगुसाईंजीके सेवक होयके आयेहैं वे दूधभात धरेंगे तब अरोगुंगो ये सुनके हरिदास अधिकारी भगवानदासके घर आयके पावन पडके बुलाय लगयो ॥ तब श्रीगोविंददेवजीने दूधभात माग लियो वे भगवानदासजी श्रीगुसाईंजीके ऐसे कृपापात्र हते ॥ प्रसंग ॥ २ ॥ और वृंदावनमें कोई वैष्णव और ब्रजवासि आवतो विनकुं भगवानदासजी वद्वत आदर करके महाप्रसाद लिवावते ॥ और द्रव्य देते जैसे वनें तैसे वैष्णवनकुं प्रसन्न करते ॥ फेर एकदिन भगवानदासजीनें सुनी जो श्रीगुसाईंजी इहां पधारेंहैं तब स्त्रीसों प्रीछि जो श्रीगुसाईंजी पधारे हैं आपणे कहा भेट करेंगे तब स्त्रीनें कही जो एक घोती तुम पेहेरो और एक घोती मैं पेहेरुंगी ॥ और सब भेट करेंगे ॥ अपने दोनो घरसुं बहार चले जाएंगे ॥ ये बात सुनके भगवानदासजी वद्वत प्रसन्न भये और स्त्रीकी सराहना करन लगे ॥ यामें

सोसों अधकी धर्महै ये धन्यहै ये कहेंगी जैसे करुंगो ऐसे
 कहेके ब्रजवासीके संग यमुनापार श्रीगुसाईजीके डेरा
 हते जहां गये दंडवत करके वृंदावनमें पधरायवेकी वीनती
 करी तब श्रीगुसाईजीकुं खबर पडी जो ये सर्वस्व भेट क-
 रेंगे ॥ तब श्रीगुसाईजी वृंदावन न पधारे पीछे श्रीगोकुल
 पधारे ॥ फेर भगवानदासजी उदास होयके पाछे वृंदावन
 गये ॥ फेर भगवानदासजीके घरमें चोरी भई तब द्रव्य
 गयो ॥ सो भगवानदासजीकुं द्रव्य गयो वाकी उदासी
 तो न भई ॥ और श्रीगुसाईजी न पधारे वाकी उदासी र-
 हिआई ॥ फेर भगवानदासजी आगरे जायके रहे ॥ प्रसंग
 ॥ ३ ॥ फेर आगरामें भगवानदास रहते ॥ नये नये पद
 बनावते कबहु महिला पंद्रिदिन श्रीगोकुल आयके रहते ॥
 कबहु गोपालपुरमें जायके रहते ॥ और कबहु अपने घर
 में श्रीठाकुरजीकी सेवा करते ऐसे करके भगवानदास-
 जीने हजारन पद बनाये ॥ और सब पदनमें ॥ कहत भ-
 गवानहितरामरायप्रभु ॥ या रीतीके कीर्तन विननें बहुत
 बनाये ॥ और सूजाकी दिवानगिरी करते हते ॥ और
 श्रीगुसाईजीके चरणारविंदमें जिनको चित्त दिवस रात
 रहतो सो भगवानदासको अंतसमय आयो तब अचेत
 होयगये ॥ तब विनके मनुष्यननें पालकीमें बैठायके वि-
 नकुं ब्रजमें लेचले ॥ जब आवे रस्तामें गये तब विनकुं
 चेत आयो ॥ तब विननें कही हमकुं पाछे लेजावो ये श-
 रीर ब्रजके लायक नहीं है ॥ कारण जो ब्रजमें वृक्षवृक्षमें
 वेणुधारीहै और पत्रपत्रमें चतुर्भुजहै ॥ ऐसे ठिकारणें ये देह

जैरगी तो श्रीठाकुरजीकुं वास आविगी ॥ तव उहां पाछें
 लगये ॥ सो आगरामें भगवानदासजीकी देह छूटी तव
 वाही क्षणमें भगवल्लीलामें प्रवेश भये ॥ सो वे भगवान-
 दासजी श्रीगुसाईंजीके ऐसे कृपापात्र हते ॥ वार्ता संपूर्ण ॥
 वैष्णव ॥ २४३ ॥ ❀ ॥ ॥ ॥ ॥ ॥
 श्रीगुसाईंजीके सेवक एक चूहडो हतो तिनकी
 वार्ता ॥ सो गोवर्धनमें रहतो हतो सो विलछकुंडपर नित्य
 घास खोदवे जातो हतो ॥ और विलछकुंडकेसामें श्री-
 नाथजीको मंदिर हतो श्रीनाथजी नित्य विलछकुंड दे-
 खते पीछे एकदिन अधिकारीजीनें भीत कराई तव श्रीना-
 थजीकुं विलछ देखवेमें आढी भीत आई तव श्रीनाथजीकुं
 विलछ देखवे विना सुहाय नहीं तव श्रीनाथजीनें वा चूहडा-
 को स्वप्नमें आज्ञा करी ॥ श्रीगोकुलमें जायके श्रीवल्लभजी-
 सों कहो जो ये भीत पढाय डारे तो मैं विलछकुंडकी सैल-
 करूं तव वा चूहडानें कही वे कैसे मानेंगे श्रीनाथजीनें कही
 जो तु मारो नाम श्रीगोकुलनाथजीहे ऐसे श्रीनाथजीनें
 कहाँ है ॥ तव वानें सवारे विचार कयो जो जाऊंके नहीं
 जाउं तव तीन दिनसुधी नित्य वाकुं स्वप्नमें आज्ञा करि वे
 तीसरे दिन गयो तव जायके पौरीयासों कही श्रीवल्लभजी-
 सों वीनती करो जो चूहडो वीनती करवे आयोहै तव वा
 पौरीयानें कही हम ऐसी वीनती नहीं करें तव वा बहार-
 वालानें कही जरूर कामहे ॥ तव पौरिया वाकुं हेला क-
 रवे लग्यो लोग एकट्ठे होयके दूरदूर करवे लग ॥ तव ये
 बातकी श्रीवल्लभजीकुं खबर पढी तव आपनें वाकु बुलायो

और सब बात पूछी तब वानें कही एकांतमें कहुंगो तब श्रीवल्लभजीनें एकांत करी तब वानें कही स्वप्नमें श्रीनाथजीनें मोसों ऐसैं कहीहे तब श्रीवल्लभजीनें तीनवार पूछी श्रीनाथजीनें मेरो कहा नाम लियो तब वानें तीनवार श्रीगोकुलनाथजी ऐसो नाम बतायो ॥ तब आपके नामकि पहचान मिली तब आपनें उठके वा भंगीकुं गलेछुं ल्मायो ॥ और मोटो उत्सव मान्यो ॥ और फेर गोपालपुर आयके वे भीत पडाय डारी ॥ श्रीनाथजीकुं सामे विलख कुंड दीखवे लम्यो ॥ सो वह चूहडो श्रीगुसाईंजीको ऐसो कृपापात्र हतो ॥ जाके कहेंतें श्रीवल्लभजीको नाम श्रीगोकुलनाथजी प्रसिद्ध भयो वार्ता सं० वै० २४४ श्रीगुसाईंजीके सेवक मधुकरसाहाराजाकी ० सो वह मधुकरसाह ओडछानगरको राजा हतो ॥ सो श्रीगुसाईंजी कोईएक समय ओडछापघारें हते ॥ सो वह राजा सेवक भयो ॥ और श्रीठाकुरजीकी सेवा करन ल्यो ॥ और जे कोई वैष्णव आवतो वाको बहुत सत्कार करते और जो कोई कंठी बंध आवतो वाके चरणस्पर्श करते ॥ और पाव धोवते ये बात देखके वाके भाईबंद मस्करी करते फेर एकदिन वा राजाके काकानें एकगधा पगायके वाकुं दस वीस कंठी पेहेरायके और तिलक करके वा राजाके पास पठायो ॥ तब वा राजानें वा गर्दभके चरणस्पर्श करे और पगधोयके चरणामृत लियो ॥ वा राजाको शुद्धभाव देखके वाईसमय श्रीठाकुरजी प्रगट होयके और राजाकुं दर्शन दिये और आज्ञा करी जो

कछु मागो तव मधुकरसाहनें माग्यो ॥ जो मेरो भाव
 वैष्णवनमें ऐसोही रहे जिनकी कृपातें आपनें मोकुं दर्शन
 दियेहें तव श्रीठाकुरजी प्रसन्न होयके कही ऐसोही तेरो
 भाव रहेगो सो वै मधुकरसाह श्रीगुसाईंजीके ऐसे कृपा-
 पात्र हते ॥ वार्ता संपूर्ण ॥ वैष्णव ॥ २४६ ॥ ❀ ॥ ॥
 श्रीगुसाईंजीके सेवक तुलसीदासजी सारस्वत
 ब्राह्मण तिनकी वार्ता ॥ सो वै तुलसीदासके पिता श्रीगु-
 साईंजीके जलघरिया हते और तुलसीदास छोटे हते ॥
 तव श्रीगिरिधरजी आदि छे बालक हते तिनके संग खेलवे
 जाते और श्रीगुसाईंजी जब लालजीनकुं बुलावते तब छ-
 लालजी उठके दौडके श्रीगुसाईंजीपास जाते तब तुलसीदा-
 सहुं संग जाते ॥ तव श्रीगुसाईंजी विनकुं बालक जानके ल-
 लजी कहते ॥ और विनके मातापिता छोटी अवस्थामें भग
 वच्छरण भये हते ॥ तव वै तुलसीदासको पालनपोषण श्री-
 गुसाईंजी करते और तुलसीदास अपने मनमें यूं जानते जो
 मैं इनकी बालकहुं जब तुलसीदास बडे भये ॥ और श्री-
 गुसाईंजीके बालकहुं बडे भये ॥ तव श्रीगुसाईंजीनें सब
 बालकनके माथे सेवा पधराय दीनी तव तुलसीदास-
 जीके मनमें ऐसी आई जो मोकुं श्रीगुसाईंजीनें कछु से-
 वा दीनी नहीं ॥ तव श्रीठाकुरजीनें श्रीगुसाईंजीसुं आज्ञा
 करी जो वै तुलसीदासकुं सेवा पधराय दें ॥ इन द्वारा
 कितनेक जीवनको उद्धार होवेगो ॥ ये बालकपनामें अप-
 नें मनमें मैं श्रीगुसाईंजीको लालजीहुं ऐसे जानते हते ॥
 तव श्रीगुसाईंजी विनकुं बुलायके और श्रीगोपिनाथजी

ठाकुरजी पधराय दिये ॥ और आज्ञा करी जो तुम सिं-
घदेशमें जायके जीवनकुं भक्तिमार्गको उपदेश करो ॥ और
सबकुं अष्टाक्षरमंत्र सुनावी तब वे लालजी नाम धरायके
और श्रीठाकुरजी पधरायके उहांसुं चले फेर रस्तामें आय-
के विननें रसोई करी ॥ और भोग धन्यो फेर श्रीठाकुरजीसुं
वीनती करी जो तुम ये रूखीरोटी अरोगी ॥ और जो नहीं
आरोगीगे तो मैं श्रीगुसाईंजीसुं कहि देऊंगो ॥ तब श्रीठा-
कुरजी प्रसन्न भये और अरोगी और वासुं कही जो तूं
कोई दिन हमारी कोई बात श्रीगुसाईंजीसुं मति कहियो
हम श्रीगुसाईंजीसुं बहुत डरपें हैं ॥ तब वे श्रीठाकुरजी
पधरायके सिंघदेशमें आये ॥ और ऐसे भोले हते जो म-
नमें यूं जाणते जो श्रीगुसाईंजीसुं श्रीठाकुरजी बहुत डरपें
हैं जासुं जन्म सूधी श्रीठाकुरजीकुं श्रीगुसाईंजीको डर
बतायो करते ॥ और श्रीठाकुरजी इनसुं सदैव ऐसे वर्तते
जोमें श्रीगुसाईंजीसुं बहुत डरपुंइं सो वे तुलसीदास श्रीगु-
साईंजीके ऐसे कृपापात्र हते ॥ और श्रीठाकुरजीइं विनकुं
लालजी कहते ॥ और विनके मनमें लालजीपनेकी बुद्धि
सदैव रहेती जासुं विनकुं कितनेक लालमति कहते ॥ और
श्रीगिरिराजजी और श्रीयमुनाजी और श्रीगोकुल और
ब्रजभूमी विनमें विनकी दृढ बुद्धि हती ॥ दुर्लभ मनुष्यदे-
हको लाभ विननें भगवत्सेवा करके लियो ॥ अविस्मृधी
सिंधुदेशमें विनके बंशकेहें ॥ सो लालजी वाले कहे जा-
यहें ॥ सो वे श्रीगुसाईंजीके ऐसे कृपापात्र हते ॥ वार्ता
संपूर्ण ॥ वैष्णव ॥ २४६ ॥ * ॥ ॥ ॥ ॥

श्रीगुसाईंजीके सेवक एक सौदागर तिनकी ० वह सौदागर आगरामें रहेतो हतो ॥ और गोपालपुरमें श्रीनाथजीके दर्शन करनकुं आये तब श्रीनाथजीके दर्शन करके श्रीगुसाईंजीके दर्शन किये ॥ सो साक्षात् पूर्णपुरुषोत्तमके दर्शन भयो ॥ तब वह सौदागर कुटुंबसहित श्रीगुसाईंजीके सेवक भये ॥ तब श्रीठाकुरजी पधरायके सेवा करन लगे ॥ ऐसे सेवा करते ॥ एकदिन जन्माष्टमीको उत्सव आयो ॥ तब वा सौदागरके परोसमें एक बनिया रहेतो हतो सो वा बनियाको वेटा परदेशमें जहाज लेके वेपार करवे गयो हतो ॥ सो जहाज बूढ गयो ॥ ऐसी खबर वा बनियाकुं आई हती ॥ तब वे रोवन लय्यो ॥ तब वा सौदागरनें वा बनियाकुं कही जो आज जन्माष्टमीको दिन है रोवो मति तब वानें कही जो वेटा जैसी वस्तु गई ॥ कैसे न रोउं ॥ तब वा सौदागरनें कही तेरो वेटी नहीं मरेगो ॥ तब बनियानें कही जो तीनदिनसूधी नहीं रोउंगो ॥ तुम वैष्णव साचे होवोंगे तो मेरो वेटा आवेगो ॥ तब श्रीठाकुरजीनें वा सौदागरकी बात सत्य करवेके लिये जहाज बुढती बखत एक पाटियापर जीवतो राख्यो हतो ॥ सो दो दिनमें पाटिया किनारे लय्यो ॥ तब वानें देशमें कागद लिख्यो तब जन्माष्टमीके दूसरे दिन वाको कागद आयो ॥ तब वो बनिया जायके सौदागरके पावन पय्यो ॥ और कही जो तुमारी बात सत्य भईहै ॥ तब वा बनियाकुं सौदागरनें कही ॥ ये सब श्रीगुसाईंजीको प्रतापहै ॥ तब वो बनिया वेटाकुं संग लेके और वा सौदा-

गरकुं संग लेके गोपालपुरमें आयी ॥ तब वो बानया
 सौदागरके संगसुं सेवक भयो ॥ और फेर वा सौदागरने
 श्रीगुसांईजीसुं पूछी जो श्रीनाथजीके चरणारविंद खेलके
 दिननमें काहेकुं ढांकेहे ॥ तब श्रीगुसांईजीने आज्ञा करी
 जो ब्रजभक्त खेलवेकुं आवेहैं ॥ तब चरणारविंदके दर्शन
 करेहैं ॥ तब चरणारविंदमें दास्यभक्ती है सो ब्रजभक्त-
 नकुं स्फुरित होवेहैं ॥ तब दासत्व हृदयमें लायके श्री-
 ठाकुरजी सन्मुख हाथ जोडके ठाढे रहेहैं और श्रीठाकुर-
 जी खेले हैं ॥ और श्रीठाकुरजीके सन्मुख ब्रजभक्त हाथ
 जोडके नीची दृष्टी करके ठाढे रहेहैं तब श्रीठाकुरजीकुं
 खेलवेको मुख नहीं परेहैं ॥ तब श्रीठाकुरजी चरणा-
 रविंद ढांकेके दास्यभक्तीकुं छिपायके सख्यभक्तीकुं
 प्रगट करेहैं ॥ तब ब्रजभक्तनकुं सख्यभक्ती उत्पन्न हो-
 वेहैं ॥ तब श्रीठाकुरजीके सन्मुख खेलेहैं तब श्रीठाकुर-
 जीकुं खेलको आनंद होवेहैं ॥ याही तें खेलके समय श्री-
 नाथजीके चरणारविंद वस्त्रसुं ढांकेहैं ॥ ये मुनके वे सौ-
 दागर और वैष्णव बहुत प्रसन्न भये ॥ तबतें वा सौदाग-
 रने श्रीठाकुरजीके चरणारविंद निशदिन हृदयमें राखे ॥
 इनको ध्यान चुकुंगो तो दासपणो सिद्ध नहीं होवेंगो ॥
 याहीतें चरणारविंदको ध्यान दृढराख्यो ॥ वे सौदागर
 श्रीगुसांईजीके ऐसे कृपापात्र हते ॥ वार्ता संपूर्ण ॥ वै-
 ष्णव ॥ २४७ ॥ ❁ ॥ ॥ ॥ ॥ ॥ ॥
 श्रीगुसांईजीके सेवक हृषीकेश क्षत्रीकी वार्ता
 सोवे हृषीकेश आगरमें रहेते हते ॥ जब श्रीगुसांईजी आ-

गरे पधारे तव हृषीकेशजी श्रीगुसाईजीके सेवक भये ॥
 सो वे हृषीकेशजी घोडानकी दलाली करते हते ॥ एक
 सौदागर बहुत घोडा लायो ॥ हृषीकेशनें विनके घोडा
 वेचाय दिये ॥ सो वा सौदागरकेपास एक सरस घोडा
 हतो ॥ वाके चिन्ह हृषीकेशजी पेहेचानते हते ॥ और कोई
 पेहेचानतो नहीं हतो ॥ तव वे हृषीकेशनें सौदागरकेपास
 घोडा माग्यो ॥ तव वा सौदागरनें दलालीमें वह घोडा
 दियो ॥ तव हृषीकेशनें घोडो श्रीगुसाईजीकुं भेट कन्यो ॥
 सो वह घोडा देखके श्रीगुसाईजी बहोत प्रसन्न भये ॥ फेर
 हृषीकेशनें श्रीगुसाईजीसों वीनती करी जो श्रीमहाप्रसु-
 जीको स्वरूप कृपाकरके मोकुं समझावें ॥ तव श्रीगुसा-
 ईजीनें आज्ञा करी सो ॥ श्लोक ॥ सौंदर्यनिजहृद्गतप्रक-
 टितंस्त्रीगृहभावात्मकंपुरुषंचपुंनस्तदंतरगतंप्रावीविश
 त्त्वप्रिये ॥ संश्लिष्टावुभयोर्वभौरसमयः कृष्णोहितत्सा-
 क्षिकंरूपंतत्तयात्मकंषरमिध्यैयंसदावल्लभं ॥ १ ॥ ये
 ग्रंथ श्रीगुसाईजीनें आज्ञा करी तव कृष्णभट्टजी उहां बैठे
 हते ॥ फेर श्रीगुसाईजी सेवामें पधारे तव हृषीकेशनें कृ-
 ष्णभट्टजीसुं कही जो ये ग्रंथ मोकुं आछीरीतीसुं सम-
 झावो ॥ तव कृष्णभट्टजीनें कही जो श्रीठाकुरजीके हृद-
 यमें श्रीस्वामिनीजी विराजेहें और श्रीस्वामिनीजीकेहृ-
 दयमें श्रीठाकुरजी विराजेहें ॥ जव विप्रयोग उत्पन्न भयो
 तव दोनोके हृदयतें वे स्वरूप प्रगट भये ॥ तव श्रीठा-
 कुरजीनें ऐसे मान्यो में स्वामिनीजीइं ॥ और श्रीस्वा-
 मिनीजीनें ऐसे मान्यो ॥ हम श्रीठाकुरजीहें ॥ ऐसो अ-

त्यंत विरह दोनोनकुं उत्पन्न भयो ॥ तब दोनोनके सु-
खते विरहाग्नीकी ज्वाला बहार प्रगट भई ॥ तब श्रीठा-
कुरजीने दोनो अग्नी संयोगरसमें प्रवेश कराई ॥ तब
तृतीय स्वरूप प्रगट भयो ॥ सो स्वरूप दोनोनके विर-
हकी अग्नी और दोनोनको संयोगरस ऐसो तृतीयात्मक
भयो ॥ ऐसो स्वरूप श्रीठाकुरजीकुं सदा बल्लभ परमो-
त्कृष्ट वा स्वरूपको सदा ध्यान करवे योग्यहै ऐसो स्व-
रूप श्रीमहाप्रभुजीको है ॥ विनकी कृपाविना संयोगरस
और विप्रयोगरसको अनुभव न होने ॥ ये बात सुनके
हृषीकेशजी ये स्वरूप हृदयमें राख्यो ॥ और भगवत्स्व-
रूपको दर्शन लीलासहित हृदयमें होवे लग्यो ॥ जैसीली-
लासहित दर्शन करते तैसे पद करके गावते ॥ सो एक
दिन चाचाहरिवंशजी हृषीकेशके घर आये ॥ तब श्रीगु-
साईजीकेपास श्रीमहाप्रभुजीके स्वरूपको ग्रंथ शीखे हते ॥
सो चाचाजीकुं कह्यो तब चाचाजीने श्रीमहाप्रभुजीको
स्वरूप नामात्मक श्रीसर्वोत्तमजीमें है ॥ और रूपात्मक
बल्लभाष्टकमें है ॥ और गुणात्मक स्फुरितकृष्ण प्रेमासृ-
तमें है ॥ इन ग्रंथनमें वर्णन है ॥ सो तीनोंग्रंथनको समा-
वेश वा एक श्लोकमें कर दिखायो ॥ तब हृषीकेशके हृद-
यमें श्रीमहाप्रभुजीको स्वरूप स्थिर भयो ॥ क्षणक्षणमें
विचार करन लगे कोईसमय तो श्रीकृष्णास्यं कृपानिधी ॥
ऐसे स्वरूपको विचार करें और कोईसमय वैश्वानर ऐसे
स्वरूपको विचार करें ॥ और कोईसमय ॥ तत्सारसूत-
रासखी भावपूरितविग्रहः ॥ ऐसे स्वरूपको विचार करें ॥

और कोईसमय ॥ वस्तुतःकृष्णएव ॥ ऐसे स्वरूपको विचार करें ॥ और कोईसमय श्रीभागवतप्रतिपदमणिवरभावांशुसृपितामृतिः ॥ ऐसे स्वरूपको विचार करें ॥ सो हृषीकेशकुं श्रीमहाप्रभुजीके स्वरूपको ऐसो अनुभव होवे लग्यो ॥ तव हृषीकेशकुं श्रीमहाप्रभुजीको ऐसो स्वरूप दृढ भयो ॥ सो वे हृषीकेश श्रीगुसांईजीके ऐसे कृपा पात्र हते ॥ वार्ता संपूर्ण ॥ वैष्णव ॥ २४८ ॥ ॐ ॥ ॥

श्रीगुसांईजीके सेवक कान्हदास राजनगरमें रहते तिनकी वार्ता ॥ एकसमय श्रीगुसांईजी राजनगर पधारते हते ॥ तव कान्हदास श्रीगुसांईजीके सेवक भये ॥ और श्रीठाकुरजी पधरायके सेवा करन लगे ॥ तव कान्हदासकी स्त्री और वेटा सब सेवामें नाहाते हते ॥ और कान्हदासके वेटाकी वद्ध हती ॥ सो भौली वद्धत हती ॥ और कछु आचार विचारमें नहीं समझती हती ॥ तव वाकुं सेवामें नहीं नाहावे देते हते ॥ तव वो वद्ध जो वैष्णव आवतो वाकी जूठन उठावती और पीतना करती और वैष्णवके पांव दावती और पंखा करती और नव्हावती और घरमें बुहारीकरती ॥ ऐसे काममें वा वद्धकुं लगाय राखी हती ॥ परंतु वाकुं भोळी जाणके श्रीठाकुरजी वासुं आयके वातें करते ॥ और सब प्रकारकी लीला जतावते ॥ एकदिन कान्हदास श्रीठाकुरजीकुं श्रृंगार करते हते ॥ और मनमें ऐसी आई जो आज जोहा लावनी है और मोचीके घर जानो है ऐसो मनमें विचार करन लगे ॥ तव कोईएक मनुष्य कान्हदासकुं बुलायवे आयो ॥ तववाने

वेटाकी बहसुं पूंछी तुमारो सुसरो कहहि ॥ तब बहुरे कही
सोचीके घर जोडा लेवे गये हैं ॥ सो ये बात सुनके कान्-
हदास बहार आयके बहुरे पावन परे ॥ और कहेन लगेवै-
ष्णवकी सेवाके प्रतापते तेरे हृदयमें भगवत्स्वरूप उदय
भयो है ॥ जासुं तुं मेरे मनकी सब बात जान गई है ॥ और
श्रीठाकुरजी तेरे ऊपर प्रसन्न है ॥ और मैं बहुत खूब
हुं सो तेरो स्वरूप मैंने जाण्यो नहीं ॥ अब नित्य सेवा
तुम करो ॥ और शृंगार तेरी इच्छा आवे सो ठाकुरजी-
कुं धरावो ॥ और सायग्री तेरी इच्छा आवें सो धरावो ॥
तब वा दिनते बहुरे सेवामें नाहावे लगी ॥ और घरके स-
नुष्य सब बहुरे पूंछके सेवा करन लगे ॥ सो वे कान्-
दास और कान्हादासके वेटाकी बहुरे ऐसे कृपापात्र भग-
वदीय हते ॥ वार्ता संपूर्ण ॥ वैष्णव ॥ २४९ ॥ ❀

श्रीगुसांईजीके सेवक एक मथुरादास तिनकी
वार्ता ॥ सो वे वैष्णव गोपालपुरमें रहते हते ॥ एकदिन मथु-
रादासनें श्रीगुसांईजीसों पूछ्यो जो आपकी सृष्टीमें और
श्रीमहाप्रभुजीकी सृष्टीमें कितनो तारतम्य है ॥ तब श्री-
गुसांईजीने आज्ञा करी हमने तेरो त्याग कियो है ॥ उहां
दशपंदरें वैष्णव बैठेहते ॥ विनने त्यागकरवेकी बात साची
मानके मथुरादाससों भगवत्स्मरण करनो छोडदियो ॥
और सब गाममें बात फेलायदीनी कोई वासुं भगवत्स्म-
रण न करे ॥ और कोई वाके पासहुं न बैठे ॥ तब मथु-
रादासनें ऐसो विचार्यो जो जंगलमें जायके कोईकुं खबर
न पडे ऐसे ठेकाणे देह छोडदेनी और अन्नजल त्याग

दियो ॥ ऐसे तीन दिन बीतगये ॥ चौथे दिन वे मथुरा-
दास बहासु जंगलमें देह छोडवेके लीये चलयो तब रस्तामें
दोकोसपर एक गाम हतो ॥ उहां श्रीमहाप्रभुजीकी सेवक
एक डोकरी रहेती हती जमनावाई वाको नाम हतो ॥ तब
मथुरादासने विचार्यो जो जमनावाईकुं मेरे त्याग कर-
वेकी खबर न होयगी ॥ यासुं याकुं भगवत्स्मरण करतो
जाउं तब मथुरादास जमनावाईके घर गये और जायके
भगवत्स्मरण किये ॥ तब जमुनावाइनै कही तुम इहां
प्रसाद लेके जावो ॥ तब मथुरादासने कही मोकुं श्रीगु-
साईजीने त्याग क्यो है ॥ और वैष्णवननेहुं त्याग
कियो है मैं देह छोडवे जाउंहुं ॥ तब जमनावाइनै कही
तुम बावरी बात करोहो ॥ श्रीगुसाईजी कोईकुं त्याग करे
नहीहि ॥ और श्रीठाकुरजीने श्रीमहाप्रभुजीकुं ऐसो वचन
दियोहै जिनकुं तुम ब्रह्मसंबंध करावोगे हम बिनकुं त्या-
ग नहीं करेंगे ॥ और बिनके दोष रहेंगे नहीं ॥ सिद्धांत-
रहस्यग्रंथमें कहीहै सो ॥ श्लोक ॥ ब्रह्मसंबंधकरणात्सर्वे-
पादेहजीवयोः ॥ सर्वदोषनिवृत्तिर्हिदोषाः पंचविधाः स्मृताः
॥ १ ॥ और अंतःकरणप्रबोध ग्रंथमें कहीहै ॥ सोवाक्य ॥
सत्यसंकल्पतोविष्णुर्नान्यथातुकरिष्यति ॥ अन्यच्च ॥
लौकिकप्रभुवत्कृष्णोनद्रष्टव्यः कदाचन ॥ और श्रीमहा-
प्रभुजीनेहुं निबंधमें कहीहै जो हमारे मार्गमें आवेंगे और
अधर्म करेंगे और वेदनिंदा करेंगे तोहुं नरकमें न जाएंगे
और हीन योनीमें जन्म लेंगे ॥ श्लोक ॥ अत्रापिवेद-
निंदायामधर्मकरणात्तथा ॥ नरकेन भवेत्पातः किंतुहीने-

पुजायते ॥ १ ॥ और श्रीठाकुरजीनें श्रीगीताजीमें कह्यो
 है सो ॥ श्लोक ॥ सर्वधर्मान्परित्यज्य मामेकं शरणं व्रज ॥
 अहं त्वांसर्वपापेभ्यो मोक्षयिष्यामि मा शुचः ॥ १ ॥ ऐसे अ-
 नेक ठेकाणे कह्यो है सो श्रीगुसांईजी कैसे त्याग करेंगे
 तेरी बात में साची नहीं मानुं ॥ तुम इहां बैठो दर्शन करो
 महाप्रसाद ले मेंहुं प्रसादलेके तुमारे संग श्रीगुसांईजीके
 पास चलुंगी ॥ तब मथुरादासनें न्हायके महाप्रसाद लि-
 यो ॥ फेर वे जमनाबाई मथुरादासकुं संगलेके श्रीगुसां-
 ईजीके पास आई ॥ तब वा मथुरादासकुं देखके श्रीगुसां
 ईजीनें कह्यो वैष्णव तूं चार दिनसुं कहां गयो हतो ॥ तब
 जमनाबाईकी बात सत्य करवेके लीये और मार्गकी स्थि-
 रता राखवेके लीये और सृष्टिको तारतम्य जणायवेके
 लीये श्रीगुसांईजीनें मथुरादासकुं ऐसी लीला दिखाई सो
 वे मथुरादास श्रीगुसांईजीके ऐसे कृपापात्र हते ॥ वार्ता
 संपूर्ण ॥ वैष्णव ॥ २६० ॥ ❀ ॥ ॥ ॥
 श्रीगुसांईजीके सेवक माधवेंद्रपुरीकी वार्ता ॥
 सो वे माधवेंद्रपुरी मध्व संप्रदायके संन्यासी हते और अ-
 डेलमें रहेते हते ॥ बिनकेपास श्रीगुसांईजी पढवे जाते
 हते ॥ और नित्य पुस्तक श्रीगुसांईजी बिनकेपास धरी
 आवते ॥ और घरमें आयके भगवत्सेवा करते ॥ फेर
 एकदिन माधवेंद्रपुरीनें श्रीगुसांईजीसुं कही जो तुम पुस्त-
 क इहां धर जावोहो और कछ गोखो नहींहो ॥ तब श्री-
 गुसांईजीनें आज्ञा करी तुम कहो सो बताऊं ॥ तब माध-
 वेंद्रपुरीनें जो स्थल पूछयो सो सब श्रीगुसांईजीनें स्पष्ट

करके बतायो ॥ सो ऐसो बतायो जैसे माधवेंद्रपूरीकुं आवतो ॥ जासुं दशगुणो विशेष बतायो ॥ तव माधवेंद्रपूरीकुं बडो विचार भयो ॥ जो ये कहा कारण होयगो ॥ इतनो कहांसो शीखे होयंगे तव अनेक प्रकारको विचार करन लगे ॥ सो बडत मनमें विस्मय जैसे होय गयो ॥ तव विचार करते रातकुं सुते तव श्रीठाकुरजीनें माधवेंद्रपूरीकुं स्वप्नमें कह्यो ॥ जो में श्रीगिरिराजजीमें प्रगट भयोहूँ ॥ और मेरी सेवा भरेविना कोई जाने नहीं है ॥ जासुं मेरी सेवा शिखायवेकेलीयें में दूसरो रूप धरके श्रीविठ्ठलनाथजी प्रगट भयोहूँ ॥ सो तेरे मोकुं प्राप्त होवेकी इच्छा होवेतो इनकी शरण जाओ ॥ तव माधवेंद्रपूरीकी नौद उढगई ॥ फेर आखीरात विचार क्यो कब दिन होवेगो और कब श्रीगुसाईंजी पढवे आवेंगे ॥ फेर दूसरे दिन श्रीगुसाईंजी पढवे पधारे तव माधवेंद्रपूरीनें श्रीगुसाईंजीसुं कही जो आप पूर्णपुरुषोत्तम होयके हमजैसेनकुं मोह करवेकेलीयें पढोहो अब मोकुं गुरुदक्षणा द्यो ॥ आपके माये श्रीनाथजी विराजे हैं ॥ जासुं मोकुं थोडे दिन सेवा करवेकी आज्ञा देउ और आप मोकुं सेवक करो ॥ तव श्रीगुसाईंजीनें माधवेंद्रपूरीकुं कही हम तुमारेपास विद्या पढे हैं हम तुमकुं सेवक नहीं करेंगे ॥ तुमकुं हम उपदेश कैसे दें ॥ तव माधवेंद्रपूरी बडत उदास भये ॥ फेर श्रीगुसाईंजीकुं उत्थापनके समय श्रीनवनीतप्रीयाजीनें आज्ञा कीनी जो माधवेंद्रपूरीकुं आप सेवक करो ॥ तव श्रीगुसाईंजीनें माधवेंद्रपूरीकुं मान निवेदन करायो ॥

और ब्रजमें संग लेपघारे और श्रीनाथजीकी सेवामें राखे और बंगाली लोग माधवेंद्रपूरीकेपास राख दिये ॥ तब माधवेंद्रपूरी श्रीनाथजीकी सेवा करन लगे परंतु माधवेंद्रपूरी संन्यासी हते ॥ जो कछु श्रीनाथजीकी भेट आवती सो सबबंगाली ब्राह्मणनकुं दे देते कछु राखते नहीं ॥ और श्रीगुसांईजी उनकुं कछु कहते नहीं ॥ तब बहुतदिन ऐसे बीतगये फेर श्रीनाथजीकी इच्छा वैभव बढ़ायवेकी भई ॥ तब श्रीनाथजीनें माधवेंद्रपूरीसुं कही तुम दक्षिणमें जायके मलयागरपर्वतमेंसुं चंदन लावो ॥ तब माधवेंद्रपूरी चंदन लेवेकुं गये ॥ तब पाछेसुं कृष्णदासजीनें बंगालीनकुं काढे ॥ ये बात श्रीनाथजीके प्राकट्यमें लिखीहै जासुं इहां नहीं लीखी ॥ फेर माधवेंद्रपूरी मलयागर चंदन लेवेकुं गये ॥ तब हिमगोपालजीके दर्शन कन्यो ॥ तब हिमगोपालजीनें आज्ञा करी जो तुम हमकुं इहां चंदन लगावो ब्रजमें मत जावो ॥ तब माधवेंद्रपूरीनें उहां चंदन समर्प्यो ॥ और उहां भगवल्लीलाकुं प्राप्त भये ॥ सो वे माधवेंद्रपूरी श्रीगुसांईजीके ऐसे कृपापात्र हते ॥ वार्ता संपूर्ण ॥ वैष्णव ॥ २५१ ॥ ❀ ॥ ॥ ॥

श्रीगुसांईजीके सेवक जाडा कृष्णदासकी वार्ता ॥ सो बिनकुं सब ब्रजवासी चाचा जाडा कहते और बडे चतुर हते ॥ और सब संतमहंतनकी परीक्षा लैते फिरते हते ॥ एकदिन श्रीगोकुलमें श्रीगुसांईजीकी परीक्षा लेवेकुं आये ॥ वाई समय श्रीगुसांईजी श्रीनवनीत प्रियाजीकुं पालना झुलावते हते ॥ तब जाडा कृष्णदासने

दर्शन करे कोई समय तो श्रीगुसांईजी झुलावे और श्रीनवनीतप्रीयाजी झुलें। और कोई समय श्रीगुसांईजी झुलें। और श्रीनवनीतप्रियाजी झुलावें ॥ तब जाडाकृष्णदास देखके चकित भये ॥ और मनमें संदेह भयो ॥ जो ये श्रीठाकुरजी होयंगे केये श्रीठाकुरजी होयंगे ॥ अत्यंत संदेह भयो ॥ तब श्रीगुसांईजी राजभोग घरके बहार पधारे ॥ तब जाडाकृष्णदासकुं श्रीगुसांईजीके रोमरोममें श्रीनवनीतप्रियाजीके दर्शन भये ॥ तब श्रीगुसांईजीकुं दंडवत करके और वीनती करी ॥ जो मैं बहुत दुष्टहुं आपकी परीक्षा लेवेकुं आयोहुं ॥ परंतु आपनें मेरी परीक्षा लीनी और कृपाकरके आपनें मेरो संदेह मिटायो ॥ जागुं आप मोकुं शरण लेवे ॥ तब श्रीगुसांईजीनें कृपाकरके विनकुं नामनिवेदन करायो ॥ प्रसंग ॥ १ ॥ फेर थोड़े दिवस उहां रहेके वृंदावनमें आये और रूपसनातनजीकुं मिले तब रूपसनातनजीसुं कही जो श्रीठाकुरजीकहा करेहैं ॥ तब रूपसनातनजीनें कही जो श्रीठाकुरजी भोजन करेहैं तब जाडाकृष्णदासजीनें कही जो श्रीठाकुरजीकी तो सब लीला नित्यहै ॥ एककालावच्छिन्न सब लीला करेहैं और तुमनें भोजन करेहैं ॥ ऐसी कही सो कारण कहा ॥ जब रूपसनातनजीनें कही ऐसेदर्शन तो श्रीगोकुलमे श्रीगुसांईजीके इहां होवे हैं ॥ और श्रीगुसांईजी जिनकुं करावें विनकुं होवेंहैं ॥ ये बात सुनके जाडा कृष्णदास बहुत प्रसन्न भये पाछे जाडाकृष्णदास सब ब्रजमें फिन्च्यो करते सो भगवद्गणालुवाद गायो करते ॥

सो इंद्रकोपको चरित्र बनायो ॥ और रासपंचाध्याई बनाई ॥ और माधवरुक्मिणीकेलीगाई ॥ और सुंदर री-
 तसुं भोजनके पद नये बनायके गाये ॥ और जिनजि-
 नसों विनको प्रसंग पढयो विनके अंतःकरणकी जड-
 ता मिट गई ॥ प्रसंग ॥ २ ॥ एकदिन जाडाकृष्णदास
 द्वारका जात्रा करवेकुं गये ॥ सो रस्तामें एक गाम
 आयो ॥ सो उहां देवीको देवल हतो सो देवीके दे-
 वलमें जायके सुते सवारके समय एक मनुष्य बकरा
 लके देवीपर चढायवे आयो ॥ तब जाडाकृष्णदा-
 सनें कही सब लोग बकरा चढावेहें ॥ कोई सिंघ नहीं
 चढावेहें ॥ तब वो मनुष्य बोल्यो जो सिंघ कैसे पकडे
 जाय ॥ तब जाडाकृष्णदासनें कही मैं तोकुं सिंघ पकड-
 देउंहुं ॥ तब तुम बकरी छोडद्यो ॥ तब वानें छोड दीनी ॥
 फेर जाडाकृष्णदास जंगलमें जायके सिंघ पकडलाये ॥
 वा सिंघकुं देखके सब मनुष्य भागगये ॥ और जाडा-
 कृष्णदासके पांव न पडवे ल्यो ॥ तब जाडाकृष्णदासनें
 विनकुं ऐसे कह्यो तुमारे आज पीछें जीवहिंसा नहीं क-
 रनी ॥ सो वे ऐसे पराक्रमी हते जिनकी कीर्ती आखा
 जगतमें फैली हती ॥ सो वे जाडाकृष्णदास ऐसें पराक्रमी
 हते ॥ प्रसंग ॥ ३ ॥ फेर एकदिन जाडाकृष्णदासजी चा-
 चाहरिवंशजीकुं मिले ॥ तब जाडाकृष्णदासनें पूछी जो
 या पुष्टिमार्गमें कोनसे शास्त्रके वचन प्रमाण है ॥ तब
 चाचाहरिवंशजनिं कही जो वेद और श्रीकृष्णके वाक्य
 और व्याससूत्र और श्रीमद्भागवतमें तीन भाषा है एक

लौकिक भाषा ॥ और दूसरी स्मृति भाषा ॥ और तीसरी समाधी भाषा ॥ सो वेद और श्रीकृष्णके वाक्य और व्याससूत्र और समाधीभाषा और धर्मशास्त्र ये प्रमाण है ॥ इनसुं मिलते पुराणके वाक्य और स्मृतीके वाक्यहुं प्रमाणहे इनसुं विरुद्ध है सो प्रमाण नहीं है ॥ सो श्रीमहाप्रभुजीनें निबंधमें कइयो है सो ॥ श्लोक ॥ वेदाःश्रीकृष्णवाक्यानिव्याससुत्राणिचैवहि ॥ समाधिभाषाव्यासस्यप्रमाणंतच्चतुष्टयं ॥ १ ॥ उत्तरपूर्वसंदेहवारकंपरिकीर्तितं ॥ अवरुद्धंतुयत्त्वस्यप्रमाणंतच्चनान्यथा ॥ एतद्विरुद्धंयत्सर्वनतन्मानंकथंचन ॥ फेर जाडाकृष्णदासनें पूछी जो अनेकप्रकारके देवपूजन और अनेकप्रकारके व्रत और अनेकप्रकारके शास्त्र बद्धत दिनसुं प्रमाण चले आवे हैं ॥ सो विनको विचार कइ करनो ॥ तव चाचाहरिवंशजीनें कही ये निर्णयतो श्रीमहाप्रभुजीनें निबंधशास्त्रार्थमें लिख्यो है सो ॥ श्लोक ॥ बुद्धावतारेत्वधुनाहरौतदशगाःभुराः ॥ नानामतानिविप्रेषुत्वाकुर्वतिमोहनं ॥ १ ॥ अयमेवमहामोहोहीदमेवप्रतारणं ॥ यत्कृष्णंभजेत्प्राज्ञःशास्त्राभ्यासपरःकृती ॥ तेषांकर्मवशानां हि भवएवफलिष्यति ॥ २ ॥ याको अर्थ जब श्रीठाकुरजीनें जीवनकुं मोह करवेके लियें और आपको भजन छुडायवेकेलीयें विचार कयो तव बुद्धावतार लियो ॥ तव श्रीठाकुरजीकी ऐसी विपरीत इच्छा जानके सब देवता श्रीठाकुरजीके वश रहेहैं ॥ सो ब्राह्मणनके घर आयके जन्म लिये ॥ और अनेक मत चलायवेके लियें अनेक शास्त्र

वर्णन करे ॥ और ये बातको कछु विचार न कन्यो ॥ जो ये श्रीठाकुरजी मोह करेंहैं ॥ और ठगाई करेंहैं ॥ ऐसे बुद्धिवानननें विचार न कन्यो ॥ ऐसे वचन सुनके लोगननें श्रीठाकुरजीकी सेवा छोडदीनी ॥ पंडितहतेतोहुँकर्मवशा होय गये ॥ ऐसे कर्मवशनकुं संसारही फलहोवें हैं ॥ और फल नहीं होवें हैं ॥ ये सुनके जाडाकृष्णदास वहुत प्रसन्न भये और कहेन लगे ॥ जो तुमारेविना कोईमेरो संदिह भागायवेकुं समर्थ नहींहैं ॥ और सब लोग, मनमें ऐसे जाने हैं जो श्रद्धा अनेक प्रकारकी लोगनमें होवेंहैं ॥ परंतु खरी श्रद्धा कहा होवेंहैं ॥ तब चाचाजीनें निबंधकी श्लोक कह्यो सो ॥ श्लोक ॥ ज्ञाननिष्ठातदाज्ञेयासर्वज्ञो-
हियदाभवेत् ॥ कर्मनिष्ठातदाज्ञेयायदाचित्तप्रसीदति ॥ १ ॥ भक्तिनिष्ठातदाज्ञेयायदाकृष्णः प्रसीदति ॥ निष्ठाभावेफलं तस्मान्नास्त्येवेतिविनिश्चयः ॥ २ ॥ याको अर्थ ॥ ज्ञाननिष्ठा साची कब जाननी जब जीव सर्वज्ञ होवे ॥ कर्मनिष्ठा साची कब जाननी जब अनेकप्रकारको कष्ट पडे दुःख होवे तोहुँ चित्त प्रसन्न रहे ॥ चित्तप्रसन्न न होवे तो सब करे कर्म व्यर्थ जाएं ॥ और भक्तिनिष्ठा साची कब जाननी जब श्रीठाकुरजी प्रसन्न होवें ॥ और निष्ठाविना कछु फल नहीं होवेंहैं ॥ ये सुनके जाडाकृष्णदासजी वहुत प्रसन्न भये ॥ और गोपालपुरमें गये ॥ जन्मपर्यंत श्रीनाथजीकी सेवा करतरहे ॥ वे जाडाकृष्णदास श्रीगुसांईजीके ऐसे कृपापात्र हते ॥ वार्ता संपूर्ण ॥ वैष्णव ॥ २६२ ॥

॥ इति श्रीगुसांईजीके सेवक दोसौबावन वैष्णवकी वार्ता संपूर्ण ॥

॥ श्रीकृष्णायनमः ॥
॥ अथ श्रीपुष्टिद्वारोलिख्यते ॥

जाकों पुष्टिअंगीकार होयगो सो जानेंगो ॥ जीवकों उच्चम करनों ॥ उत्तमभगवदीयकी संगती मिलनों ॥ अरु वाके करेको विश्वास राखनों ॥ जव विश्वास उपजे ॥ तव जानियें जो श्रीजीने कृपाकरी ॥ अपनो कियो उत्तम भगवदीयकी संगतीतें श्रीजी प्रसन्न होयके अंगीकार कियो ॥ अपनो आनंद देवेके लीयें तव स्वरूपनेष्टा उपजे ॥ तव जानीयि जो श्रीप्रभुजीने अपनों आनंद दियो वैष्णव तासों कहिये ॥ जाकों स्वरूप ऊपर अनन्यता उपजे ॥ तव तासों वैष्णव कहिये ॥ जीवकों विवेकविचार करनों ॥ जीवको चौरासीलाख योनी मिले तामें मनुष्यदेह उत्तम है ॥ सवगुण जानेंहैं सत्कर्म तथा बुरेकर्म करवेकों जीवको सामर्थ्य है ॥ जीवको और सामर्थ्य कोऊ नहीं है ॥ तातें जीभसों भगवद्गुण गावैं और हाथनसों सेवा करे ॥ काननसों भगवद्गुण सुनें ॥ नेत्रनसों दर्शन करे ॥ अग्यारह इंद्रिय भगवदर्थ लगावे ॥ जो सत्संग होय तो पैसे करे ॥ कदाचित लौकिककी संगती होय तो तातें तैसोही होवैं ॥ संगतिके वश मन हैं ॥ मनके वश देह है ॥ ज्यों चलावे त्योंही चले ॥ ज्यों बुलावैं त्योंही बोले ॥ हाथ पांव सब मनके दास हैं ॥ ज्यों कहें त्योंही करें ॥ परि वचन फेरें नहीं ॥ देहको राजा सो मन है ॥ राजासों ऊंच संगति होवैं तो राजबडे ॥ अरु नीच संगति होवैं तो राज्य

जाय ॥ तातें मनकों ऊंचसंगति मिलावनों ॥ वैष्णवकों पहिले तो पढनों ॥ पढिके श्रीमत् भागवत सुननों ॥ ता मार्ग चलनों ॥ श्रीवल्लभाचार्यजीनें टीका करीहै ॥ टीका करिके भाव लिख्यो है ॥ सो सुनियें तो श्रीठाकुरजी हृदयमेंते दूर न हौवै ॥ और श्रीआचार्यजीनें वेद तथा शास्त्रमथिकें दोहन करके ताको नवरत्नग्रंथ कियो है ॥ जो आपके अंगीकृत हैं ॥ तिनकुं मार्ग दिखाववेको कीनो हैं ॥ पहिलें श्रीप्रभुजीके सदासर्वदा अंगीकृत हैं ॥ तिनको जनम जनम छोडत नहींहैं ॥ आप श्रीवल्लभराय अब अवतार लेके अपने दासनकुं जुदे किये संसाररूपी समुद्रमें सब बूडत हते ॥ सो भगवत्स्वरूपरूपी नावमें बैठायके पार उतारे हैं ॥ ताको नामरूपी नावमें बैठे हैं ॥ परि जाकों पूर्व जैसी दशा हती ॥ तैसीही पावेंगे ॥ सो श्रीठाकुरजी कलियुगमें प्रकट प्रमाण हंसते खेलते बोलते चालते सो श्रीवल्लभाचार्यजीके घर दर्शन देत हैं ॥ परि पूर्व जो अंगीकृत जीवहैं सो जानत हैं ॥ और हैं सो आसुरी हैं ॥ देखेंगे परि विश्वास न आवेगो जैसे आंधरो सूर्य उगे परि देखे नहीं ॥ परि वे वैष्णव हृदयकी आंखिनसां देखें तो देखे ॥ अब विन आंखनको बल क्यों कर होइ ॥ अब सो उपाय कहतहैं ॥ जो तादृशी वैष्णवनकी संगति करे तो आंखिनको पडदो खुल जाय ॥ तब श्रीब्रजमंगल ब्रजाधिपती ब्रजके ईश्वर दृष्टि परें ॥ तब वा स्वरूपकी अनन्यता राखे ॥ जैसे हनुमानजीनें श्रीरामचंद्रजीको स्वरूप हृदयमें राख्यो ॥ शरीरमें भगवदावेशतें

समुद्र उलंघ्यो ॥ सो सीताजीकी शुध लाये ॥ वाग उ-
 खारि डान्यो ॥ अरु लंका जराय राख करी ॥ अरुपर्वत
 उठाय लाये ॥ सो सब भगवदावेशतें करे और असम-
 र्पित नखाय तो सुबुद्धि होवे ॥ प्रथम नामग्रहण करिये ॥
 उपरांत तादृशी वैष्णवसों मिलिये ॥ तो स्मरण उपजे ॥
 तब स्मरण किये उपरांत श्रीजुगलकिशोरकों लाडलडा-
 ईये ॥ उत्तम सामग्री करके समर्पिये ॥ सो महाप्रसाद
 वैष्णवनकों लिवाइये ॥ जब वैष्णव लेंही तब यों जानि-
 ये ॥ जो श्रीजी प्रेमसुं अरोगेहें ॥ श्रीजी प्रसन्न भए पाछें
 अपनों कर बुलावें ॥ जब कहें ये जीव हमारो हें तब जी-
 वकों कहा चाहिये ॥ सब मनोरथ सिद्ध भये ॥ परि यह
 जीव अन्याश्रयछोडे तब अपनों करें ॥ अन्याश्रयहौंनदे
 नहीं ॥ जैसे स्त्री अन्यपुरुषको संग करे वाके पतीको मृ-
 त्युप्राय दुःख होवे तब सामर्थ्य होवे तो पत्नीको त्याग
 करे ता पुरुषकों वा स्त्रीको सुख देख्यो भावे नहीं तैसे
 वैष्णवकों अन्याश्रय हौनों नहीं और अन्याश्रय करे तो
 विमुख जानिये ॥ तातें अन्याश्रय सर्वथा न करनों ॥
 और असमर्पित न लेनों असमर्पित और अन्यसमर्पित
 लेवे तो दुर्बुद्धि आवे ॥ श्रीजी हृदयमें न पधारे ॥ तातें
 प्रथम अपनो हृदय शुद्धकरिये ॥ तब हृदयकी आंखि-
 नसों देखिये ॥ जो मेरेमें कितनो दोष है ॥ खरी दृष्टिसों
 देखिये तो दीसे ॥ एक तो जीवमें अभिमान है ॥ सो तो
 चांडाल है यूं जानत है जो मैं करतहूं भलीही करतहूं और
 सब सुख हैं ॥ मोमें कछु विषय नहीं ॥ और सब विषयी

हैं तातें श्रीठाकुरजी उनको अंगिकार कबहुं न करें ॥ एक मनमें अभिमान आवतहे ॥ तातें सबनकी निंदा करत हैं ॥ ताकों चांडाल जाननों ॥ श्रीजीकी लीला अतिबडी अरु महा आनंदरूप है ॥ तैसो आनंदरूप हृदयमें राखनों तो महालीलाको सुख देखिये ॥ सो देखिके दोष उपजे तो महापतित होई और जो स्नेह उपजे तो श्रीठाकुरजी अपने रसात्मक स्वरूपको दर्शन देहिं ॥ अरु दास करि राखें ॥ तातें सखीभाव राखनो ॥ जैसे पुरुषकी पतिव्रता टेक राखे ॥ तासों कहा कहिये ॥ पुरुषतो एक पुरुषोत्तम है अरु तिनके ऊपर जे रसिकहैं तिनकों स्त्रीही जाननैं ॥ प्रसंग ॥ १ ॥ संपूर्ण ॥ अथ द्वितीय प्रसंग ॥ जो भगवदीय है सो श्रीजीको स्वरूप है ॥ भगवदीयके वचन सो श्रीजीके वचन जाननैं भगवदीयके हृदयमें आयके प्रभुजी बोलतहैं ॥ भगवदीयकुं ऐसो जाननो सो तो भाव ऊंडो है विचार देखिये तब जानिये ॥ ऐसे वैष्णव क्योंकरि पहिचानिये ॥ ताऊपर कहत हैं एक तो चिंता न करे ॥ दूसरे असमर्पित न खाय ॥ तीसरे विषयमें लीन न होई ॥ चौथे जो कछु होयसो भगवदिच्छा करमानें ॥ पांचमें अभिमान न करे ॥ छटें तो वैष्णवनके दासनको दास बहै रहे ॥ सातवें तो भगवद्गुण गान करें ॥ आठवें तो मनमें प्रसन्न रहें ॥ नवमें तो भगवदीय वैष्णव देखके मन प्रफुल्लित होवे ॥ दशमें तो लौकिकसंग छोडि वैष्णवनको संग करे ॥ ऐसो भगवदीय होई ॥ तापर भरभाव घणो राखिये ॥ भगवदीयके मनकी बात जाननी ॥

वाकी देखादेखी न करनी भगवदीयके मनकी बात तो श्रीजी जाने ॥ परि वैष्णवके वचनको विश्वास राखनो ॥ ऐसे भगवदीयको मन प्रसन्न करिये तो श्रीजी प्रसन्न होवें ॥ यह तो भाव ऊँडोहै ॥ तादृशी होयगो सो जानेंगो ॥ ताते तादृशीको संग करनो ॥ जो कदाचित स्वार्थ करे तो महा पतित होय ताके लीयें विवेक धैर्याश्रय ग्रंथ श्रीआचार्यजीने कियो है सो विचारनों ॥ और जीवकुं अंगीकार अदृष्ट है दीखवेंमें नहीं आवेंहै ॥ दुःखरूपहै ॥ परि श्रीआचार्यजीके मार्गमें चले तो सुखरूप होय जीव जानत है ॥ जो मैं करत हूं सो कोई जानत नहीं है ॥ परि श्रीजी मनकी वार्ता जानतहै ॥ तिनते कछु छिपी नहीं है ॥ जो जीव ऐसे जाने हे सो देखेंहै ॥ और जीव हैं सो विपईहै ॥ उनको मन रातदिन विषयमें रहत है ॥ ताको वह गुण करि मानेंहै ॥ वाकों कोउ बुरो कहे ॥ तापर क्रोध करेंहै ॥ ऐसी प्यारी वस्तुहै ॥ ताते ऐसी प्यार जो वैष्णवपर होई तो कृतार्थ होय ॥ परि जीवकों विषयरूपी जो चोर तापेंडेमें मिलतहै सो पापी आगें होतहै ॥ वा चोर उपर बहार करिये ॥ तो चोर भाग जाय ॥ अरु सुखसों ठिकाणें पोहोंचिये ॥ ताउपर फेर कोउ कहेगो जो बहार क्युंकर करिये ॥ ताउपर कहतहै ज्ञान करके मन राखिये तो मन रहे ॥ कारण सबको मनहै ॥ कोउ एक कहेगो जो नामग्रहण कियो होई ॥ फेर अनन्यताको संबंध बराबरहे के अधकी ओछो हे ॥ ताउपर कहतहै ॥ श्रीकृष्णावतारमें जो गोपिकानको सुख भयो ॥ सो तो औरनको

न देहि ॥ ताऊपर कहतहैं ॥ जो औरको नाम ग्रहण करावेंहैं ॥ सो पूर्व अपने न होएंगे ॥ ताऊपर कहतहैं ॥ पूर्वजाको जैसे संबंध हैं ॥ तैसेही ताको सुख पावतहैं ॥ जो श्रीकृष्णचंद्रने रासलीला करी ॥ तहां वृक्षन ऊपर पक्षी बैठे हते ॥ तिनने देख्यो परि मनमें सुख न पायो ॥ सवारो भयो तब उडगये ॥ तैसे श्रीकृष्णचंद्रजीके दर्शनको सुख देख्यो ॥ या दृष्टांतते येनिश्चयभयो जाको स्वरूपमें नेष्टा उपजे ताको श्रीजीने आनंदको सुख दीनो ॥ ताको दृष्टांत ॥ जब श्रीप्रभुजी हृदयमें आवें तब आनंद उपजे ॥ अरु भगवदावेश आवे ॥ फिर कीऊ कहेंगो जो श्रीकृष्णावतारमें एक स्वरूपसों दर्शन देत हते ॥ अब अनेक स्वरूपनसों दर्शन देतहैं ॥ सो कोनसे स्वरूपको भजिये ॥ ताऊपर कहतहैं ॥ श्रीवल्लभकुल सब पुरुषोत्तम स्वरूपहैं ॥ परि जा स्वरूपको स्मरण कियो होय ॥ ता स्वरूपको भजिये अरु बाकी अनन्यता राखनी ॥ जैसे हनुमानजीने मुक्ताफलको हार फोरडान्यो ॥ जो श्रीरामचंद्रजीको वार्धे नाम नहीं हतो ॥ ताते हार डारदीनो ॥ तैसे अपने श्रीप्रभुजीके गुणानुवाद गान न होत होवें ॥ तहांते उठिजैये ॥ ऐसो पतिव्रताको धर्म है ॥ तैसे वैष्णवनको पतिव्रताकी न्याईटक राखनी ॥ जैसे मीराबाईके घर कीर्त्तन होत हते ॥ तहां श्रीआचार्यजीके पद गावत हते ॥ तब मीराबाई बोली ॥ जो अब श्रीठाकुरजीके पद गावो तब रामदास वैष्णवने कही जो दारीरांड ये कोनके पद गावतहैं ॥ जा तेरोसुख न देदंगो ॥ तब सब

अपनी कुटुंब लैके और गांमगयो ॥ फेर मीरावाईको सुख न देख्यो ॥ वैष्णवकुं ऐसी टेक राखनी ॥ परि वैष्णवकुं फेर हंसको गुण लेनो ॥ सुक्ताफलविना चांच भरे नहीं ॥ तातें वैष्णवकुं अपने प्रभुविना मन धरनो नहीं ॥ जैसे नरसिंघ मेहेतानें अपनी टेक न छोडी ॥ मरण आदयो ॥ जब राजामंडलीक तरवार लैके सन्मुख ठाडो रह्यो ॥ कहि जो श्रीकृष्ण हार देंगे नहीं तो मैं तोकुं मारुंगो ॥ तोहूं नरसिंघमेहतानें अपनी टेक न छोडी मरण आदयो ॥ तव श्रीठाकुरजीनें हार दियो ॥ नरसिंघमेहेतापर कृपा करी ॥ राजामंडलीक म्लेच्छ भयो ॥ वैष्णवनें अपनी टेक पतिव्रताकीसी राखनी ॥ अपने श्रीप्रभुजीकुं हृदयमें राखें ॥ ताकुं वैष्णव कहिये ॥ दृष्टांत ज्या स्त्रीको अपनो धनी होवे सो होवे ॥ और लौकिक स्वार्थमेंहुं अपने खसमकुं छोडिके औरको भजन नहीं करे ॥ जो कोउ कछु कहे ताकुं गारी देन लगे ॥ जासों एक जन्मको संबंधहै ॥ और इहांतो अनेक जन्मके धनी है ॥ तो इन ऊपर घणो स्नेह क्यों न राखिये ॥ यह ऐसी बात है अरु वैष्णव सो कोन ॥ अरु स्मार्त सो कोन ॥ ता ऊपर कहत हैं ॥ जाको स्वरूपनेष्टा आई नहीं ॥ सो स्मार्त जाननो जब स्वरूपनेष्टा आवे तब वैष्णव होय ॥ तब वैष्णवको कहा करनो ॥ सो कहतहैं ॥ के तो जुगलकिशोर श्रीप्रभुजीको भजिये ॥ के अपने श्रीप्रभुजी दर्शन देतहैं ॥ वें सो स्वरूप अपने मनमें धरकें सेवा करनी ॥ जो निवेदनी वैष्णव समर्पें सो सर्वथा श्रीजी अरोगें ॥ फिर

कोई कहेगो ॥ जो श्रीगुसाईजी द्विजरूप प्रगट भएहैं ॥ सो
 शूद्रके हाथको कैसे अरोगत होएंगे ॥ ताउपर कहतहैं जो
 समर्पण देके द्विजरूप करतहैं ॥ ब्राह्मणको जनेउको अ-
 धिकार है ॥ जनेउ सुतकी त्रिसरी करेहैं तैसे वैष्णवके ग-
 रमें त्रिसरी माला लेके घालतहैं ॥ ऐसे करके ब्राह्मण कर-
 तहैं ॥ तब वाके हाथको आप अरोगतहैं ॥ पाछें सो प्रसाद
 लीजिये तो आत्मा शुद्ध होई ॥ अरु वैष्णवता आवे ॥
 पाछें वैष्णवको पथ्थरकी टेक राखनी ॥ अरु संसाररूपी
 समुद्रमें पाषाण प्रगट होतहैं ॥ संसाररूपी जल भय्यो
 है ॥ तामें ये पथ्थर होके रहें ॥ तो भीतर जल स्पर्श न
 करे तो भीतरकी अग्नीको बचाव होवे ॥ परि पूर्व वैष्णव
 है ॥ तातें जल भेदत नहीं हैं ॥ हृदयमें श्रीआचार्यजी
 बसतहैं ॥ श्रीआचार्यजी अग्निरूपहैं सो वैष्णव हृदयमें
 राखतहैं ॥ ताको श्रीआचार्यजीको खरो भरोसो है ॥ ऐसे
 उचम वैष्णवको संग कीजे तो सुगम पढे ॥ सो श्रीआ-
 चार्यजी अग्निरूप हैं सो अग्नि उंचो है ॥ तापर धरिये
 तो परिपक्व करे ॥ अरु नवनीत जैसे स्वभाव कोमलहै ॥
 श्रीआचार्यजी अग्निरूपहैं ॥ तातें उनको आसरो होई
 तो माखन मिटके घी होई आपनो रूप फिर तैसे लौकिक
 मिटके वैष्णव होई ॥ जैसे एक विगरी वस्तु सबको स्वाद
 बिगारे ॥ तैसे लौकिक है तामें स्वाद कछु नहीं ॥ फिर
 वैष्णवको तक्रको गुण लेनो ॥ जैसे मथिये तैसे नवनीत
 देई ॥ अरु आपमें जल मिले ताको मिटायके तक्र करे ॥
 अरु आप जल न होई ॥ तैसे लौकिक छोडे ताको वैष्णव

करें ॥ तैसे तादृशीकों मिले तो दोऊनके मन एक होंवें
 और प्रवाहि मिले तो एक मन न होंवें काहू कारण एक
 होंवें तो मन एक करे नहीं ॥ ताको दृष्टांत ॥ जैसे कुंद-
 नमें कुंदन मिल जाय ॥ और बाको बद्धत रीण देई तो
 मिल जाय ॥ और ताप आकरो दीजिये तो जुदो होय
 जाय ॥ सो फिर मिले नहीं ॥ तैसे मनको अग्रिको स्व-
 भाव है ॥ तातें मनकों भगवत्स्वरूपके विषें लगावे ॥
 भगवत्स्वरूप कैसो है ॥ महा आनंदरूप है ॥ द्वापरयुगमें
 श्रीवसुदेवदेवकीजीके उदरमें तें प्रकट भयेहैं ॥ तव ब्रज-
 भक्तनकुं प्राकट्य प्रमाण लीला दिखाई ॥ बद्धत चरित्र
 दिखाए ॥ पाछें कलियुगमें श्रीवल्लभाचार्यजीके घर प्रकट
 होयके अक्काजीके उदरतें बद्धत स्वरूपनकरिके दर्शन देत
 हैं ॥ जैसे कृष्णावतारमें ब्रजभक्तनकुं सुख दीनो ॥ तातें
 अधकी सुख देतहैं ॥ दोनो अवतारनको सुख देत हैं ॥
 पहिलें श्रीकृष्णावतारमें मन होंवें तो श्रीनाथजीकुं देखि-
 ये ॥ ये स्वरूप सो साक्षात् श्रीकृष्णजी है ॥ और श्रीवि-
 ष्लेश तो प्रकट प्रमाण है ॥ बोलत चालत हंसत खेलत
 दर्शन देतहैं ॥ और पूर्व विमुख असुर हैं ॥ तिनकुं विश्वा-
 स नहीं आवत हैं ॥ वैष्णवकी काहूकुं चटक लागे तो
 वैष्णव होवे ॥ जैसे कीटकों भ्रमरीके काटेको ध्यान रह-
 तहैं ॥ सो कीटपणो मिटके भ्रमरी होंवें ॥ तैसे तादृशी
 वैष्णव भगवद्दार्ता करे ते एकचित्तसुं बाको ध्यान करे तो
 वैष्णव होय ॥ फिरि वैष्णवकों वैष्णवपनेकी टेक राखनी ॥
 पपैयाकी तन्हें जैसे धनबूंदतो तो लेई परिभूमिको पच्यो

नलेई ॥ और सर्प समुद्रमें रहतहे ॥ परि स्वातीबूंद लेई ॥ परि समुद्रके जलको पान न करे ऐसी टेक राखी चाहिये ॥ जीवकी आस श्रीजी पूरे हैं ॥ तैसेही जगदीश उपर टेक राखें तो जगदीश कहा न पूरे ॥ परि मनुष्यकेविषे दोष अन्याश्रयको हैं ॥ जो करेहें सो प्रतिष्ठाके लीयें करतहें ॥ वैष्णवको धन लेके लौकिक राखेहें ॥ प्रतिष्ठाके काजें करत हैं ॥ परि मन स्थिर नहीं राखे हैं ॥ वैष्णवको धन है सो श्रीजीको है ॥ सो श्रीजीकोही जाननो ॥ मन स्थिर देखेंतो श्रीजी याको मनोरथ पूरणकरें ॥ मन तो स्थिर रहे जो तादृशी वैष्णवको संग करे ॥ जो वह अपने उपर रीसकरें तो शिक्षा करके मानें ॥ जो मेरे अलेकुं कहतहें ॥ ताकी वैष्णवता दृढ होई ॥ ताको दृष्टांत जानियें ॥ जैसे दूध है सो तो वैष्णव है अरु जम्मावन है सो तादृशी वैष्णव है ॥ सो दोऊ इकठोरें होवें ॥ तो भीतर तें नवनीत उपजो ॥ नहीं तो दूध बिगडे ॥ अरु रीसरूपी रईके घमरके उलटे सुलटे सहे तो नवनीत जुदो होई ॥ तब नवनीत अग्निसौं तावे तो घी होई बिगरे नहीं ॥ संगति बिना दूध बिगरे तैसे भगवद्दार्ता बिना वैष्णवता बढे नहीं ॥ परि पूर्वजाको जैसे संबंध होवे तैसेही होवे ॥ तैसेही संगति मिलेहें एक तो यों कहतहें ॥ जो नरसिंह मेहतानें विहार गायो ॥ अरु परमानंदजीनें बाललीला गाई ॥ ताको कारण कहा ॥ ता उपर कहत हैं ॥ जो श्रीकृष्णजीनें विहारलीला खेल कियो ॥ श्रीवृंदावनमें ब्रजभक्तनसों मिलके जब उनकों बहुत विरह भयो ॥ तब श्रीकृष्णजीनें कही

उद्धवजी तुम श्रीगोकुल जाइ ॥ पाछें उद्धवजी श्रीगोकु-
ल आए ॥ नंदजूके घर जायके उतरे ॥ तब गोपीजननें
नंदजूके घर रथ देख्यो ॥ तब वे देखवेकों आई ॥ तब
उद्धवजीकुं एकांत बुलायके पृछयो ॥ जो हमकुं श्रीकृष्ण-
जी कबहुं संभारतहें ॥ तब उद्धवजीनें कह्यो जो मोकों
तो तुमारे पास पठायो है ॥ पाछें गोपीजननें श्रीठाकुर-
जीके संग जे जे खेल किये हते ॥ ते ते उद्धवजीकुं सब
कहे ॥ कछु छुप्त न राख्यो ॥ तब उद्धवजीनें सब विहा-
रको प्रकार जान्यो सो हृदयमें राख्यो ॥ सो उद्धवजीनें
विदुरके आगें सब बात कही ॥ सो विदुर नरसिंहमेहेता
होयके अवतार लियो ॥ नरसिंहमेहेतानें महादेवकी उ-
पासना करी ॥ पाछें महादेवजी प्रसन्न भए ॥ तब कहे
जो यागो ॥ तब नरसिंहमेहेतानें कही तुमकों जो प्यारी
वस्तु होई सो मोकुं देइ ॥ तब महादेवजी नरसिंहमेहे-
ताकों श्रीतृंदावन लेगए ॥ सब रमणलीला दिखाई ॥ सो
नरसिंहमेहेतानें जैसी लीला देखी तैसी गाई ॥ और श्री-
दामा ग्वालको अवतार परमानंद स्वामी भए ॥ तिननें
वाललीलागाई ॥ तातें जैसेकुं मिलिये तैसेही दिखावे
जैसे देखिये तैसीही बुद्धि आवे ॥ तातें यत्न करनो ॥
तब यत्नकरतमें कोई दुर्बुद्धि उपजे तो चरणामृत लेइतो
दुर्बुद्धि न आवे ॥ चरणामृतकी महिमा काहूसों लिखि न
जाय ॥ श्रीशुकदेवजीनें राजा परीक्षितसों कहीहे ॥ जा
पात्रमें चरणामृत धन्यो होई सो पात्र सातवेर जलसों
धोवे ॥ सातही वेरको जल गंगोदक समानहै ॥ ताके

लीयें चरणाशृतकी महिमाको पार नहीं ॥ फेर कौऊ कहे ज्यो क्यों करि राखिये ॥ ता ऊपर कहतहैं ॥ ब्रजसूमीकी सृत्तिका अरु श्रीयमुनाजीको जल अरु अपने श्रीठाकुरजी श्रीप्रसूजीको चरणाशृत ॥ ये तीनों एकत्र करि राखिये ॥ देश परदेशनमें लीजिये ॥ तातें अधिक महिमा जानियें ॥ एक तो श्रीयमुनाजीको जल ॥ दूसरें चरणाशृत ॥ तीसरो श्रीब्रजसूमिको दर्शन कीजिये ॥ तातें सर्वथा चरणाशृत लीयेंविना जल न लीजिये ॥ जैसे श्रीआचार्यजीके सेवक त्रिपुरदास कायथ नें चरणाशृत प्रसाद विना जल न लीनो ॥ पाछें श्रीठाकुरजीनें जानी याकी देह गिरेगी ॥ परि यह जल न लेंगो ॥ तब श्रीठाकुरजी बरस दशके बालकको रूप धरकें थेली दीय एक तो चरणाशृतकी ॥ एक महाप्रसादकी देगए ॥ रसोईयासों कही जो ये थेली त्रिपुरदासनें दीनी है ॥ पाछें रसोईयानें रसोई करी भोग सरायके त्रिपुरदासको बुलायवे पठायो ॥ तब त्रिपुरदासनें कही जो मैं चरणाशृत विना प्रसाद न लेंउंगो ॥ तब रसोईयानें कही जो थेली दीय ॥ बरस दशको लरिका देगयो है ॥ वे कहेन लग्यो ॥ जो ये थेली त्रिपुरदासनें पठाई है ॥ पाछें त्रिपुरदासनें चरणाशृत प्रसाद लियो ॥ परि अपने मनमें बहुत खेद पाए ॥ मैं बहुत बुरि करी जो मैंनें हठकियो ॥ जो श्रीठाकुरजीको बहुत श्रम भयो ॥ तातें अब चरणाशृत घटे तो बढाल लीजिये ॥ तातें चरणाशृत प्रसादको माहात्म्य त्रिपुरदासनें जान्यो ॥ और वैष्णव तो वैष्णव-

को भाव लीजिये ॥ ताको दृष्टांत ॥ जैसे गंगाजीमें और जल मिले ॥ तो गंगोदक समान होवे ॥ तैसे वैष्णवके मिलापतें वैष्णव होय ॥ जुदो रहे तो वैष्णव नहीं ॥ तामे वैष्णव कारणरूपहे ॥ सो श्रीकृष्णजीको चरणासृत माथें चढावत हे ॥ जानियो अक्षरको भेद हे ॥ श्रीकृष्णजीसो पुष्टिनाम हैं ॥ जो श्रीकृष्ण है सो दाय अक्षरको नामहें ॥ श्रीकृष्ण नाम तहां माथे चढावत हैं ॥ इतने वैष्णव भये ॥ पाछें श्रीवल्लभाचार्यजीनें अपने मनकी एक अक्षर आगें कीनो तव वैष्णव भयो ॥ तातें वैष्णव ऐसो नाम हे ॥ सो भगवन्नाम हे ॥ खरी दृष्टसों जो देखेंगो सो समझेगो ॥ वैष्णवनने वैष्णवको द्रोह न करनो ॥ वैष्णवहै सो भगवत्स्वरूपहै ॥ जो श्रीठाकुरजीको अपराध कियो होई तो कदाचित छुटिये ॥ परि वैष्णवके अपराध तें क्योई न छुटिये ॥ वैष्णवसो लोहको गोलाहै ॥ जैसे अग्निके बलतें गोला तप्त होय ॥ सो अग्निहूतें तातो होई ॥ कदाचित अग्नि हाथमें लियोजाय ॥ परी वह गोला हाथमें न लियो जाय ॥ तैसे वैष्णवको अपराध न छूटे ॥ फेर जो प्यारी वस्तु होई ताकी हानी होई ॥ और श्रीठाकुरजी हृदयमें न आवे ॥ जो स्त्री प्यारी होई तो स्त्रीकी हानी होई ॥ जो लक्ष्मी प्यारी होई तो लक्ष्मीकी हानि होई ॥ जो पुत्र प्यारो होय तो पुत्रकी हानि होय ॥ ताको दृष्टांत जैसे दुर्योधनने पांडवपर द्रोह कीनो ॥ तातें कौरवकुल नाश भयो ॥ धन गयो ॥ राज्य गयो ॥ तातें वैष्णवको द्रोह न करनो ॥ वैष्णवको द्रोह करे ताको सर्वस्व नाश होय

जाय ॥ तातें वैष्णवकों वैष्णवसों स्नेह राखनी यों जानिये ॥ जो हमसों जुदे मति होवे ॥ ताको दृष्टांत जैसे मोहनदास और हरिदास वे श्री आचार्यजीके सेवक हते ॥ तातें उनमें जैसी प्रीति हती तैसीही राखनी ॥ एकसमय-हरिदासके घर मोहनदास पाइने आये ॥ सो दिन एक तथा दौय रहे ॥ पाछें मोहनदास कहन लगे ॥ जो सवारें में चलुंगो ॥ तब हरिदासनें मोहनदाससों कही जो प्यारेजी अबहीतों रहो ऐसे करिके फेर दिन तीनताई राखे ॥ तब हरिदासनें अपनी स्त्रीसों कइयो ॥ जो मोहनदास तो सवारे जाएंगे ॥ तब वा स्त्रीनें कही जो दिन एक तथा दौय औरहुं राखिये तो भलों हैं ॥ तब हरिदासनें अपनी स्त्रीसों कही जो कछु उपाय करिये तो रहे तो रहे ॥ तब हरिदासनें कही जो अपने वरस सातको यह बेटा है ॥ ताको विष दीजिये ॥ अरु यह भरे तब हमारो शोक देखिके दिन एक रहें तो रहें ॥ तब स्त्रीनें कही जो भलें ॥ ऐसेही दिन एक रहेतो राखिये ॥ तब हरिदासनें वा बालककों विष दीनो ॥ तब वह बालक मरगयो ॥ तब मोहनदासनें जानी ॥ जो रातिको तो नीको हतो अरु अबही मरगयो सो कहा जानिये ॥ न जानिये ॥ जो कहुं सांपनें खायो होयगो ॥ तब दीपक लेके देह देखी परि सांपकी डाढतो कहुं देखी नहीं ॥ तब मोहनदासनें जानी जो भरे राखिवेके लीये इननें बालककुं विष दीनोंहिं ॥ तब मोहनदासनें तो वा बालकके मुखमें श्रीजीको चरणामृत दीनो ॥ तब वह उठि बैठी ॥ तब हरिदास बहुत रोवन

लाग्यो ॥ मेरे घरतें वैष्णव जायगो ॥ तव मोहनदास कहन लागे ॥ जो मैं तुझारे पास निरंतर रहूंगो ॥ पाछें अपनी गांव छोडिके हरिदास पास आय रहे ॥ तातें वैष्णवपर ऐसो प्यार राखनो ॥ फेर वैष्णवको भेख लेके एक ठग आयो ॥ तव वह ठग दोऊ हाथ जोडिके जय श्रीकृष्ण कह्यो ॥ तव वा वैष्णवनें बहुतही वाकी आगत-स्वागत करी ॥ तव वैष्णवनें कही जो तुमनें हम ऊपर बहुतही कृपाकरी ॥ जो दर्शन दीनें ॥ अब तुम कोईक-दिन इहां रहो तो गोष्ठी वार्त्ता करिये ॥ तव उन ठगनें कही जो भलें ॥ तुझारी इच्छा होयगी तो महिनादोयचार रहेंगे ॥ पाछें वा वैष्णवके घर ठग रह्यो सो कितनेक दिन रहतें रहतें भये ॥ तव एकदिन वा वैष्णवके लरिकानें गहनो बहुत पेहेच्यो हतो ॥ तव वा ठग वा वैष्णवकी स्त्रीसों बोल्यो ॥ तव वहु रसोई करत हती ॥ वासों कही जो मैं तुझारे लरिकाकों वागमें खिलाय लाऊं ॥ तव वा स्त्रीनें कही जो भलें ॥ तव ठगनें लरिकाकों वागमें लेजायके फासी दीनी ॥ तव गहनो लेके भाग्यो ॥ तव इन वैष्णवनें जान्यो ॥ तव इननें कही जो ये हमकों मिले तो धन बहुत देवें ॥ मति याको हमारो डर लाग्यो होई ॥ यह हमारे घरतें भूल्यो क्यों गयो ॥ तामें हमकों बुरी लाग-तहे तव वह वैष्णव वा ठगकों खोजन चल्यो ॥ सो थो-रीसी दूर जायके पहुँचो ॥ तव ठगसों कही ॥ जो तुम हमारे घरतें भूखे गए सो क्यों ॥ हमारो अपराध कहा है हमारे अपराधकी और देखो मति ॥ तातें आवोप्रसाद

लीजिये तब ठग मनमें डरप्यो ॥ जो अपने घर लेजाय-
के मोकों मारेगो ॥ तब वाकों वैष्णव अपने घर लग्यो ॥
तातो पानी करिके वाकुं न्हायो ॥ तब स्त्रीने वैष्णवसों
कही जो वा लरिकाकुं डुलाय लावो ॥ तब वा वैष्णवने
कही जो लरिकाको तो निद्रा आईहै ॥ तब वा वैष्णवकुं
प्रसाद लिवायो ॥ तब वा वैष्णवने ठगसों कही जो तुम
लरिकाको पुकारो तब वा ठगने लरिकाको पुकाय्यो ॥
तब वह लरिका आलस्य मोरिके उठि ठाढ़ो भयो ॥ तब
वह लरिका कहन लाग्यो ॥ जो मोकों तो निद्रा आई
हती ॥ तब ठग उठिके वा वैष्णवके पावन पय्यो ॥ तब
कहन लाग्यो जो मैंने तो तुहारि बालकको फांसी दीनी
हती ॥ मारिके गहनो उतार लीनो हतो ॥ परि तुमने
बडो धीरज राख्यो तो श्रीठाकुरजीने तुहारो लरिका
जिवाय दीनो ॥ ताते अब मोकों वैष्णव करो ॥ तब उन
वैष्णवने वाकों भलो वैष्णव कियो ॥ ताते उत्तम भगव-
दीयको वचन माननो ॥ ताको दृष्टांत कहतहैं ॥ एक
राजा हतो सो वह मरन लाग्यो ॥ तब अपने बेटाकुं वा
राजाने राज दियो अरु बेटासों कही जो अपने घर एक
वैष्णव आवेहे ॥ सो वाको तुम वचन मानियो ॥ तब
बेटाने कही जो भलें मांनुगो ॥ तब राजातो मर गयो
बेटा राज करन लाग्यो ॥ तब एकदिन राजा सांटी छी-
लत हतो ॥ सो छुरिसों वाकी अंगुरिया कटि गई ॥ तब
वा राजाने वा वैष्णवसों कही जो मेरी अंगुरिया कटि
गई ॥ तब वा वैष्णवने कही जो भली भई ॥ तब कित-

नेक दिनपीछे वाकी राणी मरि गई ॥ तव वा वैष्णवसों
 कही जो मेरी राणी मरि गई ॥ तवहुं वानें कही जो भली
 भई ॥ तव वा राजाके मनमें बहुत क्रोध भयो ॥ जो ये
 तो मेरो बुरो वांछित हैं ॥ तव राजा कहन लाग्यो जो
 याकों ठौर मारी ॥ तव चांडाल बुलाए ॥ तव कहे जो
 वह वैष्णव पाछली राति पानी भरनको जातहे ॥ सो तूं
 याको मारि डारियो ॥ तव दूसरे दिन चांडाल तरवार
 लेके वाटवांघि करि बैठे ॥ तव वैष्णव जलभरन निक-
 स्यो ॥ इतनेहि मनमें आई ॥ जो आज दूसरे कृवातें जल
 लाऊं तो श्रीठाकुरजी प्रेमसों अरोगे ॥ तव वह दूसरी वाट
 चलयो ॥ तव वाके पांव ऊपर एक डेल टूटपडयो ॥ तातें
 वाको पांव टूटयो ॥ सो खाटमें डारिके घर लेआए ॥
 तव राजानें समाचार वैष्णवकुं पूछे ॥ जो वैष्णव तुह्यारो
 पांव टूटयो ॥ सो बुरी भयी ॥ तव वैष्णवनें कही जो
 बहुत भली भई ॥ श्रीठाकुरजी बुरी करेंहुं नहीं तव राजा
 अपने मनमें सोच्यो ॥ तव कहन लाग्यो ॥ जो मैं तु-
 ह्यारे मारनके लीयें चांडाल राखे हते ॥ और तुम और-
 कृवापें ग्रये ॥ तातें तुह्यारे पांव टूटयो ॥ पांवतो फेरहुं
 नीको होयगो ॥ परि मरिजाते तो फेर न जोवते ॥ पाछें
 राजा वा वैष्णवके पांवन परके अपने घर गयो ॥ यह
 राजा वत्तीस लक्षणो हतो ॥ और एक राजा उनतें बडो
 हतो ॥ तातें एक तलाव खुदायो हतो ॥ परि वा भीतर
 जल रहे नहीं ॥ तव पंडित बुलायके पूछे ॥ जो या तला-
 वमें पानी क्यों नहीं रहत है ॥ तव उन पंडितननें कही

जो या भीतर बत्तीस लक्षणी राजाको वध करे तो पानी रहे ॥ तलाव तब भरे इतनेही एक ब्राह्मण बोल्यो ॥ जो वह राजा बत्तीस लक्षणोंहै ॥ तब वा राजानें कही जो वाकुं बुलावों ॥ सो कटक वा बत्तील लक्षणोंके गांव पर चढ़ि गयो ॥ तब वा बत्तीस लक्षणोंने वा वैष्णवसों पूछी ॥ जो अब कहा करनो ॥ तब वा वैष्णवनें कही जो जैसे बैठेहो तैसेही उठ जावो ॥ तब वह तैसी उठी गयो ॥ सो बडे राजाके पास जायके वाकी सभामें ठाढो भयो ॥ तब वा बडे राजानें पंडितनसों कही जो तुम कहत हते सो आयोहै ॥ तब पंडितननें वाको शरीर देख्यो ॥ तब पंडितननें कही जो याकी तो अंगुरिया खंडित है ॥ तब वा बत्तीस लक्षणोंसों पूछी जो तेरे बैहारलरिका कहाहै ॥ तब इननें कही जो बैहार लडका हते सो सब मरगये ॥ तब पंडितननें वा बडे राजासों कही जो यहतो अपुत्रिक है ॥ और याके स्त्री नहीं ॥ याकी अंगुरिया खंडितहै ॥ तातें याको वध किये तें तलाव भरेगो नहीं ॥ तब बडे राजाने वाकों बिदा दीनी ॥ तब वह बत्तीस लक्षणो बोल्यो जो मोहूँकों वह तलाव दिखाओ ॥ सो जब इननें तलावकी ओर देख्यो ॥ तबहीं तलाव भरगयो ॥ तब वा बडे राजानें वाकों अपनी बेटी देके व्याह करदियो ॥ वाकुं जवाई कियो ॥ तब वाकों बहुत धन देके बिदा कियो ॥ तब वह बत्तीस लक्षणो गाजत बजावत अपने घर आयो ॥ सो आयके प्रथम वा वैष्णवके पावन पच्यो ॥ तब वा वैष्णवसों कही जो श्रीठाकुरजी करत होएंगे सो भलोई

करत होएंगे ॥ अंगुरिया कटीसो भलो भयो ॥ और बै-
ह्यर मरिसो भलो भयो ॥ नहीं तो मेरो तलावमें बघ
करते ॥ तातें अब वा राजानें अपनी बेटी व्याहीहे सो
बहु तेरे पुत्र होएंगे ॥ तातें वैष्णवके वचन श्रीठाकुरजीके
वचनकरि जाननें ॥ उत्तम वैष्णव होई तो मानिये तह कह-
तहें ॥ जो उत्तम और कपटी कैसे जानिये ॥ जाको वैष्णव
प्यारो न होई तासों न मिलियें ॥ उत्तम भगवदीयमें स्नेह
होय तासों मिलिये ॥ तातें बडो कोई नहीं ॥ ताको दृष्टांत
कहत हें ॥ सवनते बडी धरतीजामें सब समायो है ॥ तातें
बडो समुद्र जो सगरी धरतीसों लपटानोहे ॥ तातें बडे अ-
गस्त्यसुनी जिननें समुद्र एकअंजुलीमें पियो हे ॥ तातें बडो
ब्रह्मांड जामें अगस्त्यको तारो उदेहूँ दीसे नहींहे ॥ ता ब्रह्मां-
डतें श्रीप्रभुजी बडे ॥ जिन सगरो ब्रह्मांड एक पांव कियो ॥
तिनतें बडे वैष्णव जिननें ऐसें जगदीश अपने हृदयमें
राखे ॥ तातें वैष्णवतें बडो कोई नहीं ॥ तातें वैष्णवनके
दासनको दास होय रहिये ॥ परि वैष्णवकी बरावरी न
करिये ॥ जो बरावरी करे तो नीच होवें ॥ श्रीमद्भागव-
तमें षष्ठ स्कंधमें लिख्योहे ॥ तामें चित्रकेत राजा चक्र-
वर्ती हतो तिननें विचार्यो ॥ जो महादेवजी वैष्णवहें
तिनके दर्शनकुं कैलास जाऊं ॥ सो तब कैलास गयो ॥
सो तहां श्रीमहादेवजीके उत्संगमें पार्वतीजी बैठे हते ॥
और महादेवजीतो ध्यानमें मग्न हते ॥ सो देखिके राजा
चित्रकेतकों रीस चढी ॥ तब पार्वतीनें शाप दीनो ॥ जातुं
राजा राक्षस होहु ॥ तब श्रीमहादेवजी सावधान भए

प्रायलागे ॥ तब पार्वतीसों कहेके स्वीजे ॥ कहेजो पहिले
 तो मेरोही अपराध हतो ॥ तैं शापक्यों दीनों ॥ तब फेर
 जायके चित्रकेत वृत्रासुरको अवतार भयो ॥ सो मरती-
 बेर श्रीभगवान प्रसन्न भए ॥ तब कहेजो मांग ॥ सो
 श्लोक ॥ कहेके मांगे ॥ वासुदेवस्ययेभक्ताःशांतास्तद्गत
 मानसाः ॥ तेषांदासस्यदासोहंभवेजन्मनिजन्मनि ॥१॥
 जो भगवदीयके घर दास होई ॥ ताके दासनको दास
 होई ॥ ताके घर जन्मजन्मदासपनो पाऊं ॥ भगवदीयपनो
 हतो तो महादेवजीकी बरोवरी करी ॥ दासपनो विचा-
 न्यो नहीं ॥ तो राक्षस भयो ॥ तातें दासपनों मागतहूं ॥
 दासकों रीस न घटे पहिले जीव श्रीपुरुषोत्तमकुं भजे
 तब जीव सर्वथा मुक्त होई ॥ श्रीपुरुषोत्तमकी आज्ञा
 श्रीमहादेवजीनें शंकराचार्यजीको अवतार धन्यो ॥ ति-
 ननें जीवको आसुरभाव भांतिभांतिके मार्ग दिखाये ॥
 नवीन मत करिके जीवकों हरितें विमुक्त कीनें ॥ वाम-
 मार्गीय असुर सारिले भए ॥ जीवकों कलिखुगकी संगती
 करी ॥ अष्ट करे वे पतित भये ॥ अरु पतितपावन श्रीपु-
 रुषोत्तमहैं ॥ तातें अपनें जीवनके उद्धार निमित्त प्रगट
 भएहैं श्रीवल्लभाचार्यजीनें आपने जीवकों करुणादृष्टि
 देखके सब जीवनकों अपने करे ॥ श्रीविठ्ठलनाथजी रूप
 श्रीगुसांईजी प्रगटे ॥ महारसात्मक जो मार्ग जाको नाम
 पुष्टिमार्ग ॥ श्रीप्रभुजीनें महावाक्य कह्यो हे ॥ जीवकों
 वरण करेहैं ॥ ते वाणी निश्चय कियो ॥ जीवके कानमें
 कहतहैं ॥ महावाक्य जाके लीये ॥ जीवको पुरुष भागहे ॥

तहां कृपाकरके श्रीपुरुषोत्तम अंगिकार करतहैं ॥ और निवेदनमें तुलसी हाथमें लेके अपने जीवके हाथपर मेलतहैं ॥ देके फिर पाछीलतहैं ॥ जो नवरत्नके तथा एकादशके श्लोक श्रीठाकुरजी अपने मुखसों कहत हैं ॥ तैसोई नवरत्नमें कहाहे ॥ श्लोक ॥ चिंताकापिनकार्या निवेदितात्मभिः कदापीति ॥ भगवानपिपुष्टिस्थोनकरिष्यतिलौकिकिचर्गाति ॥ १ ॥ ऐसे कहिके जाने निवेदन लीनो ताकुं चिंता न करनी ॥ चिंतासो सकल दोष की माताहै ॥ जहां जाकी माता होई ॥ तहां सकल दोष होई ॥ और तुलसी देके फिर पाछें लेतहैं ॥ तुलसीसों वरणकरतहैं सो वृंदाको स्वरूपहै ॥ वृंदासो महापतिव्रताहै ॥ सो कैसेहै जो पुरुषभावरूप होई ताको मुख न देखे ॥ या वृंदाको अंगिकार श्रीपुरुषोत्तममें सब अंगनसु कीनाहै ॥ ऐसे भावसों तुम रहियो ॥ अरु अन्य पुरुषको संग मत करियो ॥ पति जो धनी ताको व्रत आचरण करे सो पतिव्रतासो कहा ॥ सो पुरुषोत्तमसंबंधी सकल सुख पावेंगे ॥ तुलसीदलको यह भावहै ॥ जब जीव नाम पावे ॥ तब वैष्णव होई ॥ वैष्णवसो कहा ॥ जो विष्णुकीसेवा जोग्य भयो होई सो वैष्णवसो कहावे ॥ ऐसे वैष्णव सुख देहैं ॥ श्रीनारायण सो श्रीपुरुषोत्तमके नीचे रहतहैं ॥ ताके भजनयोग्य भयो ॥ ताको नाम वैष्णव ॥ फेर वा वैष्णवको भाव हृदयमें भक्ति आवे श्रवण कीर्तन नामिकमलमें प्यारो लागे ॥ तब जानिये जो वैष्णवता आई ॥ फेर उत्तम वैष्णवको मिलाप रहे ॥ दीनतापूर्वक दासवहैरहे ॥ तब जानिये जो वैष्णवता आई ॥ नारायण भजन योग्य

भयो ताको नाम दास अब नारायणकोनसे ॥ जलनारायण १ सत्यनारायण २ धर्मनारायण ३ नरनारायण ४ लक्ष्मीनारायण ५ आदिनारायण ६ ये श्रीपुरुषोत्तमके पायतरें रहेंहैं ॥ ताके भजन योग्य भयो ॥ ताको नाम दास दाससो कहा ॥ दाससो कहा दूर ठाढो रहे ॥ घणो सुखपावे ॥ तव दास सो सर्वदा श्रीठाकुरजीको कामकरे कीर्तन करे ॥ सदा प्रसन्न रहे ॥ और कछु मुहाए नहीं ॥ तव दासत्व आवे ॥ तव सेवक भयो ॥ सेवकसो कहा जो घनीकेपास रहे ॥ अंगसु सेवा करे ॥ सेवाचोर न होई ॥ जो करे सो श्रीठाकुरजीसो पूछके करे ॥ ताको नाम सेवक ॥ अब सो सेवक ॥ श्रीठाकुरजीके गुणानुवाद विचारिकें गावें ॥ हरख पावें ॥ रोभांचित होई ॥ अरु नयनतें आँसु आवें ॥ साधु होई ॥ साधुसो सुधो ॥ जाके कपटको नाम नहीं ॥ मनमें तनकहूँ कपट नहीं ॥ तासो साधु कहिये ॥ ऐसो होई तव सेवक भाव आवे ॥ तव भगवदीय होई ॥ भगवदीय सो कहा ॥ भगवदीयसो श्रीजीको कृपापात्र होवे ॥ भगवदीय सो भगवत्स्वरूपहै ॥ अब फेर पात्रको गुण लेनो ॥ तहां दृष्टांत ॥ जैसे सोनेको पात्र है अरु विष भयो ॥ सो उत्तम पात्र जानिके लीजिये तो विनाश होई ॥ अरु माटीको पात्र होई ॥ अरु उत्तम सामग्री होई ॥ सो लीजिये तो परम सुख होय ॥ तातें भीतरको गुण देखके संग करणो ॥ ॥ इति श्रीपुष्टिद्वय ग्रंथ संपूर्ण ॥

पुस्तक मिलनेका ठिकाण—

वैष्णव रामदासजी गुरु श्रीगोकुलदासजी

(रणहर पुस्तकशाळा) डाकोर.

दोसोवावन वैष्णवनकी वार्ता और चौरासी वैष्णव-
नकी वार्ता यह दोनों ग्रंथनको प्रथमसे आश्रय
देनेवाले आश्रयदाताओंकी नामावली

- १०० श्रीमान रोठजी खेमराज श्रीकृष्णदास श्रीविकटेश्वर सिद्धप्रेस ...मुंबई.
 १०० श्रीमान रोठजी गंगाविष्णु श्रीकृष्णदास लक्ष्मीविकटेश्वरप्रेस कल्याण.
 १०० श्रीपंडित ज्येठाराम मुकुंदजी संस्कृत पुस्तकालय कालकादेवी मुंबई.
 १०० श्रीयुत पंडित दत्तराम चौबे मानिकचौक पुस्तकालयमथुरा.
 १०० श्रीयुत पंडित श्रीधरशिखलालजी ज्ञानसागर छापखानामुंबई.
 १० श्रीयुत पंडित नारायण मूलजी संस्कृत पुस्तकालय झवेरवाग ...मुंबई.
 ५ श्रीमान बाबु रंगनाथजी खेमराजजी श्रीविकटेश्वर प्रेस.....मुंबई.
 ५ रा. रा. जनार्दन महादेव गुर्जर बुकसेलर कालकादेवीरोड रामवाडीमुंबई.
 ५ रा. रा. नारायण चितामण आठवले बुकसेलर छीमडीचौक बडोदा.
 ५ श्रीमहंतजी गोपालदासजी गुरुश्री भगवानदासजी
 जोलेश्वर श्रीरणछोरजीके मंदिरके मालकमुंबई.
 ५ श्रीमहंतजी रघुवीरदासजी गुरुश्रीजयरामदासजी तपोवन मु० नाशिक.
 ५ श्रीमहंतजी किसनदासजी गुरुश्री खेमदासजी नागदेवी...मुंबई.
 ५ विद्यातृपण कंपनी भारत मॉर्निंग पुस्तकालय कालकादेवीरोड...मुंबई.
 ५ रोठ माधवदास गोकुलदास पास्ता कोट बजारगेट..... मुंबई.
 ५ रोठ गोकुलदास भेणसी कोट बजारगेटमुंबई.
 ५ रोठ धीरजी वालजी कोट मोदीखानामुंबई.
 ५ श्रीमतीबाई नाथीबाईते रोठ दामोदर ठाकरसीनी धर्मपत्नी महालक्ष्मीमुंबई.
 ५ स्वर्गवासी प्रत्तराम जीवनराम वेदधर्म सजाना स्थापकमुंबई.
 ५ बुकसेलर झवेरभाई उभेदाई पटेल रीचीरोड.....अमदावाद.
 ५ पंडित श्रीकृष्ण मोहनं शर्मा कातराीक पुस्तकालय मुंबई.
 २ ठाकर वसनजी परमानंद बाह्यशाला बुकसेलर कालकादेवीरोड ...मुंबई.
 १ स्वामी विश्वस्वरुपाचार्य गुरुश्रीपरमानंदजीचंद्रिनारायणका मंदिर
 दरियावरअमदावाद.

- १ महंतजी मथुरादासजी आत्मारामदासजी विश्वामीचीना गोटापुलपर
स्वस्थान श्रीरामजी मंदिर बडोदा.
- १ सा. चुनीलाल बापुजी रामजी मंदिरनीसेरीमां खेडा.
- १ परी. यंगलदास गोरधनदास. बजारमां खेडा.
- १ महाराज श्रीहंसदासजी गोपालदासजी लेनसर सामे भावनगर.
- १ महंत श्रीगोकलदासजी कुहानदासजीराधोरामजीनु मंदिर ... भावनगर.
- १ देसाई गोरधन पीतांबर सावली भेवास.
- १ पुरंदरे आणि कंभनी मुक्तसेलर माधवबाग मुंबई.
- १ वैष्णव हीरालाल गोकलदास भंवसोरवाला भंवसोर.
- १ चोकसी चुनीलाल कनभूषणदास स्वाराकुवा मुंबई.
- १ लक्ष्मीबाई लक्ष्मीनारायणनु मंदिर. वचलो जोईवाडो मुंबई.
- १ ठाकर अमनादास भीमजी मल्हाराव लेन मं० मुंबई.
- १ श्रीवातरोठजी हीरानंदजी अमृतसरवाले पंजाब अमृतसर.
- १ ठाकर धीठलदास हरीदास जिला सातारा बडगांमबाघमारा.
- १ वै० महुलाल आत्माराम गुलेश्वर श्रीजो जोईवाडो मुंबई.
- १ वै० मोहनलाल कुलभदास गुलेश्वर श्रीजो जोईवाडो मुंबई.
- १ देवीदास इन्द्रावनदास ५१ गोरधन ठिकाना महालक्ष्मी मुंबई.
- १ श्रीपरमहंसजी माधवदासजी खास चौक श्रीसत्यनारायणका मंदिर
पोट सिणोर. मालसर.
- १ पोष्टमास्तर हरिलाल भाई नडीघादना हाल मु० पोट हाफीस ... डाकोर.
- १ वैद्यराज मुरारजी भाई नवुंजी कोट होळीचकला मुंबई.
- १ श्रीमहंतराघोदासजी गुरुजी बजरंगदासजी श्रीरामजीमंदिर कुरला.



